

বাহ্য বস্তুর সাহিত্য মানব প্রকৃতির

সম্বন্ধ বিচার

প্রথম ভাগ



শ্রী অক্ষয়কুমার দত্ত কর্তৃক

প্রণীত

১৯৭৩

কলিকাতা

ভজরবোধিনী মুদ্রাঘরে মুদ্রিত

শকাব্দ ১৭৭৩

১২৫





৮৮৮

বিজ্ঞাপন

ছুঃখ নিবৃত্তি হইয়া সুখ বৃদ্ধি হয় ইহা সকলেরই বাঞ্ছা, কিন্তু কি উপায়ে এই মনো-বাঞ্ছা পূর্ণ হইতে পারে তাহা সম্যক্ রূপে অবগত না থাকিতে, অনুযা অশেষ প্র-কার ছুঃখ ভোগ করিয়া আসিতেছেন। অতি পূর্ক্কাবধি নানা দেশীয় নীতি-প্রদর্শক ও ধর্ম্ম-প্রযোজক পণ্ডিতেরা এবিষয়ে বিস্তর উপদেশ প্রদান করিয়াছেন, কিন্তু কেহই ক্লেশ-কার্য্য হইতে পারেন নাই। অস্যাপি ভুষ্-গুল রোগ, শোক, জরা, দারিদ্র্য প্রভৃতি নানা প্রকার ছুঃখে আকীর্ণ হইয়া রহিয়াছে। অত-এব, এবিষয়ের যাহা কিছু জ্ঞাত হইতে পারা যায়, তাহা একান্ত যত্ন পূর্ক্ক প্রচার করা সর্ব্বতোভাবে কর্তব্য।

খ্রীযুক্ত জর্জ কুয় সাহেব-প্রণীত “কান্স্টিটিউশন্ অব ম্যান্” নামক গ্রন্থে এবিষয় সুন্দররূপে লিখিত হইয়াছে। তিনি নিঃসংশয়ে নিকপণ করিয়াছেন, যে পরমেশ্বরের নিয়ম প্রতিপালন করিলে মুখের উৎপত্তি হয়, এবং লজ্জন করিলেই দুঃখ ঘটয়া থাকে। জগদীশ্বর কি প্রকার নিয়ম-প্রণালী সংস্থাপন করিয়া বিশ্ব-রাজ্য পালন করিতেছেন, এবং কোন্ নিয়মানুসারে চলিলে নিকপ উপকার হয়, ও কোন্ নিয়ম অতিক্রম করিলে কিপ্রকার প্রতিফল প্রাপ্ত হওয়া যায়, ঐ গ্রন্থে তাহা স্পষ্টরূপে প্রদর্শিত হইয়াছে। ঐ গ্রন্থের অভিপ্রায় সমুদায় স্বদেশীয় লোকের গোচর করা উচিত ও অত্যাবশ্যক বোধ হওয়াতে, বাঙ্গলা ভাষায় তাহার সার সঙ্কলন পূর্বক ‘বাহ্য বস্তুর সহিত মানব প্রকৃতির সম্বন্ধ বিচার’ নামক এক এক প্রস্তাব তত্ত্ববোধিনী পত্রিকাতে প্রকাশিত হইয়া আসিতেছে। ঐ সমস্ত প্রস্তাব পাঠ করিয়া অনেকেই অনুরাগ প্রকাশ করিয়াছেন, এবং স্বতন্ত্র পুস্তকে একটি করিতে পরামর্শ দিয়াছেন। তদনুসারে, পুনর্বার মুদ্রিত ও প্রচারিত হইতেছে। ইহা ইং-

রেজি পুস্তকের অবিকল অনুবাদ নহে। যে সকল উদাহরণ ইউরোপীয় লোকের পক্ষে সুসঙ্গত ও উপকারজনক, কিন্তু এদেশীয় লোকের পক্ষে সেক্ষেপ নহে, তাহা পরিত্যাগ করিয়া তৎ পরিবর্তে যে সকল উদাহরণ এদেশীয় লোকের পক্ষে সঙ্গত ও হিতজনক হইতে পারে, তাহাই লিখিত হইয়াছে। এদেশের পরম্পরাগত কুপ্রথা সমুদায় মধ্যে মধ্যে উদাহরণ স্বরূপে উপস্থিত করিয়া তাহার দোষ প্রদর্শন করা গিয়াছে। কলতঃ, এতদেশীয় লোকে সবিশেষ মনোযোগ পূর্বক পাঠ করিয়া তদনুযায়ি ব্যবহার করিতে প্রবৃত্ত হন, এই অভিপ্রায়ে আমি এই মানব প্রকৃতি বিষয়ক পুস্তক খানি প্রস্তুত করিয়া প্রকাশ করিতেছি। তাঁহারা অনুগ্রহ প্রকাশ পূর্বক এই মনস্কামনা সিদ্ধ করিলে চরিতার্থ হইব।

তাঁহারদের নিকট কৃতজ্ঞতা জ্ঞাপিত হইয়া বিনীতভাবে নিবেদন করিতেছি, যদি ইহাতে কোন স্বমত-বিপরীত ও দেশাচার-বিরুদ্ধ অভিপ্রায় দৃষ্টি করেন, তবে একেবারে অশ্রদ্ধা না করিয়া বিচার করিয়া দেখিবেন।

জগদীশ্বর যেমন অন্ধকার নিরাকরণার্থ জ্যোতিঃপদার্থ সৃজন করিয়াছেন, সেইরূপ, মনুষ্যের ভ্রম বিমোচনার্থ বুদ্ধিবৃত্তি প্রদান করিয়াছেন। অতএব, বুদ্ধি পরিচালন পূর্কক কর্তব্যাকর্তব্য নিৰূপণ না করিয়া বহু দোষাকর দেশাচারের দাস হইয়া চলা বুদ্ধিমান জীবের কর্তব্য নহে। নানা দেশে নানা প্রকার পরস্পর বিরুদ্ধ ব্যবহার প্রচলিত আছে, তৎ সমুদায় সুব্যবহার বলিয়া স্বীকার করিলে ধর্মাধর্মের আর কিছু মাত্র প্রভেদ থাকে না। এক দেশে এই প্রকার প্রথা আছে, যে ব্যক্তি নরহত্যা করিয়া যত নর-কপাল সংগ্রহ করিতে পারে, তাহার তত সত্ত্বম হয়। অন্য এক দেশে এইরূপ রীতি আছে, যে বিদেশীয় লোকের অর্থ হরণ ও প্রাণ নাশ করিলে গৌরব বৃদ্ধি হয়। কত কত সভ্য জাতির মধ্যে এই প্রকার ব্যবহার আছে, যে যদি কেহ কাহারও অপমান করে, তবে অপমানিত ব্যক্তির ইচ্ছানুসারে, উভয়ে পরস্পর গুলি করিয়া পরস্পরের প্রাণ সংহার করিতে প্রবৃত্ত হয়। অপমানকারী ব্যক্তি তাহাতে স্বীকৃত না হইলে মান-ভ্রষ্ট

ও লজ্জাম্পদ হয় । কত দেশের লোকে
নর-মাংস ভক্ষণ করিয়া উদর পূর্ণ করে । কোন
দেশে এইরূপ রীতি প্রচলিত আছে, যে পিতা,
মাতা বা পরিবারস্থ অন্য কোন ব্যক্তি অ-
ত্যন্ত পীড়িত বা জরাগ্রস্ত হইলে, তাহাকে
নষ্ট করিয়া তাহার মাংসে কুটুম্বাদি ভোজন
করায় । তত্তদ্দেশীয় লোকেরা ঐ সমুদায়
দেশাচারকে সদাচার জ্ঞান করে বলিয়া বাস্ত-
বিক সদাচার বলা যায় না । এক ধর্মাক্রান্ত
লোকের মধ্যেও আচার ব্যবহারের বিস্তর
বিভিন্নতা দেখা যায় । হিন্দুস্থানিরা পাক-করা
তণ্ডুলাদিকে অশুদ্ধ ও অস্পৃশ্য জ্ঞান করে না,
এবং তাহা গাত্রে ও বস্ত্রে স্পর্ষ্য হইলে গাত্র
ও বস্ত্র ধোতও করে না । উড়িস্যা অঞ্চলে
একপ্রকার বিধবা-বিবাহ প্রচলিত আছে ।
মহারাত্রীয় লোকে স্ত্রী পুরুষে পঙ্ক্তি ভোজনে
বসিয়া একত্র আহার করে । কিন্তু বাঙ্গলা
দেশীয় লোকের আচার ব্যবহার ইহার স-
ম্পূর্ণ বিপরীত । বাঙ্গলা দেশীয় লোক ও
হিন্দুস্থানি প্রভৃতি অন্যান্য দেশীয় লোক উভ-
য়েরই পরস্পর-বিরুদ্ধ ব্যবহার কোন ক্রমেই
হিন্দুশাস্ত্র-সম্মত হইতে পারে না । অতএব,

দেশাচার মাত্রই যে বিহিত, একথা নিতান্ত
 যুক্তি-বিরুদ্ধ। যে রীতি বস্তু পরমেশ্বরের
 নিয়মানুযায়ী, তাহাই যথার্থ বিহিত। বিশ্ব-
 নিয়ন্তা বিশ্ব-রাজ্য পালনার্থে নানা প্রকার
 শুভদায়ক নিয়ম সংস্থাপন করিয়াছেন, এবং
 তন্নিকপণার্থে আমারদিগকে বুদ্ধিবৃত্তি প্রদান
 করিয়াছেন। পরম্পরাগত দোষাকর দেশা-
 চারের অনুরোধে পরমেশ্বর-প্রদত্ত বুদ্ধিবৃত্তি
 পরিচালনে ও তৎ-প্রতিপন্ন তত্ত্ব সমুদায়ের
 অনুষ্ঠানে অবহেলা করিলে অপরাধী হই-
 তে হয়। অতএব, ব্যগ্রতা প্রকাশ পূর্বক
 নিবেদন করিতেছি, যদি কেহ এই গ্রন্থ মধ্যে
 কোন স্বমত-বিরুদ্ধ অভিপ্রায় দৃষ্টি করেন, তবে
 তাহাতে একেবারে অশ্রদ্ধা না করিয়া বিচার
 করিয়া দেখিবেন। মহামহোপাধ্যায় পণ্ডি-
 তদিগেরও কোন না কোন বিষয়ে ভ্রান্তি থা-
 কিতে পারে; অতএব, আপনাকে অপ্রাস্ত জ্ঞান
 ও আপন মতকে ভ্রম-শূন্য বিবেচনা করিয়া
 তদ্বিরুদ্ধ সমুদায় অভিপ্রায় অবিশ্বাস করা
 কাহারও কর্তব্য নহে। যে সমস্ত যথার্থ তত্ত্ব
 সন্নিবিষ্ট দ্বারা প্রতিপন্ন হয়, তাহাই স্বীকার
 করা ও তদনুযায়ী অনুষ্ঠান করা কর্তব্য। এই

মানব প্রকৃতি বিষয়ক পুস্তকে যে সমুদায় অভিপ্রায় প্রকাশিত হইয়াছে, তাহা প্রত্যক্ষ-মূলক ও যুক্তি-নিষ্পন্ন। বিশেষতঃ, তাহা যথার্থ কি না, অনায়াসে পরীক্ষা করিয়া দেখা যাইতে পারে। বিশ্ব-নিয়ন্তার একটি নিয়মও বিফল হইবার নহে, তাহা প্রতিপালন করিলেই তৎক্ষণাৎ সুখ রূপ সম্পত্তি প্রাপ্ত হওয়া যায়।

এতদ্দেশীয় লোকে সংস্কৃত বচন শুনি-লেই তাহাতে শ্রদ্ধা ও বিশ্বাস করেন, এবং তদ্বিরুদ্ধ বাক্য প্রত্যক্ষ সিদ্ধ-হইলেও অবিশ্বাস করিয়া থাকেন। আমারদিগের এই বিষম কুসংস্কার মহানর্থের মূল হইয়াছে। তাহা পরিত্যাগ না করিলে কোনক্রমেই আমারদের মঙ্গল নাই। পূর্বে যেমন ভারতবর্ষীয় পণ্ডিতেরা স্বস্ব বুদ্ধি পরিচালন পূর্ব্বক জ্যোতিষাদি কয়েকটা বিদ্যার সৃষ্টি করিয়া সংস্কৃত ভাষায় লিপি-বদ্ধ করিয়াছিলেন, সেইরূপ, যবনাদি অন্যান্য জাতীয় পণ্ডিতেরাও স্বস্ব ভাষায় বিবিধ বিদ্যা প্রকাশ করিয়াছিলেন। কিন্তু, এক্ষণকার ইউরোপীয় পণ্ডিতেরা আপনাদিগের অসাধারণ বুদ্ধি-বলে

ঐ সকল বিদ্যার যেকপ উন্নতি করিয়াছেন, তাহার সহিত তুলনা করিয়া দেখিলে, সংস্কৃত জ্যোতিষাদিকে অতি সামান্য বোধ হয় । এইরূপ, এক্ষণে যে সকল অভিনব তত্ত্ব নিকপিত ও যে সমুদায় অদ্ভুত ব্যাপার সম্পন্ন হইয়াছে এবং হইতেছে, তাহা ভারতবর্ষীয় প্রাচীন পণ্ডিতদিগের স্বপ্নেরও অগোচর ছিল । তৎ সমুদায় সংস্কৃত গ্রন্থে লিখিত নাই বলিয়া কদাপি অগ্রাহ হইতে পারে না । অতএব, সংস্কৃত শাস্ত্রোক্ত প্রমাণ ভিন্ন অন্য কোন প্রমাণ গ্রাহ্য নহে, এবং সংস্কৃত শাস্ত্রকারেরা যে বিষয় যত দূর নিকপণ করিয়াছেন, তাহার অধিক আর জানা যায় না, এই মহানর্থকর কুসংস্কার নিতান্ত ভ্রান্তি-মূলক এবং অত্যন্ত হেয় ও অশ্রদ্ধেয় । এক্ষণে, এতদেশীয় জনসাধারণের প্রতি সবিনয় নিবেদন, এই বিষম কুসংস্কার পরিত্যাগ পূর্বক এই গ্রন্থোক্ত অভিপ্রায় সমুদায় সম্পূর্ণ যুক্তিসিদ্ধ ও শুভদায়ক কি না বিবেচনা করিয়া দেখিবেন ।

অবশেষ, সন্মত চিত্তে অঙ্গীকার করিতেছি, শ্রীযুক্ত ঈশ্বরচন্দ্র বিদ্যাসাগর ও দেবেন্দ্রনাথ ঠাকুর মহাশয়েরা বহু পরিশ্রম স্বী-

কার পূর্বক এই গ্রন্থ সংশোধন বিষয়ে বিশিষ্ট-
 ষ্টকপ আনুকূল্য করিয়াছেন। তাঁহারা এবং
 তাহঁরা অন্যান্য সদ্ধিদ্যাশালি বিচক্ষণ ব্যক্তি
 গ্রাহ্য করিয়াছেন বলিয়াই, আমি ইহা প্রকাশ
 করিতে সাহসী হইয়াছি।

শ্রীঅক্ষয়কুমার দত্ত।

কলিকাতা।

শকাব্দ ১৭৭৩। ৮ পৌষ।

সূচীপত্র

পৃষ্ঠাঙ্ক

উপক্রমণিকা	১
প্রাকৃতিক নিয়ম	৩১
মনুষ্যের প্রকৃতি নির্ণয় ও বাহ্য বস্তুর সহিত	
তাহার সম্বন্ধ নিরূপণ	৫৪
ভৌতিক প্রকৃতি	৫৪
শারীরিক প্রকৃতি	৫৬
মানসিক প্রকৃতি	৬৮
মনুষ্যের সুখোৎপত্তির বিষয়	১১৩
প্রাকৃতিক নিয়মানুযায়ী ব্যবহার-প্রণালী	১২৮
প্রাকৃতিক নিয়ম লঙ্ঘন করিলে মনুষ্যের কি	
প্রকার দুঃখ হয়, তাহার বিচার	১৪৬
ভৌতিক নিয়ম লঙ্ঘনের ফল	১৪৭
শারীরিক নিয়ম লঙ্ঘনের ফল	১৫২
শারীরিক সুস্থতা ও বলাধান	১৬১
দীর্ঘায়ু প্রাপ্তি	১৬২
প্রসব বেদনা	১৬৫
বিবাহ	১৬৯
অন্ন গ্রহণ, জ্যোতিঃ ও বায়ু সেবন প্রভৃতি	১৭১
শারীরিক শক্তি ও মানসিক বৃত্তি চালনা	১৭৩
শারীরিক নিয়ম লঙ্ঘন করিলে যে অনিষ্ট হয়, তাহার	
উদাহরণ	১৮১
অবৈধ বিবাহের ফল	১৮২

পিতা মাতার গুণাগুণ যে } সম্মানে বর্ধে তাহার বিবরণ } ১২৫
অল্প-বয়স্ক, বৃদ্ধ, উৎকট রোগ-গ্রস্ত ও বিকলাঙ্গ ব্যক্তি- দিগের বিবাহ করা বিহিত নহে	২০৯
নিকট-সম্পর্কীয় কন্যাকে বিবাহ করা উচিত নয় ...	২১১
ভিন্নজাতীয় কন্যা বিবাহ করা অবিহিত নহে ..	২১২
ভৃত্য মিত্রাদি যত লোকের সহিত সংস্রব রাখিতে হয়, সকলেরই দোষাদোষ বিবেচনা করা আবশ্যিক .:	২১৭
মৃত্যুর বিষয়	২১৯
আমিষ ভক্ষণ	২৪৩

উপক্রমণিকা

এই প্রত্যক্ষ পরিদৃশ্যমান জগৎ নিরীক্ষণ করিয়া বিবেচনা করিলে ইহা স্পষ্ট প্রতীত হয়, যে যাবৎ জাতীয় প্রাণী ও যাবৎ জাতীয় জড় বস্তুর এক এক প্রকার নির্দিষ্ট প্রকৃতি আছে, ও অপরাপর বস্তুর সহিত তাহার বিশেষ বিশেষ সম্বন্ধও নিকপিত আছে। তত্ত্বজিজ্ঞাসু ব্যক্তি এই সমস্ত পরস্পর সম্বন্ধের বিষয় আলোচনা করিয়া অচিন্ত্য, অদ্বিতীয়, অনাদি, পরম কারণ পরমেশ্বরের সত্তা স্পষ্টরূপে উপলব্ধি করেন। তিনি বিশ্বকর্তার জ্ঞান, শক্তি ও মঙ্গলাভিপ্রায় এই বিশ্বের সর্ব অংশে দেদীপ্যমান দেখিতে পান। জগদীশ্বর বিবিধ বস্তুর সৃষ্টি করিয়া তাহারদের

যে পরম্পর সম্বন্ধ নিকপিত করিয়া দিয়াছেন, অর্থাৎ জগৎ প্রতিপালনার্থে যাবৎ নিয়ম সংস্থাপন করিয়াছেন, তৎ সমুদায়ই সংসারের শুভাভিপ্রায়ে সঙ্কল্পিত। সেই সমস্ত সুকৌশল-সম্পন্ন সুচারু নিয়ম অবগত হইলে পরাৎপর সর্ব-নিয়ন্তার প্রতি প্রগাঢ় প্রীতির উদয় হয়, এবং তদনুযায়ি কার্য্য করিতে যত সমর্থ হওয়া যায়, ততই সুখ স্বচ্ছন্দতার আতিশয়া হয়।

আমারদিগের দুঃখ-নিবৃত্তি ও সুখোৎপত্তির উপায় বিবেচনা করিতে হইলে আমারদিগের ক্লিপ প্রকৃতি, ও বাহ্য বস্তু সমুদায়ের সহিতই বা তাহার ক্লিপ সম্বন্ধ তাহা অবগত হওয়া আবশ্যিক। মনুষ্য এই ভুলোকে সর্ব-জীব-শ্রেষ্ঠ। যে সকল গুণে তিনি এই পৃথিবীর রাজা হইয়াছেন, তাহা ভূমণ্ডলে আর কোন জন্তুরই নাই, এবং অন্য কোন জন্তুতে তাদৃশ পরম্পর-বিরুদ্ধ গুণও দৃষ্টি করা যায় না। এক বিষয়ে তাঁহাকে পিশাচ তুল্য বোধ হয়, আর বিষয়ে তাঁহাকে দেব তুল্য বলিলেও বলা যায়। যখন তাঁহার রণ-স্থল-বর্জিত সংহার-মুক্তি ও নানা প্রকার পাপাচরণ

মনে করা যায়, তখন তাঁহাকে অমুরাবতার বলিয়া জ্ঞান হইতে পারে। কিন্তু তাঁহার অদ্ভুত বিদ্যা, দয়াদ্র চিন্ততা, স্বদেশের হিতোৎসাহ, ব্রহ্ম-স্বরূপ চিন্তন এই সমস্ত গুণ আলোচনা করিলে বোধ হয়, তিনি কোন পরম সুখাম্পদ স্বর্গলোক হইতে অবতরণ করিয়া পৃথিবীর হিতার্থ জন্ম গ্রহণ করিয়াছেন। আর কোন জন্তুতেই একপ পরম্পর-বিরুদ্ধ গুণ সমূহের একত্র সমাবেশ উপলব্ধ হয় না।

ছাগ ও মেঘের যাদৃশ দুর্বল প্রকৃতি এবং নিরূপদ্রব স্নিগ্ধ স্বভাব, ঈশ্বর বাহ্য বিষয়ের সহিত তাহারদিগের তদুপযোগি সম্বন্ধ করিয়া দিয়াছেন। তাহারা মনুষ্যের আশ্রয়ে থাকিয়া ফল পত্রাদি আহার করিয়া পরিতৃপ্ত হয়, এবং মনুষ্যের ঘরে প্রতিপালিত হইয়া নির্বিঘ্নে কাল যাপন করে। ব্যাঘ্র অতি দুর্দান্ত হিংস্র জন্তু, তদনুসারে বহু-পশু-সমাকীর্ণ মহারণ্য তাহার আবাস-স্থান, এবং তথায় তাহার হিংস্র স্বভাব প্রকাশের স্থল ও সীমা সুচারু রূপে নিকষিত আছে। নিরূপদ্রব ছাগ মেঘ প্রভৃতি তৃণ পত্র আহার করিয়া যেকপ তৃপ্তি-সুখাস্বাদন করে, জীবদ্রোহী

ব্যাঘ্র আপনার নৃশংস শক্তি প্রচার করিয়া
 সেই রূপই তৃপ্তি-সুখ প্রাপ্ত হয় । অপ-
 রাপর জন্তুর প্রকৃতিও এই প্রকার, অর্থাৎ
 তাহারদিগের শারীরিক ভাব, মানসিক বৃত্তি
 ও তাবৎ বাহ্য বস্তু বিবয়ক সম্বন্ধ সমুদায় পর-
 স্পর উপযোগি হইয়া তাহারদিগের প্রকৃতি
 এক এক সুশৃঙ্খল ও সুকৌশল-সম্পন্ন পরম
 সুন্দর যন্ত্র স্বরূপ হইয়াছে । এবম্প্রকার,
 তাহারদিগের সমুদায় গুণের পরস্পর ঐক্য ও
 বাহ্য বিষয়ে তাহার সম্যক উপযোগিতাই
 সুখোৎপত্তির কারণ । যদি এক দিবস প্র-
 ত্যক্ষ করিতাম, কোন ব্যাঘ্র সম্মুখোপস্থিত
 প্রত্যেক জন্তুর শরীর আক্রমণ করিয়া বিদৌর্ণ
 করিতেছে, এবং পর দিবস দেখিতাম, সেই
 ব্যাঘ্র পূর্ব দিবসের ঐ সকল নিষ্ঠুর ব্যবহার
 আলোচনা করিয়া পশ্চাত্তাপে পারতপ্ত হই-
 তেছে, বা কারুণ্য-রসাভিষিক্ত হইয়া সেই পূর্ব-
 বিদারিত পশুদিগের ক্ষুত বিক্ষত গাত্রে ঔষধ
 প্রলেপন করিতেছে ; অথবা কেবল নগরে বা
 প্রান্তরে অবস্থিতি করিতে তাহার একান্ত অনু-
 রাগ জন্মিয়াছে, তবে তাহার প্রকৃতি কেমন
 বিরুদ্ধ-ধর্ম্মাক্রান্ত বোধ হইত ! এবং অনা-

যাসেই এপ্রকার অনুভব হইত, যে তাহার মানসিক বৃত্তি সকলের যেকোন পরস্পর অনৈক্য, বিপর্যয় ও বাহ্য বিষয়ে অনুপযোগিতা, তাহাতে সে কখনই সুখভাগী হইতে পারে না। অতএব ইহা সপ্রমাণ হইল, যে সমস্ত মানসিক বৃত্তির পরস্পর সামঞ্জস্য ও বাহ্য বিষয়ে তাহার উপযোগিতা এই উভয়ই জীবের জীবন যাত্রার ও সুখোৎপত্তির মূলীভূত কারণ।

কিন্তু মনুষ্যের স্বভাব আলোচনা করিয়া দেখিলে তাঁহার অন্তঃকরণ পরস্পর বিপরীত গুণেরই আশ্রয় বোধ হয়। তাঁহার কুপ্রবৃত্তি সকল প্রবল হইলে তিনি মোহাতিশয় বশতঃ কাম, ক্রোধ, মদ, মাৎসর্যাদির বশীভূত হইয়া অতি কুৎসিত ইতর জন্তুর স্বরূপ প্রাপ্ত হয়েন। আর বুদ্ধি-বৃত্তি ও ধর্মপ্রবৃত্তি সকল সম্যক্ স্ফুরিত হইলে তাঁহার অন্তঃকরণ বিদ্যার নির্মল জ্যোতিতে উজ্জ্বল হইয়া এবং সত্য, সারল্য, দয়া ও প্রীতি দ্বারা শান্তি-রস-ভিষিক্ত হইয়া পরম রমণীয় হয়। তখন তাঁহার মুখশ্রীতে কি মহত্ত্ব—কি দেবত্ব প্রকাশ পায়! মনুষ্যের অবস্থার পরস্পর-বিরুদ্ধ প্রবৃত্তি

সমুদায়ের কি প্রকারে সামঞ্জস্য হইতে পারে? এবং তৎ সম্বন্ধীয় বাহ্য বস্তু সকলই বা কৌদৃশ্য হইলে তাহার প্রত্যেক প্রবৃত্তির উপযোগি হইতে পারে? এ প্রশ্নের সিদ্ধান্ত করা এক মাত্র সৰ্ব্বদ্র পরমেশ্বরকেই সম্ভব পায়। কিছুই তাঁহার অসাধ্য নাই। তাঁহার যে সঙ্কল্প সেই কার্য্য! তিনি মনুষ্যের এই সমস্ত পরম্পর-বিরুদ্ধ প্রবৃত্তির সামঞ্জস্য করিয়া তাঁহাকে মর্ত্যলোকের অধিপতি করিয়াছেন। এই গ্রন্থের উত্তরোত্তর অংশ পাঠে বোধ হইবে, যে এক্ষণে মানব প্রকৃতি ও বাহ্য বস্তুর সহিত তাহার সম্বন্ধ যৎকিঞ্চিৎ যাহা জ্ঞাত হওয়া গিয়াছে, তাহাতেও ইহা সুস্পষ্ট প্রকাশ পাইতেছে, যে পরমেশ্বর তাঁহাকে ইহ কালেও বিপুল সুখ-ভোগি করিবার নিমিত্ত জগতে তত্প্রয়োগি নিয়ম সকল সৃষ্টি করিয়াছেন। সেই সমুদায় সুচারু নিয়ম সম্যক্ প্রতিপালিত হইলে ঐহিক দুঃখের সম্যক্ নিরাকরণ হইতে পারে। নিরবচ্ছিন্ন সুখ হউক, দুঃখ মাত্র না হউক, ইহা সকলে রই বাসনা, কিন্তু তদ্বিষয়ক কার্য্য-কারণ-ভাবের তথ্য জ্ঞান প্রাপ্ত না হইলে, অর্থাৎ

আমারদিগের কি প্রকার স্বভাব, অন্য অন্য বস্তুর সহিত তাহার কি প্রকার সম্বন্ধ, ও সেই সম্বন্ধ অনুযায়ী কার্য্যানুষ্ঠানের কি প্রকার উপায় কর্তব্য এ সমস্ত জ্ঞাত না হইলে সে মনোবাঞ্ছা কদাপি পূর্ণ হইতে পারে না। কোন দেশীয় লোকের দুর্ভাগ্য ও অনুনতির কারণ জিজ্ঞাসা করিলে কেহ পূর্বদৃষ্ট, কেহ বা কাল-ধর্ম তাহার কারণ বালিয়া নিশ্চয় করিবেন, কেহ বা প্রসঙ্গ ক্রমে তাহারদিগের আলস্য-স্বভাবাদি লৌকিক কারণও উল্লেখ করিতে পারেন। বৈদ্যকে রোগ-ক্ষয়ের উপায় জিজ্ঞাসিলে, তিনি এই যথার্থ উপদেশ দিবেন, যে সমুচিত চিকিৎসা করা কর্তব্য। দৈবজ্ঞকে জিজ্ঞাসিলে, তিনি গ্রহ শান্তির পরামর্শ দিবেন। ব্রাহ্মণ পণ্ডিতকে কোন উপায় করিতে কহিলে, তিনি তৎক্ষণাৎ পূর্ব দুরদৃষ্ট ক্ষয়ের নিমিত্ত স্বস্তায়ন বিশেষের বিধি দিবেন। আর কোন কোন সর্বসমীমাংসক বিজ্ঞ অধ্যাপক পূর্বোক্ত সমস্ত ক্রিয়ানুষ্ঠানের অনুমতি প্রদান করিবেন। কিন্তু বাস্তবিক ইহার মধ্যে কোন উপায় দ্বারা রোগির রোগ শান্তি হয়, তাহা জানিবার জন্য সকলেরই অভিলାষ

হইতে পারে। এইরূপ আর আর সাংসারিক দুঃখ হইতে পরিত্রাণ পাইবার যথার্থ পথ কি তাহা জানিতেও সকলের কৌতূহল হইতে পারে। অতএব এ বিষয় সর্ব সাধারণের হৃদয়ঙ্গম করিয়া দিবার নিমিত্ত পুনঃ পুনঃ লিখিতে হইতেছে, যে মনুষ্যের প্রকৃতি ও বাহ্য বস্তুর সহিত তাহার সম্বন্ধের জ্ঞানই এপ্রয়োজন সাধনের এক মাত্র উপায়; সুতরাং তদ্বিষয়ে যত্ন করিয়া আমারদিগের কর্তব্যাকর্তব্যের জ্ঞানোপার্জন করা অত্যাবশ্যক।

বোধ হইতেছে, অবনী মণ্ডল যে একেবারেই সম্পূর্ণ মুখোঃপাদক হইবেক, পরমেশ্বর তাহার একপ স্বভাব করিয়া দেন নাই। যাহাতে পৃথিবীর তাবৎ বিষয়ের উত্তরোত্তর উন্নতি হয়, তাহার সমুদায় নিয়মেই তদনুরূপ কৌশল দৃষ্ট হইতেছে। ভূমণ্ডল ক্রমে ক্রমে রচিত হইয়াছে, ও ক্রমে ক্রমেই উৎকৃষ্টতর হইয়া পরিশেষে মানববর্গের বাসোপযোগী হইয়াছে। ভূতত্ত্ববেত্তাদিগের মতে আদৌ অবনী মণ্ডল অত্যুষ্ণ-দ্রবীভূত-পদার্থময় ছিল, পরে ক্রমে ক্রমে শ্লিষ্ট ও কঠিন হইয়া দ্বীপোপদ্বীপাদি উৎপন্ন হইয়াছে, এবং ক্রমে ক্রমে

বিবিধ প্রকার উদ্ভিজ্জ ও প্রাণি জাতির সৃষ্টি হইয়াছে। পৃথিবী কালে কালে পরিবর্তিত ও স্তরে স্তরে রচিত হইয়াছে, এবং তদনুক্রমে পূর্ব পূর্ব প্রাণি জাতি ধ্বংস হইয়া নব নব জাতি সৃষ্টি হইয়াছে। পৃথিবী খনন করিয়া এক কালের ভূমি-স্তরে যে সমস্ত প্রাণি জাতির মৃত শরীরের প্রস্তরীভূত অস্থি দৃষ্ট হয়, দ্বিতীয় কালের ভূমি-স্তরে তন্মধ্যে অনেক জাতির কোন চিহ্ন প্রাপ্ত হওয়া যায় না, এবং তদপেক্ষা আধুনিক ভূমি-স্তরে দ্বিতীয় কালের বহু প্রকার জন্তুর কোন নিদর্শন প্রত্যক্ষ হয় না, কিন্তু প্রতিকালের ভূমি-স্তরে নূতন নূতন প্রাণি জাতির চিহ্ন আছে, এবং ইহা যুক্তিসিদ্ধ বটে, যে উত্তরোত্তর মহৎ মহৎ জন্তুরই উৎপত্তি হইয়াছে *। কিন্তু এতিন কালে মেদিনী মনুষ্যের বাস-যোগ্য হয় নাই, তাঁহার সুখসন্তোগের সংজ্ঞা তখনও প্রস্তুত হয় নাই। তিনি সর্বশেষে এখানকার নিবাসী হইয়াছেন।

* উত্তরোত্তর মহৎ মহৎ জন্তুর উৎপত্তির প্রমাণ বিষয়ে প্রসিদ্ধ ভূতত্ত্ববেত্তা লায়ল সাহেব সংশয় প্রকাশ করিয়াছেন। কিন্তু তৎপরে কেহ কেহ পূর্বোক্ত মতের পোষকতা করিয়াছেন।

পূৰ্বেোক্ত বিবরণ দ্বারা নিশ্চয় হইতেছে, যে পৃথিবীতে মনুষ্যের পূৰ্বে অপরাপর বিবিধ প্রকার জীবের বসতি ছিল, এবং সুস্পষ্ট বহু-তর প্রামাণিক নিদর্শন দ্বারা ইহাও নির্দ্ধারিত হইয়াছে, যে এক্ষণকার ন্যায় তখনও তাহারদিগের উপর জন্ম মৃত্যুর অধিকার ছিল;—তখনও এই ভূলোক মর্ত্যালোক ছিল। সৃজন-কর্ত্তা মরণ-ধৰ্ম্ম-শীল মনুষ্যের সৃজন কালে অবনীর নিয়ম-শৃঙ্খলার পরিবর্তন করিয়াছিলেন এমনত বোধ হয় না। বরং ইহাই সঙ্গত বোধ হইতেছে, তিনি মনুষ্যকে পৃথিবীর যোগ্য করিয়া সৃষ্টি করিলেন। পরমেশ্বর তাঁহাকে আততায়ির দমন নিমিত্ত ক্রোধ দিলেন এবং বিপৎপাত নিবারণার্থ সাবধানতা রুত্তি প্রদান করিলেন। অতএব মনুষ্য এ পৃথিবীর পূৰ্ব্ব-নিবাসী ইতর জন্তুদিগের মধ্যে আসিয়া তাহারদিগের অধিপতি হইয়া অধিষ্ঠান করিলেন। তাঁহার প্রকৃতি মরণোৎপত্তিশীল ভূলোকেই উপযুক্ত হইয়াছে, এবং কামনা, প্রবৃত্তি, শক্তি এবং শারীরিক গঠন বিষয়ে ইতর জন্তুদিগের সহিত বহু অংশে তাঁহার সাম্য আছে। তিনি তাহারদিগের ন্যায় অন্ন

পানে পরিতুষ্ট হয়েন, নিদ্রাতে সুখানুভব করেন, ও অঙ্গ সঞ্চালনে স্ফূর্তি বোধ করেন ; কিন্তু এসমুদায় তাঁহার উৎকৃষ্ট স্বভাব নহে । মঙ্গল-স্বরূপ পরমেশ্বর তাঁহাকে বুদ্ধিশাল ধর্মশীল করিয়া পৃথিবীস্থ অপরাপর সমস্ত জীব হইতে বিশিষ্ট করিয়া সকলের শ্রেষ্ঠ পদ প্রদান করিয়াছেন । তাঁহার স্বাভাবিক ধর্ম-প্রবৃত্তি ও বুদ্ধিবৃত্তি সকলই তাঁহার পরম ধন, এবং প্রগাঢ় সুখ ও নির্মল আনন্দের কারণ । এ সমুদয় মহৎ বৃত্তি দ্বারা তিনি জ্ঞানাপন্ন ও ধর্ম-নিষ্ঠ হইয়া প্রীতিযুক্ত মনে সংসারের শুভানুষ্ঠানে মহা আত্মাদিত থাকেন, এবং বিশ্বকর্তার বিশ্বকার্যের অত্যাশ্চর্য্য অনির্বচনীয় কৌশল আলোচনা করিয়া প্রেমাভিষিক্ত চিত্তে অতুলানন্দ সাগরে অবগাহন করেন । এই সমুদায় বৃত্তি থাকাতেই মনুষ্য নামের এত গৌরব হইয়াছে, এবং এই সমুদায় বৃত্তির সঞ্চালনেই তাঁহার জন্ম সার্থক হয় ।

দয়ার সাগর পরমেশ্বর সমস্ত বাহ্য বস্তু আমারদিগের ঐ সকল শুভ বৃত্তি সঞ্চালনের উপযোগি করিয়াছেন । বিশ্ব মধ্যে কত মহা মহা প্রকাণ্ড পদার্থ বর্ত্তমান আছে, মনুষ্যের

দুৰ্ব্বল হস্ত কখনই তাহার দারুণ শক্তি অতি-
 ক্রম করিতে সমর্থ হয় না, কিন্তু করুণাকর
 বিশ্বকর্তা তৎ সমুদায় তাঁহার যথোপযুক্ত আ-
 যত্ত করিয়া দিয়াছেন। তিনি আমারদিগের
 পদতলস্থ ভূমিতে সহস্র প্রকার 'উৎপাদিকা
 শক্তি' সমর্পণ করিয়াছেন, বুদ্ধিবৃত্তি চালনা
 দ্বারা তাহার গুণ জানিয়া কৰ্ষণ করিলেই প্র-
 চুর ফল প্রাপ্ত হওয়া যায়। পৰ্ব্বত-গুহা হই-
 তে নদী সমুদায় নিঃসারণ করিয়াছেন, তরুণ
 সহকারে তাহা রাজপথ স্বরূপ করিয়া পদ-
 ব্রজের আশ্রিত হইতে নিস্তার পাওয়া যায়, ও
 প্রয়োজনানুসারে তাহার প্রবাহ পরিবর্তন
 করিয়া মুখ স্বচ্ছন্দতা বৃদ্ধি করা যায়। যে
 দুৰ্গম মহাসিন্ধু-গর্ভে অবনীৰ অর্দ্ধভাগ নিমগ্ন
 রহিয়াছে, তাহাতেও সমুদ্রপোত সন্তারিত
 করিয়া মুগম পথ প্রস্তুত করা যাইতেছে।
 আর জগদীশ্বর আমারদিগেরই হিতের নি-
 মিত্তে আমারদিগকে যে পদার্থের শক্তি অতি-
 ক্রম বা আয়ত্ত করিবার ক্ষমতা প্রদান করেন
 নাই, তাহার স্বভাব জানিয়া তদনুযায়ী কার্য্য
 করিবার উপায়-জ্ঞান দিয়াছেন। যদিও মনু-
 ষ্যের গ্রীষ্মতাপ ও শ্রবণ কটিকাদি নিবারণ

করিয়া মনঃ-কম্পিত চির বসন্ত-সুখ সন্তোষ
নিমিত্ত সূর্য্যের গতি রোধ করিবার শক্তি নাই,
তথাপি তিনি সলিল-সেবিত গৃহচ্ছায়াতে অব-
স্থিতি করিয়া ও ঝটিকাদির পূর্ব লক্ষণ সকল
উপলব্ধি পূর্ব্বক সাবধান হইয়া নিরাপদ ও
নিরুৎকণ্ঠ হইতে পারেন। যৎ কালে বাহি-
রেতে বিদ্যুৎ, ঝঞ্ঝা ও শিলারুষ্টি দ্বারা অব-
নীৰ উপপ্লব সম্ভাবনা বোধ হয়, তখন তিনি
স্বকীয় নিভৃত আলয়ে প্রিয়তম মিত্র-মণ্ডলী
মধ্যে মধুর আলাপে পরম সুখে কাল যাপন
করিতে সমর্থ হয়েন।

আমরা যে সকল বিবিধ গুণান্বিত মনুষ্য
ও ইতর জন্তুর দ্বারা চতুর্দিকে পরিবেষ্টিত
রহিয়াছি, তাহারদিগেরও উপর আমারদি-
গের সুখ দুঃখ সম্যক্ নির্ভর করিয়া আছে।
পরমেশ্বর তাহারদিগের সহিত আমারদিগের
যাদৃশ সযত্ন বন্ধন করিয়াছেন, তদনুযায়ি
কার্য্য করিলেই সুখ লাভ হয়, আর তদ্বিরুদ্ধ
কর্ম্ম করিলেই দুঃখোৎপত্তি হয়। অতএব,
তাহারদিগের কি প্রকার প্রকৃতি ও আমার-
দিগের সহিত তাহারদিগের কি প্রকার সযত্ন,

তাহা জ্ঞাত হওয়া ও তদনুযায়ি কার্য্যানুষ্ঠান অভ্যাস করা নিতান্ত আবশ্যিক ।

যে পর্য্যন্ত মনুষ্য অসত্য ও অজ্ঞানাবৃত থাকেন, সেপর্য্যন্ত তিনি অতি মিষ্টুর, ইন্দ্রিয়-পরায়ণ, ও ধর্ম বিষয়ে নানা প্রকার কুসংস্কারাবিষ্ট হইয়া নিন্দিত কর্ম্মে প্রবৃত্ত হইবেন। তৎকালে যদিও তাঁহার ক্ষুধা, তৃষ্ণা, কাম, ক্রোধাদি নিকৃষ্ট প্রবৃত্তি সকল চরিতার্থ হয়, কিন্তু তাঁহার ধর্ম্মপ্রবৃত্তি ও বুদ্ধিবৃত্তি সমুদায় নিতান্ত জড়ীভূত থাকে। তিনি এই সংসারকে কেবল কতক গুলি অস্বচ্ছ বস্তু রাশি বলিয়া মনে করেন; বিশ্বের ঘটনা সকল তাঁহার শৃঙ্খলাবদ্ধ বোধ হয় না, এবং তাঁহার অন্তঃকরণে কার্য্য-কারণ-ভাবের তত্ত্বজ্ঞান কিছু নাত্র ক্ষুণ্ণি পায় না। তিনি জগতের অন্তর্ভূত অনেকানেক পদার্থের অনিবার্য্য ভয়প্রদ শক্তি দেখিয়া ভীত হইবেন, এবং সে শক্তি অতিক্রম করা নিতান্ত সাধ্যাতীত বোধ করেন। যদিও বিশ্ব-কার্য্যের কোন কোন অংশের শোভা ও সুশৃঙ্খলা কদাচিৎ মনোগত হইয়া সুখের আশা সঞ্চার হয়, কিন্তু তৎ পরক্ষণেই সে সমুদায় ঘন-তিমিরাবৃতবৎ অস্পষ্ট ও

অলঙ্কিত হইয়া যায়, ও তৎসমভিব্যাহারেই তাঁহার সকল আশা ভগ্ন হয়। জগদীশ্বর যে এই জগতের তাবৎ পদার্থ মনুষ্যের সুখোপযোগি করিয়াছেন ইহা তাঁহার প্রতীত হয় না, সুতরাং পরমেশ্বরের অচিন্ত্য জ্ঞান ও নির্মল মঙ্গল স্বরূপে তাঁহার দৃঢ় বিশ্বাস জন্মে না। .

কিন্তু মনুষ্য সভ্য ও জ্ঞানবান্ হইলে নিশ্চয় জানিতে পারেন, যে তাঁহার চতুঃপাশ্ব-বর্ত্তি সমস্ত বস্তু ও সমস্ত ঘটনা পরস্পর সম্বন্ধ হইয়া এক সুশৃঙ্খলাযুক্ত পরম শুভদায়ক যন্ত্র স্বরূপ হইয়াছে, এবং তাহা তাঁহার সমুদায় মনোবৃত্তির চরিতার্থতা সাধনার্থেই সঙ্কল্পিত হইয়াছে। তিনি আপনাকে বিশ্বাধিপের প্রজা জ্ঞান করিয়া মহা আনন্দে তাঁহার কার্য্যালোচনায় অনুরাগী হয়েন, এবং তদ্বারা তাঁহার নিয়ম নিকূপণ করিয়া তদনুবর্ত্তী হইয়া কৰ্ম্মানুষ্ঠান করেন। তিনি পরমেশ্বরানুমত ইন্দ্রিয়-সুখ এক কালে পরিত্যাগ না করিয়া তদপেক্ষা স্থায়ি, বিশুদ্ধ, ও উৎকৃষ্ট জ্ঞান-ধৰ্ম্ম-বিষয়ক সুখেরও আশ্বাদনে তৎপর হয়েন, এবং যথা নিয়মে চলনা দ্বারাই মনুষ্যদিগের

সমুদায় শক্তির ক্ষুধা ও তত্ত্ব বিষয়ে সুখোৎপত্তি হয় জানিয়া তাহাতে যত্ন করা নিতান্ত আবশ্যক বলিয়া উপদেশ প্রদান করিতে থাকেন।

অতএব, যৎ পরিমাণে মনুষ্যের স্বীয় প্রকৃতি ও বাহ্য বিষয়ের জ্ঞান বৃদ্ধি হয়, তৎ পরিমাণে তাহার সুখ বৃদ্ধির উপায় হইতে থাকে। প্রথমে সকল জাতীয় মনুষ্যেরই অতি অসভ্যাবস্থা থাকে, পরে ক্রমে ক্রমে উন্নতি হয়। তিনি প্রথমতঃ হিংস্র জন্তুবৎ জঙ্গলে জঙ্গলে ভ্রমণ পূর্বক পশু হিংসা করিয়া উদর পূর্তি করেন, পরে কিঞ্চিৎ জ্ঞানোদ্রেক হইলে কৃষিকাৰ্য্যে প্রবৃত্ত হইয়া, তদনন্তর বুদ্ধি-বৃত্তির প্রাখর্য্য হইলে শিল্প কৰ্ম ও বিস্তৃত বাণিজ্য ব্যবসায়ে নিযুক্ত হইয়া থাকেন। এক্ষণকার সভ্য জাতিদিগের এই শেষোক্ত অবস্থা হইয়াছে ; এ অবস্থায় লোভ রিপু অত্যন্ত প্রবল। মনের ও শরীরের প্রকৃতি চিরকালই সমান, কিন্তু ঐ ভিন্ন ভিন্ন কালত্রয়বর্তি লোকদিগের বাহ্য বস্তু বিষয়ক সম্বন্ধের অনেক ইতর বিশেষ হইয়া আসিয়াছে। প্রথম অবস্থায় কাম ক্রোধাদির প্রাবল্য হইয়া অতি অপকৃষ্ট পশুবৎ ব্যবহারে

তাহারদের প্রবৃত্তি হয়; দ্বিতীয় অবস্থায় বুদ্ধি-
বৃত্তির কিঞ্চিৎ ক্ষুণ্ণিতি হয় বটে, কিন্তু কাম ক্রো-
ধাদি অন্যান্য নিকৃষ্ট বৃত্তির উপর বুদ্ধির আয়-
ত্তি'না হওয়াতে এক প্রকার অসভ্যাবস্থাই
থাকে, এবং তৃতীয় অবস্থায় বুদ্ধি বলে অনেক-
কানেক বাহ্য বস্তু তাহারদের আয়ত্ত হইয়া
ধনাকাজ্জ্ঞা ও মানাকাজ্জ্ঞারই আতিশয্য হয়।
কিন্তু একাল পর্য্যন্ত কোন অবস্থাতেই মনুষ্যের
মানসিক বৃত্তি সমুদায়ের পরস্পর সামঞ্জস্য ও
সমস্ত বাহ্য বিষয়ের সহিত তাহার ঐক্য স্থাপন
হয় নাই, এবং তৎপ্রযুক্ত কোন কালেই তাহার
ইহ-লোক-প্রাপ্য সমস্ত সুখ ভোগে অধিকার
হয় নাই।

যদি অদ্যাপি মনুষ্যের কোন অবস্থাতেই
তৃপ্তিলাভ না হইল, তবে তাহার প্রকৃতিই
বা কিপ্রকার ও বাহ্য বিষয়ের কিরূপ শৃঙ্খ-
লাই বা তাহার সমুচিত উপযোগি, ইহার
অনুসন্ধান করা নিতান্ত আবশ্যিক। ভারত-
বর্ষীয় লোকের কথা দূরে থাকুক, ইউরোপ
খণ্ডের বুদ্ধিমান্ গুণবান্ মনুষ্যদিগেরই বা
ঐহিক সুখ সন্তোষের কত উন্নতি হইয়াছে?
এক্ষণে তাহার শিল্প-কার্য্য ও বাণিজ্য-কার্য্য

বিষয়ে খ্যাতি লাভ করিয়াছেন, কিন্তু তাহাতেই কি তাঁহারদিগের সুখের একশেষ হইয়াছে? তাঁহারা কি বংশানুক্রমে এই সমস্ত ব্যাপারই সর্বোৎকৃষ্ট বিবেচনা করিয়া কেঁদল হইতেই নিপ্ত থাকিবেন? সকলেই জানেন, এ অবস্থা মনুষ্যের পূর্ণাবস্থা নহে। তবে কি উপায় করিলে তাঁহার সুখোন্নতি হইবে? কে আমারদিগের ভবিষ্যৎ সুখ-রাজ্যের পথ প্রদর্শন করিবে? এ সমস্ত প্রশ্নের এক সিদ্ধান্ত আছে। পরমেশ্বর মনুষ্যের এ প্রকার স্বভাব করিয়া দিয়াছেন, যে তাঁহার সকল বিষয়েরই ক্রমে ক্রমে উন্নতি হইবে, এবং তাঁহাকে পৃথিবীর অপরাপর প্রাণি অপেক্ষা উৎকৃষ্ট সুখের অধিকার করিয়া এই অভিপ্রায়ে বুদ্ধি-বৃত্তি প্রদান করিয়াছেন, যে তিনি স্বীয় যত্নে আপনার প্রকৃতি ও বাহ্য বিষয়ের স্বভাব জ্ঞাত হইবেন, এবং যাহাতে মানাসক বৃত্তি সমুদায়ের পরস্পর সামঞ্জস্য থাকে, ও বাহ্য বিষয়ের সহিত তাহার ঐক্য হয়, তাহার উপায় অনুসন্ধান করিবেন।

মনুষ্য যাবৎ আপন স্বভাব অজ্ঞাত ছিলেন, তাবৎ তাঁহার তদনুযায়ী সাংসারিক

নিয়ম সংস্থাপন করা কি প্রকারে সম্ভাবিত হইতে পারে? তিনি যাবৎ আপনার মনো-বৃত্তি এবং বাহ্য বস্তুর সহিত তাহার সম্বন্ধের বিষয় আলোচনা করিতে প্রবৃত্ত না হইয়াছিলেন, তাবৎ তাঁহার অন্তঃকরণ বিবেচনানুসারে নিয়োজিত হয় নাই। মনুষ্য পূর্বোক্ত অবস্থাত্রেয়ে সদস্য বিচার না করিয়া, অর্থাৎ তাহাতে আপনার সমস্ত প্রকৃতির উপযোগিতা বিবেচনা না করিয়া প্রবৃত্ত হইয়াছিলেন, একারণ তাহাতে সুখী হইতে পারেন নাই। কিন্তু তিনি যে চিরকালই আপনার স্বভাব অজ্ঞাত থাকিবেন, ও তদনুযায়ী সাংসারিক নিয়ম সংস্থাপনে অশক্ত রহিবেন, একপ বিবেচনা করা কদাপি যুক্তিসিদ্ধ নহে। যখন পরমেশ্বর মনুষ্যকে আপন প্রকৃতি ও বাহ্য বস্তুর সহিত তাহার সম্বন্ধ বিষয়ক জ্ঞান লাভে সমর্থ করিবার নিমিত্ত তাঁহাকে বিবেচনা শক্তি প্রদান করিয়াছেন, ও যখন তদ্বারা তাঁহার সুখের উপায় স্থির করিবার ভার তাঁহারই উপর অর্পণ করিয়াছেন, এবং যখন তিনি কেবল সে সকল বিষয়ে সম্পূর্ণ জ্ঞান প্রাপ্ত না হওয়াতেই অদ্যাপি সে অভিপ্রায় পূর্ণ করিতে

অসমর্থ রহিয়াছেন, সুতরাং যে অভিপ্রায়ে তাঁহার গুণ ও শক্তি সমুদায় সূচ্য হইয়াছে, তদনুসারে সাংসারিক কর্মে প্রবৃত্ত না হইয়া চুর্দান্ত প্রবৃত্তি বিশেষের বশীভূত হইয়া চলিতেছেন, তখন এ কথা সাহস করিয়া বলা যাইতে পারে, যে এক সময়ে মনুষ্য আপনার প্রকৃতি ও অপরাপর বস্তুর সহিত তাহার সম্বন্ধ যথার্থ রূপে অবগত হইয়া তদনুযায়ী ব্যবহার করিতে সমর্থ হইবেন, এবং তখন পৃথিবীতে তাঁহার সুখোন্নতি বিষয়ে যুগান্তর উপস্থিত হইবে। তখন তিনি কার্য কার্য-
ণের যথার্থ স্বরূপ অবগত হইয়া বিবেচনা পূর্বক নিকপিত নিয়মানুসারে সুখ প্রাপ্তির চেষ্টা করিতে পারিবেন।

পূর্বে আমারদিগের দেশে যত দর্শন শাস্ত্র প্রকাশ হইয়াছে, এ বিষয়ের অনুসন্ধান করা তাহার তাৎপর্য ছিল না। আপনার দিগের শারীরিক ও মানসিক স্বভাব ও বাহ্য বস্তুর সহিত তাহার সম্বন্ধ বিবেচনা করিবার প্রয়োজন তৎকালের লোকের সম্যক্ বোধ-
গম্য হয় নাই। বরঞ্চ, অপরাপর অনেক দেশের ন্যায় আমারদিগের দেশেও এই প্র-

সিদ্ধ মত প্রচলিত আছে, যে আদৌ ভুলোক
নির্মল জ্ঞান ও পরম মুখের আশ্পদ ছিল,
ক্রমে ক্রমে তাহার ভ্রাস হইয়া অজ্ঞান ও
দুঃখের বুদ্ধি হইতেছে, ও পরে ক্রমশই তাহার
আধিক্য হইতে থাকিবেক। এ নিয়মানুসারে
চলিলে মুখ-চেষ্টার আর সম্ভাবনা থাকে না,
এবং ইউরোপীয় লোকের পূর্বাপর বৃত্তান্ত
আলোচনা করিয়া দেখিলে তাহার সহিত
এ মতের সঙ্গতি হয় না। অনেকানেক খ্রীষ্টান
পণ্ডিতেরও মতে পৃথিবী প্রথমে পূর্ণ মুখের
স্থান ছিল, পরে তাহার নিয়ম-শৃঙ্খলার ব্যতি-
ক্রম হইয়াছে, এক্ষণে তাহার আর পরিশো-
ধন হইবার উপায় নাই। ইহা হইলে
বিজ্ঞান শাস্ত্রের যত উন্নতি হউক, ও তদ্বারা
জগতের নিয়ম যত অবগত হওয়া যাউক,
কিছুতেই মনুষ্যের উন্নতি হইবার আর সম্ভা-
বনা থাকেনা। কিন্তু ইউরোপীয় তত্ত্ববিৎ পণ্ডি-
তদিগের মধ্যে এই মত ক্রমশ অশ্রদ্ধিত হইয়া
আসিতেছে। তাঁহারা বিজ্ঞান শাস্ত্রের অনু-
শীলন করিয়া নিশ্চয় জানিতেছেন, যে যৎ
পরিমাণে জগতের নিয়ম প্রকাশিত হইবে ও
লোকে তদনুযায়ি কার্য্য করিতে সমর্থ হইবে,

তৎ পরিমাণে তাহারদিগের সুখের বৃদ্ধি, এবং অবস্থা ও স্বরূপের উন্নতি হইবেক। তাঁহারা অবিজ্ঞ লোকদিগের ন্যায় পরমেশ্বরকে লৌকিক ফলাফলের সাক্ষাৎ কারণ বলিয়া স্বীকার করেন না, অর্থাৎ পরমেশ্বর কাহারও প্রতি তুষ্ট বা ক্রুষ্ট হইয়া সাক্ষাৎ ঐশী শক্তি প্রকাশ পূর্ব্বক কোন সাংসারিক ব্যাপার সম্পন্ন করেন, এবং তাহাতে বিশেষ বিশেষ সঙ্কল্প করিয়া বিশেষ বিশেষ ব্যক্তির সুখ দুঃখ নিয়োজন করেন, ইহা অঙ্গীকার করেন না। প্রত্যুত, তাঁহারা এ প্রকার বিশ্বাস করেন, যে জগদীশ্বর নিকৃপিত নিয়ম সংস্থাপন করিয়া বিশ্ব-রাজ্য পালন করিতেছেন—ফলাফল বিধান করিতেছেন—সুখ দুঃখ বিতরণ করিতেছেন। তিনি কদাপি কাহারও শুভ বা প্রার্থনার অনুরোধে কোন নিয়মের অতিক্রম করেন না। তিনি জগতের পদার্থ সকল কিয়ৎ পরিমাণে আমারদিগের ইচ্ছার আয়ত্ত করিয়া রাখিয়াছেন, এবং যাহাতে আমরা সেই সমস্ত বস্তুর বিষয় আলোচনা করিয়া আপনারদিগের জ্ঞান ও সুখের উন্নতি করিতে পারি, তাহারদিগের তদ্রূপ ব্যবস্থা করিয়া দিয়া-

ছেন। অতএব, যখন পরমেশ্বর চেতনাচে-
তন তাবৎ বস্তুর উপর সাধারণ নিয়ম প্রচা-
রণ করিয়া সংসার-রাজ্য শাসন করিতেছেন, ও
তদ্বারা আমরাদিগের কর্তব্যাকর্তব্য বিষয়ে
আপন অভিপ্রায় প্রকাশ করিতেছেন, তখন
তঁাহার সেই সকল নিয়ম লঙ্ঘন করিলেই
তঁাহার আজ্ঞা লঙ্ঘন করা হয়, এবং তজ্জন্য
অবশ্যই ক্লেশ প্রাপ্ত হইতে হয়। যে কার্য
তঁাহার নিয়মাধীন না হয়, তাহা কখনই উ-
চিত কার্য্য নহে। যখন তঁাহার নিয়ম অব-
গত হইলাম, তখন তাহাতে শ্রদ্ধা করা, অ-
ন্যকে তাহা উপদেশ দেওয়া, ও সংসারে
যাহাতে তদনুযায়ী ব্যবহার প্রচলিত হয় তা-
হার উপায় করা সর্ব্বতোভাবে কর্তব্য। পর-
মেশ্বরের নিয়মের উপদেশ করা ধর্ম্মোপদে-
শেরই অঙ্গ। চতুষ্পাঠীর পাঠ্য গ্রন্থের সংখ্যা
মধ্যে তদ্বিসয়ক গ্রন্থ নিয়োজিত করা সম্যক-
রূপে বিধেয়।

এদেশে কোন বিজ্ঞান শাস্ত্রেরই তাদৃশ
প্রচার নাই, অতএব এক্ষণে চতুষ্পাঠীতে
একুপ ধর্ম্মোপদেশ হওয়া সম্ভাবিত নহে।
কিন্তু বিজ্ঞান-শাস্ত্র-সমুজ্জ্বলিত ইউরোপ খণ্ডে-

র খ্রীষ্টান পণ্ডিতেরাই বা কোন্ আপনার-
 দিগের বিদ্যালয়ে এ বিষয়ের উপদেশ করিয়া
 থাকেন? বরঞ্চ, কেহ অনুরোধ করিলে তা-
 হার প্রতি খড়্গ-হস্ত হইয়া কটুক্তি করেন,
 ও নাস্তিকতা অপবাদ প্রদান করিয়া থাকেন।
 বস্তুতঃ, যৎকালে ধর্মশাস্ত্র প্রকাশিত হইয়া-
 ছিল, তখন মনের নিয়ম ও ভৌতিক জগতের
 নিয়ম বিশিষ্ট রূপে আলোচিত হয় নাই;
 ইহ লোকে কি নিয়মে সংসারের কার্য নি-
 র্বাহ হইতেছে, ভোগাভোগের বিধান হই-
 তেছে, সুখ দুঃখের পরিবর্তন হইতেছে, এস-
 মস্ত বিষয় তৎকালের লোকের গোচর হয়
 নাই, সুতরাং পরমেশ্বর যেকূপ নিয়মে সংসার
 পালন করিতেছেন, শাস্ত্রকারেরা তাহার
 সহিত স্বপ্রকাশিত শাস্ত্রের ঐক্য রাখিতে সমর্থ
 হইেন নাই। অনেকানেক প্রাচীন পণ্ডিত
 সংসারের সুখ-দুঃখ-বিষয়ক সুনিয়ম নিকূপণে
 অপারগ হইয়া এককালে এমত মীমাংসা
 করিয়া গিয়াছেন, যে এ সংসারের কোন মুহূ-
 র্ত্তলাই নাই, কেহ বা তাহা মানব-বুদ্ধির স-
 ম্পূর্ণ অগম্য বলিয়া উল্লেখ করিয়াছেন। যদিও
 কোন কোন খ্রীষ্টান সম্প্রদায় জগতের নিয়ম

শৃঙ্খলা স্বীকার করিয়া থাকেন, কিন্তু তাঁহারা তাহার উপদেশ দেওয়া নিতান্ত আবশ্যক জ্ঞান করেন না, সুতরাং তদ্বিষয়ে আদরও করেন না। তাঁহারা সমস্ত বিজ্ঞান-শাস্ত্র ও লৌকিক জ্ঞান কেবল কৌতুহল-জনক ও ধনাগমের উপায় বলিয়া থাকেন। কিন্তু লোকে সাংসারিক ব্যবহার কালে আপন স্বভাব ও প্রাকৃতিক নিয়ম যৎকিঞ্চিৎ যাহা অবগত আছে তদনুযায়ী কার্য্য করিতে সচেষ্ট হয়, আপন পুণ্য-বল ও অদৃষ্টের উপর নিতান্ত নির্ভর করিয়া নিশ্চিন্ত থাকে না। বৃষ্টি না হইলে কৃষিকার্য্যের নিয়মানুসারে শস্য-ক্ষেত্রে জল সেচন করে, অন্ন সংস্থান না থাকিলে সাংসারিক নিয়মানুসারে কার্যিক পরিশ্রম করিয়া উপার্জ্জনের চেষ্টা করে, এবং রোগ হইলে শারীরিক নিয়মানুযায়ী চিকিৎসার্থে চিকিৎসক বিশেষকে আহ্বান করে। অতএব যখন এতাদৃশ নিয়ম পালনের কর্তব্যতা বিষয়ে উপদিষ্ট না হইয়াও লোক তদবলম্বন পূর্ব্বক তাহার ফলাফল প্রত্যক্ষ দেখিতে পায়, তখন মানব প্রকৃতির সহিত বাহ্য বিষয়ের কিরূপ সম্বন্ধ অর্থাৎ পরমেশ্বর কি প্রকার নিয়মে

সংসার প্রতিপালন করিতেছেন, তাহার সবিশেষ অনুসন্ধান করা ও তদনুযায়ি ব্যবহার করা কি পর্য্যন্ত শুভজনক তাহা বলিতে পারা যায় না। বস্তুতঃ বিজ্ঞান-শাস্ত্র দ্বারা ইহা সম্পূর্ণরূপে সপ্রমাণ হইতেছে, যে এই প্রকার নিয়ম প্রতিপালন ব্যতিরেকে আমারদিগের বলের উন্নতি, জ্ঞানের উন্নতি, ধর্ম্মের উন্নতি, বীর্য্যের উন্নতি, ক্ষমতার উন্নতি হইবার—বলিতে কি সম্যক্ রূপে মনুষ্যত্ব রক্ষা হইবার আর উপায়ান্তর নাই।

জগদীশ্বর বিশ্ব-রাজ্য পালনার্থ যে সমস্ত সুচারু সুখাবহ নিয়ম সংস্থাপন করিয়াছেন, তাহা লঙ্ঘন করিবার অব্যবহিত কাল পরেই দুঃখের সঞ্চার হয়। একবার কোন নিয়ম লঙ্ঘন করিলে পুনর্বার তদ্রূপ নিষিদ্ধ কার্য্য না করি এই অভিপ্রায়েই তিনি তাহাতে দুঃখ নিয়োজন করিয়া দিয়াছেন। তিনি নিয়ম সংস্থাপনার সময়েই তাহার ফলাফল এক কালে নির্দিষ্ট করিয়া রাখিয়াছেন, তাহার অন্যথা করা কাহারও সাধ্য নহে। দেখ, ব্যায়ামাদি শারীরিক নিয়ম প্রতিপালনে ক্রটি, অল্প বয়সে অর্থাৎ শরীরের পূর্নাবস্থা না

হইতে হইতেই স্ত্রী-সহযোগ, জগতের ভৌ-
তিক নিয়ম নিকপণ পূর্বক সুনিপুণ" রূপে
শিষ্যাদি শাস্ত্র শিক্ষা না করা, স্ত্রীদিগের
মূর্থতা ও পুরুষদিগের জ্ঞান ধর্ম বিষয়ে উত্তম-
রূপ উপদেশ প্রাপ্ত না হওয়া; এই সমস্ত কারণে
আমাদিগের দেশীয় লোকের যে প্রকার দু-
র্দশা ঘটিয়াছে, তাহা মনে করিতে হইলে অন-
র্গল অশ্রুপাত হয়। পরমেশ্বর আমাদিগের
হিতার্থেই দুঃখ যোজনা করিয়াছেন, কিন্তু আ-
মরা আপনার দোষে তাঁহার অভিপ্রেত কার্য
না করিয়া দুঃখই ভোগ করিতেছি। এখনও
আমাদিগের বোধোদয় হইলে, তাঁহার করুণা
শ্রুণে এই দুঃখ রূপ কণ্টকি বৃক্ষ হইতে শুভ
ফল উৎপন্ন হয়। যাঁহারদিগের ধর্ম্মেতে শ্রদ্ধা
আছে, ও ঈশ্বরেতে প্রীতি আছে, তাঁহারা
যাহাকে সেই সর্ব-সেবনীয় পরমেশ্বরের নিয়ম
বলিয়া জানিলেন, তাহা প্রতিপালন করিতে
যত্ন না করিয়া কি প্রকারে নিশ্চিন্ত থাকিতে
পারেন? যাঁহারা শাস্ত্রোক্ত বৈধাবৈধ কর্ম্মের
উপদেশের আবশ্যকতা বোধ করেন, জগ-
দীশ্বরের সাক্ষাৎ প্রণীত পরম শাস্ত্র স্বরূপ
যে এই প্রত্যক্ষ পরিদৃশ্যমান জগৎ, তাহার

নিয়ম অভ্যাসে ও তদনুযায়ী ব্যবহারে একান্ত যত্ন ন্যূন করা। কি তাঁহারদিগের উচিত? যদি বল, এ সমস্ত বিবরণ ঐহিক ভোগাভোগের বিষয়েই লিখিত হইল। যাঁহার ঐহিক ভোগ কামনা না করেন, তাঁহাদের এত নিয়মানিয়ম বিচারে আবশ্যক কি? কিন্তু ইহা বিবেচনা করা উচিত, যে তাঁহারা ধর্মোপদেশ ও ধর্ম্মানুষ্ঠান অবশ্য কর্তব্য বলিয়া জানেন। আর ইহাও জ্ঞাত থাকা আবশ্যক, যে যাঁহার মানসিক প্রকৃতি যত উৎকৃষ্ট, তিনি উপদেশ গ্রহণ করিতে তত সমর্থ। বিশুদ্ধ-বুদ্ধি ব্যক্তি ব্রহ্ম-স্বরূপের জ্ঞান লাভে যে প্রকার সমর্থ হয়, মূর্থ ব্যক্তি সে প্রকার কখনই হয় না। যাঁহার প্রবল ভক্তিভাব আছে, সে ব্যক্তি যেকোন ভক্তি বিষয়ক উপদেশ আশু গ্রহণ করিয়া পরমেশ্বরের প্রগাঢ় প্রেমে মগ্ন হয়, অন্য ব্যক্তি তদ্রূপ কখনই হয় না। যাঁহার অত্যন্ত দয়া-স্বভাব, দয়া বিষয়ক উপদেশ তাঁহার যেকোন হৃদয়ঙ্গম হয়, ও তদনুষ্ঠানে তাঁহার যাদৃশ অনুরাগ জন্মে, অন্য ব্যক্তির তাদৃশ কখনই হয় না। পরন্তু আমারদিগের এই সমস্ত ধর্ম্ম বিষয়ক স্বভাবের উন্নতি নি-

মিত্ত কতক গুলি শারীরিক ও মানসিক নিয়ম প্রতিপালন করা আবশ্যিক, তদ্ব্যতিরেকে ধর্মোপদেশের পূর্ণ ফল উৎপন্ন হওয়া কোন প্রকারে সম্ভাবিত নহে। যদি কেহ স্বভাবতঃ উপদেশ গ্রহণে সমর্থ না হয়, তথাপি কি উপায়ে তাহার মানসিক বৃত্তি সমুদায়ের উৎকর্ষ হইতে পারে, তাহার অনুসন্ধান করা অনাবশ্যক নহে। যদি অন্ন বস্ত্রের ক্লেশ, অস্বাস্থ্যদায়ক দ্রব্য ভক্ষণ, কুস্থানে বাস, দীর্ঘকাল-ব্যাপী ক্লান্তিকর পরিশ্রম ইত্যাদি কারণে অন্তঃকরণের উৎকৃষ্ট বৃত্তি সকল নিস্তেজ হয়, সুতরাং পরমেশ্বরের স্বরূপ জ্ঞান ও প্রগাঢ় ভক্তি প্রভৃতি উদয় হইবার ব্যাঘাত জন্মে, তবে ঐ সমস্ত ধর্ম-কণ্টক ছেদনার্থ তদ্বিষয়ক কার্য্য কারণ নিকূপণ করা উপেক্ষার বিষয় নহে।

কোন দেশীয় ও কোন জাতীয় ধর্মোপদেশকেই কোন কালে এসকল অভিপ্রায় গ্রহণ করেন নাই, সুতরাং তদনুযায়ী অনুষ্ঠানও করেন নাই, অতএব তাঁহারা প্রাণপণে উপদেশ করিয়াও কেবল এই সকল স্বাভাবিক নিয়ম প্রতিপালনে অবহেলা করাতে স্ব বাঞ্ছা-

নুসারে লোকের ধর্মোন্নতি ও সুখোন্নতি করিতে সমর্থ হইবেন নাই । কিন্তু এক্ষণে বিজ্ঞান-শাস্ত্র দ্বারা এই সমুদায় মত নিঃসংশয়ে প্রতিপন্ন হইয়াছে । অতএব বিশ্বের নিয়ম আলোচনা ও তৎ প্রতিপালন করা সর্বতোভাবে কর্তব্য । জগতের নিয়ম জগদীশ্বরের সাক্ষাৎ আজ্ঞা, তাহা লঙ্ঘন করিলে অবশ্যই দুঃখ আছে । আলোচনা কর, বিচার কর, সিদ্ধান্ত কর, তবে এ বাক্যে অবশ্যই বিশ্বাস হইবে । তখন এই পরিদৃশ্যমান বিশ্বকে পরমেশ্বর-প্রণীত ধর্ম-শাস্ত্র স্বরূপ জানিয়া তাহার নিয়ম প্রতিপালনে অবশ্যই শ্রদ্ধা ও অনুরাগ জন্মিবে ।

প্রথম অধ্যায়

প্রাকৃতিক নিয়ম

জগতের নিয়ম বিচারে প্রবৃত্ত হইবার পূর্বে নিয়মের স্বরূপ নির্দেশ করা আবশ্যিক। সংসারের তাবৎ বস্তুর তাবৎ কার্য্যই বিশেষ বিশেষ নির্দিষ্ট রীত্যানুসারে সংঘটিত হয়। সমুদ্রের জল সূর্য্যের তেজে বাষ্প হইয়া উর্দ্ধ গামী হয়, এবং তাহাতেই মেঘ জন্মিয়া পৃথিবীতে বারি বর্ষণ করে। এস্থলে জল ও তেজ এই উভয় পদার্থের কার্য্য বাষ্প অথবা মেঘ। এই কার্য্য জগতের নিয়মানুসারে ঘটিয়া থাকে, অর্থাৎ জল ও তেজের যাদৃশ প্রকৃতি, এবং উভয়ের যাদৃশ পরস্পর সম্বন্ধ নিকপিত আছে, তাহাতে ঐ কার্য্যের ঐ প্রকার ঘটনা ব্যতিরেকে আর কিছুই হইতে

পারে না। জল ও তেজের যে অবস্থায় ঐ কার্য্য একবার ঘটিয়াছে, পুনর্বার তাহারদের সে অবস্থা ঘটিলে অবশ্যই সে কার্য্য ঘটিবে, এই যে নির্দিষ্ট রীতি আছে ইহাকেই নিয়ম বলা যায়। জগতের সমস্ত নিয়ম তদন্তগত বস্তু সমুদায়ের প্রকৃতি-মূলক, এ প্রযুক্ত ঐ নিয়মকে প্রাকৃতিক নিয়ম বলিয়া নির্দেশ করা যায়। নিয়ম থাকিলে অবশ্যই তাহার আশ্রয় স্বরূপ বস্তু বিশেষ থাকিবে। পূর্কোক্ত উদাহরণে জল ও তেজ এই পদার্থ দ্বয় মেঘোৎপত্তি বিষয়ক নিয়মের আশ্রয়। এইরূপে কোন না কোন বস্তু জগতের এক এক নিয়মের আশ্রয়।

জগদীশ্বর এই বিশ্ব-রাজ্য পালনার্থে যে সমস্ত নিয়ম সংস্থাপন করিয়াছেন, মনুষ্যদিগকে তাহার তত্ত্ব জানিয়া তদনুযায়ি কার্য্য করিবার ক্ষমতাও প্রদান করিয়াছেন। তাঁহারা স্বীয় বুদ্ধি-শক্তিতে জগতের নিয়ম অবগত হইতে পারেন, এবং অবগত হইলে পরে ঐ নিয়ম তাঁহারদিগের কর্ম্মের নিয়ম হয়। আমাদিগের শারীরিক প্রকৃতির সহিত অগ্নি ও পুতিগন্ধিক পদার্থের যে প্রকার সম্বন্ধ নির্দিষ্ট

আছে, তদনুসারে, অত্যুষ্ণ জলে স্নান করিলে বল-হানি হয়, এবং দুর্গন্ধ-ময় স্থানে বাস করিলে পীড়া জন্মে। মনুষ্যের এনিয়ম রহিত অথবা পরিবর্তিত করিবার সামর্থ্য নাই। কিন্তু যখন তিনি এ নিয়ম জানিতে পারেন, এবং তাহা লঙ্ঘন করিলে কি অনিষ্ট হয় তাহাঁও জ্ঞাত হন, তখন তাঁহার দুঃখোৎপত্তি বা দেহ-ভঙ্গের আশঙ্কায় স্বভাবতই এই নিয়ম রক্ষায় যত্ন হয়, এবং তাহা হইলে পরমেশ্বর যে অভিপ্রায়ে কার্য্য বিশেষে দুঃখ নিয়োজন করিয়াছেন, তাহা সম্পন্ন হয়।

কোন কৰ্ম্ম কর্তব্য ও কোন কৰ্ম্ম অকর্তব্য, এই বিষয়ে উপদেশ দিবার নিমিত্ত পরমেশ্বর কার্য্য বিশেষে মুখ বা দুঃখ নিয়োজন করিয়াছেন। কোন কৰ্ম্মের অনুষ্ঠান করিয়া তজ্জন্য দুঃখ প্রাপ্ত হইলে তৎক্ষণাৎ নিশ্চয় জানা উচিত, ঐ দুঃখ-জনক কার্য্য মঙ্গল-লাভের পরমেশ্বরের নিয়মানুগত কার্য্য নহে। অতএব জগদীশ্বরের এই রূপে কর্তব্যাকর্তব্যের উপদেশ দেওয়া, আর মহাভীষণ নাদে আজ্ঞা প্রকাশ করা, উভয়ই তুল্য। যদি তিনি মনুষ্যের ন্যায় শরীরী হইতেন, আর আমার-

দিগকে সমক্ষে দণ্ডায়মান করিয়া ভয়ঙ্কর ক্রোধ প্রদর্শন পূর্বক ঘনঘোর গভীর নাদে অনুচিত কর্ম্মানুষ্ঠানের নিষেধ করিতেন, এবং কহিতেন, এই নিষিদ্ধ কর্ম্ম করিলে যাতনার আর সীমা থাকিবেক না, তবে তাঁহার অনিবার্য্য অনুমতি শ্রবণ করিয়া যাদৃশ ব্যবহার করা উচিত হইত, তাঁহার নিয়ম জানিয়া একান্ত চিত্তে তদনুযায়ী আচরণ করাও সেই রূপ আবশ্যক। তাহা না করিলেই দুঃখ। বরং নিয়ম ভঙ্গের ফল অবিলম্বে অনুভূত হইলে বাচনিক উপদেশ অপেক্ষাও তাহা দৃঢ়তর রূপে হৃদয়ঙ্গম হইতে পারে। তিনি আমারদিগের হিতের নিমিত্তে ক্লেশের উৎপত্তি করিয়াছেন—অধিক দুঃখ ঘটনার নিরাকরণ নিমিত্ত অল্প দুঃখের সৃষ্টি করিয়াছেন—অকাল মৃত্যু নিবারণার্থে শারীরিক ক্লেশের সৃজন করিয়াছেন। একবার কোন কর্ম্ম-দোষে দুঃখ প্রাপ্ত হইলে তাহা নিয়ম-বিরুদ্ধ জানিয়া বারান্তর তদ্রূপ কর্ম্ম না করি, এই অভিপ্রায়েই তিনি নিয়ম-ভঙ্গকে দুঃখ-জনক করিয়াছেন। যদি সে দুঃখানুভব আমারদিগের উপকারের কারণ না হইত, তবে নিয়ম লঙ্ঘন করিলেও আমারদিগকে দুঃখ

প্রদান করিতেন না। তিনি যেমন রাজা স্বরূপ হইয়া শুভকর নিয়ম সংস্থাপন পূর্বক বিশ্ব-রাজ্য পালন করিতেছেন, তদ্রূপ পরম কারুণিক আচার্য্য স্বরূপ হইয়া স্বপ্রতিষ্ঠিত নিয়ম শিক্ষার উপায় করিয়া দিরাছেন। সংসারে যত দুঃখ আছে, সমস্তই পরমেশ্বরের নিয়ম লঙ্ঘনের ফল। অতএব কোন নিয়ম লঙ্ঘনে কোন দুঃখের উৎপত্তি হইতেছে, তাহার বিবেচনা ও প্রতীকার করা, অর্থাৎ বিশ্ব-রাজ্যের শাসন-প্রণালীর তত্ত্ব জানিয়া তদনুযায়ী ব্যবহার করা নিতান্ত আবশ্যিক।

জগতের তাৎৎ বস্তুর এক এক প্রকার নির্দিষ্ট প্রকৃতি আছে, তদনুসারে তাহার কার্য্য প্রকাশ পায়। প্রাণিগণ ও অপরাপর সমুদায় বস্তু পরস্পর স্বতন্ত্র ও অসম্বন্ধ বিবেচনা করিলেও তাহারদের যত প্রকার কার্য্য-শক্তি আছে, বিশ্বেরও তত প্রকার নিয়ম আছে বলিতে হইবে ; যেহেতু কার্য্যেরই এক এক প্রকার নির্দিষ্ট রীতির নাম নিয়ম। কিন্তু প্রাণিগণ ও অন্যান্য বস্তু সকলের পরস্পর বিশেষ বিশেষ সম্বন্ধ আছে, তৎ সম্বন্ধানুসারে তাহাদের কার্য্যের বৈলক্ষণ্য হয় ; যথা শুদ্ধ

তুণ অগ্নি দ্বারা যেকপ দক্ষ হয়, জল-সিক্ত তুণ তক্রপ ধ্বংসই হয় না; কারণ এস্থলে জলের দ্বারা অগ্নির কার্যের বৈলক্ষণ্য হয়। অতএব ভিন্ন ভিন্ন প্রাণি ও বস্তু সমুদায়ের পরস্পর যত সম্বন্ধ আছে, জগতেরও তত নিয়ম আছে। যৎ পরিমাণে এই সমস্ত নিয়মের তত্ত্ব জানা যাইবে, তৎ পরিমাণে তন্নিষ্পন্ন 'ব্যবহারিক নিয়ম সকলও সুনির্দিষ্ট ও সুখ-জনক হইবে।

কিন্তু কোন কালে যে এই সমুদায় নিয়মের যথার্থ তত্ত্ব প্রকাশ পাইবে, এবং তখন তৎ সম্পাদন নিমিত্ত বুদ্ধি চালনার আর প্রয়োজন থাকিবে না, ইহা এক্ষণে মনেও কল্পনা করা যায় না। যদিপি কখনও কোন প্রতাপাব্বিত সম্রাট স্বীয় বাহুবলে সমাগরা পৃথিবীকে একচ্ছত্রা করিয়া কহিতে পারেন, যে আমার জয়-পতাকা উড্ডীয়মান করিবার আর অন্য স্থান নাই, তথাপি বিদ্যার্থী ব্যক্তি কখনও কহিতে পারিবেন না, যে আমার শিক্ষা করিবার আর অন্য বিষয় নাই। সমুদায় নিয়মের তত্ত্ব জ্ঞাত হওয়া অনন্ত কালের কার্য্য! অতএব তন্মধ্যে কতিপয় প্রসিদ্ধ ও আবশ্যক নিয়মের বিবরণ করা যাইতেছে।

জগতের তিন প্রকার নিয়ম ; যথা ভৌতিক, শারীরিক, ও মানসিক ।

প্রথমতঃ—জল, বায়ু, স্বর্ণ, রৌপ্য, লৌহ, মৃত্তিকাদি অচেতন পদার্থের নাম ভৌতিক পদার্থ । যে নিয়মে তৎ সমুদায়ের কার্য্য নিৰ্ব্বাহ হয়, তাহার নাম ভৌতিক নিয়ম । অগ্নিতে অন্ন পাক হয়, জলেতে নৌকা মগ্ন হয়, চূর্ণেতে হরিদ্রা দিলে রক্ত বর্ণ হয়, হস্ত হইতে প্রসূর-খণ্ড স্থলিত হইলে ভূমিতলে পতিত হয়, ইত্যাদি জড়-পদার্থ ঘটিত কার্য্য বিবিধ প্রকার ভৌতিক নিয়মানুসারে সম্পন্ন হয় ।

দ্বিতীয়তঃ—যে নিয়মে শরীর সম্বন্ধীয় কার্য্য নিৰ্ব্বাহ হয়, তাহার নাম শারীরিক নিয়ম । শরীরি বস্তুর এই প্রকার স্বভাব, যে শরীরান্তর হইতে উৎপন্ন হয়, আহার দ্বারা সজীব থাকে, এবং ক্রমে ক্রমে তাহার বৃদ্ধি, হ্রাস, ও ভঙ্গ হয় । প্রসূর কদাপি প্রসূরান্তর হইতে উৎপন্ন হয় না, আহারও করে না, এবং ক্রমানুসারে বৃদ্ধি ও হ্রাস পাইয়া নষ্টও হয় না । কিন্তু মনুষ্য, পশু, পক্ষ্যাদি প্রাণী ও বৃক্ষ, লতা, তৃণাদি উদ্ভিজেতে ইহার সমস্ত

লক্ষণই দৃষ্ট হয়। বস্তুতঃ, যে নিয়মানুসারে জন্তু ও উদ্ভিজ্জের এই সমস্ত অবস্থার সংঘটনা হয়, তাহারই নাম শারীরিক নিয়ম। তন্মধ্যে মনুষ্যের বিষয় বিবেচনা করাই এপ্রস্তাবের উদ্দেশ্য।

তৃতীয়তঃ—যে সকল জীব বুদ্ধি-জীব, যাহারদিগের কেবল আপন সত্তা মাত্রেরও বোধ আছে, তৎ সমুদায়ই মানসিক নিয়মের অধীন। তাহারদিগের দুই প্রধান শ্রেণী; মনুষ্য এবং ইতর জন্তু। মনুষ্যের বুদ্ধিবৃত্তি, ধর্মপ্রবৃত্তি ও নিকৃষ্ট প্রবৃত্তি, এই তিন প্রকার বৃত্তি আছে, আর ইতর জন্তুদিগের বুদ্ধি-বৃত্তি ও কাম ক্রোধাদি নিকৃষ্ট প্রবৃত্তি আছে, কিন্তু দয়াদি ধর্মপ্রবৃত্তি নাই। বুদ্ধিজীবী জীবদিগের মানসিক বৃত্তি সমুদায়ের নির্দিষ্ট প্রকৃতি আছে, ও বাহ্য বস্তুর সহিত তাহার নিকপিত সম্বন্ধ আছে। রসনেন্দ্রিয় সুস্থ থাকিলে ইক্ষুরসের স্বাদ কদাপি তিক্ত বোধ হয় না, ও নিম্বপত্রের স্বাদও কখন মিষ্ট জ্ঞান হয় না। চক্ষু ও কর্ণ প্রকৃতিস্থ থাকিলে চম্পক পুষ্প কদাপি শ্বেতবর্ণ দেখায় না, ও বংশী-ধ্বনিও কর্কশ শুনায় না। তদ্রূপ, আমারদিগের অ্যায়প-

রতা ও উপচিকীর্ষা বৃদ্ধির বৈলক্ষণ্য না হইলে প্রতারণা ও মনুষ্য-বধে অন্তঃকরণ প্রকুল হয় না। এই রূপ, আমারদিগের সমস্ত মানসিক শক্তি স্বস্থ প্রকৃতি ও বাহ্য বস্তুর সহিত নির্দিষ্ট সম্বন্ধানুসারে স্বস্থ কার্যে প্রবৃত্ত হয়। যে নিয়মে তত্তৎ কার্য সম্পন্ন হয়, তাহারই নাম মানসিক নিয়ম।

এই সমস্ত প্রাকৃতিক নিয়মের বিষয় বিবেচনা করিয়া দেখিলে তাহার কতক গুলি অতি উপাদেয় গুণ প্রতীত হয়। যথা

প্রথমতঃ—সমুদায় নিয়ম পরস্পর স্বতন্ত্র, অর্থাৎ এক নিয়ম প্রতিপালনের সুখ কদাপি অন্য নিয়ম লঙ্ঘন দ্বারা নিরাকৃত হয় না, এবং এক নিয়ম ভঙ্গের দুঃখ কদাপি অন্য নিয়ম পালন দ্বারা খণ্ডিত হয় না। পরোপকার দ্বারা জ্বর রোগের শান্তি হয় না, এবং ঔষধ সেবন দ্বারা কদাপি শোক ও মনস্তাপ দূর হয় না। যদি কোন ব্যক্তি পরম ধার্মিক হন, আর আপনার জ্ঞাতসারে অথবা অজ্ঞাতসারে সাংঘাতিক বিষ পান করেন, তবে তিনি শারীরিক নিয়ম ভঙ্গন করাতে অবশ্যই মৃত্যু-গ্রাসে পতিত হইবেন। তখন

জাহার মগ্নিত পুণ্যবলে দেহ ভঙ্গের নিবারণ হইবে না, কারণ শারীরিক নিয়ম স্বতন্ত্র, অন্য অন্য নিয়মের অধীন নহে । যদি কোন পাপিষ্ঠ ব্যক্তি মিথ্যাবাদী, মিত্রদ্রোহী, প্রতারক ও বিশ্বাসঘাতী হয়, তথাপি সে যথা নিয়মে পরিমিত পান ভোজন ও ব্যায়ামাদি শারীরিক নিয়ম প্রতিপালন করিলে হৃষ্ট, ধুর্ষ ও বলিষ্ঠ হইবেক । কিন্তু যদি কোন ব্যক্তি ঐ সকল শারীরিক নিয়ম প্রতিপালন না করেন — যথা নিয়মে বিহিত কালে উপাদেয় দ্রব্য ভোজন, অনতিশয় শারীরিক ও মানসিক পরিশ্রম, সুনির্মল বায়ু সেবন, দুর্গন্ধ-দ্রব্য-শূন্য স্থানে বাস, কামরিপু সংযম ইত্যাদি নিয়ম প্রতিপালন না করেন, তবে তিনি সত্যবাদী, সুশীল, শান্ত-স্বভাব ও পরম দয়াবান্ হইলেও শারীরিক নিয়ম লঙ্ঘন করাতে রোগের যাতনায় অস্থির হইয়া শয্যায় লুণ্ঠমান থাকেন । যদি কেহ কৃষি-কর্মে ও বাণিজ্য-ব্যাপারে বিশিষ্ট রূপে পারদর্শী হইয়া যত্ন ও পরিশ্রম পূর্বক তাহা নির্বাহ করে, ও পরিমিত-ব্যয়ী হয়, তবে সে ব্যক্তি দ্বেষী ও পরদ্রোহী হইলেও বিপুল ধন সঞ্চয় করিতে

পারে। যদি কোন ব্যক্তি বিষয় কর্মে অনৈ-
পুণ্য প্রযুক্ত ধনোপার্জনে অক্ষম হন, এবং তন্নি-
মিত্ত কায়-ক্লেশে যথা কালে শাকান্ন আহার
করিয়া দিনপাত করেন, তথাপি তিনি যদি
ধর্ম-পথাবলম্বী থাকেন—সত্যবাদী, জিতে-
ন্দ্রিয়, সত্বপদেশক ও ঈশ্বর-পরায়ণ হয়েন,
তবে ঐ সকল যথার্থ ধর্ম প্রতিপালন করাতে
অফুল্ল ও অসন্ন চিত্তে কাল যাপন করেন
তাহাতে সন্দেহ নাই।

দ্বিতীয়তঃ—পৃথক্ পৃথক্ নিয়ম পালনের
পৃথক্ পৃথক্ সুখ, ও পৃথক্ পৃথক্ নিয়ম
লঙ্ঘনের পৃথক্ পৃথক্ দুঃখ; ইহা পূর্বোক্ত
উদাহরণ সমুদায় দ্বারাই এক প্রকার সপ্র-
মাণ হইয়াছে। নাবিকেরা বায়ু জলাদির
স্বভাব জানিয়া ভৌতিক নিয়মানুসারে সু-
ন্দর রূপে নৌকা চালনা করিলে নিরুদ্বেগে
নির্দিষ্ট স্থানে উত্তীর্ণ হয়, আর তাহার
অন্যথা হইলে জলমগ্ন হইয়া অব্যাজে মৃত্যু
গ্রাসে পতিত হইতে পারে। এইরূপে, যিনি
শারীরিক নিয়ম প্রতিপালন করেন, তিনি
শারীরিক সুখ স্বচ্ছন্দতা লাভ করেন, এবং
যিনি তাহা লঙ্ঘন করেন, তিনি রোগাক্রান্ত

হইয়া বল-হীন ও বীৰ্য্য-হীন হইলেন । যিনি ধর্ম-বিষয়ক নিয়মানুবর্তী হইয়া সদাচারে ও সদ্যবহারে রত থাকেন, চন্দ্রালোক-তুল্য সুনির্মল আনন্দ-জ্যোতি তাঁহার চিত্তোপরি বিকীর্ণ থাকে, এবং লোকে তাঁহাকে মনের সহিত ভালবাসে ও সমাদর করে । আর তাহার বিপর্য্যয় করিলে সে সুখ হইতে বঞ্চিত হইয়া আন্তরিক গ্লানিযুক্ত, লোকের অপ্রিয়, ও রাজদ্বারেও দণ্ডনীয় হইতে হয় । যে যদ্বিষয়ক নিয়ম প্রতিপালন করে, পরমেশ্বর তাহাকে তদ্বিষয়ক সুখ প্রদান করেন, এবং যে যদ্বিষয়ক নিয়ম লঙ্ঘন করে, তাহার প্রতি তদ্বিষয়ক দুঃখ বিধান করেন । সজ্জেকপে কহিতে হইলে এই কথা বলিতে হয়, যে যাহা চায়, পরমেশ্বর তাহাকে তাহাই দেন ।

তৃতীয়তঃ—প্রাকৃতিক নিয়ম সমুদায় অপরিবর্তনীয় ও অনতিক্রম্য এবং সর্বস্থানে ও সর্ব সময়েই সমান, কিছুতেই তাহার অন্যথা হয় না । বাঙ্গলা দেশেই হউক, বা সিংহল দ্বীপেই হউক, সর্ব স্থানেই অপরিমিত ভোজন করিলে শরীরের অসুখ বোধ হয়, ও রোগ জন্মে । যথা নিয়মে ব্যায়াম করিলে হিন্দু-

স্থানের লোকেই বলিষ্ঠ হয়, আর অন্য দেশীয় লোকে হয় না, এমত কখন, হইতে পারে না। ইন্দ্রিয়-দোষ দ্বারা কেবল বাঙ্গালিরই বল-হানি ও বীর্য্য-হানি হয়, আর শিখ ও ইংরাজদিগের সে শাস্তি হয় না, এমত কখনই হইতে পারে না। যে ব্যক্তি দোষ-শূন্য শারীরিক প্রকৃতি প্রাপ্ত হইয়া নির্বিঘ্নে ভূমিষ্ঠ হইয়াছে, এবং তদবধি সমস্ত শারীরিক নিয়ম প্রতিপালন করিয়া আসিতেছে, সে ব্যক্তি যে যাবজ্জীবন রোগের আঁলায় আলাতন ও মৃত-কম্প হইয়া কাল হরণ করে, ইহা কোন স্থানে কোন কালেই ঘটে না। প্রত্যুত, যে ব্যক্তি রোগাক্রান্ত হইয়া ভূমণ্ডলে জন্ম গ্রহণ করিয়াছে, এবং অহিতকারি দ্রব্য ভক্ষণ, দুর্গন্ধ স্থানের বায়ু সেবন, শারীরিক ও মানসিক পরিশ্রমের আতিশয্য প্রভৃতি নানা প্রকার অহিতাচরণ করিয়া ক্রমাগত শারীরিক নিয়ম সকল লঙ্ঘন করিয়া আসিয়াছে, সে ব্যক্তি যে দ্রুতি, বলিষ্ঠ ও বীর্য্যবান হইয়া সদা সুস্থ থাকে, ইহারও দৃষ্টান্ত কি পঞ্জাব, কি কাবুল, কি চীন, কি আমেরিকা কুত্রাপি কদাপি প্রাপ্ত হওয়া যায় না। যে

ব্যক্তি রিপু-পরতন্ত্র হইয়া অনবরতই পাপ পক্ষে যুগ্ম আছে, সে যে শাস্ত-চিত্ত হইয়া জ্ঞান-ধর্মোৎপাদ্য নির্মল আনন্দ নীরে অব-গাহন করে, ও শুদ্ধ-চিত্ত-ব্যক্তিদ্বিগের আদর-ণীয় ও প্রিয় পাত্র হয়, ইহার দৃষ্টান্ত কি কাশী, কি মক্কা, কোথাও দৃষ্ট হয় না।

চতুর্থতঃ—যদিও সকল প্রকার প্রাকৃতিক নিয়ম পরস্পর স্বতন্ত্র, কিন্তু তাহার। পরস্পর সহকারি বটে । তাহারদের এ প্রকার আশ্চর্য্য সম্বন্ধ নিকপিত আছে, যে এক প্রকার নিয়ম পালন করিলে অন্যান্য প্রকার নিয়ম প্রতিপালনের সুবিধা হয়, এবং এক প্রকার নিয়ম লঙ্ঘন করিলে অন্যান্য প্রকার নিয়ম প্রতিপালনের ব্যতিক্রম ঘটে । প্রথমতঃ—ভৌতিক নিয়ম লঙ্ঘন করিলে তদ্বিষয়ক অনিষ্ট ঘটনা হইয়া শারীরিক ও মানসিক নিয়ম প্রতিপালনের ব্যাঘাত জন্মে । এই প্রকার ভৌতিক নিয়ম আছে, যে জড় বস্তু উচ্চ স্থান হইতে পতিত হইলে ভগ্ন বা আহত হয় । তৎ প্রতিপালনে সাবধান না হওয়াতে অকস্মাৎ অট্টালিকার ছাদ হইতে পতিত হইয়া যদি কোন ব্যক্তির হস্ত পদাদি ভগ্ন হয়,

তবে তদ্বারা তাহার শরীর ও মন অসুস্থ হইয়া শারীরিক ও মানসিক নিয়ম-প্রণালীর বিশৃঙ্খলা ঘটিয়া উঠে । তাহাতে তাহার শরীর অপটু হইয়া রোগাশ্রমদ হইতে পারে, এবং মস্তকস্থ মস্তিষ্ক রাশি আহত হইয়া মানসিক নিয়ম প্রতিপালনের ব্যতিক্রম ঘটিতে পারে । দ্বিতীয়তঃ—সম্যক্ রূপে শারীরিক নিয়ম প্রতিপালন দ্বারা শারীরিক স্বাস্থ্য লাভ হইলে শরীর সবল ও মন ক্ষুভ্তিবিশিষ্ট হয়, এবং তদ্বারা ভৌতিক ও মানসিক নিয়ম প্রতিপালনে সমধিক সমর্থ হওয়া যায় । সুস্থ-কায় ব্যক্তি কোন ভৌতিক নিয়ম লঙ্ঘন করিয়া আঘাত প্রাপ্ত হইলে তাহার আশু প্রতীকার হইতে পারে, কিন্তু অসুস্থ-কায় ব্যক্তি তদ্রূপ আহত হইলে অনায়াসে আরোগ্য লাভ হওয়া অতি কঠিন । 'শরীর' সুস্থ না থাকিলে বুদ্ধিবৃত্তি সতেজ থাকে না, এবং ধর্ম-প্রবৃত্তিও ক্ষুভ্তি পায় না ; সুতরাং বিদ্যানুশীলন বা ধর্মানুষ্ঠানার্থ প্রগাঢ় পরিশ্রম পূর্বক তত্ত্বদ্বিষয়ক নিয়ম প্রতিপালনে সম্যক্ রূপে সমর্থ হওয়া যায় না । তৃতীয়তঃ—মানসিক নিয়ম বিষয়েও এই প্রকার প্রণালী । সমু-

দায় মনোবৃত্তি যথা নিয়মে সঞ্চালন করিলে কেবল অপরিয়াপ্ত সুখ সন্তোষ করা যায় এমনত নহে, তদ্বারা ভৌতিক পদার্থ সকল আমার-দিগের আয়ত্ত করিয়া যথেষ্ট উপকার প্রাপ্ত হওয়া যায়। বুদ্ধিবৃত্তি সকল সম্যক্ রূপে মার্জিত ও উন্নত না করিলে তাহা কোন ক্রমে সম্পন্ন হইতে পারে না। আর, সমস্ত মনো-বৃত্তি যথা নিয়মে চালনা করিলে শারীরিক স্বাস্থ্য লাভও হয়। তন্মিন্ন, বুদ্ধি বিষয়ক নি-য়ম লঙ্ঘন করিয়া বিদ্যাভ্যাসার্থ অযথোচিত নিয়মাতিরিক্ত মানসিক পরিশ্রম করিলে, এবং ধর্ম বিষয়ক নিয়মে অবহেলা করিয়া লম্প-টতাচরণ ও তদানুষঙ্গিক অন্যান্য অহিতা-চারে আসক্ত হইলে, শারীরিক পীড়া জন্মিয়া অশেষ ক্লেশ উৎপন্ন হয়। কাহারও কাহা-রও শরীর একপ রুগ্ন ও ভগ্ন হইয়া পড়ে, যে তাহারদিগকে আপন আপন যৌবন কা-লের কুক্রিয়ার প্রতিকল বৃদ্ধ কালেও ভোগ করিতে হয়। অতএব, পরমেশ্বর প্রাকৃতিক নিয়ম সমুদায় যেমন পরস্পর স্বতন্ত্র করিয়া দিয়াছেন, তেমনি আবার তাহারদিগকে পর-স্পর সম্বন্ধ করিয়া অতি আশ্চর্য্য কৌশল প্র-

কাম করিয়াছেন । সমুদায় নিয়ম পৃথক্ পৃথক্ থাকিয়াও পরস্পর মিলিত হইয়া আমাদেরিগের শুভ সাধন করিতেছে ।

পঞ্চমতঃ—মানব প্রকৃতির সহিত সমুদায় প্রাকৃতিক নিয়মের ঐক্য আছে । আমাদেরিগের বুদ্ধি-সাধ্যানুসারে উত্তম রূপে নৌকা নির্মাণ করিয়া উত্তম-রূপে চালনা করিলে যদি তাহা না ভাসিয়া জলমগ্ন হইত, তবে আমাদেরিগের বুদ্ধিবৃত্তির সহিত তাহার ঐক্য থাকিত না । কিন্তু যখন মগ্ন না হইয়া জলের উপর ভাসিতে থাকে, তখন এ নিয়মের সহিত আমাদেরিগের বুদ্ধিবৃত্তির সম্পূর্ণ ঐক্য আছে বলিতে হইবেক । যদি মদিরা-মত্ত ও ব্যভিচারাক্রান্ত ব্যক্তি-দিগের স্ব স্ব দোষের আতিশয্য দ্বারা শারীরিক সুস্থতা ও সুখ বৃদ্ধি হইত, তবে তাহার সহিত আমাদেরিগের বুদ্ধি ও ধর্ম বিষয়ক নিয়মের ঐক্য থাকিত না । কিন্তু জগদীশ্বর তাহা না করিয়া উভয় প্রকার নিয়মের পরস্পর ঐক্য রাখিয়াছেন । আমাদেরিগের দয়াদি ধর্ম-প্রবৃত্তি থাকাতে ভূমণ্ডলের দুঃখ হ্রাস ও সুখবৃদ্ধি করিতে ইচ্ছা হয় । জগতের ভৌতিক ও শারীরিক নিয়মের সহিতও তাহার ঐক্য দেখিতেছি,

কারণ ঐ সকল নিয়ম প্রতিপালন করিলেই
 দুঃখ নিবৃত্তি হইয়া সুখ প্রাপ্তি হয়। যাবতীয়
 দুঃখ সেই সকল নিয়ম লঙ্ঘনের ফল। কিন্তু
 তাহাও পরমেশ্বর এই অভিপ্রায়ে নিয়োজন
 করিয়াছেন, যে আমরা একবার নিয়ম লঙ্ঘনের
 দুঃখময় ফল অবগত হইয়া যাহাতে তদ্রূপ বি-
 রুদ্ধ কর্ম পুনর্ব্বার না হয়, তাহার চেষ্টা করি।
 যদি প্রবল ঝটিকার সময় কোন বেগবতী নদীর
 ভয়ানক তরঙ্গোপরি নৌকা বাহন করা যায়,
 আর তাহা জল মগ্ন হয়, তবে তাহা দেখিয়া
 লোকের নৌকা-বাহন-বিষয়ক নিয়ম প্রতি-
 পালনের আবশ্যকতা দৃঢ়রূপে হৃদয়ঙ্গম হয়।
 পরিমিত ভোজন ও পরিমিত পরিশ্রম না
 করিলে যে রোগ জন্মে, তাহাও পরমেশ্বর
 এই আশয়ে নিয়োজন করিয়াছেন, যে তদৃষ্টে
 আমরা সাবধান হইয়া শারীরিক নিয়ম প্রতি-
 পালনে যত্নবান্ হইব, এবং তদ্বারা শারী-
 রিক পীড়া ও অকাল-মৃত্যুর হস্ত হইতে নিস্তার
 পাইয়া স্বাস্থ্য-সুখ সম্ভোগ করিব। ধর্ম্ম বিষ-
 য়ক নিয়ম ভঞ্জন করিলে যে মনে মনে ঘৃণা,
 গ্লানি, অসন্তোষ, ও বিরক্তি বোধ হয়, তদ্বারা
 পরমেশ্বর এই অভিপ্রায় প্রকাশ করিয়াছেন,

যে আমরা ঐ নিয়ম ভঙ্গের দুঃখময় ফল জ্ঞাত হইয়া ধর্ম বিষয়ক নিয়ম প্রতিপালন পূর্বক আত্ম প্রসাদ ও নির্মল আনন্দ লাভ করি।

যখন কোন প্রাকৃতিক নিয়মের এ প্রকার লঙ্ঘন হয়, যে তাহার প্রতীকারের আর সম্ভাবনা থাকে না, তখন মৃত্যু আসিয়া সকল দুঃখ নিবারণ করে। যদি কোন ভৌতিক নিয়ম লঙ্ঘন হওয়াতে কোন নৌকা সমুদ্র-গর্ভে নিমগ্ন হয়, আর নৌকাবদ্ধ ব্যক্তিদিগের তীর প্রাপ্তির উপায় না থাকে, তবে তাহারদিগের তদবস্থায় চিরকাল জীবিত থাকা যে কি প্রকার যাতনার বিষয়, তাহা চিন্তা করিলেও হৃৎকম্প হয়। কিন্তু পরমেশ্বর-প্রসাদে তৎকালে মৃত্যু অমৃত স্বরূপ হইয়া তাহারদিগের যন্ত্রণানল এককালে নির্ব্বাণ করে। যদি শারীরিক নিয়ম লঙ্ঘন দ্বারা কোন যুবা পুরুষের পাকস্থলী ও হৃদয়াদি মর্ম স্থান নষ্ট হয়, তবে তৎকালে মৃত্যুই শ্রেয়; কারণ হৃদয়াদি ব্যতিরেকে চিরকাল জীবিত থাকিতে হইলে যে প্রকার দুঃসহ যন্ত্রণার সম্ভাবনা, তাহা মনে করাও যন্ত্রণা। অতএব পরম মঙ্গলাকর পরমেশ্বর এস্থলে তাঁহাকে ইহ লোক হইতে

অবসর করিয়া তাঁহার যজ্ঞগার শেষ করেন ।
 এস্থলে অত্যাও পরম হিতকারী বন্ধু । সমুদায়
 সংসার জগদীশ্বরের এক অচিন্তনীয় অনির্বচ-
 নীয় কৌশল-সম্পন্ন মহান্ যজ্ঞঃ; বিশ্বাধিপতি
 বিশ্ব-যজ্ঞাক্রম জীবদিগের সুখ স্বচ্ছন্দতা সম্পা-
 দন নিমিত্ত নানা প্রকার শুভকর নিয়ম সংস্থা-
 পন করিয়াছেন, এবং সমুদায় নিয়মের সমুদায়
 কৌশলই সংসারের মঙ্গলাভিপ্রায়ে কল্পনা
 করিয়াছেন । আপাততঃ যাহা অশুভ জ্ঞান হয়,
 সবিশেষ বিবেচনা করিয়া দেখিলে তাহাই
 পরম শুভকর বলিয়া নিশ্চয় হয় । যদি কো-
 থাও দেখি, ছুই বলিষ্ঠ পুরুষ এক দুর্বল
 বালকের হস্ত পদ ধৃত করিয়া রহিয়াছে, আর
 এক জন এক খান তীক্ষ্ণ অস্ত্র লইয়া তাহার
 উরুদেশে প্রবেশ করাইতেছে, এবং তা-
 হাতে অনর্গল রক্ত নিঃসৃত হইতেছে, ও সেই
 বালক উচ্চৈঃস্বরে চীৎকার করিতেছে,—
 যদি অকস্মাৎ এ প্রকার দৃষ্টি করি, আর ঐ
 কর্মের অভিসন্ধি ও ফলাফল বিবেচনা না করি,
 তবে ঐ তিন ব্যক্তিকেই অত্যন্ত নিষ্ঠুর ও দু-
 র্বৃত্ত নরাধম বলিয়া অবশ্যই নিন্দা করি তা-
 হার সন্দেহ নাই । কিন্তু পরে যদি শুনি, ঐ

বালকের উরুদেশে একটা বিস্ফোটক হই-
 যাছে, যে ব্যক্তি তাহাতে অস্ত্র করিতেছে সে
 একজন সুনিপুণ অস্ত্র-চিকিৎসক, আর দুই
 জনের মধ্যে এক জন ঐ বালকের পিতা ও
 এক জন তাহার ভ্রাতা, তবে আমরাদিগের
 নিশ্চয় বোধ হয়, যে ঐ কৰ্ম্ম বালকের আপা-
 ততঃ ক্লেশদায়ক বটে, কিন্তু তাহার হিতার্থেই
 সঙ্কল্পিত হইয়াছে। তখন আর ঐ তিন
 ব্যক্তিকে নিন্দা না করিয়া বরঞ্চ বালকের হি-
 তাকাঙ্ক্ষি বলিয়া তাঁহারদিগের প্রতি অনুরাগ
 প্রকাশ করিতে প্রবৃত্তি হয়। সেই প্রকার,
 পরমেশ্বর সমস্ত দুঃখই সংসারের হিতাভি-
 প্রায়ে সৃজন করিয়াছেন। জগতে দুঃখ
 আছে বলিয়াই যে ব্যক্তি জগদীশ্বরকে নি-
 র্দয় বলে, তাহার অতিশয় ভ্রান্তি। যদি
 তাঁহার মনুষ্যকে যন্ত্রণা দিবার অভিপ্রায়
 থাকিত, তবে তিনি সমস্ত নিয়মই মানুষের
 দুঃখজনক করিতেন। তিনি এমত করিতে
 পারিতেন, যে আমরা যাহা আহা করি তা-
 হাই তিক্ত ও কটু, যাহা শ্রবণ করি তাহাই
 বিকট ও কৰ্কশ, যাহা দর্শন করি তাহাই কুৎ-
 সিত ও ভয়ানক, এবং যাহার ভ্রাণ পাই

তাহাই দুর্গন্ধ ও পীড়াদায়ক । কেহ কেহ একপ কহিতে পারে, যে সুখ ও দুঃখ কিছুই তাঁহার অভিপ্রেত নহে, তিনি কার্য্য গতিকে যে বস্তুর যেমন স্বভাব হইয়া উঠিয়াছে, সেই রূপই রাখিয়াছেন । ইহা হইলে জগতের সকল নিয়ম এক প্রকার হইবার সম্ভাবনা থাকিত না, কোন নিয়ম বা সংসারের শুভদায়ক হইত, কোন নিয়ম বা অশুভদায়ক হইত । কিন্তু জগতের যত নিয়ম প্রকাশ পাইয়াছে, তাহার একটিও অশুভদায়ক নহে । নিয়ম লঙ্ঘনেতেই সকল দুঃখ ঘটে, কিন্তু তজ্জন্য বিশ্ব-নিয়ন্তাকে মঙ্গল স্বরূপ ব্যতিরেকে কদাপি অমঙ্গল স্বরূপ বলা যায় না । কলম কর্ত্তন করিতে অঙ্গুলি ছেদন হইলে কেহ এমত কথা বলে না, যে কর্ম্মকার অঙ্গুলি-ছেদনের নিমিত্ত ছুরিকা প্রস্তুত করিয়াছে । সেই রূপ লোকের দন্তশূল ও শিরঃপীড়া হয় বলিয়া কেহ একপ নিশ্চয় করে না, যে পরমেশ্বর মনুষ্য গণকে যন্ত্রণাদিবার নিমিত্ত দন্ত ও মস্তকের সৃষ্টি করিয়াছেন । দন্ত ও মস্তকের যে হিতজনক প্রয়োজন তাহা প্রসিদ্ধই আছে, কেবল শারীরিক নিয়ম ভঙ্গ হইলেই তাহার বৈলক্ষণ্য হয় ।

মঙ্গল স্বরূপ পরমেশ্বর সমুদায় নিয়মই
আমাদের সুখদায়ক করিয়াছেন, এবং নিয়ম
লঙ্ঘন করিলে যাবৎ দুঃখ ঘটে, তাহাও আ-
মারদিগকে নিয়মানুগামি করিবার নিমিত্তেই
সৃষ্টি করিয়াছেন, এবং সে দুঃখও মোচন
করিবার প্রবৃত্তি ও শক্তি দিয়াছেন। তাঁহার
সমুদায় কৌশলই মঙ্গল কৌশল, এবং অন্তে
আমারদিগের মঙ্গল হয় ইহাই তাঁহার অভি-
প্রায়, এই প্রকার জ্ঞান করিয়া তাঁহার নিয়-
মানুযায়ি কার্য্য করাই আমারদিগের পরম
ধর্ম ও পরম সুখের নিদান।

দ্বিতীয়াধ্যায়

মনুষ্যের প্রকৃতি নির্ণয় ও বাহ্য বস্তুর সহিত
তাহার সম্বন্ধ নিকপণ।

জগদীশ্বর মনুষ্যকে কিরূপ প্রকৃতি দিয়া-
ছেন, এবং বাহ্য বস্তুর সহিত তাহার কিরূপ
শুভকর সম্বন্ধ নিকপণ করিয়াছেন, তদ্বিষয়ের
অনুসন্ধান করা আবশ্যিক।

মনুষ্যের ভৌতিক প্রকৃতি।

অস্থি, মাংস, রক্ত, নাড়ী, মস্তিষ্ক প্রভৃতি
যে যে বস্তু দ্বারা শরীর নির্মিত হইয়াছে, তৎ
সমুদায়ই ভৌতিক পদার্থ দ্বারা রচিত ও
ভৌতিক নিয়মের অধীন। অপরাপর জড়
পদার্থের ন্যায় শরীরও উচ্চ ভূমি হইতে
পতিত হইলে আহত হয়, এবং অগ্নি-সংযুক্ত
হইলে দগ্ধ হয়। অতএব মনুষ্যের সুখ দুঃখ
জগতের ভৌতিক নিয়মের উপর কত নির্ভর

করে, তাহা জানিতে হইলে প্রথমতঃ ভৌতিক পদার্থ সমুদায়ের কার্য্য দেখিয়া ভৌতিক নিয়ম নিরূপণ করিতে হয়; দ্বিতীয়তঃ শরীরের কি প্রকার গঠন, ও কি প্রকার নিয়মে তাহার কার্য্য নিরূহ হয়, তাহার সবিশেষ বুঝান্ত জানিতে হয়; তৃতীয়তঃ তাহার সহিত ভৌতিক নিয়মের কি প্রকার সম্বন্ধ, তাহারও নির্দেশ করিতে হয়। এ সমুদায় সম্পন্ন হইলে, আমরা ভৌতিক নিয়মানুযায়ী কার্য্য করিয়া তদ্বারা কত উপকৃত হইতে পারি তাহা নিশ্চয় করিতে পারা যায়; এবং ভৌতিক পদার্থের অনিবার্য্য শক্তি দ্বারাই বা আমাদেরিগের কত দুঃখ হয়, আর অজ্ঞান প্রযুক্তই বা কত ক্লেশের উৎপত্তি হয়, তাহাও নির্দ্ধারিত করা যাইতে পারে। পশ্চাৎ এ বিষয়ের বিস্তারিত বিবরণ করা যাইবেক, সম্প্রতি ইহা নিশ্চয় জানা উচিত, যে যথা নিয়মে ভৌতিক পদার্থের নিয়োগ করিতে না পারিলেই দুঃখোৎপত্তি হয়। অগ্নির দাহিকা শক্তি আছে। তদ্বারা লোকের অন্ন পাক, অস্ত্রাদি নির্মাণ, বাষ্প-যন্ত্রের কার্য্য সম্পাদন, ইত্যাকার সহস্র সহস্র প্রকার উপকার দর্শিতে

ছে। তবে যে অগ্নি দ্বারা কাহারও গৃহ দাহ হইয়া স্বর্কনাশ, বা শরীর দগ্ধ হইয়া প্রাণ সংহার, অথবা অন্য প্রকার অশুভ ঘটনা হয়, তাহা অসাবধানতা প্রযুক্তই হইয়া থাকে। বল ও বুদ্ধি চালনা দ্বারা ঐ সমস্ত বিপদের নিবারণ হইতে পারে কি না তাহা বিবেচনা করা উচিত। এই প্রকার যুক্তি-পরম্পরা ক্রমে পর্যালোচনা করিয়া দেখিলে ইহা দ্রব জ্ঞান হইবে, যে পরমেশ্বর মনুষ্যের মুখাভি-প্রায়েই সমস্ত ভৌতিক নিয়ম সংস্থাপন করিয়াছেন, এবং তদ্বারা যে দুঃখের উৎপত্তি হয় তাহা প্রায়ই আমারদিগের নিয়ম প্রতিপালনে ক্রটি প্রযুক্তই হইয়া থাকে। যদি আমরা বিশ্ব-সম্রাটের সমুদায় ভৌতিক ও অন্যান্য নিয়ম প্রতিপালনে সমর্থ হই, তবে ভুলোক পরম মুখাম্পদ স্বর্গলোক হইয়া উঠে।

মনুষ্যের শারীরিক প্রকৃতি।

মনুষ্য শরীরী জীব, সুতরাং শারীরিক নিয়মের অধীন। পূর্বেই নির্দেশ করা গিয়াছে, যে শরীরী বস্তু শরীরান্তর হইতে উৎপন্ন হয়, আহার দ্বারা সজীব থাকে, এবং ক্রমে ক্রমে তাহার বৃদ্ধি, ক্রাস ও ভঙ্গ হয়।

এই সমুদায় বিষয় যথা নিয়মে সম্পন্ন হইলে স্বথোৎপত্তি হয়, আর তাহা না হইলেই দুঃখ ঘটনা হয়।

প্রথমতঃ- বীজ যদি সর্বোৎকৃষ্ট-সুন্দর হয়, তবে তদুৎপন্ন শরীরী বস্তুও সর্ব-মূলক্ষণ-সম্পন্ন হয়, আর বীজের বৈলক্ষণ্য হইলে তাহা হইতে যে বস্তুর উৎপত্তি হয় তাহারও বৈলক্ষণ্য ঘটে। যাহার কোন কোন জীবনোপযোগী অংশ নষ্ট হইয়াছে, এমত বীজ বপন করিলে, তদুৎপন্ন তৃণও তদুৎ অংশে হীন হয়। যদি কোন বীজের সমুদায় অংশ পরিপূর্ণ থাকে, কিন্তু কুস্থানে স্থিতি বা কারণান্তর দ্বারা তাহার ব্যতিক্রম ঘটে, অথবা তাহা সুন্দর রূপ পরিপক্ব না হইয়া থাকে, তবে তদুৎপন্ন বৃক্ষ সতেজ হয় না, এবং দীর্ঘ কাল সজীবও থাকে না। মনুষ্যের বিষয়েও এই প্রকার নিয়ম। অল্প বয়সে বা পীড়িতাবস্থায় সন্তান হইলে সে সন্তান কখনই দৃঢ় পুষ্ট ও বলিষ্ঠ হয় না; বরঞ্চ অল্প কালেই জরাগ্রস্ত ও মৃত্যু গ্রাসে পতিত হইয়া অপরাধি পিতা মাতাকে শোকাবুল করিয়া যায়।

দ্বিতীয়তঃ। শরীরি জীবদিগের আপন

আপন স্বভাবানুযায়ী উৎকৃষ্ট-গুণাবিত পরি-
মিত রূপ জল, বায়ু, জ্যোতি, ও খাদ্য সামগ্রী,
এবং অন্যান্য প্রয়োজনীয় দ্রব্য আজন্ম মর-
ণান্ত নিত্য আবশ্যক। এই নিয়ম প্রতি-
পালন করিলে দেহের শক্তি ও মনের বৃদ্ধি
সমুদায় সতেজ হয়, শরীরের সুস্থতা বোধে
চিত্তের ক্ষুধা জন্মে, এবং অন্তঃকরণ সর্বদা
প্রফুল্ল থাকে। রোগ, যন্ত্রণা ও অকাল-মৃত্যু
এ সমুদায় ঐ নিয়ম লঙ্ঘনের ফল। বক্ষ্য-
মাণ উদাহরণ দ্বারা এ বিষয় দৃঢ়রূপে হৃদয়-
ঙ্গম হইতে পারে। পূর্বে আয়ারল্যান্ড দ্বীপের
এক সাধারণ স্মৃতিকাগারে উত্তম বায়ু সঞ্চা-
য়ের উপায় ছিল না, এ প্রযুক্ত তথায় যত
সন্তান জন্মিত, ভূমিষ্ঠ হইবার পর নয় দিনের
মধ্যে তাহার ষষ্ঠ অংশের মৃত্যু হইত। পরে
অধ্যক্ষেরা তথায় উপাদেয় বায়ু সঞ্চালনের
উপায় করিয়া দিলে, উক্ত কালের মধ্যে কেবল
বিংশতি ভাগের এক ভাগ মাত্র কাল প্রাপ্ত
হইতে লাগিল।

তৃতীয়তঃ। শরীরের সমুদায় অঙ্গ যথা নিয়মে
চালনা করা আবশ্যক। এ নিয়ম প্রতিপালন
করিলে শরীর স্বচ্ছন্দ থাকে, অঙ্গ চালনার সম-

যেই দেহের ক্ষুধা হয়, এবং অন্যান্য বিবিধ প্রকার উপকার উদ্ভাবিত হয়; আর তাহা লঙ্ঘন করিলে শরীরের সুস্থতা ভঙ্গ, গ্লানি বোধ, এবং সর্বদা অসুখ ও ক্লেশ ঘটনা হয়, সুতরাং শরীর ও মনের শক্তি সমুদায় নিস্তেজ হইতে থাকে।

বাস্কলা দেশের লোক এই ত্রিবিধ শারীরিক নিয়ম ভঙ্গ বিষয়ের যেমন উদাহরণ-স্থল এমন আর দ্বিতীয় নাই। এ দেশের লোক কি নিমিত্ত একপ দুর্বল ও নিবীৰ্য্য হইল? কি নিমিত্ত ভিন্ন জাতীয় রাজার অধীন হইয়া এ প্রকার হয় হইল? কি নিমিত্ত এমত দরিদ্র ও দুর্দশাগ্রস্ত হইল? এ সমস্ত প্রশ্নের একমাত্র সিদ্ধান্ত এই, যে তাহারা পরম কারুণিক পরমেশ্বরের এই সকল নিয়ম প্রতিপালন না করিয়া এ প্রকার দুরবস্থান্বিত হইয়াছে।

জগদীশ্বর মনুষ্য ভিন্ন অন্য কোন জন্তুকে বিবেক-শক্তি প্রদান করেন নাই, কিন্তু তৎপরিবর্তে বাহ্য বস্তুর সহিত তাহারদের প্রকৃতির এ প্রকার সংঘর্ষ করিয়া দিয়াছেন, যে তাহারদের তৃণাদি ভোজ্য বস্তু সমুদায় বিনা যত্নে উপলব্ধ হয়—বসুমতী আপনা হইতে

৬০ মনুষ্যের শারীরিক প্রকৃতি

অনবরতই তাহারদের খাদ্য সামগ্রী প্রস্তুত করিয়া রাখিতেছেন। সেই রূপ, পরমেশ্বর তাহারদের গাত্রাচ্ছাদন নির্মাণ করিবার কৌশল-জ্ঞান প্রদান করেন নাই, কিন্তু তদ্বিনিময়ে পক্ষ লোমাদি দ্বারা তাহারদের শরীর আবৃত ও সুশোভিত করিয়া দিয়াছেন। জগদীশ্বর যখন পশু, পক্ষি, পতঙ্গাদির বিষয়ে এইরূপ অচিন্ত্য জ্ঞান ও বিচিত্র শক্তি প্রকাশ করিয়াছেন, তখন ইচ্ছা করিলে মনুষ্যের বিষয়েও একরূপ করিতে পারিতেন, যে তাঁহার শস্য কলাদি সমস্ত ভোজ্য দ্রব্য বিনা আয়াসে আপনা হইতেই উৎপন্ন হইত, এবং তাঁহার গাত্রাচ্ছাদনও স্বভাবতই তাঁহার শরীরে জন্মিতে পারিত। কিন্তু জগদীশ্বর আমারদিগের হিতাভিপ্রায়েই তাহা করেন নাই। তাঁহার এই অখণ্ডনীয় অনুমতি আছে, যে ভূমি কর্ষণ, বীজ বপন, শস্য ছেদন ও বস্ত্র বয়নাদি ব্যতিরেকে কখনই লোক যাত্রা নির্বাহ হইবেক না। কিন্তু জগদীশ্বর যেমন আমারদিগকে অযত্ন-সম্পন্ন অন্ন বস্ত্র প্রদান করেন নাই, তেমন তৎ সমুদায় সম্পাদনার্থে আমারদিগকে শারীরিক ও মানসিক শক্তি সমুদায়

প্রদান করিয়াছেন, আর তিনি যেমন মানসিক ও শারীরিক শক্তি প্রদান করিয়াছেন, তদুপযোগি উর্বরা ভূমি সমুদায়ও চতুর্দিকে বিস্তার করিয়া রাখিয়াছেন, ও বহু-গুণোৎপাদক বীজ সকল সৃষ্টি করিয়াছেন। তিনি আমাদেরিগকে রচনা শক্তি প্রদান করিয়াছেন, ও বিবিধ প্রকার বস্ত্র-বয়নোপযোগি দ্রব্যের সৃজন করিয়াছেন, আমরা বুদ্ধি-বলে তদ্বারা উত্তমোত্তম বিচিত্র বসন প্রস্তুত করিয়া শীত নিবারণ ও শোভা বর্দ্ধন করিতে পারি। পরম কারুণিক পরমেশ্বর আমাদেরিগকে অ-যত্ন-সম্ভূত অন্ন বস্ত্র না দিয়াও সকলি দিয়া রাখিয়াছেন। আপাততঃ পশুদিগকে মনুষ্যের অপেক্ষা সুখি ও ভাগ্যবর বোধ হয়, কিন্তু সন্নিবেচনা পূর্বক মনুষ্যের স্বভাব ও বাহ্য বস্তুতে তাহার উপযোগিতার বিষয় পর্যালোচনা করিয়া দেখিলে নিশ্চয় হইবে, যে ভূমণ্ডলে মনুষ্যই সর্ব-শ্রেষ্ঠ। অন্ন বস্ত্র আহরণের নিমিত্ত তাঁহাকে যে কার্যিক ও মানসিক পরিশ্রম করিতে হয়, তাহাতেই তাঁহার এমত মহত্ত্ব হইয়াছে। জগদীশ্বর লোকের অন্ন বস্ত্রের প্রয়োজনের সহিত ভূমির উৎপা-

৬২ মনুষ্যের শারীরিক প্রকৃতি

দকতা গুণের যে প্রকার শুভকর সম্বন্ধ নিক-
পিত করিয়া দিয়াছেন, তাহাতে পৃথিবীর
কর্মক্ষম ব্যক্তির প্রতিদিন কিঞ্চিৎ কিঞ্চিৎ
পরিশ্রম করিলেই সকল লোকের আহাঁর,
ব্যবহার ও মুখ-সন্তোষোপযোগী যথেষ্ট দ্রব্য
প্রস্তুত হয়। এক জন ইউরোপায় পণ্ডিত
গণনা করিয়া দেখিয়াছিলেন, যে যদি প্রত্যেক
স্ত্রী ও পুরুষ প্রতিদিন দশ দণ্ড মাত্র কর্ম
বিশেষে নিযুক্ত থাকে, তবে লোকযাত্রা-নি-
র্ঝাহোপযোগি সমুদয় আবশ্যক ও সুখোৎ-
পাদক সামগ্রী প্রাপ্ত হওয়া যায়, এবং তাহা
হইলে দুঃখ ও দরিদ্রতা পৃথিবী হইতে নির্ঝা-
সিত হয়; অবশিষ্ট ৫০ দণ্ড কেবল অবকাশ
ও আমোদ প্রমোদের কাল থাকে।

উষ্ণ দেশীয় লোক স্বভাবতঃ দুর্বল, এ
নিমিত্ত পরমেশ্বর তথাকার ভূমিও উর্বরা
করিয়াছেন, অতএব তাহারদিগের অল্প পরি-
শ্রমে লোকযাত্রা নির্ঝাহ হয়, সুতরাং সে দে-
শের লোকের যেমন বল, সেইরূপ অল্প শ্রমে-
রই প্রয়োজন। প্রথর সূর্য্য কিরণে দগ্ধ হও-
য়াতে এ দেশের লোক অত্যন্ত ক্ষীণ ও নিবীৰ্য্য,
সুতরাং অধিক পরিশ্রমে সমর্থ নহে, কিন্তু

ঈশ্বরের কি আশ্চর্য্য কৌশল! তিনি এদেশের ভূমি একপা উর্বরা করিয়া দিয়াছেন, যে অল্প পরিশ্রমেই অধিক ফলোৎপত্তি হয়। আর উষ্ণদেশীয় লোকের বস্ত্র বয়ন ও গৃহ নির্মাণেও অধিক শ্রমের প্রয়োজন নাই। কিন্তু শীতল দেশে ভূমি অনুর্বরা, তাহাতে আবার তথায় শীত ও নীহার নিবারণার্থ ঘনতর গাভ্রাচ্ছাদন আবশ্যিক, এ প্রযুক্ত পরমেশ্বর তত্ত্বদেশের লোকদিগকে সবল শরীর দিয়া যথা প্রয়োজন শ্রমক্ষম করিয়াছেন।

প্রত্যেক দেশে তত্ত্বদেশীয় লোকের সুস্থতা-সম্পাদক, ধাতু-পোষক ও প্রয়োজনোপযোগি-বলোৎপাদক দ্রব্যের উৎপত্তি হইয়া থাকে। আত্যন্তিক শীতল দেশে যে সকল খাদ্য সামগ্রী জন্মে, তাহা ভক্ষণ করিলে উষ্ণ দেশীয় লোকের শরীর কখনই সুস্থ থাকে না, সেই রূপ অত্যন্ত উষ্ণ দেশোৎপন্ন দ্রব্য দ্বারা শীতল দেশীয় লোকের কখনই বলাধান হয় না। উত্তর-মহাসাগর-তীরবর্ত্তি অত্যন্ত শীতল দেশ সমুদায়ে বা ঐ মহাসাগরের দ্বীপ বিশেষে ধান্যাদি শস্য উৎপন্ন হয় না; তথাকার লোকেরা কেবল মাংস ও মেদ

ভক্ষণ করিয়া প্রাণ ধারণ করে। জগদীশ্বরের যে কি আশ্চর্য্য কৌশল তাহা বচনাতীত। তথায় যেমন ফল মূলাদি জন্মে না, সেই রূপ শীতের প্রভাবে লোকের তাহাতে রুচিও হয় না। অপেক্ষাকৃত উষ্ণ দেশীয় অনেকানেক ব্যক্তি তথায় গমন করিয়াছিলেন, তাঁহার-দিগকে নিত্য-ভক্ষ্য ফল, মূল ও শস্য পরি-ত্যাগ করিয়া কেবল মেদ মাংস আহার করিয়া থাকিতে হইয়াছিল। তাঁহারা কহি-য়াছেন, সেখানে ফল মূলাদি অতি বিস্বাদ বোধ হয়; তাহা আহার করিলে পীড়া জন্মে, এবং কেবল মেদ মাংস ভক্ষণেই শরীরের ক্ষুধা ও বলাধান হয়। অতএব পরমেশ্ব-রের পরমাশ্চর্য্য কৌশল ও অনির্বচনীয় করুণা বিষয়ে এই কথাই বলা উচিত, যে তথায় শ-স্যাদি দ্বারা দেহ রক্ষা হয় না বলিয়াই তিনি সে দেশের লোককে তাহা প্রদান করেন নাই। ঐ সকল হিম-প্রধান জনপদে গ্রীষ্ম কালে অ-পর্যাপ্ত পশু, পক্ষি, ও মৎস্য প্রাপ্ত হওয়া যায়, তাহাতেই লোকের সংবৎসরের আহারের সংস্থান হয়। তাহারা ঐ সমস্ত জন্তুর মেদ ও মাংস শুষ্ক করিয়া রাখে এবং শীতকালে তাহা

অতু্যপাদেয় জ্ঞান করিয়া ভোজন করে । ভারতবর্ষের উষ্ণ ভূমিতে যব, গোধূম ও তণ্ডুলাদি শস্য ও অন্যান্য বিবিধ প্রকার ফল মূল অপৰ্য্যাপ্ত রূপে উৎপন্ন হয় ; কিন্তু আশ্চর্য্য দেখ, মাংস অপেক্ষা শস্য ও ফল মূল অধিক ভক্ষণ করিলেই ভারতবর্ষীয় লোকের শরীর সুস্থ ও সবল থাকে, এবং নিরবচ্ছিন্ন মাংস আহাৰ করিলে অসুস্থ হয় । অন্ত ব্যঞ্জন ভোজন করিলে আমারদের দেশীয় লোকের যেমন তুষ্টি জন্মে, এমন আর কিছুতেই নহে । তবে উষ্ণ দেশের লোক শীতল দেশীয় লোক অপেক্ষা দুর্বল বটে, তেমন অল্প পরিশ্রমেই তাহারদের যথেষ্ট ভোজ্য ভোগ্য সামগ্রী লব্ধ হইতে পারে । ইংরাজদিগের দেশ এখানকার অপেক্ষা শীতল, তথায় শস্য অপেক্ষা করিয়া হ্রস্ব পুষ্ট গো মেষাদি পশুই অধিক জন্মে, তদনুসারে মাংস তাহারদের প্রধান খাদ্য, এবং মাংস আহাৰেই তথাকার লোক সুস্থ শরীরে থাকে । ফরাশিশদের দেশ তদপেক্ষা উষ্ণতর, তথায় যেমন শস্য জন্মে, তেমন পশুপালন হয় না ; তদনুসারে তথাকার লোকে ইংরাজ ও স্কাট লোকের অপেক্ষা

অপ্প মাংস আহার করিলেই সতেজ ও মুস্থ-
কায় থাকে। এক জন কৃষি-তত্ত্বজ্ঞ পণ্ডিত
গণনা করিয়া দেখিয়াছিলেন, যে ইংরাজেরা
যত মাংস আহার করে, ফরাশিশেরা তাহার
ষষ্ঠ অংশের অধিক ভক্ষণ করে না*।

পূর্বোক্ত সমস্ত বৃত্তান্ত দ্বারা ইহা স্পষ্ট
রূপে প্রকাশ পাইতেছে, যে জগদীশ্বর মনু-
ষ্যের শারীরিক প্রকৃতি ও তৎ-সম্বন্ধ বাহ্য বস্তু
সমুদায়কে পরস্পর উপযোগি করিয়াছেন—
অতি সুচারু রূপে পৃথিবীকে মনুষ্যের যোগ্য
ও মনুষ্যকে পৃথিবীর যোগ্য করিয়া সৃষ্টি করি-
য়াছেন, এবং যাহাতে যথোচিত অঙ্গ চালনা ও
শুষ্টিবর্দ্ধন ইহীয়া শারীরিক শক্তি সমুদায় উন্নত
হয়, তদুপযোগি ব্যবস্থা করিয়া দিয়াছেন।
পরমেশ্বর যাহারদিগকে যে শক্তি প্রদান করি-
য়াছেন, তাঁহারা তাহা যথা নিয়মে নিয়োজন
পূর্বক পরিশ্রম করিবেন, ইহাই তাঁহার অভি-

* কুম্ভ সাহেবের এই প্রকার মত। কিন্তু এক্ষণে ইউ-
রোপ ও আমেরিকা প্রদেশীয় যে সকল প্রসিদ্ধ পণ্ডিত
মৎস্য মাংসাহারে বিস্তর দোষ প্রদর্শন পূর্বক তাহা নিষিদ্ধ
কর্ম বলিয়া উল্লেখ করিতেছেন, তাঁহাদের অভিপ্রায় যুক্তি
বিরুদ্ধ বোধ হয় না।

প্রায় । মনুষ্যের মধ্যে কে কোন্ কৰ্ম করিবে তাহা তাঁহার ইচ্ছাধীন রাখিয়াছেন । কেহ ভূমি খনন করিতেছে, কেহ বা তরণি বাহন করিতেছে, কেহ বা মৃগয়ানুরাগী হইয়া মৃগ পশ্চাৎ ধাবমান হইতেছে । এ নিয়ম অমহেলা করিয়া আলস্যের বশীভূত হইলে ক্ষুধা মান্দ্য, নিদ্রা হানি, দৌৰ্ব্বল্য, শরীর ও মনের অবসাদ, চিররোগ ও পরিশেষে অকাল মৃত্যু, এই সমস্ত প্রত্যক্ষ শাস্তি ঘটিয়া থাকে । আর পরিশ্রমের আতিশয্য হইলে ধাতু ক্ষয়, শারীরিক ও মানসিক সামর্থ্য হ্রাস, জড়তা, রোগ ও আয়ুঃক্ষয় হয় । কি আক্ষেপের বিষয় ! লোকে এই পরম প্রয়োজনীয় নিয়ম গ্রাহ্য না করিয়া দুঃখানলে দগ্ধ হইতেছে ! ভোগাসক্ত ঐশ্বর্য্যবান্ ব্যক্তিরা পরিশ্রমকে দুঃখ স্বরূপ জ্ঞান করিয়া আলস্য-পরতন্ত্র হইয়া প্রথমোক্ত শাস্তি সমুদায় প্রাপ্ত হয়, আর দুঃখিরা নিয়মাতিরিক্ত পরিশ্রম ফলে শেষোক্ত বহুতর ক্লেশ ভোগ করে । কিন্তু উভয়ের মধ্যবর্ত্তি পথ অবলম্বন করাই ঈশ্বরের অভি-প্রেত । যথা নিয়মে সমুদায় অঙ্গ চালনা কর—অর্থাৎ পরিমিত পরিশ্রম কর, তাহা হই-

লেই তাঁহার নিয়ম প্রতিপালিত হইয়া যথেষ্ট
সুখ-স্বচ্ছন্দতা উপভোগ হইতে থাকিবে।

মনুষ্যের মানসিক প্রকৃতি

মনুষ্যের মানসিক বৃত্তি সমুদায়কে তিন
শ্রেণীতে বিভক্ত করা যাইতে পারে, যথা কাম,
জিঘাংসা, বুভুক্ষা, সাবধানতা প্রভৃতি যে সমস্ত
নিরুচ্চ প্রবৃত্তি মনুষ্যের এবং অন্যান্য প্রাণি-
রও আছে, তাহা প্রথম শ্রেণীভুক্ত ; ভক্তি,
ন্যায়পরতা, অধ্যবসায় প্রভৃতি যে সকল উৎ-
কৃষ্ট প্রবৃত্তি কেবল মনুষ্যের আছে, তাহা
দ্বিতীয় শ্রেণীভুক্ত ; আর দর্শন শ্রবণাদি জ্ঞা-
নেন্দ্রিয়, এবং উপমিতি, অনুমিতি, পরিমিতি,
সংখ্যা প্রভৃতি যে সমস্ত বুদ্ধিবৃত্তি দ্বারা পদার্থ
বোধ হয়, তাহা তৃতীয় শ্রেণী-ভুক্ত।

জগতের কোন না কোন বস্তুর সহিত
প্রত্যেক মানসিক বৃত্তির নির্দিষ্ট সম্বন্ধ আছে।
যখন কোন বৃত্তি প্রবল থাকে, তখন তাহার
উপভোগ্য বিষয় প্রাপ্তির অন্বেষণ হয়, আর
তাহা প্রবল না থাকিলেও তদুপভোগ্য
বিষয় উপস্থিত হইলে তাহার উদ্রেক হইতে
থাকে। এইরূপ, আমাদেরদিগের মনের সহিত
বাহ্য বস্তু সমুদায়ের অত্যাশ্চর্য্য শুভকর

সম্বন্ধ নিকৃষিত থাকাতে, সংসারে যখন যে কার্য্য আবশ্যক, ঈশ্বর-প্রসাদে তখনই তৎসাধনে যত্ন হয়। ধনের প্রয়োজন হইলে উপার্জনের ইচ্ছা হয়, আততায়ি শত্রু নিবারণের প্রয়োজন হইলে যুদ্ধেতে প্রবৃত্তি হয়, ও বিপৎ পতন হইলে ধৈর্য্য ও তিতিক্ষার সঞ্চার হয়।

মানসিক বৃত্তি সমুদায়ের পরস্পর শুভাশুভ সম্বন্ধানুসারে বিবিধ প্রকার সদসৎ কার্য্যের উৎপত্তি হয়। প্রথমতঃ, যদি আমারদিগের নিকৃষ্ট প্রবৃত্তি সকল বুদ্ধিবৃত্তি ও ধর্ম্ম-প্রবৃত্তি সমুদায়ের বিরুদ্ধকারি না হইয়া স্বস্ব ব্যাপারে প্রবৃত্ত থাকে, তবে তাহা কদাপি অন্যায় কার্য্য বলা যায় না, এবং তছুৎপন্ন সুখও গর্হিত সুখ নহে। ধন উপার্জন করা, পান ভোজন করা, পুজোৎপাদন করা, এসমস্ত কার্য্যে প্রবৃত্তি স্বভাবতঃ কুপ্রবৃত্তি নহে। যখন তাহারা বুদ্ধি ও ধর্ম্ম-প্রবৃত্তির আয়ত্ত না থাকিয়া তদ্বিরুদ্ধ পথে সঞ্চরণ করে, তখনই তাহারদিগকে কুপথগামি বলা যায়। যদি কোন বণিক্ ক্রেতার নিকট মিথ্যা-কথন দ্বারা আপনার পণ্য বস্তুর দোষ

গোপন করে, এবং আরোপিত করিয়া তাহার গুণ ব্যাখ্যা করে, ও অন্যান্য বণিকের পণ্য দ্রব্যের নিন্দা করে, তবে একস্মিকে গর্হিত কর্ম বলিতে হয়, কারণ এস্থলে সে ব্যক্তি ধন-লুব্ধ হইয়া বুদ্ধি-বৃদ্ধি ও ধর্ম-প্রবৃত্তির শাসন অবহেলন করিলেক। একপ ব্যবহারের ফলাফল বিবেচনা করিয়া দেখিলে প্রতীত হয়, যে যদিও আপাততঃ ঐ ছুরাশয় বণিকের ইচ্ছা লাভ হইতে পারে, কিন্তু চরমে তাহার বিস্তর অনিষ্ট ঘটনা হয় ; কারণ সে ব্যক্তি সকলের নিন্দনীয় ও অশিশু হয়, এবং আপনি ধর্মোৎপাদ্য বিশুদ্ধ মুখে বঞ্চিত হয়। এইরূপ এক-ধর্মাসক্ত হইয়া অন্য ধর্মের অতিক্রম করাও দোষ। রাজা যদি বিচারস্থলে দয়াসক্ত হইয়া দণ্ডাই ব্যক্তিকে ক্ষমা করেন, ও ধনাঢ্য ব্যক্তি অপাত্রে দান করিয়া আলস্য বা কুকর্মে উৎসাহ প্রদান করেন, অথবা অপরিমিত ব্যয় করিয়া সর্বস্ব নষ্ট করেন, এবং যদি কেহ সাতিশয় ভক্তি-রস-পরায়ণ হইয়া ঈশ্বরের শ্রবণ মননেই সমস্ত কাল হরণ পূর্বক আর আর কর্তব্য কর্ম সাধনে পরাঙ্মুখ থাকেন, তবে তাঁহারদের এসমস্ত

ব্যবহারকে কখনই সুব্যবহার বলা যায় না । এক বৃত্তিকে চরিতার্থ করিতে গিয়া অন্য বৃত্তির বিরুদ্ধাচরণ করা কর্তব্য নহে । পরমেশ্বর যখন আমাদেরিগকে অর্জনস্পৃহা দিয়াছেন, তখন উপার্জন করা উচিত ; যখন কাম রিপু দিয়াছেন, তখন জীব-প্রবাহ রক্ষা করা উচিত ; যখন জিজীবিষা দিয়াছেন, তখন জীবন রক্ষায় যত্ন করা উচিত ; যখন বৃত্তি দিয়াছেন, তখন অন্ন পান দ্বারা দেহ রক্ষা করা উচিত ; যখন উপচিকীর্ষা দিয়াছেন, তখন উপকার করা উচিত ; যখন ভক্তি দিয়াছেন, তখন ভক্তি করা উচিত ; কিন্তু এক বৃত্তির প্রয়োজনানুরোধে অন্য বৃত্তিকে অতিক্রম করা কখনই উচিত নহে । অতএব এইরূপ অবধারণ করা যায়, যে যে কার্য্য কোন বৃত্তির অসম্মত নহে, সেই কার্য্য কর্তব্য । যে স্থলে কোন কার্য্যে এক বৃত্তির প্রবৃত্তি থাকে, আর অন্য কোন বৃত্তি তাহার প্রতিকূল হয়, সে স্থলে বুদ্ধি-বৃত্তি ও ধর্ম্ম-প্রবৃত্তির অনুগামী হইয়া কর্ম্ম করিবেক, কারণ আমারদিগের বুদ্ধি ও ধর্ম্ম-প্রয়োজক বৃত্তি সমুদায়ই সর্ব্বপ্রধান । কিন্তু সকলের মন সমান নহে ; কাহারও অধিক বুদ্ধি কাহারও অল্প বুদ্ধি ;

কাহারও অধিক দয়া, কাহারও অল্প দয়া ; কাহারও এক রিপু প্রবল, কাহারও অন্য রিপু প্রবল । অতএব যদি মনোবৃত্তি সমুদায় স্বভাবতঃ তেজস্বি হয়, ও তাহারদিগের পরস্পর সামঞ্জস্য থাকে, এবং তাহারা বিবিধ প্রকার ভৌতিক ও মানসিক বিদ্যানুশীলন দ্বারা সম্যক্ রূপে মার্জিত হয়, তবে তৎ-সম্মত কার্য্যই সৎকার্য্য । যে স্থলে আমারদিগের নিকৃষ্ট প্রবৃত্তির সহিত কোন ধর্ম্ম-প্রবৃত্তি বা বুদ্ধি-বৃত্তির বিরোধ জন্মে, সে স্থলে বুদ্ধিবৃত্তি ও ধর্ম্মপ্রবৃত্তির প্রাধান্য স্বীকার করিয়া তদনুযায়ি ব্যবহার করিবেক । যিনি এইরূপ অনুষ্ঠান করেন, তিনিই সাধু ।

আমারদিগের কর্তব্যাকর্তব্য নিকূপণ করিতে হইলে মানসিক বৃত্তি সমুদায়ের গুণাগুণ ও কার্য্যাকাঁর্য্যের বিচার করা আবশ্যিক । অগ্রে কামাদি নিকৃষ্ট প্রবৃত্তি, এবং তৎপরে ভক্তি উপচিকীর্ষাদি ধর্ম্মপ্রবৃত্তি ও বুদ্ধিবৃত্তির বিষয় আলোচনা করা যাইবেক । আমারদিগের নিকৃষ্ট প্রবৃত্তি ও ধর্ম্মপ্রবৃত্তি এ উভয়ের পরস্পর বিশেষ-বিভিন্নতা এই, যে কেবল আত্ম রক্ষা ও পরিবারাদি

প্রতিপালনই নিরুচ্চ প্রকৃতির মুখ্য বিষয়, আর পরমেশ্বরেতে শুদ্ধা পূর্বক সাধারণের হিত চেষ্টা করা আমারদিগের সমুদায় ধর্ম-প্রকৃতির প্রয়োজন । তদ্বিশেষ পশ্চাৎ দর্শিত হইবে । জগদীশ্বর আমারদিগকে নানা বিষয়ের ভার দিয়াছেন, ও নানা প্রকার মুখ ভোগের অধিকারি করিয়াছেন, এবং তদুপযোগি পৃথক্ পৃথক্ মানসিক বৃত্তি প্রদান করিয়া অত্যাশ্চর্য্য কৌশল প্রকাশ করিয়াছেন । ক্রমে ক্রমে তাহার বিবরণ করিয়া তাঁহার অপার মহিমা কীর্তন করিতেছি ।

জিজীবিষা ও বুভুক্ষা ।—পরমেশ্বর আমারদিগকে স্ব স্ব জীবন রক্ষাথে যত্নশীল করিবাক্স নিমিত্ত জিজীবিষা দিয়াছেন, এবং জীবন রক্ষণার্থে অন্ন গ্রহণ করা আবশ্যিক এ প্রযুক্ত বুভুক্ষার সৃষ্টি করিয়াছেন । আমারদিগের এই উভয় বৃত্তিই আত্ম সম্বন্ধীয় ।

কাম, অপত্যস্নেহ, ও আসঙ্গলিপ্সা এ তিনও আত্ম বিষয়ক । পরমেশ্বর জীব-প্রবাহ রক্ষার্থে স্ত্রী পুরুষ দ্বিপ্রকার জাতি সৃষ্টি করিয়া তদুপযোগি কাম রিপ্সু সৃজন করিয়াছেন, পুত্র দিয়া তদুপযোগি অপত্যস্নেহ

দিয়াছেন, এবং মিত্র মণ্ডলীর মিত্রতা সম্পাদনার্থে আসঙ্কলিপ্সা প্রদান করিয়াছেন। কামের বিষয় স্ত্রী বা স্বামী, স্নেহের বিষয় সন্তান, ও আসঙ্কলিপ্সার বিষয় মিত্র। এই সমস্ত বিষয় প্রাপ্ত হইলেই তাহার চরিতার্থ হয়, কিন্তু ঐ স্ত্রী বা স্বামী প্রভৃতির শুভাভিলাষ করা কামাদির ধর্ম নহে। যে ব্যক্তি কেবল কাম রিপূর বশীভূত হইয়া স্ত্রী বা স্বামির প্রতি অনুরাগ প্রকাশ করে, সে ব্যক্তি নিতান্ত ইন্দ্রিয়-পরায়ণ ও অনুরাগ-শূন্য; প্রীতি-ভাজনের হিতানুষ্ঠান বিষয়ে তাহার কখনই যত্ন হয় না। কিন্তু যে প্রেমানুরাগী ব্যক্তি বুদ্ধি-বৃত্তি, উপচিকীর্ষা, ন্যায়পরতা ইত্যাদি প্রধান বৃত্তি সমুদায়ের বশবর্তী হইয়া চলে, সে ব্যক্তি নিঃস্বার্থ হইয়া আপন প্রেমান্ধদের মঙ্গল চেষ্টা করে, এবং তৎফল স্বরূপ অপূর্ণ সুখ সন্তোষ করে। যদি দেশ বিশেষের কোন ইন্দ্রিয়-সুখাসক্ত ব্যক্তি কোন অধর্ম-শীলা পূর্ণ-যৌবনা রমণীর অসামান্য রূপ লাবণ্য সন্দর্শনে বিমোহিত হইয়া তাহার পাণি গ্রহণ করে, তবে পরে সে ব্যক্তিকে অবশ্যই অনুতাপে তাপিত হইতে হয়, কারণ যদিও

তাহার রূপ লাভ্য মনোহর বটে, কিন্তু ছুশ্চরিত্রা স্ত্রীর পাণি গ্রহণ করা আমারদিগের বুদ্ধি-বৃত্তি ও ধর্মপ্রবৃত্তির অনুমত নহে। অপত্যস্নেহ বশতঃ সম্ভানে অনুরাগ জন্মে, কিন্তু সম্ভানের শুভানুধ্যায়ী হওয়া অপত্যস্নেহের কার্য্য নহে, সে কেবল উপচিকীর্ষার কর্তব্য। পিতা মাতার স্নেহ যদি বুদ্ধি-বৃত্তি ও উপচিকীর্ষার আয়ত্ত না থাকে, তবে ভুরি ভুরি স্থলে তাঁহার। আপনারাই স্বীয় সম্ভানের অনিষ্টকারি হয়েন। কত কত বালকের পিতা মাতা সাতিশয় পুত্রানুরাগ বশতঃ বিদ্যাভ্যাস শ্রম-সাধ্য বলিয়া আপন পুত্রকে তাহা হইতে পরাঙ্মুখ রাখেন। অনেক পুত্রকে পাপাসক্ত দেখিয়াও তাহার কুপ্রবৃত্তি নিবারণ করেন না, ও পুত্রের সহিত বিচ্ছেদ হওয়া ছঃসহ যাতনার বিষয় ভাবিয়া তাহাকে দৃষ্টি-বহির্ভূত করিতে চাহেন না, এবং অত্যাবশ্যক কার্য্যেও দূরদেশ গমনের অনুমতি প্রদান করেন না। প্রগাঢ় অপত্যস্নেহ তাঁহারদিগের অন্তঃকরণ আচ্ছন্ন করিয়া রাখে। এইরূপ আসঙ্গলিপ্সা গুণ দ্বারা মিত্র লাভের ইচ্ছা হয়। কিন্তু মিত্রের ইষ্ট

চিন্তা করা আসঙ্গলিপ্সার কার্য্য নহে। যে ব্যক্তির আসঙ্গলিপ্সা ও উপচিকীর্ষা উভয় বৃত্তি উত্তম আছে, সেই ব্যক্তিই মিত্রের শুভাকাঙ্ক্ষী হয়—মিত্রের দুঃখে দুঃখী ও মিত্রের সুখে সুখী হয়, নতুবা কেবল আসঙ্গলিপ্সা মাত্র থাকিলে যেমন এক মেঘ অন্য মেঘের সংসর্গে থাকিতে ভালবাসে, সেইরূপ এক মনুষ্য অন্য মনুষ্যের সংসর্গ করিতে পারিলেই চরিতার্থ হয়। যদি দুই ধনাঢ্য মিত্রের আসঙ্গলিপ্সা, আত্মাদর এবং লোকানুরাগ-প্রিয়তা এই তিন বৃত্তি প্রবল থাকে, আর তাদৃশ উপচিকীর্ষা ও ন্যায়পরতা না থাকে, তবে যাবৎ তাঁহারদের উভয়ের অবস্থার ন্যূনাধিক্য না হয়, তাবৎ তাঁহারদিগের মিত্রতা থাকিতে পারে, কারণ ধনাঢ্য ও সন্তোষ ব্যক্তির সহিত সৌহার্দ থাকিতে উভয়েরই আত্মাভিমান রক্ষা পায়, ও লোকানুরাগপ্রিয়তা বৃত্তিও চরিতার্থ হয়; কিন্তু তন্মধ্যে যদি এক জন দৈবাৎ সন্ত্রস্ত-চ্যুত ও দারিদ্র্য-দশা প্রাপ্ত হয়, তবে তাহার সহিত মিত্রতা রাখিলে মানহানি হইবে এবং হীনের সহিত মিত্রতা রাখিলে লোকে হীন বোধ করিবে,

এই বিবেচনায় অপর ব্যক্তির আত্মাদর ও লোকানুরাগপ্রিয়তা বৃদ্ধি চরিতার্থ হয় না। সুতরাং এমত স্থলে অবিলম্বেই মুহূর্ত্তেদ হইয়া উঠে, এবং ঐ ধনাঢ্য ব্যক্তি আপন-নার পূর্ব্ব মিত্র পরিত্যাগ পুরঃসর অপর কোন আত্ম সদৃশ ব্যক্তিকে মিত্র রূপে বরণ করিতে প্ররুত্ত হয়। সংসারে সর্ব্বদাই এপ্রকার ঘটনা ঘটিয়া থাকে, এবং সর্ব্ব দেশে এই প্রাচীননীতি প্রচলিত আছে, যে বিপদ-কালেই মুহূর্ত্তেদ হয়। যেমন বসন্ত কালের নব-পল্লব-শোভিত কুমুমিত তরু-শাখা সকল গ্রীষ্ম ঋতুর প্রবল বায়ু বেগে ছিন্ন হয়, সেই-রূপ সৌভাগ্য কালের মিত্রতা দৌর্ভাগ্য কালে লয় প্রাপ্ত হয়। বস্তুতঃ একপ মিত্রতার মূলেই দোষ থাকে, কারণ স্বার্থ-পরতাই যে মিত্রতার মূলীভূত, স্বার্থ-হানি হইলেই স্বভাবতঃ তাহার ভেদ হইবে, ইহাতে আশ্চর্য্য কি? যদি আসঙ্গলিপ্সা রূপ বীজ, ধর্ম্ম রূপ বারি সেচন দ্বারা অঙ্কুরিত হইয়া মিত্রতা রূপ মনোহর তরু উৎপন্ন করে, তবেই তাহা সুখ স্বরূপ কুমুম-সৌরভে পরিপূর্ণ হইয়া চতুর্দিক্ আমোদিত করিতে থাকে। এই রূপ মিত্রতাই যথার্থ মিত্রতা।

প্রতিবিধিৎসা ও জিঘাংসা।—সংসারে বিস্তর ঊৎপাত আছে, ও সকল বিষয়েরই নানা প্রকার প্রতিবন্ধক ঘটিয়া থাকে, তন্নি-
 বারণার্থে পরমেশ্বর আমারদিগকে প্রতিবি-
 ধিৎসা, অর্থাৎ প্রতিবিধানের ইচ্ছা প্রদান
 করিয়াছেন। আততায়ি নিবারণে অপরা-
 জুখ হওয়া, বিপদুদ্ধারার্থে অপ্রতিহত চিন্তে
 যত্ন করা, এবং আর আর অভীষ্ট সাধনের
 প্রতিবন্ধক মোচনার্থে দৃঢ় সাহস প্রকাশ করা,
 এসমুদায়ই প্রতিবিধিৎসার কার্য্য। আমার-
 দিগের এপ্রকার কোন মনোবৃত্তি না থাকিলে
 এ দুঃখময় সংসারে বাস করা কাহার সাধ্য
 হইত? জিঘাংসা বৃত্তিও এ পৃথিবীতে সম্যক্
 আবশ্যক। জিঘাংসাতেই ক্রোধের উদ্রেক
 হয়, এবং ক্রোধ দ্বারা পশুর আক্রমণ ও মনু-
 ষ্যের অত্যাচার নিবারিত হয়। অতএব যে
 পৃথিবীতে দুঃখ ও বিপদ আছে, যে পৃথিবীতে
 লোকে পরানিষ্ট চেষ্টা করে, যে পৃথিবীতে
 এক জীবের আহারার্থে অন্য জীবের প্রাণ
 নষ্ট হয়, ও যে পৃথিবীর বহুতর শোভা ও
 সুখ কেবল জন্ম মৃত্যুর উপর নির্ভর করে,
 জিঘাংসা ও প্রতিবিধিৎসা এ দুই মনোবৃত্তি

সে পৃথিবীর সম্যক উপযুক্ত । যদিও পরের দুঃখ মোচন ও বিপদ উদ্ধারার্থে এই উভয় বৃত্তিকে চালনা করা যাইতে পারে, কিন্তু পরের হিতাভিলাষ করা তাহারদের কার্য্য নহে ; সে কেবল উপচিকীর্ষারই কার্য্য ।

নির্ম্মিমিৎসা ।—আমারদিগের দেহ রক্ষণ ও লোকযাত্রা নির্ব্বাহার্থে গৃহ, বস্ত্র, অস্ত্রাদি বিবিধ দ্রব্যের প্রয়োজন আছে, কিন্তু সংসারে ইহার কিছুই অযত্ন-সম্পন্ন বৃত্তি, গিরি গুহা, বা গাত্র-লোমের ন্যায় আপনা হইতে উৎপন্ন হয় না । অতএব যাহাতে ঐ সকল সামগ্রী প্রস্তুত হইতে পারে, জগদীশ্বর তদুপযুক্ত অশেষ প্রকার বস্তু সৃজন পূর্ব্বক সর্ব্বত্র বিস্তার করিয়া রাখিয়াছেন, এবং তদ্বিষয়ে আমারদিগকে প্রবৃত্তি দিবার নিমিত্ত নির্ম্মিমিৎসা অর্থাৎ নির্ম্মাণের ইচ্ছা প্রদান করিয়াছেন । যখন বাহিরে মৃত্ত প্রস্তরাদি অসংখ্য দ্রব্য চতুর্দিকে বিস্তৃত রহিয়াছে, আর অন্তঃকরণে ইচ্ছা ও বুদ্ধি আছে, তখন মনোহর অট্টালিকা, মহোচ্চ জয়স্তম্ভ, এবং সুকৌশল-সম্পন্ন প্রবল-বেগবান্ বাষ্পীয় পোত কেন না প্রস্তুত হইবে ? এত্বেলে বাহ্য বস্তুর সহিত মনের কি আশ্চর্য্য সম্বন্ধ প্রতীত হইতেছে !

জুগোপিষা ।—অন্তঃকরণে মুহুর্নুহুঃ কত কত ভ্রাবের উদয় হইতেছে, ও মনে মনে কত শত বিষয়ের মন্ত্রণা করিতে হইতেছে, তাহা বচনাভীত । তাহা কার্য্য কালেই প্রকাশ করা উচিত, নতুবা অসময়ে ব্যক্ত করিলে আপনার ও পরের কার্য্য হানি ও অনিষ্ট ঘটনার সম্ভাবনা । অতএব জগদীশ্বর আমাদেরদিগকে জুগোপিষা বৃত্তি অর্থাৎ গোপন করিবার ইচ্ছা প্রদান করিয়াছেন ।

বিবৎসা ।—পুনঃ পুনঃ বাস পরিবর্তন করিলে গার্হস্থ্য কর্ম্মের সুরীতি, রাজশাসনের সুশৃঙ্খলা, আচার ব্যবহারের সুনিয়ম, বিদ্যা বৃদ্ধি, ও সভ্যতার উন্নতি এসমুদায় কিছুই হয় না । অতএব পরমেশ্বর আমাদেরদিগকে বিবৎসা বৃত্তি অর্থাৎ এক স্থানে স্থিতি করিবার ইচ্ছা প্রদান করিয়াছেন । জন্ম-ভূমি যে পরম রমণীয় বোধ হয়, তাহার এই কারণ । এই সমুদায় সূক্ষ্ম সূক্ষ্ম বৃত্তিতেও পরম কারুণিক পরমেশ্বরের কি পরমাশ্চর্য্য কৌশল প্রকাশ পাইতেছে !

আত্মাদর ।—পরমেশ্বর আমাদেরদিগকে স্বকীয় জীবন রক্ষায় যত্নবান করিবার নি-

মিত্র যেকপ জিজীবিষা রুত্তি প্রদান করিয়াছেন, সেইরূপ আমারদিগের আত্ম বিষয়ে যত্ন, আত্ম গৌরব, ও স্বাধীনতার অনুরাগ ইত্যাদি নানা বিষয় সম্পাদনার্থে আত্মাদর নামক রুত্তি সৃষ্টি করিয়াছেন। নিৰ্ম্মমিৎসা, জুগোপিষা, বিবৎসা ও আত্মাদর এচারি রুত্তি যে পরের হিত চেষ্টায় চেষ্টিত নহে, তাহা স্পষ্টই বোধ হইতেছে।

অর্জনস্পৃহা।—এই রুত্তির স্বভাব বশতঃ ধনাধিকারে অভিলাষ, সঞ্চয়ে সুখ বোধ, ও সঞ্চিত বিষয় ক্ষয়ে দুঃখোৎপত্তি হয়। জগদীশ্বর সংসারে বিবিধ প্রকার ভোগ্য সামগ্রী সৰ্ব্বত্র বিস্তার করিয়া রাখিয়াছেন, এবং আমারদিগকে তৎসমুদায় সংগ্রহ করণে প্রবৃত্ত করিবার নিমিত্ত এই প্রবৃত্তি প্রদান করিয়াছেন। আমারদিগের অন্যান্য প্রবৃত্তির ন্যায় অর্জনস্পৃহাও বহুপকারিণী; উপার্জনশীল না হইলে দানশীলও হওয়া যায় না। কিন্তু স্বতঃপরোপকার করা প্রবৃত্তির ধর্ম নহে। যে সকল বাণিজ্য-ব্যবসায়ি লোক উপার্জন-বাসনা-পরবশ হইয়া মিত্রতা করে, তাহারদের একের কুটিল ব্যব-

হারে অন্যের উপাভনের ব্যতিক্রম ঘটিলেই তৎক্ষণাৎ বিচ্ছেদের সঞ্চার হয়, এবং প্রণয়ামৃত-সঞ্চারের পরিবর্তে অবিলম্বে শাত্রবানল প্রজ্বলিত হইয়া উঠে। তাহারদিগের মিত্রতা-মালা অর্জনস্পৃহা রূপ সূত্র দ্বারা গ্রথিত থাকে, যখন সেই সূত্র ছেদ হয়, তখন আর কি প্রকারে তাহারদিগের সৌহার্দ রক্ষা পাইতে পারে? তাহারা অর্থলিপ্সু হইয়া মিত্রতা করে, সুতরাং তাহার অন্যথা হইলেই প্রণয় ভঙ্গ হয়। সংসারে এপ্রকার ঘটনা অহরহ ঘটিতেছে। তাহারা যদি পক্ষপাত পরিত্যাগ পুরঃসর আপনাদিগের মনোগত ভাব আলোচনা করিয়া দেখে, তবে অবশ্য জানিতে পারিবে, যে ধনাকাজ্জ্বল্য তাহারদিগের মিলন হইবার মূলীভূত কারণ, সুতরাং সে আকাজ্জ্বল্য পূর্ণ হইবার প্রতিবন্ধকতা ঘটিলে যে বিচ্ছেদ হয়, ইহা স্বাভাবিক বটে। তাহারা কেবল নিকৃষ্ট প্ররুতির প্রয়োজন সাধন দ্বারা মুখ লাভের বাসনা করে, তাহারদিগের কর্ম বৃক্ষে এই প্রকার ফল সর্বদাই ফলে।

লোকানুরাগপ্রিয়তা।—আমারদিগের

লোকানুরাগপ্রিয়তা অর্থাৎ লোকের নিকট অনুরাগ প্রাপ্তির অভিলাষ আছে, এবং লোকেও প্রশংসা দ্বারা সে অভিলাষ পূর্ণ করে। জগদীশ্বর আমাদের অন্তঃকরণের সহিত লোকের এই শুভকর সম্বন্ধ নিকপিত করিয়া আমাদেরিগের যশস্কর কার্য্যে উৎসাহ বৃদ্ধির সুন্দর উপায় করিয়া দিয়াছেন। এই যশো-বাসনা বশে ভূপতি গণ সমস্ত হইয়া প্রজা-পালন করেন, গ্রন্থকর্ত্তারা কত কত সছপদে-শ জনক পরম-হিত-কর গ্রন্থ রচনা করেন, ও অন্যান্য কত প্রকার ব্যক্তি লোকের হিতার্থে প্রাণ পণ করিয়া চেষ্টা করেন। যদিও যশস্কর কার্য্য দ্বারা লোকের মঙ্গলোন্নতি হওয়া সম্যক্ রূপে সম্ভাবিত বটে, কিন্তু মঙ্গল কামনা করা এ প্রবৃত্তির কার্য্য নহে। লোকের নিকট সুখ্যাতি ও সমাদর লাভই এ বৃত্তির এক মাত্র বিষয়। যখন আমরা যশোভিলাষ-পরবশ হইয়া কাহারও হিতানুষ্ঠানে অনুরাগী হই, তখন লোকের নিকট সুখ্যাতি-বাদ শ্রবণ পূ-র্ব্বক আত্ম সন্তোষ লাভই আমাদেরিগের মনোগত থাকে। বরঞ্চ যদি কাহারও হিত করিতে গেলে তাহার অনুরাগের জন্যে সন্তা-

বনা হয়, তবে যশোলোভী ব্যক্তি তাহা হই-
তে বিরত হন। যদি আমারদিগের কোন
আত্মীয় ব্যক্তি কোন দুষ্ট কৰ্ম্ম করে, তবে তা-
হার দোষ সপ্রমাণ করিয়া তাহার দুষ্প্রবৃত্তি
দমন করিতে প্রবৃত্ত হওয়া উচিত। কিন্তু যদি
আমারদিগের লোকানুরাগপ্রিয়তা অতি প্র-
বল হয়, এবং উপচিকীর্ষাদি ধৰ্ম্মপ্রবৃত্তি
তাহার নিকট পরাভূত থাকে, তবে কি জানি
সে ব্যক্তি আমারদিগকে প্রশংসা না করে, ও
আমারদিগের উপর কোপান্বিত হয়, এই আ-
শঙ্কায় আমরা তাহার দোষ নিরাকরণে নিরস্ত
হই, বরঞ্চ তাহার সন্তোষার্থে গুরু দোষকে
লঘু করিয়া বর্ণনা করি। যশোলোভির কার্য্য
যে সাত্ত্বিক নহে, ইহা প্রসিদ্ধই আছে। তিনি
যদি কোন পুণ্যজনক কৰ্ম্মানুষ্ঠান করেন, আর
লোকে জানিতে পারে যে কেবল যশোলোভে
সে কৰ্ম্ম করিতেছেন, তবে তাহারা তাঁহার
প্রতিষ্ঠা করে না। তাহারা কহে, অমুক সা-
ত্ত্বিক ভাবে একৰ্ম্ম করে নাই, এবং তজ্জন্য
তাহার সম্যক ফলভোগও হইবে না। পরম
কারুণিক পরমেশ্বরের কি অনির্ধ্বচনীয় মহি-
মা! মনুষ্য খ্যাতি-লাভ রূপ স্বার্থ সাধনে তৎ

পর হইয়া কার্য্য করে, অথচ তদ্বারা পৃথিবীর মহোপকার হয়। এমত পরম সুন্দর কৌশল আর কাহা কর্তৃক উদ্ভাবিত হইতে পারে! /

সাবধানতা।—আমারদিগের সাবধানতা বৃত্তি এই রোগ-শোক-দুঃখময়ী পৃথিবীর সম্যক্ উপযুক্ত। মানব দেহ অগ্নিতে দগ্ধ হইতে পারে, জলে মগ্ন হইতে পারে, প্রহারে ভগ্ন হইতে পারে, অত্যন্ত হিম ও প্রচণ্ড রৌদ্রে পীড়িত হইতে পারে, ইত্যাদি বিবিধ প্রকারে আহত ও নষ্ট হইতে পারে; অতএব জগদীশ্বর আমারদিগকে সাবধানতা গুণ প্রদান করিয়াছেন, এবং তদ্বারা তাঁহার এই উপদেশ দেওয়া হইয়াছে, যে ‘সদা সাবধান থাক’। এই বৃত্তি থাকাতে আমরা ভাবি বিপৎপাত নিবারণ করিতে যত্নবান হই, এবং তৎ সাধনার্থ অন্যান্য অনেক বৃত্তিকে স্বস্থ বিষয়ে সচেষ্টিত করিয়া উপস্থিত ব্যাপারের ফলাফল বিবেচনা করি। যখন কার্য্য কালে আমারদের কোন বৃত্তি প্রবল হইয়া উঠে, তখন সাবধানতা উপস্থিত হইয়া তাহার শমতা করে। যে ব্যক্তির সম্যক্ সাবধানতা না থাকে, তাহার পদে পদে ভ্রম ও পুনঃ পুনঃ বিপদ ঘটনা হয়।

৮৬ মনুষ্যের মানসিক প্রকৃতি

সাবধানতা মনুষ্যের স্বাভাবিক গুণ ; সুতরাং আদ্য-কালীন মনুষ্যদিগেরও এগুণ ছিল তাহার সংশয় নাই । অতএব এইক্ষণকার ন্যায় তৎকালের লোকেরও নানা প্রকার বিপদ ঘটনার সম্ভাবনা ছিল ; নতুবা তাঁহারদের সাবধানতা গুণ থাকিবার নিতান্ত বৈয়র্থ্য হয়, ও মানসিক প্রকৃতি ও বাহ্য বস্তুর পরস্পর উপযোগিতাও থাকে না । অতএব বসুমতী এইক্ষণকার ন্যায় তখনও দুঃখশালিনী ছিলেন । সর্ব জাতীয় লোকেরা কহিয়া থাকেন, আদৌ ভূমণ্ডল নিরবচ্ছিন্ন আনন্দ-ধাম ছিল, পৃথিবীতে দুঃখের লেশও ছিল না, এবং রোগ, শোক, জরা, মৃত্যুর সঞ্চারও হয় নাই । এসকল ভাব মনে করিলে পরম সুখোদয় হয় বটে, কিন্তু বিচারে তাহারক্ষা পায় না । যখন জিঘাংসা, প্রতিবিধিৎসা, সাবধানতা এসমুদায় মনুষ্যের স্বাভাবিক বৃত্তি, অর্থাৎ আদ্য কালীন মনুষ্যদিগেরও যখন এ সমস্ত গুণ ছিল, তখন ইহা অবশ্য স্বীকার করিতে হয়, যে তৎকালেও পশ্বাদি হনন ও আততায়ি নিবারণ করিবার, এবং বিপৎপাত ভয়ে সাবধান হইবার প্রয়োজন ছিল । সাবধানতা বৃত্তিও যে মনু-

ষ্যের আত্ম সম্বন্ধী তাহা স্পষ্টই বোধ হই-
তেছে।

যে সমস্ত বৃত্তি মনুষ্য ও অন্যান্য জন্তু
উভয়েরই আছে, তাহার অধিকাংশের বিবরণ
করা গেল। 'যাবৎ এই সমুদায় বৃত্তি ধর্মপ্র-
বৃত্তির আয়ত্ত না হয়, তাবৎ আত্ম রক্ষা ও
আত্ম সন্তোষই মনুষ্যের সমুদায় কার্যের প্র-
য়োজন বলিয়া বোধ থাকে; তাবৎ তিনি
পরের শুভাভিপ্রায়ে কোন কর্ম করেন না।
আমরা এই সমস্ত বৃত্তি দ্বারা আত্ম রক্ষা ও
আত্ম হিত সাধন করিব, জগদীশ্বর এই অভি-
প্রায়ে তাহারদের সৃষ্টি করিয়াছেন। তাহারা
প্রত্যেকে যদি অন্য অন্য বৃত্তির বিরুদ্ধকারী
না হইয়া স্বস্থ ব্যাপারে নিযুক্ত থাকে, তবে
তদ্বারা অমঙ্গল ঘটনা না হইয়া পরম মঙ্গল
স্বরূপের মঙ্গলাভিপ্রায়ই সিদ্ধ হয়। কিন্তু যদি
তাহার কোন বৃত্তি বুদ্ধিবৃত্তি ও ধর্মপ্রবৃত্তি
সমুদায়কে পরাভব করিয়া স্বপ্রধান হইয়া
উঠে, এবং আমারদিগের তাবৎ কর্মের প্রব-
র্তক স্বরূপ হয়, তবে তদ্বারা বিস্তর অনিষ্ট
ঘটিবার সম্ভাবনা। এদেশীয় লোকের চরিত্র
আলোচনা করিয়া দেখিলে এ বিষয়ের ভূরি

ভুরি উদাহরণ প্রাপ্ত হওয়া যায়। লোক-
 যাত্রা নির্বাহার্থে অর্থ উপার্জন করা আব-
 শ্যক, এ প্রযুক্ত পরমেশ্বর আমারদিগকে উপা-
 র্জনের প্রবৃত্তি প্রদান করিয়াছেন; কিন্তু
 লোকে বুদ্ধির মন্ত্রণা ও ধর্মের শাসন পরি-
 ত্যাগ পুরঃসর ধন-লুব্ধ হইয়া চৌর্য্য বৃত্তি ও
 উৎকোচ গ্রহণে প্রবৃত্ত হয়। পরমেশ্বর জীব-
 প্রবাহ রক্ষার্থে কাম রিপুর সৃজন করিয়া-
 ছেন; লোকে তাঁহার এই তাৎপর্য্য অবহে-
 লন পূর্ব্বক তদ্বিষয়ে যথেষ্টাচারি হইয়া পাপ
 পক্ষে মগ্ন হয়। আমারদিগের আত্ম মর্যাদা
 বোধ, আত্ম বিষয়ে যত্ন, ও স্বাধীনতাতে অনু-
 রাগ সঞ্চার ইত্যাদি বিষয় সাধনার্থ পরমেশ্বর
 আমারদিগকে আত্মাদর-বিশিষ্ট করিয়াছেন;
 একগণকার বিদ্যাভিমানী যুবক-সম্প্রদায় এই
 প্রবৃত্তিকে বুদ্ধি ও ধর্মের আয়ত্ত না করিয়া
 বিদ্যামদে গর্বিত হইয়া প্রাচীন লোকদিগকে
 অনাদর ও অবজ্ঞা করিয়া থাকে। শরীর
 পোষণার্থে ভোজন-শক্তি ও পান-শক্তি প্র-
 দান করিয়াছেন; অনেকে অপরিমিত ভোজ-
 ন ও কেহ কেহ মদিরা পান দ্বারা শারীরিক
 ও মানসিক নিয়ম লঙ্ঘন করিয়া ভগ্ন-কায়, নি-

বীৰ্য্য, ও হত-জ্ঞান হয়, এবং পাপাসক্ত হইয়া নানাবিধ দুঃসহ যন্ত্রণা ভোগ করে, ও অকাল বার্দ্ধক্য প্রাপ্ত হইয়া কাল-গ্রাসে পতিত হয়। অতএব আপন প্রকৃতি ও বাহ্য বস্তুর সহিত তাহার সম্বন্ধ নিকপণ করিয়া, অর্থাৎ পরমেশ্বরের নিয়ম সমুদায় অবগত হইয়া, তদনুযায়ি ব্যবহার না করিলে কখনই সুখ-লাভ হইবার সম্ভাবনা নাই।

এক্ষণে আমারদের উৎকৃষ্ট বৃত্তি সমুদায়ের বিবরণ করা যাইতেছে।

উপচিকীর্ষা।—আমারদিগের যেমন উপচিকীর্ষা অর্থাৎ জীবের উপকার করিবার বাসনা আছে, সেইরূপ উপকারের সমূহ পাত্রও সর্ব স্থানে প্রাপ্ত হওয়া যায়। এই পরম পবিত্র প্রবৃত্তি কোন অংশে স্বার্থ-প্রবৃত্ত না হইয়া কেবল পরের শুভানুধ্যানেই রত থাকে। অন্যকে সুখ বিতরণ করা—তাপিত হৃদয়ে করুণামৃত বর্ষণ করা ও সুখা-দ্ৰ চিত্তেরও আনন্দ প্রবাহ প্রবল করা এই প্রবৃত্তির কার্য্য। এই মনোবৃত্তি যাহার শুভ সাধনার্থ সঞ্চরণ করে, তাহার সুখারবিন্দ যৎপরিমাণে প্রস্ফুটিত হয়, হিতৈষি ব্যক্তির

অন্তঃকরণও তত প্রফুল্ল হইতে থাকে । লোক-সমাজে মুখ বিস্তার করিতে পারিলেই তাঁহার পরম আনন্দ হয় ; এবং তৎকার্য্য সম্পাদনার্থে তাঁহার পদদ্বয় দ্রুত গমন করে, ও হস্ত দ্বয় সতত প্রসারিত থাকে । তাঁহার নিরালস্য চিন্তা পরের হিত-চিন্তাতেই সুখী হয়, এবং তাঁহার রসনা পরের মঙ্গল কীৰ্ত্তনেই পরম পরিতোষ প্রাপ্ত হয় । আর যখন তাঁহার কোন কুশলাভিপ্রায় সম্পন্ন হয়, তাঁহার তৎকালের অবস্থার কথা কি কহিব ?—তিনি সুখান্নবে মগ্ন হন ! যিনি আমাদের এমত উৎকৃষ্ট স্বভাব করিয়াছেন, যে পরের মঙ্গল করিতে গেলে তাহার সঙ্গে সঙ্গেই আপনার মঙ্গল হইতে থাকে, তাঁহার অপার মহিমা ও অনির্বচনীয় মঙ্গল স্বরূপ আলোচনা করিলে অন্তঃকরণ প্রেমামৃত রসে একেবারে আদ্র হইয়া যায় ।

ভক্তি ।—পরমেশ্বর অনেকানেক গুরু-লোক ও অন্যান্য মহৎ মহৎ ব্যক্তির সহিত আমারদিগের গুরুতর সম্বন্ধ নিকপিত করিয়া দিয়াছেন, এবং তাঁহারদিগের সহিত আমারদিগের তদুচিত ব্যবহার সম্পাদনার্থে আমা-

রদিগকে ভক্তি রূপ পরম পবিত্র প্রবৃত্তি প্রদান করিয়াছেন। মহৎ ও উত্তম গুণ মনে হইলেই ভক্তির উদয় হয়। যাঁহাকে কখনও দেখি নাই, যাঁহার কথা কখনও শুনি নাই, যিনি সহস্র সহস্র বৎসর পূর্বে মানব-লীলা সম্বরণ করিয়া লোকান্তর গমন করিয়াছেন, তাঁহারও অসাধারণ ক্ষমতা ও অতি প্রসংশনীয় গুণ শ্রবণ করিলে অনিবার্য ভক্তি-রস প্রকটিত হইতে থাকে। ভক্তি প্রভাবে বোধ হয়, যেন তাঁহার পরমারাধ্য মূর্তি সমক্ষে বিদ্যমান দেখিতেছি! কিন্তু পরমেশ্বর যেমন ভক্তির বিষয়, এমন আর দ্বিতীয় নাই। এমন পরমোৎকৃষ্ট অনির্বচনীয় গুণ—এমত মহত্ত্ব ভাব—এমত বিশুদ্ধ স্বরূপ আর কাহার আছে? যিনি এই প্রত্যক্ষ পরিদৃশ্যমান জগতের সৃজনকর্তা, এই অপরিসীম বিশ্ব-কার্যে যাঁহার অচিন্ত্য জ্ঞান, মহীয়সী শক্তি ও পরম মঙ্গল স্বরূপ দেদীপ্যমান রহিয়াছে, সংসারের প্রত্যেক নিয়মে যাঁহার অপরিবর্তনীয় শাস্ত্র স্বভাব সম্যক্ রূপে প্রতীত হইতেছে, তাঁহার ন্যায় প্রেমের আশ্রয় ও ভক্তির ভাজন আর কোথায় পাইব? ইহা

আমাদের পরম সৌভাগ্যের বিষয়, যে সর্ব-স্থানে ও সর্বকালেই তাঁহার অপার মহিমার সমূহ নিদর্শন দৃষ্টি করা যায় । পরমেশ্বর-পরায়ণ ভক্তিমান্ ব্যক্তি সকল স্থানেই তাঁহাকে উপলব্ধি করিয়া তাঁহার প্রেমে মগ্ন হয়েন । ঘন বিজন কানন বা তরু-শূন্য মরুদেশ, গভীর সিন্ধু-গর্ভ বা জনাকীর্ণ রাজধানী, প্রথর-রশ্মি-প্রদীপ্ত মধ্যাহ্ন সময় বা ঘোরা দ্বিপ্রহর। তামসী বিভাবরী, মুশীতল-সমীরবহ প্রভাত সময় বা বিহঙ্গ-কোলাহল-কলিত শ্রান্তিহর সায়ংকাল, এবং সুললিত তরুণ যৌবন বা পরিপক্ব প্রবীণ কাল, সর্বস্থানে সর্বকালে ও সর্বাবস্থায় পরাৎপর পরমেশ্বরকে সাক্ষি স্বরূপ দেখিয়া তাঁহার চিত্ত ভক্তি-ভাবে দ্রবীভূত হইয়া যায় ।

আশা !—আশা বৃত্তি কেবল ভবিষ্যৎ মুখান্বেষণে সতত তৎপর । যে পৃথিবীতে কাল বিলম্বে মনোরথ পূর্ণ হয়; যে পৃথিবীতে উপার্জন করিয়া উদরান্ন আহরণ করিতে হয়, যে পৃথিবীতে ভবিষ্যৎ মুখলাভের প্রতীক্ষায় বর্তমান দুঃখানুভবের ত্রাস করিতে হয়, এই আশাবৃত্তি সে পৃথিবীর সম্যক্ উপ-

যুক্ত । যখন হৃদয়াকাশ বিষম বিপত্তি রূপ মেঘ দ্বারা ঘোরতর আচ্ছন্ন হয়, তখন কেবল প্রবল আশা বায়ু প্রবাহিত হইয়া তাহাকে পরিস্ফুট করিতে থাকে । যখন আশার সহিত কোন নিকৃষ্ট প্রবৃত্তির সংযোগ হয়, তখন অন্তঃকরণ স্বার্থ-পরায়ণ হইয়া আত্মসুখ সাধনেই ব্যগ্র থাকে । আর যখন কোন ধর্মপ্রবৃত্তির সহযোগ হয়, তখন ইচ্ছা হয়, বিশ্ব সংসার আনন্দে পরিপূর্ণ হউক । ইহলোকে পরমেশ্বরের জ্ঞান, শক্তি, মঙ্গল স্ব-রূপ, ও অপরিবর্তনীয় স্বভাবের উপর নির্ভর করিয়া তাঁহার নিয়মানুসারে যথোপযুক্ত উপায় অনুষ্ঠান করিলেই ইচ্ছালাভ হয়, এইরূপ বিশ্বাস রাখিয়া আশাবৃত্তি চালিত ও চরিতার্থ করা কর্তব্য । কিন্তু কেবল ইহকাল ও এই ভূমণ্ডল মাত্র আশার বিষয় নহে । জিজী-বিষা বৃত্তির সহিত তাহার সংযোগ হইলে শত বর্ষ আয়ুর্ভোগ করিয়াও তৃপ্তি হয় না ; তখন এই শত বৎসরকে অতি অল্প কাল বোধ হয়, এবং এ জীবন অতি অকিঞ্চিৎকর জ্ঞান হয় ; তখন মনে হয়, অনন্ত কালই আমার পরমায়ু, এবং অখিল সংসারই আমার নিত্য-

ধাম ; আমি এই জঘন্য দেহ-পিঞ্জর হইতে উড়্‌ডীয়মান হইব, লোক লোকান্তর গমন করিব, সর্বত্র বিচরণ করিব, জ্ঞান তৃষ্ণা শাস্তি করিব, এবং পূর্ণকাম হইয়া অপর্যাপ্ত সুখ সম্ভোগ করিব । যদি কোন উয়ঙ্কর কাল উপস্থিত হইয়া ভূমণ্ডল বিনাশ পায়, চন্দ্র সূর্য্য অপ্রকাশ হয়, এবং ঐ সকল প্রকাণ্ড প্রকাণ্ড গ্রহ নক্ষত্র স্ব স্ব স্থান হইতে চ্যুত হইয়া দিগ্ধিদিক্ ঘূর্ণায়মান হইয়া ভগ্ন ও চূর্ণ হয়, এই জাজ্বল্যমান জগৎ যদি অসৎ হইয়া যায়, তথাপি আমি বর্ত্তমান থাকিব ! আশা বৃত্তি মর্ত্য লোকের বিষয়োপভোগে পরিতৃপ্ত না হইয়া অলৌকিক সুখাশয়ে এইরূপ সঞ্চরণ করিতে থাকে । তাহাকে সম্পূর্ণ চরিতার্থ করিতে পারে এমত পদার্থ ব্রহ্মাণ্ডে নাই ।

শোভানুভাবকতা ।—পরমেশ্বর আমা-
রদিগকে শোভা-প্রিয় করিয়া তদুপযোগি অ-
শেষ প্রকার রমণীয় পদার্থ দ্বারা সমস্ত সং-
সার বিভূষিত করিয়া রাখিয়াছেন ; তাহার
দর্শন, শ্রবণ, ও মননে অন্তঃকরণ পরম পুল-
কিত হয় । সুন্দর চিত্র, সুশোভন পাষাণময়
মূর্ত্তি, মনোহর অট্টালিকা, ও সুদৃশ্য ভূমিখণ্ড

সন্দর্শন করিলে যে আনন্দানুভব হয়, এবং কাহারও অন্তঃকরণকে জ্ঞান ও ধর্মোন্মুখিতা দেখিলে যে প্রীতি সঞ্চার হয়, তাহার এই কারণ। নিজেরই হউক বা অন্যেরই হউক, সুন্দর বস্তু প্রত্যক্ষ করিলেই সুখোদয় হয়। অতএব সমস্ত বিশ্বই এই শুভকরী বৃত্তির উপ-ভোগ্য, এবং যিনি আমারদের হৃদয় রাজ্যে এমন সুখের আকর সৃজন করিয়াছেন, তিনিই ইহার সর্বোৎকৃষ্ট বিষয়।

আশ্চর্য্য।—এই বৃত্তির গুণে, অদ্ভুত, অসাধারণ ও অভিনব বস্তু প্রত্যক্ষ হইলে হর্ষোদয় হয়। যে পৃথিবীর সমুদায়ই অনিত্য, যে পৃথিবীর সকল বস্তুই পুরাতন বেশ পরিত্যাগ পূর্ব্বক নিয়ত নবীন রূপ ধারণ করিতেছে, নাশ ও উৎপত্তি যে পৃথিবীর প্রকৃত ধর্ম্ম, এই বৃত্তি তাহার সম্যক্ উপযুক্ত হইয়াছে। যখন আমারদিগের পরমেশ্বরের সত্তা উপলব্ধি করিবার শক্তি আছে, ও তাঁহার আশ্চর্য্য কার্য্যের বিষয় পর্যালোচনা করিয়া তাহার যথার্থ তত্ত্ব জানিবার ক্ষমতা আছে, তখন এই পরম সুখদায়ক বৃত্তির উপভোগ্য বস্তুর আর অভাব কি? যত অনুসন্ধান করা যায়, ততই

অভিনব ব্যাপার ও অদ্ভুত কৌশল প্রকাশ পায়।' পরমেশ্বর-প্রসাদে এই বৃত্তি সর্বত্র অপরিয়াপ্ত বিষয় প্রাপ্ত হইয়া সর্বদা চরিতার্থ হইতেছে, ও তদ্বারা অপরাপর অনেক মনো-বৃত্তিও স্ব স্ব বিষয়ে সঞ্চারিত হইয়া তৃপ্তি লাভ করিতেছে। স্বার্থ প্রাপ্তি এ প্রবৃত্তির, মুখ্য প্রয়োজন না হইলেও তদ্বারা প্রচুর সুখের উদ্ভব হয়।

অধ্যবসায়।—সপ্রতিজ্ঞ হইয়া কন্ম না করিলে সংসারের কার্য সম্পন্ন করা মুকঠিন, এনিমিত্ত পরমেশ্বর আমারদিগকে অধ্যবসায় বৃত্তি প্রদান করিয়াছেন। যে স্থানে অনেক বিষয়ে পরের উপর নির্ভর করিতে হয়, যে স্থানে অভীষ্ট সাধনে নানা প্রকার প্রতিবন্ধক ঘটে, এবং যেখানে কাল বিলম্ব ব্যতীত প্রায় কোন অভিলাষ পূর্ণ হয় না, এই অধ্যবসায় বৃত্তি সে স্থানের সম্যক্ উপযুক্ত হইয়াছে।

অনুচিকীর্ষা।—যাহারদিগের সহিত আমারদিগকে সহবাস করিতে হয়, আমরা তাহারদিগের আচরণ দৃষ্টে আচার ব্যবহার শিক্ষা করিব এই অভিপ্রায়ে জগদীশ্বর আমারদিগকে অনুচিকীর্ষা বৃত্তি অর্থাৎ অনুকরণের ইচ্ছা

প্রদান করিয়াছেন ; সকল বিষয়ের অনুকরণ করা এ বৃত্তির কার্য্য । বাল্যাবস্থায় এই বৃত্তিই আমারদিগের প্রধান গুরু । তৎকালে আমরা চতুঃপাশ্চবর্ত্তি ব্যক্তিদিগের যে প্রকার ব্যবহার দেখি, সেই প্রকার অভ্যাস করিতে থাকি । এই . বৃত্তি থাকাতে, এক প্রদেশস্থ সমস্ত লোক অনায়াসে একরূপ ব্যবহার করিতে সমর্থ হয় । পরমেশ্বর নানা প্রকার বুদ্ধি-বৃত্তি প্রদান করিয়াও ক্ষান্ত হন নাই, তিনি আমারদের জ্ঞান-শিক্ষা ও কার্য্য-সাধন সুগম ও সুসাধ্য করিবার নিমিত্ত এই পরম শুভকরী বৃত্তি সৃষ্টি করিয়াছেন ।

ন্যায়পরতা ।—যখন মনুষ্যের কামাদি কতক গুলি প্রবৃত্তি কেবল স্বার্থ সাধনে তৎপর, এবং উপচিকীর্ষাদি অন্য ক্রতক গুলি প্রবৃত্তি কেবল পরানুরাগি, তখন এই উভয় জাতীয় প্রবৃত্তি সমুদায়ের আতিশয্য নিবারণার্থে, ও তাহারদিগকে যথা নিয়মে চালনা করিবার নিমিত্তে কোন স্বতন্ত্র শক্তি আবশ্যক ; পরমেশ্বর এই ন্যায়পরতা বৃত্তিকে সেই শক্তি দিয়াছেন । এই শুভকরী বৃত্তি মার্জিত বুদ্ধি সহকারে যাহাতে পরের অনিষ্ট ও অকারণে

আত্ম সুখের হানি না হয়, এইরূপে সমুদায় প্রবৃত্তিকে স্বস্থ বিষয়ে নিয়োজন করে। সকল ব্যক্তিকে আত্মবৎ জ্ঞান করিবে, এই প্রসিদ্ধ পরম ধর্মও এই মহতী বৃত্তির উপদেশ দ্বারা জ্ঞাত হওয়া যায়। পরম ন্যায়বান্ পরমেশ্বর আমারদিগকে কর্তব্যাকর্তব্যের উপদেশ প্রদানার্থে এই আত্ম-প্রতিনিধি স্বরূপ বৃত্তিকে আমারদের হৃদয় মধ্যে স্থাপনা করিয়াছেন, তাহার অনুবর্তী হইয়া চলিলে সকল কর্মেই সুখোদয়, আর তাহার উপদেশ অবহেলন করিয়া অবিহিত কর্মে প্রবৃত্ত হইলে তৎক্ষণাৎ তাহার দুঃখ রূপ দণ্ড উপস্থিত হয়। যিনি আমারদিগের পরম্পর অন্যায় ব্যবহার নিবারণার্থে এমত শুভকরী বৃত্তি সৃজন করিয়াছেন, তাঁহার সমান ন্যায়বান্ আর কে আছে ?

যে সমস্ত ধর্মপ্রবৃত্তির বিষয় বিবরণ করি গেল, * তাহারা স্বস্থ বিষয় ভোগের নির্দিষ্ট সীমা উল্লঙ্ঘন করিলে, অর্থাৎ মার্জিত বুদ্ধি সহকারে যথা নিয়মে নিযোজিত না হইলে

* উপাধিকার্য, ভক্তি ও ন্যায়পরতা এই তিন প্রধান ধর্ম-প্রবৃত্তি। আশা, শোভানুভাবকতা ও অধ্যবসায় এই তিন বৃত্তিকে তাহার অনুকূল বৃত্তি বলা যায়।

বিস্তর অনিষ্ট ঘটনার সম্ভাবনা। যদি বুদ্ধি পরিপাক না হইয়া ভক্তি উপচিকীর্ষাদির আতিশয্য হয়, তবে কাণ্পনিক ধর্ম্মে প্রক্কা ও অতিব্যয়শীলতাদি নানা দোষ উপস্থিত হয়। অতএব বুদ্ধি বৃত্তিকে মার্জিত করা সর্ব্বতো-ভাবে কর্তব্য।

বুদ্ধিবৃত্তি* ১—বুদ্ধি অতি প্রথমে অস্ত্র স্ব-রূপ। তাহাকে যে বিষয়ে চালনা করা যায়,

* বুদ্ধিবৃত্তি সমুদায়কে চারি শ্রেণীতে বিভাগ করা যায়। তন্মধ্যে চক্ষুঃশ্রোত্রাদি পঞ্চ জ্ঞানেন্দ্রিয় প্রথম শ্রেণী-নিবিষ্ট; ব্যক্তিগ্রাহিতা, আকারানুভাবকতা, ধরুজ্ঞানুভাবকতা, বর্ণানুভাবকতা প্রভৃতি যে সমস্ত বৃত্তি দ্বারা বাহ্য বস্তুর সম্ভা ও গুণ জ্ঞাত হওয়া যায়, তৎসমুদায় দ্বিতীয় শ্রেণী-নিবিষ্ট। কালানুভাবকতা, ঘরানুভাবকতা, ঘটনানুভাবকতা, সংখ্যা ও ভাষা শক্তি প্রভৃতি যে সমস্ত বৃত্তি দ্বারা বাহ্য বস্তু সকলের পরস্পর সম্বন্ধ জ্ঞান যায়, তৎসমুদায় তৃতীয় শ্রেণী-নিবিষ্ট। আর উপমিতি, ও অনুমিতি অর্থাৎ কার্য্য কারণ জ্ঞান, চতুর্থ শ্রেণী-নিবিষ্ট।

এই সমুদায় বৃত্তির সংজ্ঞা দ্বারাই ইহারদিগের স্ব স্ব বিষয় ও কার্য্য অবগত হওয়া যাইতেছে; যথা যে বৃত্তির দ্বারা এক একটি বস্তুর সম্ভা উপলব্ধ হয়, তাহার নাম ব্যক্তি-গ্রাহিতা; যে বৃত্তি দ্বারা আকারের অনুভব হয়, তাহার নাম আকারানুভাবকতা ইত্যাদি। পরমেশ্বরের মনুষ্যকে যত বুদ্ধি বৃত্তি প্রদান করিয়াছেন, জগতে তদুপযোগি অশেষ প্রকার বিষয় সৃষ্টি করিয়া তাঁহার সুখের পথ প্রস্তুত করিয়া রাখিয়াছেন।

তাহাতেই নৈপুণ্য হয়। যে বুদ্ধি দম্য-বৃত্তি, মিত্র-ক্রোধ, বিশ্বাস-ঘাতকতা ও নর-বধ সম্পাদনের উপায় চিন্তা করে, সেই বুদ্ধিই এই ভুলোককে স্বর্গলোক-সমান মুখ-ধাম করিবারও মন্ত্রণা করিতে পারে। কিন্তু যাবতীয় বস্তুর সত্তা ও গুণ জানা, তাহাদের পরস্পর সম্বন্ধ নিকপণ করা, এবং আমাদের নিকৃষ্ট প্রবৃত্তি ও ধর্মপ্রবৃত্তি সমুদয়কে যথা নিয়মে নিয়োজন করা বুদ্ধিবৃত্তির যথার্থ প্রয়োজন। অতএব সমস্ত সংসারই তাহার উপভোগ্য বিষয় ; সুতরাং বিহিত বিধানে তাহা চালনা করিলে আমারদিগের চিত্ত-ভূমি অপরিয়াপ্ত মুখ-সলিলে স্খাবিত হইতে পারে।

জগদীশ্বর অতি অদ্ভুত কৌশল প্রকাশ পূর্বক আমারদিগের মানসিক প্রকৃতির সহিত বাহ্য বস্তু সমুদায়ের এইরূপ সম্বন্ধ নিকপিত করিয়া দিয়াছেন, যে আমারদিগের নিকৃষ্ট প্রবৃত্তির যে সকল কার্য্য সমস্ত বুদ্ধিবৃত্তি ও ধর্মপ্রবৃত্তির অনুমত, তাহা আমারদের যথার্থ উপকারক ও সুখদায়ক, আর যে সকল কার্য্য তাহাদের অনুমোদিত নহে, তাহা পরিণামে

অপকারক ও দুঃখ-দায়ক হয়। তদ্রূপ, যে ধর্মশীল সুবোধ ব্যক্তির ধর্মপ্রবৃত্তি সকল মার্জিত বুদ্ধি দ্বারা নিয়োজিত হইয়া পরস্পর ঐক্য ভাবে সংশ্লিষ্ট করে, যদিও পরের শুভ সাধনই তাঁহার মুখ্য প্রযোজন হয়, কিন্তু গৌণ কল্পে তদ্বারা আপনারও পরম মুখ্য সম্ভোগ হয়। ইহাতে ইহলোকে পাপের দণ্ড ও পুণ্যের পুরস্কার অবাধে হইয়া আসিতেছে।

আমারদিগের নিকৃষ্টপ্রবৃত্তি ও ধর্মপ্রবৃত্তির পরস্পর যেকপ বিভিন্নতা দৃষ্টি করি গেলে, তাহা সবিশেষ পর্যালোচনা করিয়া দেখিলে এই পশ্চাল্লিখিত তিন বিষয় প্রতিপন্ন হয়।

প্রথমতঃ।—আমারদিগের যে প্রকার মানসিক প্রকৃতি, ও বাহ্য বস্তুর যেকপ স্বভাব তাহাতে অন্তঃকরণের কোন বৃত্তি অতি প্রবল হইলে তাহার আর একেবারে নিবৃত্তি হয় না। যদিও বিষয়োপভোগ দ্বারা ক্ষণিক নিবৃত্তি হয়—অন্ন পান দ্বারা বুভুক্ষা বৃত্তির শান্তি হয়, কোন বিষয় ব্যাপারে কৃতকার্য হইলে অর্জনস্পৃহা ক্ষণকালের নিমিত্ত নি-

শেষে থাকে, বিষয় বিশেষে জয় লাভ হইলে তৎকালে আত্মাদর ও লোকানুরাগপ্রিয়তা বৃদ্ধি চরিতার্থ হয়, অবিচ্ছেদে বুদ্ধি চালনা করিলে কিঞ্চিৎকাল বিচার-শক্তির মান্দ্য হয়, কিন্তু তাহার। কিয়ৎকাল বিশ্রামের পরেই পুনরুদীপ্ত হইয়া স্বস্ব বিষয় লাভার্থে ব্যগ্র হয়। অতএব আমারদিগের মনোবৃত্তি সকল যথাবৎ নিয়মিত না হইলে উত্তরোত্তর প্রবল ও অপ্রশান্ত হইতে থাকে। বিশেষতঃ দুর্দান্ত নিকৃষ্ট প্রবৃত্তি সকল নিতান্ত স্বার্থ-পরায়ণ ও সদসৎ-ফল-বিবেক-রহিত, এ প্রযুক্ত তাহার। পরিমিত বিষয়োপভোগ করিয়া ক্ষান্ত থাকিতে পারে না। যদি আমারদিগের নিকৃষ্টপ্রবৃত্তি সমুদায় বুদ্ধিবৃত্তি ও ধর্মপ্রবৃত্তির শাসন অবহেলন পুরঃসর তন্নির্দিষ্ট নিয়ম লঙ্ঘন করিয়া অনবরত বিষয়োপভোগে রত থাকে, তবে তদ্বারা আপনার ও পরের বিস্তর অনিষ্ট ঘটনার সম্ভাবনা। যদি লোকানুরাগ লাভ মাত্র আমারদিগের সমস্ত কর্মের উদ্দেশ্য হয়, তবে স্থল বিশেষে কুকর্মের মনস্তৃষ্টির নিমিত্ত কুকর্মও করিতে হয়, ও তাহার প্রতিকল রূপ দুঃখও প্রাপ্ত হইতে হয়,

এবং যে সকল যশস্কর বিষয় সাধনের ক্ষমতা নাই, অতিশয় যশোলোভ বশতঃ তাহাতেও প্রবৃত্ত হইয়া হতাশ ও ভগ্নোৎসাহ হইতে হয়। সবিশেষ জ্ঞানাভাব বা ধর্মপ্রবৃত্তির ক্ষীণতা বশতঃ রিপু-পরতন্ত্র হইয়া অল্প বয়সে, অথবা শরীর ও মনের অস্বাস্থ্য সময়ে, সম্মান উৎপন্ন করিলে, সে সম্মান দুর্বল ও ব্যাধি-যুক্ত বা রিপু-প্রধান হইয়া পিতা মাতার অশেষ যাতনার কারণ হয়। এইরূপ, আমা-রদিগের অর্জুনম্পৃহা থাকাতে অর্থ আহরণে ও ধন সঞ্চয়ে প্রবৃত্তি হয়, কিন্তু ব্রহ্মাণ্ডপতির অখণ্ডনীয় নিয়ম ক্রমে বসুন্ধরা সম্বৎসর কালে পরিমিত ধন দান করেন, আর মনুষ্যেরও বুদ্ধি-শক্তি ও কায়িক পরিশ্রমের নির্দিষ্ট সীমা আছে, সুতরাং সকলেই ধনাঢ্য হইতে চা-হিলে অনেককে স্বভাবতঃ নিরাশ হইতে হয়। যাঁহারা নিকৃষ্টপ্রবৃত্তির বশীভূত হইয়া কেবল বিষয় পথে সঞ্চরণ করেন, তাঁহারা এই অক-ল্পিত কথা মনে রাখিবেন। অতএব নিকৃ-ষ্টপ্রবৃত্তি সকল বুদ্ধিবৃত্তি ও ধর্মপ্রবৃত্তি দ্বারা নিয়মিত না হইলে নানা প্রকার অনিষ্ট ঘট-নার সম্ভাবনা।

দ্বিতীয়তঃ ১—আমারদিগের বুদ্ধিবৃত্তি ও ধর্মপ্রবৃত্তি সমুদায়ই সর্বাপেক্ষা প্রধান বৃত্তি, এপ্রযুক্ত যখন আমারদের নিকৃষ্টপ্রবৃত্তির কার্য্য তৎসম্মত না হয়, তখন অন্তঃকরণ অপ্রসন্ন ও গ্লানিযুক্ত থাকে । বোধ হয়, যেন আমারদের মনের শ্রেষ্ঠ বৃত্তি সমুদায় ইতর বৃত্তির অনুচিত ভোগাতিশয়ে অসম্মত হইয়া তিরস্কার করিতেছে । যে তরুণ যুবাব সুকোমল সরল চিত্ত এখনও পাপ রসে দূষিত হয় নাই, যাহার সাধু চিন্তা এখনও সংসারের কুটিল পথে সঞ্চরণ করে নাই, অধর্মের কঠোর হস্ত যাহার সুকুমার নির্মল মতি এখনও স্পর্শ করিতে পারে নাই, সে যদি দুর্কিপাক বশতঃ দুস্প্রবৃত্তি রূপ পিশাচের বশীভূত হইয়া মোহ হ্রদে মগ্ন হয়, তবে সেই জানিতে পারে, যে ধর্মের শাসন অবহেলন করিয়া নিকৃষ্ট প্রবৃত্তিকে চরিতার্থ করিলে কি প্রকার যাতনা ভোগ করিতে হয় । তখন আর তাহার অনুতাপ-তাপিত হৃদয় শান্তিরসে আদ্র হয় না, এবং মনের গ্লানির আর পরিসীমা থাকে না । তাহার আপনার অন্তঃকরণই গরলময় নরক সমান হয়, ও প্রাণ-

ঘাতিনী ছুশ্চিন্তা তাহার চিত্তকে অহর্নিশ পেষণ করিতে থাকে। যদি কোন দ্বিষয়ার্থী ব্যক্তি তরুণ বয়স অবধিই ধন সঞ্চয় ও মান সম্ভ্রম উপার্জনে একাগ্র-চিত্ত হইয়া সমস্ত কাল হরণ করেন, এবং প্রাতঃকালাবধি সায়ং কাল পর্য্যন্ত কেবল ক্রয়, বিক্রয়, ও আয় ব্যয় নিকপণাদি বৈষয়িক ব্যাপারে অনবরত ব্যাপ্ত থাকিয়া মনের বীৰ্য্য ক্ষয় করেন, আর সুতরাং ভক্তি, উপচিকীর্ষা, ও ন্যায়পরতা বৃত্তি সঞ্চালন না করেন, বরং তদ্বিরুদ্ধ ব্যবহার করিয়া আইসেন, এবং যদি বান্ধব্যা-দশা উপস্থিত হইলে আপনার গত জীবনের তাবৎ কার্য্য পর্য্যালোচনা করিয়া দেখেন, তবে তিনি দীর্ঘ নিশ্বাস পরিত্যাগ পুরঃসর একথা অবশ্য বলিবেন, যে “ কেবল কলহ, উত্ত্যক্তি ও মিথ্যাভিমান প্রকাশেই আমার সমস্ত আয়ুঃ গত হইয়াছে। আমার শ্রেষ্ঠ মনোবৃত্তি সমুদায়কে চরিতার্থ করি নাই, এবং তন্নিমিত্ত জ্ঞান-ধর্মোৎপাদ্য বিশুদ্ধ মুখ ভোগে অধিকারী হইতে পারি নাই। বুদ্ধিবৃত্তি ও ধর্ম-প্রবৃত্তি সমুদায়ের অনুশাসন ক্রমে আর আর সমস্ত মনোবৃত্তিকে যথা নিয়মে চালনা করিলে

১০৬ মনুষ্যের মানসিক প্রকৃতি

যে প্রচুর সুখোৎপত্তি হয়, আমি তাহা লাভ করিতে সমর্থ হই নাই । কেবল কৰ্ম ভোগ করিয়া সমুদায় জীবন ক্ষেপণ করিলাম ।” শেষ দশায় এপ্রকার অনুতাপিত হওয়া দুঃসহ যন্ত্রণার বিষয় ।

তৃতীয়তঃ ১—আমারদিগের প্রধান প্রবৃত্তি সমুদায় যদি পরস্পর ঐক্য-ভাবাপন্ন থাকিয়া মার্জিত বুদ্ধি দ্বারা নিযোজিত হইয়া সঞ্চরণ করে, তবে তাহারা স্বস্থ বিষয়োপভোগের অশেষ স্থল প্রাপ্ত হয় । এই সকল বৃত্তির যৎকিঞ্চিৎ স্ফূর্তি হইলেও আনন্দ লাভ হয়, আর তাহারদিগকে অতিশয় প্রবল রাখিয়া সম্যক্ৰূপে চরিতার্থ করিতে পারিলে অন্তঃকরণ সুখান্নবে মগ্ন হয় । এই সমস্ত ধৰ্মপ্রবৃত্তির অনুবর্তী হইয়া চলিলে পশ্চাত্তাপে তাপিত হইতে হয় না, এবং সুখোপভোগের পুনঃপুনঃ বিচ্ছেদও ঘটে না । তদ্বারা আমরা যাবজ্জীবন শান্তি-রসাদ্র ও স্থির-সুখ-সম্পন্ন হইয়া কাল যাপন করিতে পারি । বিশেষতঃ ঐ সকল প্রধান প্রবৃত্তির অনুগামী হইয়া কার্য্য করিলে নিকৃষ্ট প্রবৃত্তি সকলও স্বসাধ্য সমুদায় সুখ উৎপন্ন করিতে

পারে । আর যেমন আমারদিগের ধর্মপ্র-
রুতি মার্জিত বুদ্ধি দ্বারা নিয়োজিত না, হইলে
বহুপ্রকার অমঙ্গল ঘটনার সম্ভাবনা, সেইরূপ
বুদ্ধিও আমারদিগের প্ররুতি সকলের স্বভাব
বিচার ও প্রয়োজন রক্ষা করিয়া না চলিলে
ভ্রম-রহিত হইতে পারে না । বস্তুতঃ বুদ্ধি-
রুতি ও ধর্মপ্ররুতির প্রাধান্য স্বীকার করিয়া
ও সমস্ত মনোরুতির প্রয়োজন রক্ষা করিয়া
চলিতে পারেন, এইরূপ অপ্রাকৃত ব্যক্তিকেই
যথার্থ সাধু বলা যায়, এবং এইরূপ ব্যক্তিই
চিরকাল সুখ সম্ভোগ করিতে পারেন । পশ্চাৎ
এবিষয়ের উদাহরণ প্রদান করা যাইতেছে ।

যদি কোন ব্যক্তি পূর্বেক্ত প্রকারে আপন
কর্তব্যাকর্তব্য নিকূপণ করিয়া সংসার পথে
পদার্পণ করেন, তবে তাঁহার উপচিকীর্ষা রুতি
বশতঃ এই রূপ বোধ হইবে, যে আর আর
মনুষ্যেরাও আমার ন্যায় পরমেশ্বরের প্রিয়-
পাত্র, ও আমার ন্যায় তাহারাও সুখ সম্ভোগ-
গের অধিকারি ; আমার ইচ্ছসাধক কার্য্য
যদি তাহারদের অনিষ্ট-জনক হয়, তবে তা-
হার অনুষ্ঠান করা কখনই উচিত নহে, বরং
আমার সাধ্যানুসারে তাহারদের উপকার

করাই কর্তব্য । ভক্তি স্বভাব বশতঃ পরমেশ্বরের নিয়ম প্রতিপালনে দৃঢ় শ্রদ্ধা হইবে, এবং তাঁহার অচিন্ত্য জ্ঞান, বিচিত্র শক্তি, ও অপার মঙ্গল স্বরূপের উপর নির্ভর করিয়া একপ্রকার বিশ্বাস করিতে হইবে, যে একপ ব্যবহার দ্বারা সমুদায় মনোরুত্তি চরিতার্থ হইয়া পরিণামে অত্যন্ত সুখ সম্পাদন করিবে, এবং মনুষ্য বর্গকে সম্যক্ আদরণীয় বোধ হইয়া যথা শক্তি তাহারদিগের উপকার করিতে অনুরাগ জন্মিবে । আর ন্যায়পরতার বশবর্তী হইয়া তিনি সকলের সহিত ন্যায়বৎ ব্যবহার করণে ও অন্যায় ব্যবহার পরিত্যাগে প্ররূত্ত থাকিবেন । তিনি এই প্রকার কর্তব্যাকর্তব্য নিকৃপণ পূর্বক তদনুসারে যে কার্য্য করিবেন, তাহাতেই লোককে পরম সুখি করিবেন, ও আপনিও পরম সুখী হইবেন । পরম রমণীয় আনন্দ-জ্যোতিঃ তাঁহার অন্তরে সতত প্রকাশ পাইতে থাকিবে !

একপ সুশীল ব্যক্তি কাহারও সহিত মিত্রতা করিলে উপচিকীর্ষা গুণে সকল স্বার্থ পরিত্যাগ করিয়া কেবল মিত্রের শুভানুধ্যায়ী হয়েন । ভক্তি স্বভাবে একপ মিত্রতা ঈশ্বর-

নুমত জানিয়া মিত্রের প্রতি তাঁহার প্রীতি বৃদ্ধি হয়, এবং তদ্বারা মিত্রের অনুরাগ করা ও তাঁহার সকল কার্যে আনন্দানুভব করা এক প্রকার অভ্যাস পাইয়া যায় । ন্যায়পরতা থাকাতে তাঁহার প্রীতি হয়, যে মিত্রের সহিত পরস্পর প্রণয়ের বিনিময়, শীলতার বিনিময়, ও উপকারের বিনিময় করাই কর্তব্য ; তন্মিন্ন অনুচিত প্রার্থনাদি কোন কঠোর ব্যবহার করা কোন ক্রমেই উচিত নহে । আর তিনি প্রণয় সঞ্চার কালে বুদ্ধি দ্বারা নিয়োজিত হইয়া দেখেন, যে তাঁহার মিত্র ধর্মাংশে নিতান্ত হীন না হন, কারুণ্য দান্তিক, স্বার্থপর, ও অধাৰ্ম্মিক ব্যক্তির সহিত যথার্থ প্রণয় হওয়া সম্ভাবিত নহে । দুঃশীল ব্যক্তির প্রতি রূপা হইতে পারে, কিন্তু তাহার সহিত কখন প্রীতি হইতে পারে না ।

এ প্রকার মৈত্রী লাভ হইলে আমারদিগের অনেকানেক নিকৃষ্টপ্রবৃত্তিও অতিশয় চরিতার্থ হইয়া পরম সুখ প্রদান করে । যদি বুদ্ধিতে নিশ্চয় হয়, আমার মিত্র অতি ধর্ম-পরায়ণ, এবং কেবল ধর্ম-প্রবৃত্তির প্রাধান্য স্বীকার করিয়া তদনুযায়ি ব্যবহার করেন,

তবে আমার আসক্তলিপ্সা মহোৎসাহ সহ-
 কারে অমূল্য নিধি স্বরূপ পরম প্রিয় মিত্র রত্নে
 প্রগাঢ়রূপে আসক্ত হয়। একপ ন্যায়বান্,
 পরহিতৈষী, ভক্তিশীল মিত্র কখনই মিত্রের
 অনিষ্ট চেষ্টা করেন না, এবং 'সসত্ত্বম আ-
 দর অবেক্ষা পরিত্যাগ' করিয়া অত্যালাপ
 ও ইতর ব্যবহারেও প্রবৃত্ত হয়েন না। এমত
 প্রণয়ের স্থলে অপমান, প্রবঞ্চনা ও অপ-
 রাপর অনিষ্ট ঘটনার অসম্ভাবনা জানিয়া
 হৃদয় পদ্ম সর্বদা বিকসিত থাকে। আসক্তলি-
 প্সাতে অন্যান্য ইতর বৃত্তির সাহচর্য থাকিলে
 অন্তঃকরণে তাদৃশ প্রণয়ামৃত সঞ্চার ও আ-
 নন্দ-বারি নিঃস্রবণ কখনই হইতে পারে না।
 এমত মৈত্রী লাভ দ্বারা আমারদিগের লোকা-
 নুরাগপ্রিয়তাও চরিতার্থ হয়। কারণ একপ
 পরহিতৈষী, ন্যায়বান্, মর্যাদক মিত্রের
 প্রিয় সম্ভাষণ, আদরোক্তি ও সৌহার্দ প্রকাশ
 অপেক্ষা অধিক অনুরাগ আর কাহার নি-
 কটে প্রাপ্ত হওয়া যাইতে পারে? একপ
 দুর্লভ মিত্রের বাহে সৌহার্দ প্রকাশ ও অ-
 স্তরে দ্বেষানল প্রদীপন, সমক্ষে মধুরালাপ ও
 পরোক্ষে গ্লানি ও নিন্দাবাদ, কথায় পরমো-

পকার ও কার্যে অবহেলা, এ সমুদায়ের কিছুই করা সম্ভব নহে । ফলতঃ বুদ্ধি ও ধর্ম যাহার মূলীভূত, এমত প্রণয় হইলে অন্তঃকরণ সতত প্রফুল্ল থাকে, সুধাকর-কিরণ-সম পরম রমণীয় প্রেমামৃত তদুপরি অবিভ্রান্ত বর্ষণ হইতে থাকে, এবং বুদ্ধি বৃত্তি, ধর্ম-প্রবৃত্তি ও আর আর সমস্ত মনোবৃত্তি পরস্পর ঐক্য-ভাবাপন্ন থাকিয়া অপরিয়াপ্ত আনন্দ প্রদান করে ।

আমারদিগের মনোবৃত্তি সমুদায়ের কি প্রকারে সামঞ্জস্য হইতে পারে, এবং তাহার ফলই বা কি, তাহা এই উদাহরণ দ্বারা স্পষ্ট প্রতীত হইতেছে । যে সকল স্বার্থ-পর ব্যক্তি বুদ্ধি ও ধর্মপ্রবৃত্তির অনুবর্ত্তি হইয়া না চলে, ইতঃ পূর্বে তাহারদিগের মিত্রতার বিষয় লিখিত হইয়াছে, এবং ধর্মোপেত মিত্রতার বিষয় এ স্থলে বিবরণ করা গেল । এই উভয়ের ফল-তারতম্য ও তাদৃশ অন্যান্য নিকৃষ্টপ্রবৃত্তি-জনিত সুখের বিষয় পর্য্যালোচনা করিয়া দেখিলে ইহা অবধারিত হয়, যে আমারদের সমস্ত মনোবৃত্তির পরস্পর সামঞ্জস্যই সুখের কারণ ; যে স্থলে

কোন বৃত্তির সহিত অন্য কোন বৃত্তির বিরোধ উপস্থিত হয়, সে স্থলে বুদ্ধিবৃত্তি ও ধর্মপ্রবৃত্তির প্রাধান্য স্বীকার করিয়া তদনুযায়ী আচরণ করা কর্তব্য। যে সাধু ব্যক্তি এই নিয়মানুসারে কার্য করেন, আসন্ন মৃত্যুও তাঁহার বিশেষ ক্লেশকর হয় না। যিনি মৃত্যু-শয্যায় শয়ান হইয়া একপ বলিতে পারেন, যে আমি যাবজ্জীবন যথা সাধ্য পরোপকার করিয়াছি, লোকের সহিত যথোচিত ব্যবহার করিয়াছি, মনের সহিত পরমেশ্বরের আরাধনা করিয়াছি, এইক্ষণেও সেই সকল-মঙ্গলালয় আনন্দ স্বরূপে চিত্ত সমর্পণ করিলাম, তিনি প্রকৃত মনুষ্য নহেন! তাঁহার মৃত্যু-কালও সুখের কাল, ও মৃত্যু-শয্যাও সুখ-শয্যা।

তৃতীয়াধ্যায়

মনুষ্যের সুখোৎপত্তির বিষয়

মনুষ্যের প্রকৃতি ও বাহ্য বস্তুর সহিত তাহার সম্বন্ধের বিষয় সংক্ষেপে বিবরণ করা গিয়াছে, এক্ষণে তাঁহার সুখোৎপত্তির মূল অন্বেষণ করা যাইতেছে।

প্রথমতঃ—ইহা স্পষ্টই দৃষ্ট হইতেছে, যে শরীর ও মন চালনা না করিলে সুখানুভব হয় না। ইহা জগদীশ্বরের সাক্ষাৎ আজ্ঞা স্বরূপ বোধ হইতেছে, যে “শরীর ও মনোবৃত্তি সকল চালনা কর, সুখ লাভের আর দ্বিতীয় পথ নাই।” তাহার। সুষুপ্তবৎ নিশ্চেষ্ট হইয়া থাকিলে আমারদের জীবিত থাকাই রূথা হইত; মনুষ্যের জীবনে ও বৃক্ষাদির জীবনে কিছুই বিশেষ থাকিত না। ফলতঃ সর্ব-তোভাবে নিশ্চেষ্ট থাকা আমারদিগের স্বভা-

ব-বিরুদ্ধ । যদি কোন বালক গৃহ মধ্যে অপূৰ্ণ পূর্য্যক্ষোপরি সুকোমল শয্যায় শয়ন করিয়া থাকে, আর তথা হইতে তাহার ক্রীড়াসক্ত বয়স্যদিগের কেলি-কোলাহল শ্রবণ করে, এবং তাহার। কি ক্রীড়া করিতেছে, তাহাও অনুভব করিতে পারে, তবে সে বহির্গত হইয়া তাহারদের সঙ্গী হইবার নিমিত্ত কেমন ব্যগ্র হয় ! যদি তাহার পিতা তাহাকে নিবাসিত করিয়া রাখেন, তবে তাহার মনোদুঃখের আর সীমা থাকে না । এইরূপ যদি কোন প্রবীণ ব্যক্তিও ঘোরতর দুর্দিন প্রযুক্ত ক্রমাগত ৫১৭ দিবস গৃহের বহির্ভূত হইতে না পারেন, তবে তিনিও বিরক্ত ও অস্থির হইবেন । যিনি সর্বদা প্রসন্ন থাকেন, এমন স্থলে তাঁহারও অপ্রসন্ন বদন দেখা যায় । অতএব, মনুষ্যের মুখলাভ কায়িক ও মানসিক পরিশ্রমের উপর নিতান্ত নির্ভর করে কি না, তাহা যৎকালে তিনি সর্বথা নিশ্চয় থাকেন, তখনই সম্যক উপলব্ধি করিতে পারেন ।

যাহাতে আমরা শরীর ও মনঃ সঞ্চালনে প্রবৃত্ত হইয়া আনন্দ লাভ করি, পরমেশ্বর সমস্ত জগতের সহিত মানব প্রকৃতির তদনুযায়ি

স্বয়ংক্রিয় নিকপিত করিয়া রাখিয়াছেন। দেখ, আহাৰ ব্যতিরেকে শরীর রক্ষা পায় না, সুতরাং শারীরিক ও মানসিক পরিশ্রম স্বীকার করিয়া অন্ন আহরণ করিতে হয়। পশুদিগের যেমন গোত্র-লোম আছে, আমরাদিগের শীত নিবারণার্থে তাদৃশ কোন স্বাভাবিক আচ্ছাদন নাই, সুতরাং শরীর ও মনের চেষ্টা দ্বারা পরিধেয় প্রস্তুত করিতে হয়। আর আমরাদিগের সমুদায় মনোবৃত্তি স্ব স্ব বিষয় লাভার্থে নিয়ত ব্যগ্র, কিন্তু চেষ্টা বিনা তাহা-রদিগকে চরিতার্থ করিবার উপায় নাই। অতএব, আমরাদিগের শরীর ও মনকে সম্যক্ সচেষ্ঠ রাখা যে পরমেশ্বরের অভিপ্রেত, তাহা সুন্দররূপে প্রতীত হইতেছে। তাঁহার নিয়-মানুবত্তী হইয়া যত চালনা করিবে, ততই শরীরের অঙ্গ সকল সবল হইবে, মনের বৃত্তি সকল সতেজ হইবে, এবং অন্তঃকরণ মুখার্ণবে মগ্ন হইতে থাকিবে।

আমরাদিগের জ্ঞানাভিলাষ অত্যন্ত প্রবল। জ্ঞান লাভই সমুদায় বুদ্ধিবৃত্তির প্রয়োজন, এবং কেবল জ্ঞানামৃত পান দ্বা-রাই তাহারা চরিতার্থ হয়। কোন অভি-

নব বস্তু সন্দর্শন মাত্রেই অন্তঃকরণ প্রফুল্ল হয়, তাহার সবিশেষ গুণাগুণ জানিতে ইচ্ছা ও উৎসাহ হয়, এবং তাহার স্বভাব ও প্রয়োজন যত জানা যায়, ততই মুখোদয় হইতে থাকে। সে বস্তুর দ্বারা 'আমারদিগের কোন সাংসারিক উপকার না হউক, তথাপি তাহার আলোচনা মাত্রেই একপ নিৰ্ম্মল আনন্দ অনুভূত হয়, যে তজ্জন্য শারীরিক ও সাংসারিক ক্লেশ সহ্য করিতে হইলেও সে রমণীয় জ্ঞানালোচনা পরিত্যাগ করিতে পারা যায় না। অতএব, ইচ্ছা করিলেও নিতান্ত নিশ্চেষ্ট থাকা সম্ভাবিত নহে। পরমেশ্বর আমারদিগের সুখ সম্পাদনার্থে মানসিক প্রকৃতির সহিত বাহ্য বস্তুর যেকপ সম্বন্ধ নিকপিত করিয়া দিয়াছেন, এবং উভয়কে পরস্পর যে প্রকার উপযোগি করিয়া দিয়াছেন, ও মনোবৃত্তি সমুদায়কে সচেষ্টি রাখিবার নিমিত্ত যেকপ কৌশল করিয়াছেন, এই গ্রন্থের উপক্রমণিকায় তাহার উদাহরণ প্রদান করা গিয়াছে। অতএব, মনোবৃত্তির চালনাতেই যে সুখানুভব হয়, ও ইহা যে পরম কারুণিক পরমেশ্বরের সম্পূর্ণ অভিপ্রেত, তাহার সংশয় নাই।

যদি আমরা জন্ম কালে বুদ্ধিবৃত্তি-নিষ্পাদ্য সমুদায় জ্ঞান প্রাপ্ত হইয়া ভূমিষ্ঠ হইতাম, এবং আমারদিগের বৃত্তি সমুদায় স্ব স্ব বিষয় ভোগে এক কালেই চরিতার্থ হইয়া থাকিত, আর তাহারদিগকে চালনা করিবার প্রয়োজন ও সম্ভাবনা না থাকিত, তবে এমন অবস্থায় এইক্ষণকার অপেক্ষা সুখের অস্পতা ভিন্ন কখনই আধিক্য হইত না। যদি একবার মাত্র ভোজন করিলেই চির কাল উদর পরিপূর্ণ থাকিত, ও ক্ষুধার উদ্রেক আর না হইত, তবে প্রত্যহ ক্ষুৎ পিপাসা শান্তি করিয়া যে সুখ সম্ভোগ করা যায়, তাহাতে এককালে বঞ্চিত থাকিতে হইত। ধন-লাভ হইলেই রূপণের মনে আত্মলাভ হয়, কিন্তু সে আত্মলাভ অতি অস্পকাল স্থায়ী। হস্ত-গত ধনে তাহার তৃপ্তি হয় না, সুতরাং সে তৎক্ষণাৎ অধিক উপার্জননার্থে ব্যগ্র হয়। যদিও লোকে তাহাকে অক্লান্ত বোধ করে, কিন্তু সে ব্যক্তি স্বীয় স্বভাবেরই বশবর্তী হইয়া কার্য্য করে। তাহার অর্জনস্পৃহা বৃত্তির চালনাতেই সুখানুভব হয়, এবং কেবল ধনান্বেষণ ও ধনোপার্জন দ্বারা সে বৃত্তি সব্যাপার থাকিতে পারে।

অতএব, যদি ঐ বৃত্তি একেবারে অপৰ্যাপ্ত বিষয় লাভ করিয়া চিরকাল সুখশুভবৎ ব্যাপার-শূন্য থাকিত, তবে মানববর্গ তছুৎপন্ন মুখ-ভোগে কখনই অধিকারী হইত না। এইরূপ, আর আর মনোবৃত্তিও নিতান্ত নিশ্চেষ্ট হইয়া থাকিলে এক্ষণে তাহারদিগকে পুনঃ পুনঃ চরিতার্থ করিয়া যে প্রচুর মুখ সন্তোষ করা যাইতেছে, তাহা আর আমারদিগের ভাগ্যে ঘটিত না। এক্ষণে হইলে, এককালে আমারদের মনশ্চেষ্টার অন্ত হইত, আমারদিগের প্রথম চেষ্টাই শেষ চেষ্টা হইত, অত্যাশ্রিত কালেই সর্ব বস্তু পুরাতন বোধ হইত। কিছুতে আর কৌতূহল থাকিত না, কিছুতেই উৎসাহ হইত না, এবং কোন বিষয়ে আশাবৃত্তি সঞ্চার করিত না। এমন যে পরম রমণীয় বিচিত্র সংসার তাহাও নিতান্ত নীরস বোধ হইত। অতএব, পরমেশ্বর যে ব্যবস্থা করিয়াছেন, তাহাই সর্বোৎকৃষ্ট—তাহার উপর আর কথা নাই। যেক্ষণ মনোবৃত্তি সকল সৃজন করিয়াছেন, তাহারদিগকে তছুপযুক্ত বিষয় সমুদায়ও প্রদান করিয়াছেন। ঐ সকল বিষয়ের প্রয়োজন জানিয়া যথোচিত ব্যবহার ক-

রিলে ইচ্ছা লাভ ও আনন্দ সঞ্চার হয়, আর তদ্বিরুদ্ধাচরণ করিলে অনিচ্ছ ঘটনা ও দুঃখোৎপত্তি হয়। পরম মঙ্গলালয় পরমেশ্বর তাহারদের গুণাগুণ অনুসন্ধান করিবার ভার আমাদের উপর সমর্পণ করিয়া আমাদের মনোবৃত্তি সকলকে সদা সব্যাপার রাখিবার কি সুন্দর কৌশল করিয়াছেন।

পৃথিবীতে ধান্য গোধূমাদি শস্য জন্মে, এবং তদ্বারা মানব দেহের পুষ্টি বর্দ্ধন হয়, কিন্তু তাহা নিস্তুষ ও সুসম্পাদিত না হইলে সুস্বাদ, সুজীর্ণ ও বলাধায়ক হয় না। পরন্তু তৎসম্পাদন জন্য শরীর ও মনের পরিচালনার অপেক্ষা রাখে। অতএব জগদীশ্বর যৎকালে শস্য সৃজন করিয়া তাহাতে তত্বচিত গুণ সকল প্রদান করিয়াছিলেন, এবং মানব শরীরকে তন্নিষ্ঠ ধর্ম ও বৃত্তি সমুদায় দ্বারা সুসম্পন্ন করিয়াছিলেন, তৎকালেই গোধূমাদির সহিত মানব দেহের পরস্পর সম্বন্ধ ও উভয়ের পরস্পর উপযোগিতা নিকপণ করিয়া দিয়াছিলেন, এবং আমরা যে কার্যিক ও মানসিক চেষ্টা দ্বারা জ্ঞান লাভ ও সুখ সন্তোষ করিব, তাহারও সূত্রপাত তৎকালেই করিয়াছিলেন।

পৃথিবীতে বহুতর বিষ-বৃক্ষ আছে, তাহার কল, মূল, পত্রাদি অগ্নি পরিমাণে সেবন করিলে অনেকানেক রোগ প্রতীকার হয়, কিন্তু অধিক ভক্ষণ করিলে প্রাণ বিয়োগ হয়। ইহাতে মনুষ্যের বুদ্ধিবৃত্তি সমুদায়েরও সম্যক উপযোগিতা আছে, কারণ তাহার সাবধানতা সহকারে ঐ সমস্ত দ্রব্যের গুণ প্রকাশ করিতে সমর্থ হইয়া মনুষ্যের মঙ্গল সাধন করে। যিনি মনুষ্যের দেহকে রোগাশ্রয় করিয়াছেন, তিনিই তদুচিত ঔষধ সকল সৃষ্টি করিয়া মর্কট বিস্তার করিয়া রাখিয়াছেন, এবং তদীয় গুণ সমুদায় নিকপণার্থে তাঁহাকে তদুপযুক্ত মনোবৃত্তি সকল প্রদান করিয়াছেন। সুতরাং তাহারদিগকে তদ্বিষয়ে চালনা করা যে পরমেশ্বরের সম্যক অভিপ্রেত, তাহার সংশয় নাই।

জল উষ্ণ করিলে বাষ্প হয়। সেই বাষ্পের আশ্চর্য্য শক্তি প্রভাবে বাষ্পীয় যন্ত্রের কার্য্য নির্বাহ হইয়া অত্যন্তুত ব্যাপার সকল সম্পন্ন হইতেছে। বাষ্পীয় তরলী সমুদায় যে প্রকার প্রবল বেগে ধাবমান হইয়া ছয় মাসের পথ এক মাসে উত্তীর্ণ হইতেছে, তাহা

সকলেরই বিদিত আছে। পরমেশ্বর সৃষ্টি কালেই এই সমস্ত ভাবি ব্যাপার অবধারিত করিয়াছেন, এবং মনুষ্যের বুদ্ধিবৃত্তি সকল তদুপযোগি করিয়া জল ও অগ্নির স্বভাব এবং তাহারদের পরস্পর সম্বন্ধ অনুসন্ধান করিবার ভার তাঁহারই উপর সমর্পিত করিয়া রাখিয়াছেন। যখন বুদ্ধি চালনার সঙ্গে সঙ্গে সুখোদয় হয়, এবং অভীষ্ট সিদ্ধ হইলে সাংসারিক উপকার দর্শে, তখন অবশ্য স্বীকার করিতে হইবে, যে পরম কারুণিক পরমেশ্বর আমারদের হিতাভিপ্রায়েই একপ কৌশল প্রকাশ করিয়াছেন।

কোন ভূমি শকরা কি বালুকাময়ী, কঠিন কি পঙ্কিল, নিম্ন কি উচ্চ, ইত্যাকার সমস্ত দোষ জ্ঞাত হইয়া তাহার কারণ অনুসন্ধান পূর্বক তৎ প্রতীকারের উপায় চেষ্টা করা—পঙ্কিল ভূমি শুষ্ক করিবার, কঠিন মৃত্তিকা চূর্ণ করিবার, অনুরূপ ভূমি উর্বরা করিবার উপায় অবধারণ করা আমারদিগের বুদ্ধিবৃত্তির কার্য্য। যে সকল নরজাতি বুদ্ধিবৃত্তি পরিচালনা পূর্বক ভূমির গুণ, উৎপাদিকা শক্তি, এবং জল ও শস্যাদির সহিত তাহার সম্বন্ধ

নিরূপণ করে, ও নিরালস্য হইয়া ভূমির দোষ সংশোধনার্থে ও কৃষিকার্য্য নির্বাহার্থে মানসিক শক্তি সকল চালনা করে, তাহারদের উজ্জ্বল্য প্রচুর অন্ন লাভ হয়, স্বদেশের ভূমি সকল দোষ-বর্জিত হইয়া শরীরের সুস্থতাকর হয়, এবং মনোরূতি চালনা করাতে অন্তঃকরণ সর্বদা হৃষ্ট থাকে। আর যাহারা আলস্য-পরবশ হইয়া তাদৃশ অনুষ্ঠান না করে, তাহারা তৎপ্রতিকূল স্বরূপ জ্বর, কম্প, বাত ও অপরাপর বহু ক্লেশকর রোগ দ্বারা আক্রান্ত হইয়া, অনবরত অন্ন বস্ত্রের ক্লেশ পায়, এবং মধ্যে মধ্যে শস্যোৎপত্তির ব্যাঘাত ঘটিয়া অনাভাবে মৃতপ্রায় হয়। এই ক্লেশ তাহারদের উপদেশ স্বরূপ মনে করা উচিত। তাহারা যে কর্তব্য কর্ম্মে অবহেলা করিয়া সুখ সম্ভোগে বঞ্চিত হইতেছে, ইহাই জ্ঞাত করিতে জগদীশ্বর এমত স্থলে দুঃখ নিয়োজন করিয়াছেন। যখন তাহারা পরমেশ্বরের নিরমানুবর্তি হইয়া পূর্বোক্ত প্রকারে শরীর ও মন চালনা করিবে, তখনই দারুণ দুঃখের কঠোর হস্ত হইতে উত্তীর্ণ হইয়া সুখি হইবে।

সমুদ্রের অগাধ জল, প্রবল ঝটিকা, ভী-

যণ তরঙ্গ,এ সমস্ত আপাততঃ দূর দেশ গমনা-
 গমনের অনিবার্য্য প্রতিবন্ধক বোধ হয়। কিন্তু
 জলের সহিত কাষ্ঠের সম্বন্ধ ও জলপ্লুত দ্রব্যের
 সহিত বায়ুর সম্বন্ধ নিরূপণ করিয়া,ও বাষ্পের
 অন্তুত শক্তি অবধারণ করিয়া, মনুষ্য এক্ষণে
 সাগর-সলিলে প্রকাণ্ড প্রকাণ্ড পোত সমুদায়
 সস্তারিত করিয়া দেশ দেশান্তর গমন করিতে-
 ছে। পরমেশ্বর কোন কালে মনুষ্যে ও তৎ
 সম্বন্ধি বাহ্য পদার্থে এই সমস্ত গুণ সংস্থাপন
 করিয়াছেন, কিন্তু আমরা বুদ্ধিবৃত্তির ক্ষুদ্রত্ব
 সহকারে তৎ সমুদায় ক্রমে ক্রমে অবগত হই-
 তেছি এবং সংসারের মুখ স্বচ্ছন্দতা বুদ্ধি করি-
 তেছি। পরমেশ্বর যে আমারদিগের মনো-
 বৃত্তি সকল সতত সব্যাপার রাখিবার নিমিত্ত
 পরমোৎকৃষ্ট কৌশল প্রকাশ করিয়া বাহ্য
 বস্তুর সহিত তাহারদের একপ শুভকর সম্বন্ধ
 নির্দিষ্ট করিয়া দিয়াছেন, তাহাও আমরা
 কেবল সম্প্রতি জ্ঞাত হইতেছি। এক্ষণে, যে
 বাষ্পীয় মহাপোত পৃথিবীর অতি দূরবর্ত্তি
 দেশ সমুদায়কে পরস্পর সন্নিবিষ্ট করিতেছে,
 যে বেলুন যন্ত্র সহকারে ভূমণ্ডলের মনুষ্য গগণ
 মণ্ডলে উড্ডীয়মান হইতেছে, ও যে দূরবী-

কণ যদ্ব উজ্জ্বল-স্থিত নক্ষত্র মণ্ডলের সংবাদ নিমেষ
মাত্রে এই অধোলোকে আনয়ন করিতেছে,
তৎ সমুদায়ই পূর্বে অজ্ঞাত ছিল। পৃথিবীর
সর্ব্বাংশেই একপ বিচিত্র পদার্থ, তাহারদের
পরস্পর সামঞ্জস্য, ও পরমাশ্চর্য্য কৌশল অ-
ব্যক্ত রহিয়াছে, তৎ প্রকাশার্থে কেবল অসা-
ধারণ-ধী-শক্তি-সম্পন্ন মনুষ্যদিগের উদয় হই-
বার অপেক্ষা। জগদীশ্বর সৃজন কালেই এ
সমস্ত সঙ্কল্প করিয়াছেন, এবং আমারদিগের
মানসিক প্রকৃতি ও তৎ-সম্বন্ধ বাহ্য বস্তু সমু-
দায়কে তদুপযোগি করিয়া সৃষ্টি করিয়াছেন।
তিনি পরম মঙ্গলালয়, তাহার দ্বারা যাহা কিছু
উদ্ভাবিত হইয়াছে, তাহাই মঙ্গলদায়ক। তিনি
যখন আমারদের সুখ-সঞ্চার শরীর ও মনের
চেষ্টাধীন করিয়াছেন, তখন তদনুযায়ী ব্যবহা-
রই নিশ্চিত শুভদায়ক, এবং অতিশয় আগ্রহ
প্রকাশ পূর্ব্বক তাহাতে প্রবৃত্ত থাকা উচিত।

দ্বিতীয়তঃ।—সমুদায় মনোবৃত্তিকে পর-
স্পর সম্পূর্ণরূপে সমঞ্জসীভূত করিয়া চরিতার্থ
করা কর্তব্য, নতুবা এ সংসারে যে প্রমাণে যদু-
র-স্থায়ি সুখ সম্ভোগের সম্ভাবনা আছে, তাহা
সম্পন্ন হয় না। কেবল ধন কিম্বা যশোলাভই

জীবনের সার কার্য জানিয়া তন্মাত্র উপার্জনে
আমুংক্ষয় করিলে ভক্তি, উপচিকীর্ষা, ও ন্যায়প-
রতা রূতিকে তৃপ্ত করা হয় না, সুতরাং অ-
ন্তঃকরণ সর্বতোভাবে সুখী হইতে পারে না।
কিন্তু জ্ঞানানুসন্ধান পূর্বক আপনার প্রতি,
আত্মীয়ের প্রতি, স্বদেশের প্রতি, সমস্ত মনুষ্য
বর্গের প্রতি, ও পরমেশ্বরের প্রতি যেকপ
ব্যবহার কর্তব্য তাহা সম্পাদন করিলে, সমস্ত
মনোরূতি চরিতার্থ হইয়া ধন, মান, খ্যাতি ও
শারীরিক স্বচ্ছন্দতাদি বিবিধ ফল প্রদান
করে, এবং অন্তঃকরণ সর্বথা স্থির সুখ প্রাপ্ত
হইয়া পরম সুখী হয়।

তৃতীয়তঃ :—মনুষ্যের সুখ স্বচ্ছন্দতাকে
বন্ধ-মূল করিতে হইলে, তাহার সমস্ত মনো-
রূতি পরস্পর সমঞ্জসীভূত থাকিয়া যেকপ
উপদেশ প্রদান করে, তাহার সহিত বাহ্য বস্তু
বিষয়ক নিয়ম সমুদায়ের ঐক্য রাখা আব-
শ্যক, এবং বুঝি যাহাতে উভয়েরই স্বরূপ ও
পরস্পর সম্বন্ধ নিকপণ পূর্বক ভ্রম-প্রমাদ-
শূন্য হইয়া সৎপথ-প্রবর্তক হইতে পারে,
এমত কর্তব্য। বস্তুতঃ পরমেশ্বর এইকপই
করিয়াছেন। তিনি মানব প্রকৃতির সহিত

জগতের সমুদায় নিয়মের ঐক্য রাখিয়াছেন । যদিও আমারদিগের জ্ঞানোন্নতির যে নির্দিষ্ট সীমা আছে, তাহা উল্লঙ্ঘন করিবার অধিকার নাই, এবং যদিও তৎপ্রযুক্ত ইহা লোকে বস্তুর স্বরূপ ও আদ্যন্ত কখনই আমারদিগের বুদ্ধিগম্য হইবে না, কারণ আমারদিগের তদুপযোগি কোন বৃত্তি নাই ; তথাপি যিনি এই সৰ্ব্বাঙ্গ-সুন্দর বাহ্য সংসার রচনা করিয়াছেন, তিনিই যখন আমারদিগের মনোবৃত্তি সমুদায় সৃষ্টি করিয়াছেন, এবং যখন তাহার একপ অভিপ্রায় স্পষ্ট রূপে দৃষ্ট হইতেছে, যে আমরা যাবৎ ইহা লোকে থাকিব, তাবৎ পরম পুরুষার্থ সাধন পূৰ্ব্বক সুখে কাল যাপন করিব, এবং যখন ইহা অবধারিত হইয়াছে, যে জগতের নিয়ম নিকপণ পূৰ্ব্বক তদনুযায়ি কার্য্য করাই সুখলাভের একমাত্র উপায়, তখন ইহাও নিশ্চিত, যে পরমেশ্বর আমারদিগের বুদ্ধিবৃত্তি ও অন্যান্য সমস্ত মনোবৃত্তিকে ইহালোকের উপযুক্ত করিয়া সৃষ্টি করিয়াছেন । আমরা যখন তাহারদের পূর্ণাবস্থা সম্পাদনে সমর্থ হইয়া যথাবৎ নিয়োগ করিতে পারিব, তখনই চরিতার্থ হইব ।

আমরা যত জ্ঞান লাভ করিব, এবং যথানিয়মে শারীরিক ও মানসিক শক্তি সমুদায় যত চালনা করিব, ততই আমারদিগের সুখ স্বচ্ছন্দতা বৃদ্ধি হইবে, এবং ততই বিশ্ব-স্রষ্টার জ্ঞান ও করুণার অশেষ নিদর্শন প্রকাশ হইতে থাকিবে।

চতুর্থাধ্যায়

প্রাকৃতিক নিয়মানুযায়ী ব্যবহার-প্রণালী

মনুষ্যের প্রকৃতি ও তাঁহার সুখোৎপত্তির বিষয় যে প্রকার বিবরণ করা গিয়াছে, তদনুসারে শরীর ও মনের নিয়োগ বিষয়ে পঞ্চালিখিত অথবা তাদৃশ কোন ব্যবহার-প্রণালী কল্পনা করা যাইতে পারে ।

প্রথমতঃ ।—মুস্থ ব্যক্তিদিগের শরীর সঞ্চালনার্থ প্রতিদিবস কতিপয় দণ্ড তদুপযোগি পরিশ্রম করা উচিত । এই পরম কল্যাণকর নিয়ম প্রতিপালন করিলে শরীর মুস্থ থাকে, বল ও বীৰ্য্য হয় এবং দেহের লঘুতা বোধ হইয়া অন্তঃকরণ সর্বদা প্রফুল্ল থাকে ।

দ্বিতীয়তঃ ।—বাহ্য বস্তুর গুণ, তাহাদের পরস্পর সম্বন্ধ নির্ণয়, এবং প্রাণিদিগের স্বভাব ও অপরাপর বস্তুর সহিত তাহার সম্বন্ধ

প্রাকৃতিকনিয়মানুযায়ীব্যবহারপ্রণালী ১২৯

নিকপণ বিষয়ে প্রতিদিন কতিপয় দণ্ড সবিশেষ মনোযোগ পূর্ব্বক বুদ্ধিবৃত্তি চালনা করা কর্তব্য। যাহাতে মনোবৃত্তি সঞ্চালন সহকারে অবলম্ব্য-প্রবাহ প্রবাহিত হয়, এবং যাহাতে প্রত্যেক নিকপিত তত্ত্ব লোকের চুঃখ ভ্রাস ও সুখ বুদ্ধির প্রতি কারণ হয়, এই দৃষ্টি রাখিয়া জ্ঞানালোচনা করিবেক। ইহা নিশ্চয় জানা উচিত, যে প্রত্যেক বাহ্য বস্তুর সহিত আমারদের শারীরিক ও মানসিক প্রকৃতির সম্বন্ধ নিকপণ করা, এবং পরমেশ্বর আমারদের সুখ সাধনার্থে সেই সমস্ত স্বাভাবিক সম্বন্ধ বন্ধন করিয়া দিয়াছেন ইহা হৃদয়ঙ্গম রাখা, আমারদের জ্ঞানাভ্যাসের এক প্রধান প্রয়োজন। এইরূপে জ্ঞানাভ্যাস করিলে বহুতর মনোবৃত্তি চরিতার্থ হইবেক, এবং একপ অনুষ্ঠান দ্বারা অভ্যাস কালেই সুখানুভব হইবেক, ও জ্ঞান বৃক্ষের ফল ভোগ বিষয়ে ক্ষমতা বৃদ্ধি হইতে থাকিবে। ইহাই আমারদের যথেষ্ট পুরস্কার।

আর নানা প্রকার বিজ্ঞানশাস্ত্রে এবং শিল্প ও বিষয় কার্যে বুদ্ধি বৃত্তি চালনা করা কর্তব্য।

তৃতীয়তঃ ১—কতিপয় দণ্ড আমারদি-
গের ধর্ম বিষয়ক প্রবৃত্তি সকল সঞ্চালন পূর্বক
চরিতার্থ করা,—তাহারদিগকে মার্জিত বুদ্ধি
সহকারে চালনা করা, তদ্বারা পরমাশ্চর্য্য-
স্বরূপ পরমেশ্বরের প্রতি শ্রদ্ধা ও ভক্তি প্রকাশ
করা, তাঁহার অপার মহিমার প্রশংসা বি-
ষয়ে চিত্ত সমর্পণ করা, এবং তাঁহার আজ্ঞা-
বহু হইয়া তাঁহার নিয়ম প্রতিপালনের আ-
বশ্যকতা হৃদয়ঙ্গম করা সর্ব্বতোভাবে কর্তব্য ।
এই শেষোক্ত বিষয় অতি গুরুতর ও পরম
কল্যাণদায়ক । আমারদিগের বুদ্ধিবৃত্তি যত
বর্দ্ধিত হউক, কিন্তু ধর্মপ্রবৃত্তি দ্বারা প্র-
যোজিত ও উৎসাহিত না হইলে মিষ্ট কল
প্রদান করে না । বিদ্যা রত্ন মহাধন বটে,
কিন্তু ধর্ম স্বরূপ চন্দ্রালোক ব্যতিরেকে তাহার
পরম রমণীয় শোভা প্রকাশ পায় না ।
কেবল বুদ্ধিবৃত্তি চরিতার্থ হইলেই মনুষ্যের
পরম পুরুষার্থ সিদ্ধ হয় না ; ধর্মপ্রবৃত্তি
সমুদায় সঞ্চালন পূর্বক বুদ্ধি-নিষ্পন্ন তত্ত্ব
সকলের অনুষ্ঠান করা, ও তন্নির্দিষ্ট নিয়ম সমু-
দয় প্রতিপালন করা অতি কর্তব্য । যখন
এই অখিল ব্রহ্মাণ্ড এক যন্ত্র স্বরূপ এবং এক অ-

দ্বিতীয় পরমেশ্বরই ইহার স্রষ্টা ও পাতা, তখন ইহা অবশ্যই অনুভব-সিদ্ধ, যে এই জগতের সমুদায় অংশের পরম্পর অতি সুন্দর সামঞ্জস্য আছে, এবং ইহার সহিত ঈশ্বরের স্বরূপেরও ঐক্য আছে। মনুষ্যের মনও এই অসীম বিশ্বের এক বিন্দু বটে, সুতরাং সমুদায় জগতের সহিত তাহারও অবশ্য সামঞ্জস্য আছে। বিশ্ব-কার্যের আলোচনা করিয়া বিশ্বাধিপের অভিপ্রায় নির্ণয় করা আমারদের সমস্ত বুদ্ধিবৃত্তি ও ধর্মপ্রবৃত্তির প্রধান প্রয়োজন।

বিদ্যা ও ধর্মের পরম্পর অনৈক্য ভাবা উচিত নহে। বিদ্যালোক দ্বারা যে সমস্ত যথার্থ তত্ত্ব প্রকাশ হয়, তাহা সাক্ষাৎ পরমেশ্বর-প্রণীত। এই প্রত্যক্ষ পরিদৃশ্যমান বিশ্ব-রূপ ধর্মশাস্ত্রের আলোচনা দ্বারা যাবতীর তত্ত্ব নিকপিত হয়, এবং যে সমস্ত নিয়ম নির্দিষ্ট হয়, তাহাই যথার্থ ধর্ম। পরমেশ্বরই আমাদের পরম আচার্য্য এবং এই অচিন্ত্য বিশ্ব-কার্যই আমাদের পরম শাস্ত্র। এ শাস্ত্রে ভ্রম নাই, প্রমাদ নাই, এবং কোন অবৈধ বিধান থাকিবারও সম্ভাবনা নাই।

যিনি আমারদের বুদ্ধি সৃষ্টি করিয়াছেন, তিনিই ধর্মপ্রবৃত্তি প্রদান করিয়াছেন, অতএব তাহারদের পরম্পর অনৈক্য থাকা কখনই সম্ভাবিত নহে। পরমেশ্বর তাহারদের পরম্পর সুন্দর সামঞ্জস্য রাখিয়াছেন, কেবল আমারদিগের মূঢ়তা বশতঃ তাহারদের পরম্পর অনৈক্য ঘটিয়াছে। মনুষ্যদিগের পরম্পর জ্ঞানোপদেশ ও সর্ব-শ্রেষ্ঠ সর্ব-মঙ্গলালয় পরমেশ্বরের উপাসনা বিষয়ে যুগপৎ বুদ্ধি-বৃত্তি এবং ধর্মপ্রবৃত্তি চালনা করা উচিত। তাহা হইলে হৃদয় ভাণ্ডার জ্ঞান-রত্নে পরিপূর্ণ হইবে, এবং সকলে পরম্পর আনন্দ বিতরণ পূর্বক প্রচুর সুখ প্রাপ্ত হইবে। যাহার চিত্ত পরম মঙ্গলাকর পরমেশ্বরের তত্ত্ব রসে আদ্র, এবং তাহার পরম কল্যাণকর বিশ্ব-কৌশলের জ্ঞানে পূর্ণ, ও মনুষ্যবর্গের শুভানুধ্যানে অনুরক্ত থাকিয়া তাহারদের প্রীতি সলিলে মগ্ন হইয়া রহিয়াছে, সেই ধর্মপ্রায়ণ, পরম দয়াবান, শান্ত-স্বভাব, সচ্চরিত্র, সাধু ব্যক্তির সংসর্গে যিনি এক দিবস কিম্বা এক মূহূর্ত্তও যাপন করিয়াছেন, তিনি তৎকালে যে প্রকার নির্মল অনুপম স্থির সুখ

সম্ভোগ করিয়াছেন, তাহা অনির্কচনীয়। বিশেষতঃ একপ অনুষ্ঠানে প্রবৃত্ত থাকিলে আমারদের বুদ্ধিবৃত্তি ও ধর্মপ্রবৃত্তি সমুদায় উত্তরোত্তর প্রবল হইবে, এবং জগদীশ্বরের নিয়ম নিকপণ ও প্রতিপালন করিবার সামর্থ্য বৃদ্ধি হইবে।

এখনও. আমারদিগের নিকৃষ্টপ্রবৃত্তির বিষয়ে সবিশেষ কিছু বলা হয় নাই, কিন্তু তাহারদের বৃত্তান্ত এক প্রকার পূর্বোক্ত প্রকরণ সকলের অন্তর্ভূত রহিয়াছে। অঙ্গ চালনার প্রয়োজন স্থাপনায় জিঘাংসা, প্রতি-বিধিৎসা, নির্মিমিৎসা, অর্জ্জুনম্পৃহা, আত্মা-দর ও লোকানুরাগপ্রিয়তা বৃত্তির বিষয় এক প্রকার প্রতিপন্ন হইয়াছে; কারণ মনুষ্য এই সকল বৃত্তির বশবর্তী হইয়াই অঙ্গ চালনা করেন। সাংসারিক বিঘ্ন নিরাকরণ করিতে হইলে জিঘাংসা ও প্রতিবিধিৎসা বৃত্তি চরিতার্থ হয়। বল-সাধ্য শিষ্প কর্ম সম্পাদনার্থে এই দুই বৃত্তি এবং নির্মিমিৎসা ও অর্জ্জুনম্পৃ-হার চালনা করিতে হয়। জিগীষা দ্বারা, অর্থাৎ অধিকতর শুভ সাধনে কে সমর্থ হইতে পারে এইরূপ প্রতিজ্ঞা পূর্বক কার্য্যানুষ্ঠান দ্বারা

আত্মাদর ও লোকানুরাগপ্রিয়তা বৃত্তি চরিতার্থ হয়। তদ্ভিন্ন, বুদ্ধি ও ধর্ম্যপ্রবৃত্তি চালনাতেও পূর্বোক্ত কতিপয় বৃত্তি এবং আর আর নিকৃষ্টপ্রবৃত্তি চালনা করা হয়। কাম, অ-পত্যস্নেহ ও আসঙ্গলিপ্সা ইহার। বুদ্ধিবৃত্তি এবং ভক্তি, উপচিকীষাদি ধর্ম্যপ্রবৃত্তির আয়ত্ত থাকিলে সংসারশ্রমকে পরম রমণীয় করে। নিকৃষ্টপ্রবৃত্তি সমুদয়কে পূর্বোক্ত প্রধান প্রধান বৃত্তির বশবর্ত্তি করিয়া যথা নিয়মে চালনা করা কোন ক্রমেই অধর্ম্ম-মূলক নহে। নিকৃষ্ট প্রবৃত্তির প্রবলতা দ্বারা পাপ সঞ্চার হইতে পারে বলিয়া তাহারদের উচ্ছেদ চেষ্টা করা কদাপি পরমেশ্বরের অভিপ্রেত নহে। “তাহারদিগকে বশীভূত রাখ, কিন্তু কদাপি তাহারদের বশীভূত হইও না” ইহাই তাঁহার শাসন। অধর্ম্ম বশে বা ধর্ম্ম ভ্রমে ইহার অন্যথাচরণ করিলেই দুঃখ আছে। অতএব, যাহারা ইন্দ্রিয়ের উচ্ছেদ সাধনকে ইন্দ্রিয়-সংযম বলিয়া ইন্দ্রিয়-দ্বার রোধ করিবার চেষ্টা করে, ও সাংসারিক কার্য সম্পাদনে বিমুখ হয়, তাহার। পরমেশ্বর সন্নি-ধানে সাপরাধ থাকিয়া নানা মুখে বঞ্চিত হয়।

বিশ্ব-নিয়ন্তার নিয়ম পালনেই ধর্ম ও মুখ,
এবং তাহার নিয়ম লঙ্ঘনেই অধর্ম ও দুঃখ।

চতুর্থতঃ—আহার, নিদ্রা, ও আমোদ
প্রমোদে কিঞ্চিৎ কাল ক্ষেপণ করিবেক।

আমোদ, প্রমোদ, হাস্য, কৌতুকে কি-
ঞ্চিৎ কাল ক্ষেপণ করা গর্হিত নহে, বরং অ-
ত্যন্ত উপকার-জনক। তাহাতে শরীর মুস্থ
ও মন প্রশান্ত থাকে। অবিরত এক বৃত্তি চা-
লনা করিলে ক্লান্ত হইতে হয়, অতএব জগ-
দীশ্বর আমারদিগকে নানা বৃত্তি প্রদান করিয়া
নানা প্রকার মুখ ভোগের অধিকারি করি-
য়াছেন। যখন আমরা সঙ্গীত রসাস্বাদনার্থ
স্বরানুভাবকতা ও কালানুভাবকতা বৃত্তি প্রাপ্ত
হইয়াছি, এবং যখন চিত্রময় প্রতিকূপ ও পা-
ষাণাদি-নির্মিত প্রতিমূর্তি প্রস্তুত করিবার
নিমিত্ত অনুচিকীর্ষা, নির্মিমিৎসা, বর্ণানুভাব-
কতা, আকারানুভাবকতা প্রভৃতি নানা বৃত্তি
প্রাপ্ত হইয়াছি, তখন তত্তৎ বিষয় সম্পাদ-
নার্থ ঐ সকল বৃত্তি নিয়োজন করা কোন ক্র-
মেই যুক্তি-বিরুদ্ধ নহে। তবে তাহার সহিত
দুষ্প্রবৃত্তির সহযোগ হওয়া অবশ্যই দূষণীয়
তাহার সন্দেহ নাই। যে সকল ব্যাপার দৃষ্টি

১৩৬ প্রাকৃতিক নিয়মানুযায়ী

করিলে নিকৃষ্ট প্রবৃত্তি উত্তেজিত হয়, এবং
যাহা দেখিলে বুদ্ধিবৃত্তি ও ধর্মপ্রবৃত্তি বর্দ্ধিত
হয়, উভয়ই চিত্রপটে চিত্রিত হইতে পারে ।
যাহা কর্ণগোচর হইলে রিপু সকল অবলম্বন হয়,
এবং যাহা শ্রবণ করিলে ধর্ম মতি ও পর-
মেশ্বরে প্রীতি হয়, উভয়ই তাল, মান, রাগ,
রাগিণী সহকারে গীত হইতে পারে । তন্মধ্যে
যাহার নিকৃষ্টপ্রবৃত্তি অবলম্বন, সে তদুপযোগি
বিষয় দর্শন ও শ্রবণ করিতে ভালবাসে,
এবং যাহার বুদ্ধিবৃত্তি ও ধর্মপ্রবৃত্তি বলবতী,
সে ঐ সকল বৃত্তি যাহাতে চরিতার্থ হয়, তা-
হাই বাঞ্ছা করে । যে দেশের লোক অশ্লীল
অকথ্য বিষয় সকল দর্শন, শ্রবণ, উচ্চারণ করিয়া
লজ্জিত হয় না, তাহারদের নিকৃষ্টপ্রবৃত্তি অ-
ত্যন্ত তেজস্বিনী তাহার সন্দেহ নাই । আমা-
রদের দেশে যেকয় প্রকার অতি জঘন্য নৃত্য
গীত প্রচলিত আছে, এ দেশীয় জন-সাধারণ-
ের নিকৃষ্টপ্রবৃত্তি অবলম্বন না থাকিলে, তাহা
কখনই চলিত থাকিত না । কিন্তু কুপ্রবৃত্তি-
জনক নৃত্য গীত নিষিদ্ধ বলিয়া জ্ঞান-বর্দ্ধক ও
ধর্মপ্রবর্তক পবিত্র গান কোন ক্রমেই অশ্রাব্য
নহে ।

যখন জগদীশ্বর আমাদেরদিগকে আ-
মোদ, প্রমোদ, হাস্য, কোতুকের উপযোগি
নানা প্রকার বৃত্তি প্রদান করিয়াছেন, এবং
যখন সেই সকল বৃত্তি সঞ্চালন করিলে শা-
রীরিক স্বাস্থ্য ও মানসিক 'সুখ' সম্পন্ন হয়,
তখন তাহাতে কিঞ্চিৎ কাল ক্ষেপণ করা তাঁ-
হার অভিপ্রেত বলিয়া স্বীকার করিতে হয়।
তবে তাহাতে পাপের সাহচর্য থাকা নিন্দ-
নীয় তাহার সন্দেহ নাই।

এস্থলে মনুষ্যের সুখ-সম্পাদক আর এক
টি বিষয় বিবেচনা করা আবশ্যিক। প্রত্যেক
ব্যক্তির সুখ স্বীয় সমাজের আচার, ব্যবহার,
মত, ও ধর্মের উপর এপ্রকার নির্ভর করে, যে
সমুদায় লোকে তাঁহার মতাবলম্বি না হইলে
এবং তদনুযায়ি অনুষ্ঠান না করিলে তিনি ইহ
লোকে আপনার জ্ঞান ও ধর্মের সম্পূর্ণ ফল
প্রাপ্ত হইতে পারেন না। বরঞ্চ অনেক স্থলে
তাঁহার সেই জ্ঞান ও ধর্মের অনুষ্ঠান তাঁহার
ক্লেশেরই কারণ হইয়া উঠে। লোকে তাঁহার
মর্যাদা জানিতে পারে না, সুতরাং সমাদরও
করে না। অন্ধকারে থাকা তাহারদের অভ্যাস
পাইয়া গিয়াছে, সূর্য-জ্যোতিঃ আর সহ হয় না।

তাহারা স্বপ্নকে সত্য জ্ঞান করে, আর জাগ্রৎ কালের বাস্তবিক ব্যাপার সকল স্বপ্ন জ্ঞান করে। কত কত অসাধারণ-বুদ্ধি পরম সাধু মহাত্ম ব্যক্তিও স্বদেশস্থ দুর্দান্ত মূর্থদিগের অত্যাচারে অশেষ ক্লেশ ও দুঃসহ যন্ত্রণা ভোগ করিয়াছেন—মৃত্যুর গ্রাসেও পতিত হইয়াছেন। এস্থলে রাজা রামমোহন রায়কে কাহার না স্মরণ হইবে? ইটালি দেশীয় সুপ্রসিদ্ধ পণ্ডিত গালিলিয় পৃথিবীকে সচলা বলিয়া উল্লেখ করাতে, রোম নগরীয় খ্রীষ্টান সভার অধ্যক্ষেরা তাঁহাকে কারা-রুদ্ধ ও নির্বাসিত করেন। অন্যান্য দেশে যে এ প্রকার ভূরি ভূরি ঘটনা হইয়াছে, তাহা এদেশস্থ ইংলণ্ডীয় ভাষাধ্যায়ি ব্যক্তিরা সবিশেষ জ্ঞাত আছেন। এক্ষণে তাঁহারা আপনারাই এ বিষয়ের উদাহরণ-স্থল হইতেছেন। তাঁহাদের মধ্যে অনেকানেক ব্যক্তি সাংসারিক আচার ব্যবহারাদির যথার্থ তত্ত্ব অবগত হইয়া, ও সুখ সৌভাগ্যের বহুতর উপায় নিকপণ করিয়াও লোক ভয়ে তাহার অনুষ্ঠানে পরাঙ্মুখ হইতেছেন। অতএব, ধর্ম্মতঃ এবং স্বার্থতঃ উভয় কক্ষেই স্বদেশীয় লোককে বিদ্যা বিত-

রূপার্থে এবং তাহারদিগকে সুখলাভের যথার্থ পথ প্রদর্শনার্থে একান্ত যত্ন করা উচিত। আপন আপন নিত্য কর্ম সমাপনান্তে যৎ কিঞ্চিৎকাল যাহা অবশিষ্ট থাকে, তাহা জন-সমাজের সুখোন্নতির উপায় সম্পাদনে ক্ষেপণ করাই শ্রেয়ঃ। যখন মনুষ্যের বুদ্ধিবৃত্তি ও ধর্মপ্রবৃত্তির প্রাধান্যের উপর সুখ নির্ভর করে, তখন জ্ঞানাপন্ন ও ধর্ম-নিষ্ঠ ব্যক্তি তাদৃশ উৎকৃষ্ট সমাজস্থ না হইলে কদাপি সুখী হইতে পারেন না। যে স্থানের সাধারণ লোকে অন্যায় ধনোপার্জন করিয়া বহু ব্যয় পূর্বক নাম সত্ত্বম উপার্জন করে, তথায় ছুই এক জন পরম ন্যায়বান ও ধর্মশীল হইলে তাহারদের উদরান্ন হওয়াই ছুফর হয়। এই দুর্ভাগ্য দেশের অবস্থা নিরীক্ষণ করিলেই তাহার সমূহ উদাহরণ-স্থল প্রাপ্ত হওয়া যায়।

এই গ্রন্থে যে সমস্ত পরম মঙ্গলদায়ক তত্ত্ব প্রকাশ করা যাইতেছে, যদি আপামর সাধারণ সকল লোকে তাহা গ্রহণ করে, যদি রাজা তদনুযায়ি নিয়ম সংস্থাপন করিয়া রাজ্য পালন করেন, এবং জ্ঞানবান্ পণ্ডিত মহা-

শয়েরা তাহা সাক্ষাৎ পরমেশ্বর-প্রণীত নিয়ম বলিয়া উপদেশ দেন, তবে অবিলম্বে সর্বসাধারণের জ্ঞান, ধর্ম, ও সুখভোগের বিস্তার উন্নতি হয়, এবং সকল-মঙ্গললব্ধ পরমেশ্বরের অচিন্ত্য জ্ঞান ও অপার করুণার প্রত্যক্ষ প্রমাণ সকল সুস্পষ্ট রূপে প্রতীত হইতে থাকে। ভূমণ্ডলে এই সমস্ত মতানুযায়ী আচার ব্যবহার প্রচলিত ও তদ্বারা সুখ সৌভাগ্য বর্দ্ধিত হওয়া কখনই অসম্ভব নহে। সংসারে দুঃখের প্রাদুর্ভাব হইয়া আসিয়াছে বলিয়া কদাপি এ প্রকার অবধারণ করা উচিত নহে, যে চিরকালই ভুলোকের এই প্রকার দুর্দশা থাকিবেক। “মनुষ্যের সুখ ও সভ্যতার এই পর্য্যন্ত উন্নতি হইবেক, ইহার অধিক আর হইবেক না” একপ নির্দেশ করা সম্ভাবিত নহে। তিনি যে কালেন যৎপরিমাণে বাহ্য বস্তুর স্বভাব ও তাহার সহিত আপনার সম্বন্ধ জ্ঞাত হইয়াছেন, ও তদনুযায়ী ব্যবহারে প্রবৃত্ত হইয়াছেন, তখনই তৎপরিমাণে তাঁহার সুখ স্বচ্ছন্দতার বৃদ্ধি হইয়াছে। তিনি প্রথমে জঙ্গলে জঙ্গলে পশু হিংসা করিয়া উদর পূর্ত্তি করেন, পরে কৃষিকার্য্য রূপ উৎকৃষ্টতর

বৃদ্ধি অবলম্বন করিয়া কিঞ্চিৎ স্ফূর্তি লাভ করেন, এবং তদনন্তর শিল্প ও বাণিজ্য-কার্যাদি দ্বারা সাংসারিক সুখ স্বচ্ছন্দতা বৃদ্ধি করেন। কোন দেশের লোক অদ্যাপি শেযোক্ত অবস্থা অতিক্রম করিতে সমর্থ হয় নাই। মনুষ্য যে দীর্ঘ পথ ভ্রমণ করিলে চরমাবস্থায় উত্তীর্ণ হইতে পারিবেন, অদ্যাপি তাহার প্রারম্ভে পদ বিক্ষেপ করিতেছেন। ইহা নিশ্চিত, যে আপনার প্রকৃতি ও তৎসম্বন্ধ বাহ্য বস্তুর জ্ঞান শিক্ষা করা তাহার চরম দশা প্রাপ্তির অন্তরঙ্গ সাধন, কিন্তু জ্ঞান প্রচারের প্রধান উপায় যে মুদ্রায়ন্ত্র, ৪১৫ বৎসর মাত্র পূর্বেও তাহার প্রকাশ ছিল না, এবং গ্রন্থ পাঠের রীতি অদ্যাপি সমুচিত প্রচলিত হয় নাই। বিশেষতঃ সর্বপ্রকার কাল হরণ অপেক্ষা গ্রন্থ পাঠ ও বিদ্যানুশীলন যে সর্বোৎকৃষ্ট ও অত্যাবশ্যক, ইহা আমারদের দেশীয় লোকের অদ্যাপি হৃদয়ঙ্গম হয় নাই। ন্যূনাধিক ৬০০ বৎসর হইল, নাবিকদের মহোপকারী কম্পাস যন্ত্র সাধারণ রূপে বিদিত হইয়াছে, এবং ৩৫৯ বৎসর মাত্র হইল, অর্ধভূমণ্ডল যে আমেরিকা খণ্ড তাহা প্রকাশ হইয়াছে, এবং

তাহার বিস্তর স্থান অদ্যাপি বিচক্ষণ তত্ত্বানু-
সন্ধায়ি পণ্ডিতদিগেরও অজ্ঞাত রহিয়াছে।
কেবল ৭৬ বৎসর অবধি নির্দিষ্ট প্রণালী ক্রমে
রসায়নবিদ্যার চর্চা আরম্ভ হইয়াছে, এবং
এমত মহোপকারী যে বাম্পীয় যন্ত্র, যদ্বারা
সংসারের সুখ স্বচ্ছন্দতা বৃদ্ধি বিষয়ে যুগান্তর
উপস্থিত হইয়াছে, তাহারও বয়ঃক্রম দুই
শত বর্ষের অধিক নহে। ৪৪ বৎসর মাত্র
পূর্বে বাম্পীয় নৌকার সৃষ্টি হয়। এই রূপ
যে সমস্ত বিদ্যা ও তত্ত্ব নিকপণ দ্বারা এক্ষণে
ইউরোপ খণ্ডে এমত সৌভাগ্যশালী হইয়াছে
—এমত পরম পদ প্রাপ্ত হইয়াছে, দুই শত
বা এক শত বা পঞ্চাশৎ বৎসরের মধ্যে তা-
হার অনেকেরই প্রকাশ হইয়াছে। যদিও
অতি পূর্ব কালে তাহার কোন কোন বিষ-
য়ের সূত্রপাত হইয়াছিল বটে, কিন্তু সে সকল
বিষয়ের বিশিষ্ট রূপ উন্নতি সাধন করিয়া
সর্ব দেশে সাধারণ রূপে প্রচার করিবার ও
তদ্বারা লোকের সুখস্বচ্ছন্দতা বৃদ্ধি করিবার
চেষ্টা ইদানীং আরম্ভ হইয়াছে। রাজনীতি
ও ধর্মনীতি এ দুই বিদ্যা অদ্যাপি অতি অপ-
কৃষ্ট ও অসম্পূর্ণ অবস্থায় আছে।

মনুষ্য আপনার প্রগাঢ় মূৰ্খতা দোষে চিরকালই হিংসা লোভাদি দুৰ্দাস্ত রিপু সমূহের বশবর্তী হইয়া চলিয়াছেন; কোন অবস্থাতেই আপনার প্রকৃতি ও প্রয়োজনাদির যথার্থ জ্ঞান প্রাপ্তি পূৰ্ব্বক তদুপযোগি সাংসারিক নিয়ম সংস্থাপনে সমর্থ হইবেন নাই। যে বস্তুর যে শক্তি, সে বস্তু তাহা মনুষ্যের উপর চিরকাল প্রচার করিতেছে, কিন্তু তিনি আপনার মূৰ্খতা দোষে জগতের যথার্থ নিয়ম নিকৃপণ ও তদনুযায়ি ব্যবহার করিতে না পারিয়া অশেষ ক্লেশ ভোগ করিতেছেন। অদ্যাপি সৰ্ব্ব জাতীয় সামান্য লোকেরা ঘোরতর অজ্ঞান তিমিরে আচ্ছন্ন রহিয়াছে, সকল জাতিতেই তাহারদের অধিক সংখ্যা, সুতরাং তাহারদের মূৰ্খতা প্রভাবে অবশিষ্ট লোকেরও অবস্থার ব্যতিক্রম ঘটিয়া উঠিতেছে। বিশেষতঃ এ দেশীয় লোকের মধ্যে যে কেবল পুরুষদিগের অধিকাংশ মূৰ্খ এমত নহে, সমস্ত স্ত্রীলোক বিদ্যা রসে বঞ্চিত রহিয়াছে। তাহারা স্বীয় সংস্কারই সুসংস্কার জ্ঞান করে, এবং যদি কোন বিষয়ে কোন অভিনব প্রণালী স্থাপনের সূত্র দেখে, এবং তাহা যদি পরম

হিত-জনকও হয়, তথাপি অধর্ম-মূলক বোধ করে, এবং কলির উপদ্রব বিবেচনা করিয়া ভয়ে কম্পমান হইতে থাকে । এ প্রযুক্ত এক্ষণে যাঁহারা স্বদেশের কুরীতি সংশোধন বা সুরীতি সংস্থাপনার্থে যত্ন করেন, তাঁহারা সর্বতোভাবে পরাভব প্রাপ্ত হইবেন । প্রভূত অজ্ঞান প্রভাবে তাঁহাদের বিদ্যা-বল প্রকাশ পায় না । অসীম সমুদ্র সলিলে কতিপয় অগ্নি-স্কুলিঙ্গ পতিত হইলে সেই অগ্নিই নির্বাণ হইয়া যায় । অতএব, সর্ব-সাধারণের জ্ঞান চক্ষুরুন্মীলন ব্যতিরেকে এসমস্ত প্রতিবন্ধক নিবারণের আর উপায় নাই । বিদ্যা প্রচারই দুঃখ নাশ ও সুখবৃদ্ধির একমাত্র উপায় । স্বদেশের শুভ সাধনে যাঁহাদের অনুরাগ আছে, তাঁহাদের বিদ্যা জ্যোতিঃ প্রকাশ দ্বারা লোকের চিত্তশুদ্ধি করা সর্বোপায় কৰ্ত্তব্য । বিদ্যাভ্যাসই সুখ-ভূমি আরোহণের প্রথম সোপান । এই প্রধান পথ পরিত্যাগ করিয়া উপায়ান্তর চেষ্টা করিলে তাঁহার ফল অসময়ের ফল তুল্য অপূর্ণ ও বিশ্বাস হইবে । অন্য জাতীয় লোকের সুখ সৌভাগ্য দৃষ্টে আপনাদের তাদৃশ শুভাবস্থা প্রাপ্তির অভিলাষ

হয় বটে, পরের উদ্যানে কোন সুরমা পুষ্পতরু দর্শন করিলে নিজ উদ্যানে তাদৃশ রূক্ষ রোপণ করিবার প্রয়াস হয় বটে, কিন্তু তাহার ভূমি তদ্রূপ উৎকৃষ্ট করা আবশ্যিক। যে কার্যের যে কারণ, তদ্ব্যতিরেকে সে কার্য কখনই সম্পাদিত হইতে পারে না। ফলতঃ এক্ষণে বিদ্যা-প্রভা পৃথিবীতে যে প্রকার ব্যাপ্ত হইতেছে, শিল্প কর্মের উন্নতি হইতেছে, ও জ্ঞান প্রচারের উপায় সকল ধার্য হইতেছে, তাহাতে মনুষ্যের কার্যিক শ্রমের ক্রমশঃ লাঘব হইবে, বিদ্যানুশীলনার্থে লোকের অবকাশ বৃদ্ধি হইবে, এবং তদ্বারা জগতের নিয়ম নিকপণ পূর্বক তৎপ্রতিপালনে বিশিষ্টরূপ প্রযত্ন হইবে তাহার সন্দেহ নাই। অতএব, এক্ষণে অনায়াসেই এ কথা বলা যাইতে পারে, যে ভূমণ্ডলে মনুষ্যের দুঃখ হরণ ও সুখোন্নতি বিষয়ে যুগান্তর উপস্থিত হইবার সূত্রপাত হইতেছে।

পঞ্চমাধ্যায়

প্রাকৃতিক নিয়ম লঙ্ঘন করিলে মনুষ্যের কি
প্রকার দুঃখ হয় তাহার বিচার

ভূয়োভূয় উল্লেখ করা গিয়াছে, যে সকল-
মঙ্গলালয় পরমেশ্বর কেবল মঙ্গল-জনক নিয়ম
সমুদায় সংস্থাপন করিয়া বিশ্ব-রাজ্য পালন
করিতেছেন, এবং সংসারের সমস্ত বস্তুকে আ-
মারদের উত্তরোত্তর সুখ-বৃদ্ধি সাধনের উ-
পযোগি করিয়া সৃষ্টি করিয়াছেন। কেবল
মঙ্গলই তাঁহার সমুদায় নিয়মের প্রয়োজন,
এবং সুখই সমস্ত বস্তুর উৎপাদ্য। সংসারে
এমত কোন নিয়ম নাই, যে তাহা দুঃখোৎ-
পত্তির নিমিত্তে স্থাপিত হইয়াছে, এবং এ
প্রকার কোন পদার্থ নাই, যে তাহা জগতের
অশুভ সম্পাদনার্থে সৃষ্টি হইয়াছে। যদিও
এই সমস্ত কথা যথার্থ বটে, তথাপি ভূম-

গুল কেবল দুঃখের স্থান রূপে প্রতীয়মান হই-
তেছে ; রোগের যাতনা, দারুণ দৈন্য-দশা,
পরের অত্যাচার, আকস্মিক দুর্ঘটনা, নৈস-
র্গিক ঔৎপাত এবং অন্যান্য নানা প্রকার
শারীরিক ও মানসিক পীড়ায় পীড়িত হইয়া
ভূরি ভূরি লোকে দুঃসহ যন্ত্রণা ভোগ করি-
তেছে। অতএব, এই সমস্ত দুঃখ পরমেশ্বরের
নিয়ম পালনাধীন ঘটিতেছে, কি তাঁহার সুখা-
বহ নিয়ম অবহেলন করাতেই মর্ত্যলোকের
এইরূপ দারুণ দুর্দশা হইতেছে, তাহা বিবেচনা
করা কর্তব্য। বিবেচনা করিলে অবধারিত
হইবে, যে যাবতীয় দুঃখ তাঁহার নিয়ম লঙ্ঘ-
নেরই ফল। সেই পূর্ণ-ন্যায়বান্ বিশ্ব-সম্রাট্
অশুভ কর্মের দুঃখ রূপ ফল বিধান করিয়া-
ছেন, এবং সংসারে যে কিছু দুঃখ আছে,
তাহাও তিনি সর্ব সাধারণের সুখের নিমিত্তেই
সৃজন করিয়াছেন।

ভৌতিক নিয়ম লঙ্ঘনের ফল

পরমেশ্বর যে সকল নিয়ম সংস্থাপন
করিয়া এই অখিল ব্রহ্মাণ্ড শাসন করিতেছেন,
তদ্বিষয় বিবেচনা করিতে হইলে, প্রথমতঃ সেই
সমুদায় নিয়মের প্রয়োজন কি ও তদনুযায়ি

১৪৮ ভৌতিক নিয়ম লঙ্ঘনের ফল

কার্য্য করিলে কি কি উপকার দর্শে, এবং দ্বিতীয়তঃ কি কার্য্য করিলে তাহার বিরুদ্ধাচরণ করা হয়, ও তাহাতে কি কি অনিষ্ট ঘটে, এই সমুদায় অনুসন্ধান করা সর্ব্বতোভাবে কর্তব্য । সংপ্রতি আকর্ষণী শক্তির উদাহরণ দিয়া এ বিষয় প্রতিপাদন করা যাইতেছে ।

কোন মৃৎপিণ্ড হস্ত হইতে স্থলিত হইলে বা কোন ফল বৃক্ষ-শাখা হইতে বিগলিত হইলে, উর্দ্ধ দিকে গমন না করিয়া পৃথিবীতেই কেন পতিত হয়, এই প্রশ্ন বিচার করিয়া নিঃসংশয়ে নিকপিত হইয়াছে, যে পৃথিবীর এমনত কোন শক্তি আছে, যে তদ্বারা ঐ ফল ও মৃৎপিণ্ড অধোদিকে আকৃষ্ট হইয়া ভূতলে পতিত হয় । যদি কোন নৌকা নদীতে ভাসিতে থাকে, আর কোন তীরস্থ ব্যক্তি রজ্জু দ্বারা তাহা আকর্ষণ করিতে থাকে, তবে সেই নৌকা যেমন তীরাভিমুখে গমন করে ও অবশেষে তীরে আসিয়াই লগ্ন হয়, সেইরূপ পৃথিবীর শক্তি বিশেষ দ্বারা তন্নিকটবর্ত্তি সমস্ত জড় পদার্থ পৃথিবীতে পতিত হয় । এই শক্তির নাম আকর্ষণী শক্তি ।

প্রত্যেক পরমাণুতে এই আকর্ষণ-শক্তি আছে, সুতরাং যে দ্রব্যে যত পরমাণু, সে দ্রব্যের তত আকর্ষণ-শক্তি। পৃথিবী আপ-নার নিকটবর্তী সমুদায় দ্রব্য অপেক্ষা বৃহৎ, অর্থাৎ অধিক পরমাণু-বিশিষ্ট, এ প্রযুক্ত সমস্ত বস্তুকে স্বাভিমুখে আকর্ষণ করে। অতএব যে সকল বস্তু নিরবলয় থাকে, তাহা সুতরাং ভূমিতলে পতিত হইয়া তছুপরি স্থিতি করে। এই নিয়ম দ্বারা জীবলোকের বিস্তর উপকার দর্শিতেছে। ইহার দ্বারা পৃথিবীস্থ বা তল্লিকটস্থ সমস্ত বস্তু যথোপযোগি আশ্রয় প্রাপ্ত হইলে তছুপরি স্থির হইয়া থাকে, প্রাচীর ও স্তম্ভ সকল যথোপযুক্ত স্থূল ও সরল করিয়া নির্মাণ করিলে দৃঢ় ও উন্নত থাকে, নৌকা সকল জলোপরি স্ৰবমান হইয়া স্থিরভাবে চলে, বৃক্ষ লতাাদি পৃথিবীতে দৃঢ়রূপে বদ্ধ-মূল আছে, এবং জীবগণ অভ্যাস ও যৎকিঞ্চিৎ যত্ন সহকারে অনায়াসে স্থায়ী শরীর স্থির রাখিতে ও অক্লেশে গমনাগমন করিতে সমর্থ হয়। এই পরম শুভকরী শক্তির সহিত মানব প্রকৃতির সামঞ্জস্য স্থাপনার্থে পরমেশ্বর অতুল কৌশল প্রকাশ পূর্বক মানুষকে

১৫০ ভৌতিক নিয়ম লঙ্ঘনের ফল

এ প্রকার অস্থি, মাংস, শিরা, ও বুদ্ধিবৃত্তি প্রদান করিয়াছেন, যে তদ্বারা তিনি অবলীলাক্রমে গতিবিধি করিতে পারেন। তিনি আপনার বুদ্ধি সহকারে ঐ নিয়মের সত্তা, তৎসাপেক্ষ কার্যের ক্রম, তাহার সহিত আপন প্রকৃতির সম্বন্ধ, তৎপ্রতিপালনের শুভ ফল ও তাহা লঙ্ঘনের অশুভ ফল এই সমস্ত জানিতে পারেন, ও তদনুযায়ি আচরণ করিয়া দুঃখ নিবারণ ও সুখ স্বচ্ছন্দতা লাভ করিতে সমর্থ হইবেন। কিন্তু এই আকর্ষণ-শক্তি সম্বন্ধীয় নিয়ম পালন দ্বারা যেনন অশেষ প্রকার ইষ্ট সাধন হয়, সেই রূপ তাহা লঙ্ঘন করিলে বিস্তর অনিষ্ট ঘটনাও হয়। অশ্ব, রথ, ছাদ, সোপান, বৃক্ষ পর্বতাদি হইতে পতিত হইলে হস্ত পদাদি ভঙ্গ ও প্রাণ বিয়োগ হইবার সন্যক্ সম্ভাবনা আছে; অতএব পরমেশ্বর এই সমস্ত বিদ্যম দুর্গটনা নিবারণার্থে কিপ্রকার উপায় করিয়া দিয়াছেন, তাহার অনুসন্ধান করা অতি কর্তব্য। অন্যান্য জন্তুও এই প্রবল শক্তির অধীন, পরমেশ্বর তাহারদিগের প্রকৃতিও তদুপযোগি করিয়াছেন। তিনি তাহারদিগকে অস্থি, মাংসপেশী, চক্ষু কণাদি

ইন্দ্রিয়, সাবধানতা, ও অন্যান্য নানা প্রকার শারীরিক ও মানসিক শক্তি প্রদান করিয়া তাহারদের প্রকৃতি ও আকর্ষণী-শক্তি উভয়ের পরস্পর সুন্দর সামঞ্জস্য রাখিয়াছেন। সামান্যতঃ এই সমস্ত প্রবল উপায় থাকাতে তাহারদের সর্বদা বিপদ ঘটিতে পায় না। আকর্ষণ-শক্তি দ্বারা যে জন্তুর অনিষ্ট ঘটনার অধিক সম্ভাবনা আছে, পরমেশ্বর তাহার সে দুর্ঘটনা নিবারণের সুন্দর কৌশল করিয়া দিয়াছেন। বানরের বৃক্ষ আরোহণ করা স্বভাব, অতএব জগদীশ্বর তাহারদের হস্ত, পদ, ও লাল্মূলে অপেক্ষাকৃত অধিক বল প্রদান করিয়াছেন; তদ্বারা তাহার। অবলীলাক্রমে নির্ঝিঁঘে শাখায় শাখায় গমন করে। যে সকল পক্ষি বৃক্ষ-শাখায় শয়ন করিয়া নিদ্রা যায়, তাহারদের এ প্রকার এক মাংসপেশী জানুর উপর দিয়া পদতল পর্য্যন্ত গিয়াছে, যে তাহা শরীরের ভার দ্বারা সঙ্কুচিত হইয়া তাহারদের পদদ্বয়কে বৃক্ষ-শাখায় সংযুক্ত করিয়া রাখে। ইহাতে যে পক্ষির শরীর যত ভারী হয়, ও তদনুসারে যাহার পতনের যত সম্ভাবনা থাকে, সে তত দৃঢ় রূপে বৃক্ষ-শাখায়

১৫২ ভৌতিক নিয়ম লঙ্ঘনের ফল

সংশ্লিষ্ট হইয়া থাকে। বালুকাময় উষ্ণ ভূ-মিতে গমন করা উদ্ভেদকর্ম, এ নিমিত্ত তাহারা বিস্তৃত খুর প্রাপ্ত হইয়াছে। নতুবা শ্লথ বালু-কাতে তাহারদের পদ মগ্ন হইয়া অতিশয় ক্লেশকর হইত। মৎস্যদিগের উদরে এক বায়ুকোষ* আছে, তাহারা তাহার শৈথিল্য বা সঙ্কোচন করিয়া স্বেচ্ছানুসারে জল মধ্যে উর্দ্ধ বা অধঃ সঞ্চারণ করে।

এই সকল উদাহরণ দ্বারা ইহা স্পষ্ট প্রকাশ পাইতেছে, যে পরম কারুণিক পর-মেশ্বর ভূমির আকর্ষণী শক্তির সহিত নীচ জন্তুদিগের প্রকৃতির অতি সুন্দর সামঞ্জস্য রাখিয়াছেন। কেবল মনুষ্যই কি পরম পিতার অপ্রিয় পাত্র? তিনিই কি কেবল ঐ দুর্দ্ব-ষণীয়া শক্তির অধীন থাকিয়া দুঃখ ভোগ ক-রিতে জন্মিয়াছেন? পরম মঙ্গলাকর পর-মেশ্বরের নিয়ম সমুদায় পর্যালোচনা করিয়া দেখিলে এ কথাকে নিমেষ মাত্রও মনেতে স্থান দেওয়া যায় না। তাঁহার বিচিত্র শক্তি ও বিচিত্র কার্য্য। তিনি মনুষ্যের নিমিত্তে প্রকা-রান্তর কৌশল করিয়াছেন, তাহার মর্ম্ম অব-

* মাছের পটকা।

গত হইয়া তদনুযায়ি অনুষ্ঠান করিতে পারিলে অবশ্য পশুদিগের ন্যায় মনুষ্যেরও এ বিষয়ে ছুঃখ হ্রাস ও সুখ লাভ হয় । মনুষ্যেরও পশুদিগের ন্যায় অস্থি, মাংসপেশী, ধমনী*, দেহের সমসংস্থান জ্ঞান ও সাবধানতা বৃত্তি আছে, কিন্তু তাঁহার এই সমস্ত বিষয় পশুদিগের সমান নহে, কারণ তাঁহার শরীরের আকার, স্থূলতা, ও ভারবদ্ধ যেকপ, তিনি তৎ পরিমাণে এই সকল বিষয় প্রাপ্ত হইয়েন নাই । কিন্তু জগদীশ্বর নির্মিমিৎস। ও অনুমিতি বৃত্তি প্রদান করিয়া তাঁহাকে এবিষয়ে পশুদের সমান, বরঞ্চ তাহারদের অপেক্ষা শ্রেষ্ঠ করিয়াছেন । পূর্বে নিকপণ করা গিয়াছে, যে মনুষ্যের বুদ্ধিবৃত্তি ও ধর্মপ্রবৃত্তিই

* এই সকল নাড়ী স্নেহবর্ণ। কপালস্থ মস্তিষ্ক ও মেরুদণ্ডস্থ মজ্জার সহিত মুখ্যরূপে বা গৌণরূপে ইহাদের সংযোগ আছে ; মন এই সকল নাড়ী দ্বারা ইন্দ্রিয়ের বিষয় সমুদায় গ্রহণ করিতে সমর্থ হয়, ও ইচ্ছা মাত্র অঙ্গ সকল চালনা করিতে শক্তি হয়, এবং পাকস্থলী ও হৃদয়াদি যে সমস্ত শারীরিক যন্ত্রের ব্যাপার ইচ্ছার আয়ত্ত নহে, বিশেষ বিশেষ ধমনীর শক্তি তাহারও উপর চালিত হয় ।

১৫৪ ভৌতিক নিয়ম লঙ্ঘনের ফল

সর্বাপেক্ষা প্রধান বৃত্তি এবং সমুদায় বাহ্য বস্তুর যত্নবাহু তাহার সম্যক উপযোগী। আকর্ষণ-শক্তির বিষয়ও তাহার এক উদাহরণ-স্থল। সবিশেষ বিবেচনা করিয়া দেখিলে ইহা সপ্রমাণ হইবে, যে পৃথিবীর আকর্ষণী-শক্তি দ্বারা যত ক্লেশ ঘটনা হয়, তৎ সমুদায় আমা-রদিগের নিকৃষ্টপ্রবৃত্তির আধ্যান্য-ও বুদ্ধিবৃত্তি চালনার ক্রটি প্রযুক্তই ঘটিয়া থাকে। শকট ভগ্ন বা গৃহ পতিত হইয়া লোকের অঙ্গভঙ্গ বা প্রাণবিয়োগ হইলে যদি অনুসন্ধান করিয়া দেখা যায়, তবে প্রায় দৃষ্ট হয়, যে সেই রথ বা গৃহ অতি পুরাতন ও জীর্ণ হইয়া গিয়াছিল, এবং শকট-নায়ক ও গৃহস্বামির অর্জ্জুনস্পৃহা বৃত্তির প্রবলতা হওয়াতেই তাহার প্রতী-কার হয় নাই। এইরূপ কত কত ব্যক্তি ইন্দ্রিয়-ভোগের আতিশয্য দ্বারা দুর্বল ও নিবীৰ্য্য হইয়া অট্টালিকার ছাদ, নৌকার গুণ-বৃক্ষ*, রথের শৃঙ্গ, মন্দিরের চূড়া ও বৃক্ষের শাখা হইতে পতিত হয়। অপরিমিত মাদক সেবন দ্বারা শারীরিক ও মানসিক শক্তি সমু-দায়ের ত্রাস হওয়াতে এ প্রকার ভূরি ভূরি

ভৌতিক নিয়ম লঙ্ঘনের ফল ১৫৫

দুর্ঘটনা সর্বদা ঘটিয়া থাকে। এমত স্থলে কেবল নিরুপদ্রব্যতার আতিশয্য মাত্র মনুষ্যের দোষ নহে, তিনি আপন শরীরের বল ও সর্ম্মসংস্থান জ্ঞান মাত্রের উপর নির্ভর করিয়া চলেন, নিশ্চিন্তমিৎসা ও অনুমিতি বৃত্তির চালনা করেন না। দৈবাৎ পদ স্থলন হইলে যাহাতে একেবারে ভূতলে পতিত না হইন এমত কোন উপায় করেন না। বিশিষ্টরূপ অনুসন্ধান ও বিবেচনা দ্বারা অবশ্য নানা কৌশল কল্পিত হইতে পারে। অটালিকার ছাদের প্রান্তভাগে দণ্ডায়মান হইয়া কার্য্য করিতে হইলে, যদি এক ক্ষুদ্র শৃঙ্খলের এক প্রান্ত কটি দেশে লগ্ন করিয়া অপর প্রান্ত সেই ছাদের কোন স্থানে একটা কীলকে বদ্ধ করিয়া রাখা যায়, তবে নির্ভয়ে কর্ম্ম করা যায়, অথচ পতনের সম্ভাবনা থাকে না।

ইহা যথার্থ বটে, যে মনুষ্যদিগের অন্তঃকরণ অদ্যাগি যেকূপ ভ্রান্তি-সঙ্কুল ও হীন-দশাশ্রিত রহিয়াছে, তাহাতে তাঁহারদের সমুদায় প্রাকৃতিক নিয়ম প্রতিপালনে সম্যক্ সমর্থ হওয়া কখনই সম্ভাবিত নহে, সুতরাং এ বিবেচনায় মনুষ্যকে পশু অপেক্ষা দুর্ভাগ্য

১৫৬ ভৌতিক নিয়ম লঙ্ঘনের কল

বলিতে হয়। কিন্তু আমারদের অসম্যক্ বুদ্ধি চালনাও অযথোচিত বিদ্যানুশীলনই ইহার এক মাত্র কারণ। মনুষ্যের মনোবৃত্তি সমুদায় যত দূর চালিত ও বর্দ্ধিত হইতে পারে, এইরূপে কুত্ৰাপি তাহার অত্যাশ্রিত ও সম্পন্ন হইতে দেখা যায় না। মনুষ্যের মানসিক ও শারীরিক প্রকৃতি, বাহ্য বস্তু সমুদায়ের সহিত তাহার সম্বন্ধ, সেই সকল বস্তুর স্বভাব, শারীরিক ও মানসিক চেষ্টাতেই যথার্থ সুখোদয় হয় ও উৎকৃষ্ট বৃত্তির চালনা করিলে অধিক আনন্দ অনুভূত হয়, এই সমস্ত বিষয় কোন দেশীয় লোকে সুপ্রণালী ক্রমে শিক্ষা করিয়া থাকে? এপ্রকার অবস্থায় ভূমণ্ডলের বহু ভাগ যে কতকগুলি মুহূমান জড়বৎ বুদ্ধি দ্বারা পূর্ণ, ও তজ্জনিত অশেষ প্রকার ছুঃখ দ্বারা আকীর্ণ হইয়া রহিয়াছে, ইহা আশ্চর্য্য নহে। যখন আমারদের মনোবৃত্তি সমুদায় পরস্পর সমঞ্জসীভূত থাকিয়া চেষ্টমান হইলেই সুখ সঞ্চার হয়, তখন তাহারদের অসামঞ্জস্য অর্থাৎ বুদ্ধিবৃত্তি ও ধর্ম্মপ্রবৃত্তির হীনতা ও নিকৃষ্টপ্রবৃত্তি সমুদায়ের প্রবলতা দ্বারা যে ছুঃখোৎপত্তি হয়, ইহা স্বভাব-সিদ্ধ বটে। এই সমস্ত ছুঃখ

আমাদের মঙ্গলাভিপ্রায়ে সৃষ্ট হইয়াছে। যখন আমরা বিশ্ব-নিয়ন্তার কোন নিয়ম লঙ্ঘন করিয়া ক্লেশ পাই, তখন তাহা সেই পরাৎ-পর পরম আচাৰ্য্যের সাক্ষাৎ উপদেশ স্বরূপ জ্ঞান করিয়া একান্ত অন্তঃকরণে এই প্রতিজ্ঞা করা উচিত, যে “ হে বিশ্বাধিপ ! হে করুণাকর ! আমি তোমার সুখাবহ নিয়ম আর লঙ্ঘন করিব না। ” যৎ পরিমাণে আপনার কর্তব্য কর্ম সাধন করিবে, মঙ্গলাকর বিশ্ব-পাতা তৎপরিমাণে সুখ দান করিবেন। কেবল মঙ্গলই সমুদায় বিশ্ব-কোণলের প্রয়োজন, এবং যত দুঃখ উৎপন্ন হয়, তাহা সেই পরম প্রয়োজন সাধনার্থেই সঙ্কল্পিত। অতএব, নিয়ম লঙ্ঘন করিলে অনিষ্ট ঘটে বলিয়া সেই নিয়মকে কখনও অশুভ নিয়ম বলা যায় না। পৃথিবীর আকর্ষণ-শক্তির প্রয়োজন অবগত হইয়া তদনুযায়ি ব্যবহার না করিলে বিপদ উপস্থিত হয়, একারণ তাহাকে অকল্যাণকরী শক্তি বলা কদাপি উচিত নহে। যদি পরমেশ্বর এই শুভকরী আকর্ষণী শক্তিকে নষ্ট করেন, তবে মহোচ্চ অটোলিকাদি কম্পমান হয়, রূক্ষ সমুদায় শিথিল হয়, মানব-

১৫৮ ভৌতিক নিয়ম লঙ্ঘনের ফল

দেহ অত্যপ্প কারণেই আকাশ পথে উৎক্ষিপ্ত হয়, এবং সংসারের এইরূপ অন্যান্য সহস্র সহস্র প্রকার বিশৃঙ্খলা ঘটিয়া উঠে। কার্য্য-কারণ-প্রণালী ক্রমে যে কারণের যে কার্য্য তাহা অবশ্যই হয়, এই যে পরম সুন্দর নিয়ম অবধারিত আছে, ইহারও অন্যথা হইয়া সমুদায় বিপর্য্যয় হইয়া উঠে। অতএব, যদি পরমেশ্বর কোন প্রিয় উপাসকের উপস্থিত বিপদ নিবারণার্থে সাধারণ নিয়ম ভঙ্গ করিতেন, তবে পৃথিবীর অমঙ্গলের আর সীমা থাকিত না। ইহা হইলে আমারদের কোন কর্ম্মেরই নিয়ম থাকিত না। অনেক প্রকার উৎকৃষ্ট আনন্দও পৃথিবী হইতে অন্তর্হিত হইয়া যাইত, এবং অনুমিতি প্রভৃতি কত কত মনোরুত্তি নিতান্ত নিষ্প্রয়োজন হইত। যদি কার্য্য-কারণের নিয়মই না থাকিত, তবে তন্নিরূপণোপযোগি মনোরুত্তি থাকাতেই বা কি ফল দর্শিত? এক্ষণে তাহার চালনা দ্বারা যে বিপুল সুখের সম্ভাবনা আছে তাহা এককালে রহিত হইত। এইরূপ আশা ও অপরাপর অনেক মনোরুত্তি চরিতার্থ হইবার প্রতিও সম্যক্ বিঘ্ন ঘটিত, এবং তদ্বারা এক্ষণে

শারীরিক নিয়ম লঙ্ঘনের ফল ১৫৯

যে প্রকার সুখ লাভ করা যাইতেছে, তাহাতেও বঞ্চিত হইতে হইত ।

আকর্ষণী শক্তির ন্যায় অপরাপর প্রাকৃতিক নিয়মের বিষয়েও বিচার করিলে এইরূপ সিদ্ধান্ত হইবে । তৎসমুদায়ও প্রতিপালন করিলে সুখ লাভ হয়, লঙ্ঘন করিলেই দুঃখ ঘটিয়া থাকে । কাহারও প্রতি পরমেশ্বরের কোন নিয়মের অব্যাপ্তি নাই, কাহারও প্রতি তাঁহার পক্ষপাত নাই । সকলেই সেই এক পরম পিতার সন্তান, সকলেই সেই এক বিশ্বাধিপতির প্রজা । তিনি সকলকেই সমান স্নেহ করেন ও সকলকে সমান নিয়মে পালন করেন ।

শারীরিক নিয়ম লঙ্ঘনের ফল

পূর্বে উল্লেখ করা গিয়াছে, যে শরীরী বস্তু শরীরান্তর হইতে উৎপন্ন হয়, অন্ন গ্রহণ দ্বারা সজীব থাকে, এবং ক্রমে ক্রমে তাহার বৃদ্ধি, পূর্ণাবস্থা, হ্রাস ও ভঙ্গ হয় । পরমেশ্বর কি অনির্বচনীয় অভিপ্রায়ে জীব সমুদায় সৃষ্টি করিয়াছেন, তাহা নিশ্চয় করা মুকঠিন । কিন্তু তাহারদের সুখে কাল যাপন করা যে তাঁহার অভিপ্রেত, ইহাতে সং-

১৬০ শারীরিক নিয়ম লঙ্ঘনের ফল

শয় নাই। তাঁহার এই অভিপ্রায় স্বীকার করিলে, ইহাও অঙ্গীকার করিতে হয়, যে তিনি তাহারদের সমুদায় শরীর পূর্বোক্ত অভিপ্রায় সাধনের সম্যক্ উপযোগি করিয়াছেন। কোন শরীরি বস্তুর উত্তমতা সম্পাদন করিতে হইলে এই পরম শুভকর নিয়মত্রয় প্রতিপালন করা কর্তব্য ; প্রথমতঃ যে বীজ হইতে তাহার উৎপত্তি হয়, তাহা সর্বাঙ্গ-সুন্দর ও সর্বাংশে সম্পূর্ণ থাকা উচিত, দ্বিতীয়তঃ আজন্ম মরণ পর্য্যন্ত যথোচিত জল বায়ু, জ্যোতিঃ, অন্ন ও অন্যান্য প্রয়োজনোপযোগি দ্রব্য সমুদায় সেবন করা আবশ্যিক, তৃতীয়তঃ সমুদায় শারীরিক শক্তি ও মানসিক বৃত্তি যথা নিয়মে চালনা করা কর্তব্য। যে সকল তত্ত্ববিদ ব্যক্তির পরমেশ্বরকে পরম-মঙ্গলালয় বলিয়া জ্ঞান আছে, তাঁহারদিগকে সুতরাং ইহাও বিশ্বাস করিতে হয়, যে তাঁহার নিয়ম প্রতিপালন করিলে সমস্ত জীবের নিজ নিজ প্রকৃতি গুণেই সুখের উৎপত্তি হয় এবং ইহাও হৃদয়ঙ্গম রাখিতে হয়, যে সমস্ত জীব যাহাতে পরমেশ্বরের নিয়ম প্রতিপালনে সমর্থ হইতে পারে তিনি তাহারদের

প্রকৃতির সহিত বাহ্য বস্তু সমুদায়ের তদুপ-
যোগি সম্বন্ধ নিকৃপিত করিয়া দিয়াছেন। এই
পরম কল্যাণকর বিষয়ের ভুরি ভুরি উদাহরণ-
স্থলও প্রাপ্ত হওয়া গিয়াছে। জন্মাবধি বার্জিকা
পর্য্যন্ত দ্রুতিষ্ঠ, বলিষ্ঠ ও সুস্থকায় থাকে এমনত
অনেকানেক মনুষ্য দৃষ্টি-গোচর হইয়াছে,
এবং তদনুসারে মনুষ্যের আজন্ম মরণ পর্য্যন্ত
সবল ও সুস্থ থাকিবার যে সম্যক্ সম্ভাবনা
আছে, ইহা নিশ্চিত বোধ হইতেছে। নব-
জীলও-দ্বীপস্থ লোকের যেকোন বর্ণনা আছে,
তাহা পাঠ করিলে চমৎকৃত হইতে হয়।
ভূমণ্ডল-প্রদক্ষিণকারী কুক্ সাহেব ও তাঁ-
হার সমভিব্যাহারি সমুদায় ব্যক্তি নব-জী-
লও দ্বীপে যত বার অবতরণ করিয়াছিলেন,
তত বারই আবাল বৃদ্ধ বনিতা যাবতীয় লোক
তাঁহারদের দর্শনার্থ সমাগত হইয়াছিল,
তন্মধ্যে কোন ব্যক্তিকে রোগাক্রান্ত দেখেন
নাই। যাহারদের সর্ব শরীর দৃষ্টি-গোচর
হইয়াছিল, তাহারদের কোন অঙ্গ ক্ষত
মাত্র ছিল না, এবং পূর্বেও যে কখন কোন
ক্ষত হইয়াছিল তাহারও কোন নিদর্শন দৃষ্ট
হয় নাই। তাহারদের কোন অঙ্গ দৈবাৎ

১৬২ শারীরিক নিয়ম লঙ্ঘনের ফল

আহত হইলে বিনা ঔষধ প্রয়োগে তাহার আশু প্রতীকার হয়; ইহাও তাহারদের শারীরিক সুস্থতার প্রমাণ। উক্ত দ্বীপে ভূরি ভূরি কেশ-হীন ও দন্ত-হীন বৃদ্ধ লোক দৃষ্ট হইয়াছিল, কিন্তু তন্মধ্যে কেহ বল-হীন ও জরাগ্রস্ত ছিল না। তাহারা বল ও প্রাক্রমে তরুণ-বয়স্ক ব্যক্তিদিগের সমান ছিল না বটে, কিন্তু তাহারদের ন্যায় ক্ষুধীর্ণ ও প্রফুল্ল-চিত্ত ছিল। জল মাত্র তাহারদের পানীয়। তৎকাল পর্যন্তও সুরা রূপ বিষম বিষ পানে তাহারদের আমোদ উপস্থিত হয় নাই।

প্রায় সমস্ত দেশেই একপ অনেকানেক লোক দেখা যায় যে তাহারা দীর্ঘ আয়ুঃ প্রাপ্ত হইয়া সুস্থ শরীরে কাল যাপন করে*। এক্ষণে দুর্ভাগ্য বাঙলা দেশীয় লোকেরা যেমন দুর্বল ও রুগ্ন হইয়াছে, এমত আর কুত্রাপি নাই। কোন মহাপাপ এদেশে প্রবেশ করি-

* ডা, ক, প্রিচার্ড সাহেব তাঁহার “মানব বর্গের প্রাকৃতিক ইতিবৃত্তানুসন্ধান” বিষয়ক গ্রন্থের প্রথম খণ্ডে কতকগুলি দীর্ঘজীবি স্ত্রীপুরুষের বৃত্তান্ত সংগ্রহ করিয়াছেন, তন্মধ্যে ১১০ বর্ষের অধিক পরমায়ু বিশিষ্ট কতিপয় ব্যক্তির বিষয় লেখা যাইতেছে।

শারীরিক নিয়ম লঙ্ঘনের ফল ১৬৩

যাচ্ছে—পরমেশ্বরের কোন প্রবল আজ্ঞা লঙ্ঘন হইতেছে—আমাদের কোন দারুণ ছুরদৃষ্ট ঘটিয়াছে, তাহার সংশয় নাই! অ-

ইউরোপীয় লোক

বয়ঃক্রম		ব্যক্তি সংখ্যা	
বর্ষের অধিক	বর্ষের অনধিক		
১১০	১২০	২৭২	
১২০	১৩০	৮৭	
১৩০	১৪০	২৭	
১৪০	১৫০	২	
১৫০	১৬০	৫	
১৬০	১৭০	৪	
১৭০	১৮০	৪	

তন্মিয়

১৮৫ বৎসর বয়স্ক ১

ইউরোপ-জাত বা ইউরোপীয় বংশ-জাত আমেরিকাবাসি লোক

১১০	১৩০	৭
১৩০	১৫০	২

তন্মিয়

১৫১ বৎসর বয়স্ক ১

আফ্রিকা খণ্ডের লোক

১১০	১৩০	৬
১৩০	১৫০	৪
১৫০	১৭০	২

তন্মিয়

১৮০ ১

১৬৪ শারীরিক নিয়ম লঙ্ঘনের ফল

নেকেই কহেন, আমার পিতামহ অতি বলবান ছিলেন; অশীতি বৎসর বয়সেও আমার দ্বিগুণ ভোজন ও পরিশ্রম করিতে পারিতেন। কেহ কহেন, আমার পিতামহকে কখনও গুরুতর রোগে আক্রান্ত হইতে শুনি নাই, এক্ষণে তাঁহার সন্তান বলিয়া পরিচয় দিতে লজ্জা উপস্থিত হয়। বস্তুতঃ ইহা প্রত্যক্ষ দেখা যাইতেছে, এবং অনেকে পুনঃ পুনঃ এই খেদোক্তিও করিয়া থাকেন, যে অদ্যাপি ৭০ বর্ষের বৃদ্ধ ব্যক্তিরা যত অন্ন ভোজন করেন, আমরা যৌবন দশায়ও তাহা পারি না। ৪০। ৫০ বৎসরের মধ্যে কি কারণে এপ্রকার বিষম অমঙ্গল ঘটিল, তাহার অনুসন্ধান করা স্বদেশ-শ-হিতৈষি মহাশয় ব্যক্তিদিগের সর্বতোভাবে কর্তব্য। অল্প কালে স্ত্রী-সহযোগে যে ইহার এক প্রধান কারণ তাহার সংশয় নাই। প-

আমেরিকা খণ্ডের আদিম বংশীয় লোক

১১৭	(স্ত্রী)	১
১৪৩	(তৎস্বামী)	১

এই শেষোক্ত ব্যক্তি ১৩০ বৎসর বয়সে প্রত্যহ ৫।৬ ক্রোশ ভ্রমণ করিতেন।

ভারতবর্ষীয় লোকের মধ্যে কোন কোন ব্যক্তি ১২০ বৎসর পর্যন্ত জীবিত ছিলেন এমত অবগণ করা গিয়াছে।

শ্চাৎ এ বিষয়ের তত্ত্বানুসন্ধান করা যাইবেক, এক্ষণে যে প্রকরণ আরম্ভ করা গিয়াছে, তাহার বিবরণ করা আবশ্যিক।

• মনুষ্য যে যাবজ্জীবন সুস্থ থাকিতে পারে তাহা এক প্রকার সপ্রমাণ হইয়াছে। প্রাকৃতিক নিয়মের কোন স্থলে অব্যাপ্তি নাই; এক্ষণে স্বাস্থ্য-সুখ সম্ভোগ করা যদি আমারদের স্বভাব-সিদ্ধ না হইত, তবে কোন ব্যক্তির ভাগ্যেই তাহা ঘটিত না। যদি এক ব্যক্তিকেও নীরোগ ও দীর্ঘজীবী দেখা যায়, তবে ইহা নিশ্চিত জানিতে হইবে, যে পরম কারুণিক পরমেশ্বরের নিয়ম প্রতিপালন করিলে সকলেই তাদৃশ পরম সুখ সম্ভোগ করিতে পারে।

অনেকে স্ত্রীলোকের প্রসব-বেদনার উদাহরণ দিয়া কহেন, যে এ সংসারে মনুষ্য যে বিনা ক্লেশে সমস্ত শারীরিক ও মানসিক ব্যাপার সম্পন্ন করিবেন ইহা পরমেশ্বরের অভিপ্রেত নহে; যেহেতু তাঁহার এক্ষণে অভিপ্রায় হইলে প্রসব-কালে বেদনা ও তৎপরে দৌরবল্যা ও পীড়া উপস্থিত হইত না। কিন্তু এ বিষয়েরও যত দূর জানা গিয়াছে, তদনু-

১৬৬ শারীরিক নিয়ম লঙ্ঘনের ফল

সারে বোধ হয়, যে এ যাতনাও পরমেশ্বরের নিয়ম লঙ্ঘনের ফল। ইউরোপীয় চিকিৎসকেরা ও পর্য্যটকেরা দেশ বিশেষের ইতর জাতীয় স্ত্রীদিগের প্রসব-বেদনা ও আনন্তরিক ক্লেশের বিস্তর লাঘব দেখিয়া তাহার সবিশেষ বিবরণ লিখিয়াছেন। এলিসন সাহেব যে কয়েক উদাহরণ প্রদান করিয়াছেন, তাহা পশ্চাৎ লিখিতেছি। “১৮২৯ খ্রীষ্টাব্দে স্কটলণ্ডের অন্তঃপাতি এবর্ডিন নামক স্থানের এক স্ত্রী সন্তান প্রসবের ২১৩ দিবস পরে সেই শিশুকে পৃষ্ঠ দেশে লইয়া এক দিবসে প্রায় চতুর্দশ ক্রোশ গমন করিয়াছিল। ফলতঃ প্রতি দিনই এ প্রকার ঘটনা হইয়া থাকে। সচরাচর এ প্রকারও প্রত্যক্ষ করা যায়, যে স্ত্রীলোকেরা শস্যক্ষেত্রে শস্যছেদন করিতে করিতে সহসা তথা হইতে অপসৃত হইয়া কিঞ্চিৎ দূরে গমন করে, এবং কাহারও সহকার ব্যতিরেকে সন্তান প্রসব করিয়া কন্ম-স্থানে প্রত্যাগমন পূর্ব্বক দিবাবসান পর্য্যন্ত তথায় কন্ম করে। কিঞ্চিৎ ক্লশতা ও বিবর্ণতা ব্যতিরেকে তাহারদের মুখশ্রীতে আর কোন যাতনার চিহ্ন দেখা যায় না। অনেকানেক স্ত্রী প্রসবান্তে

তদ্বিবসেই ৩।৪ কোশ পথ চলিয়াছে, এমত
প্রমাণ প্রাপ্ত হওয়া গিয়াছে। নিয়মাত্তিচারি
ধনাঢ্য লোকদিগের পরিবারে এ প্রকার বি-
ষয় দুর্ঘট বটে; কিন্তু দুর্গতি লোকদিগের মধ্যে
এ সকল ঘটনা সর্বদাই ঘটে। যখন একপ
অনায়াস-সাধ্য প্রসবের ভুরি ভুরি স্থল প্রাপ্ত
হওয়া যায়, তখন যে আমেরিকা খণ্ডের পূর্বতন
জাতীয় স্ত্রীলোকদিগের পুরুষ সমভিব্যাহারে
বন পর্যটন করিতে করিতে কিঞ্চিৎ পশ্চাদ্ব-
র্ত্তিনী হইয়া সন্তান প্রসব করিবার এবং তা-
হাকে পৃষ্ঠদেশে সংস্থাপন পূর্বক অবিলম্বে
স্বামির সমভিব্যাহারিণী হইয়া ভ্রমণ করিবার
বিষয়ে যে সকল বৃত্তান্ত আছে, তাহা অবশ্য
বিশ্বাস করা যাইতে পারে।”

লারেন্স সাহেব কহেন “পর্যটকেরা
ভূয়োভূয়ঃ উল্লেখ করিয়া থাকেন, যে আমে-
রিকার আদিম লোক, নিগ্রো ও অন্যান্য অ-
সভ্য জাতীয় স্ত্রীদিগের অত্যন্ত প্রসব-বেদনা
হয়। সামান্য ও লঘু আহার ও ক্রমাগত
পরিশ্রম দ্বারা তাহারদের শরীর দ্রুতি ও
বলিষ্ঠ হয়, এ প্রযুক্ত তাহারা সাতিশয় ভোগ-
শালি অলস মনুষ্যদিগের ভোগ্য ভুরি ভুরি

১৬৮ শারীরিক নিয়ম লঙ্ঘনের ফল

ক্লেশ প্রাপ্ত হয় না। কিন্তু ঐ ভোগাসক্ত সভ্য লোকের মধ্যেও ইতর জাতীয় বহু-পরি-শ্রমি স্ত্রীদিগের প্রসব সময়ে পূর্বোক্ত অস-ভ্য জাতীয় অবলাদিগের ন্যায় অস্পষ্ট ক্লেশ ঘটিয়া থাকে।”

দক্ষিণ আমেরিকাতে আরৌকেনিয়া নামে এক দেশ আছে, তথাকার স্ত্রীলোকেরা প্রস-বান্তে তৎক্ষণাৎ সর্ষাপেক্ষা নিকটবর্তি নদী-তে অবতরণ করিয়া আপনার ও সন্তানের অঙ্গ প্রক্ষালন করে, এবং তৎপরে আপনার নিয়মিত কর্ম করিতে প্রবৃত্ত হয়।

প্রসব হইতে কষ্ট হইলে ইউরো-পীয় চিকিৎসকেরা যে যে ঔষধ প্রয়োগ ক-রিয়া থাকেন, তাহাতে বেদনার ঐকান্তিক নি-বৃত্তি হয়। কেহ কেহ সহজ প্রসবের স্থলেও এক প্রকার ঔষধ প্রয়োগের পরামর্শ দেন। যদি তাঁহারা এ বিষয়ে ক্লতকার্য্য হয়েন, তবে প্রসব-বেদনার বিস্তর নিবারণ হইবেক। মৈ-স্মরতত্ত্ব প্রকাশিত হওয়াতে মানুষের যে পর্য্যন্ত দুঃখ হ্রাসের উপায় হইয়াছে, তাহা বলিবার নহে। পূর্বে যে সকল অস্ত্র-চিকিৎ-সাতে রোগির অসহ্য যাতনা উপস্থিত হইত,

এক্ষণে তাহার অজ্ঞাতসারে তাহা সম্পন্ন হইতে পারে। ইহাতে সর্ব-দুঃখ-নিবারক ও সর্ব-সুখ-দায়ক পরম কারুণিক পরমেশ্বরের ভক্তিতে 'কাহার চিন্তা আদ্র' না হইবে? অতএব, ইহা সম্যক্ সত্তাবিত, যে মনুষ্য নিজ প্রকৃতি গুণে যাবজ্জীবন বল, স্বাস্থ্য, ও শারীরিক ও মানসিক সুখ প্রাপ্ত হইতে পারেন। তথাপি কি কারণে এই সমস্ত শুভ সাধন না হইতেছে, তাহার অনুসন্ধান কর্তব্য।

পূর্বেই উল্লেখ করা গিয়াছে, যে বীজ সর্বাঙ্গ-সম্পূর্ণ ও সর্ব-সুলক্ষণ-সম্পন্ন না হইলে তদুৎপন্ন বৃক্ষ বা প্রাণী সুন্দররূপ সতেজ ও স্ফূর্তিযুক্ত হয় না। ক্ষত, বা নিস্তেজ, বা জীর্ণ বীজ বপন করিলে তদুৎপন্ন বৃক্ষও তেজোহীন হয়, ও অবিলম্বে নষ্ট হইয়া যায়। মনুষ্যাদি যাবতীয় প্রাণির বিষয়েও এনিয়মের কিছু ইতর বিশেষ নাই। মনুষ্যেরা কি এ নিয়ম প্রতিপালন করিতেছেন? পালন করা দূরে থাকুক, তাঁহারা একাল পর্য্যন্ত তাহার সত্তাও স্পর্শ রূপে নিকপিত করিতে পারেন নাই। যদিও অস্পর্শ রূপে জ্ঞাত হইয়াই

১৭০ শারীরিক নিয়ম লঙ্ঘনের ফল

থাকেন, তথাপি প্রতিপালনের আবশ্যকতা সম্যক হৃদয়ঙ্গম করিতে সমর্থ হয়েন নাই। কত কত অল্প-বয়স্ক, দুর্বল, রোগাক্রান্ত, ও জরাগ্রস্ত ব্যক্তি এ নিয়ম অবহেলন পূর্বক বিবাহ করিয়া ক্ষীণজীবী সন্তান উৎপন্ন করে। তাহারা কি নির্দোষ! কি নির্দয়! তাহারা একবার ভাবে না, যে তাহারদের সন্তানেরাও পৈতৃক ও মাতৃক গুণের অধিকারি হইবেক, রোগা হই ও নিস্তেজ শরীর প্রাপ্ত হইয়া চিরজীবন অশেষ যন্ত্রণা ভোগ করিবেক ও অচিরে কাল-গ্রাসে পতিত হইবেক। কেবল মৃত্যু ও নিরুচ্চ প্রবৃত্তির প্রাবল্য ইহার মূলভূত কারণ। বিবেচনা করিলে, যাহারা ঈশ্বরের নিয়মে অশ্রদ্ধা করে, ও তিনি ঐ নিয়ম লঙ্ঘনের প্রতিকূল স্বরূপ দুঃখ নিয়োজন করিয়া তদ্বারা মনুষ্যের বিবাহ সংস্কার বিষয়ে যেকোন বিধি ও উপদেশ প্রদান করিয়াছেন, তাহাও অবহেলন করে, তাহারদের হইতেই এমনত সকল ব্যাপার সম্ভাবিত হয়। বিচার করিয়া দেখিলে, অজ্ঞান, কাম ও লোভই এমনত অবৈধ গাণিগ্রহণের প্রধান প্রবর্তক। সন্তানের ক্ষীণতা ও যাতনা এবং পিতা মাতার

উৎকর্ষ ও শোক এই অকর্তব্য কর্মের সমুচিত ফল । এই দুর্ভাগ্য বাঙলা দেশ এবিষয়ের সম্পূর্ণ উদাহরণ-স্থল । যে স্থানে পিতা মাতা সচেষ্টিত হইয়া দশবর্ষীয় বালকের এবং অতি ক্ষীণজীবী চিররোগি সন্তানেরও বিবাহ দেন, এবং যে স্থানে কন্যা ক্ষিপ্ত ও মহারোগ-গ্রস্ত হইলেও কলঙ্ক ভয়ে তাহাকে পাত্রস্থ করিতে হয়, সে স্থানের লোক যে এমত নিবীৰ্য্য, অসমর্থ ও অকর্মণ্য হইবেক ইহাতে আশ্চর্য্য কি ? যাহা হউক, ইহা স্থির জানা উচিত, যে পরম কারুণিক পরমেশ্বরের নিয়মের প্রতিপালনেই সুখ ও লঙ্ঘনেই দুঃখ ।

অন্ন গ্রহণ, জ্যোতিঃ ও বায়ু সেবন, যথা-যোগ্য বস্ত্র পরিধান, ইত্যাকার জড়পদার্থ-ঘটিত ব্যাপার দ্বারা শরীরকে সবল ও সুস্থ করিতে যত্ন করা সর্বতোভাবে কর্তব্য । এই সমুদায় বিষয় যথোপযুক্ত রূপে সম্পন্ন করা দ্বিতীয় শারীরিক নিয়ম । কিন্তু মনুষ্যেরা কোন কালে এনিয়ম সুচারু রূপে প্রতিপালন করিতে সমর্থ হইয়েন নাই । নিয়ম না জানিলে তদনুসারে কার্য্য করা কখনই সম্ভাবিত নহে । আমারদের শারীরিক প্রকৃতির তত্ত্বানুসন্ধান

১৭২ শারীরিক নিয়ম লঙ্ঘনের ফল

না করিলে কিরূপে তাহা জ্ঞাত হওয়া যায়? শারীরস্থান ও শারীরবিধান যথা নিয়মে শিক্ষা না করিলেই বা কি প্রকারে শারীরিক প্রকৃতি জানিতে পারা যায়? আর বাহ্য বস্তু সমুদায়ের সহিত শরীরের কি রূপ সংস্ক তাহা অবগত হওয়া উচিত, এবং তৎ সাধনার্থে ঐ সকল বস্তুর সত্তা ও গুণ সমুদায় জ্ঞাত হওয়া, ও পরীক্ষা দ্বারা মানব দেহের সহিত তাহার সংস্ক নিকূপণ করা কর্তব্য। আমরা এই সমুদায় বিষয় যত সম্পন্ন করিতে পারিব, ততই, পরমেশ্বর আমাদের শারীরিক কার্য সাধন ও সুখ বিধান নিমিত্ত যে সমস্ত শুভকর নিয়ম সংস্থাপন করিয়াছেন, তাহা নিকূপণ করিতে সমর্থ হইব, এবং ততই তাঁহার পরাংপর মঙ্গলকর পরম সুখ স্বরূপ উপলব্ধি করিয়া অপার আনন্দ-নীরে নিমগ্ন হইব।

যথা নিয়মে শারীরিক শক্তি সমুদায় চালনা করা তৃতীয় শারীরিক নিয়ম। মনুষ্য অন্যান্য নিয়মের ন্যায় এনিয়মেও অবহেলা করিয়া তাহার প্রতিফল রূপ যৎপরোনাস্তি ক্লেশ প্রাপ্ত হইয়া আসিতেছেন। দেখ, কত শত ব্যক্তি ব্যায়াম বা প্রকারান্তরে অঙ্গ চালনা

না করিয়া ক্ষুধা-মান্দ্য, দৌর্বল্য, অস্বচ্ছন্দতা, সদা বিরক্তি ইত্যাদি অশেষ প্রকার যন্ত্রণা ভোগ করে। ইহা প্রসিদ্ধই আছে, যে এদেশীয় অনেকানেক ধনাঢ্য ব্যক্তি এবিষয়ে সম্যক্ সাপরাধ আছেন। বিশেষতঃ ইহা অত্যন্ত আক্ষেপের বিষয়, যে এদেশস্থ ইংরাজী বিদ্যালয়ের বহুতর বিদ্যার্থী ছাত্র শারীরিক আয়াস পরিত্যাগ ও নিয়মাতীত মানসিক পরিশ্রম করিয়া আপনারদের শরীরকে কেবল ব্যাধি-মন্দির ও নিতান্ত অকর্মণ্য করিয়াছেন। এ বিষয়ের উপদেশ করা যে সর্বাপেক্ষায় প্রয়োজনীয়, তাহা ঐ সকল বিদ্যালয়ের অধ্যক্ষেরা কিছুমাত্র বিবেচনা করেন না।

অঙ্গ চালনা করিলে যে শরীর সুস্থ থাকে, ইহা পুনঃ পুনঃ প্রতিপন্ন করা গিয়াছে; পরন্তু নিয়মিত মনোবৃত্তি চালনাতেও শারীরিক স্বাস্থ্য লাভ হয়। কপালস্থ মস্তিষ্ক মনের যন্ত্র স্বরূপ, এপ্রযুক্ত মনোবৃত্তি চালনা করিলেই মস্তিষ্কের চালনা হয়। যখন যে অঙ্গ সঞ্চালিত হইতে থাকে, তখন তাহাতে রক্ত-প্রবাহ ও তদীয় ধমনীর প্রভাব বৃদ্ধি হয়, এবং তদ্বারা তাহার শিরা সমুদায়

১৭৪ শারীরিক নিয়ম লঙ্ঘনের ফল

ক্রমে ক্রমে দ্রুত ও পুষ্ট হইয়া কার্য্য-তৎপর হয়। এই সাধারণ নিয়মানুসারে, মস্তিষ্ক চালনা করিলে তাহার রক্ত-প্রবাহ প্রবল হয়*, এবং তৎসম্বন্ধে ধমনী সমুদায় সবল ও সতেজ হইয়া আর আর অঙ্গের সুস্থতা বিধান করে, কারণ স্বস্থ ধমনীর প্রচুর প্রভাব ব্যতিরেকে কোন অঙ্গের স্বাস্থ্য ও ক্ষুর্ভিলাভ হয় না। অতএব কার্য্যিক কুশলের নিমিত্তেও মনোবৃত্তি সমুদায় চালনা করা আবশ্যিক। বিদ্যা চর্চ্চা, শিল্প কৰ্ম্ম, বিষয় কার্য্য, এবং লৌকিক ও সামাজিক যাবতীয় কর্তব্য কৰ্ম্মের যথোচিত অনুষ্ঠান করিলে আমারদের সমুদায় মনোবৃত্তি সব্যাপার হইয়া সনস্ত মস্তিষ্কের চালনা ও স্বাস্থ্য

* ১৮২১ খ্রীষ্টাব্দে এক ফরাণীশ স্ত্রীর কপালের অর্দ্ধভাগ উন্মোচিত হওয়াতে তাহার মস্তিষ্ক দৃষ্টি-গোচর হইত; পিয়ক্কটিন নামক এক ডাক্তর তাহার চিকিৎসা করেন। তিনি লিখিয়াছেন, যে যৎকালে ঐ স্ত্রী অকাতরে নিদ্রা ঘাইত, তখন তাহার মস্তিষ্কও সন্দেহহীন হইত; যখন নিদ্রিত থাকিয়া স্বপ্ন দর্শন করিত, তখন চঞ্চল ও ক্ষীণ হইত এবং যখন সম্যক জাগ্রত থাকিত ও বিশেষতঃ যখন বিষয় বিশেষে প্রগাঢ়রূপ উৎসাহ পূৰ্ব্বক কথোপকথন করিত, তখন তদপেক্ষায় অধিক উচ্চ হইয়া উঠিত, সুপর ও ব্ল্যেনবেক নামক ডাক্তরেরাও অনেক স্থলে এইরূপ দৃষ্টি করিয়াছেন।

বিধান হয় । তদ্বিষয় সাধনার্থে মনুষ্যের
বাল্যাবস্থাতে তাঁহাকে বিহিত বিধানে শিক্ষা
দান করিয়া তাঁহার মনোবৃত্তি সমুদায়ের
যথোচিত বর্দ্ধন ও শাসন করা উচিত ; এবং
যাহাতে গুরুতর কল্যাণকর কর্তব্য কর্ম সকল
সম্পন্ন করিতে হয় এই প্রকার অবস্থায় তাঁহাকে
স্থাপন করা সর্বতোভাবে কর্তব্য । এইরূপ
শিক্ষাতেই বালকের যথার্থ উপকার হয়,
এবং এই প্রকার সম্পত্তিতেই তাহার যথার্থ
সুখ সঞ্চয় হয় ।

এই মস্তিষ্ক রূপ মানস যন্ত্র সুস্থ ও ক্ষু-
র্ত্বিযুক্ত থাকিলে আর এক উপকার আছে ।
মনোবৃত্তি চালনার প্রকারানুসারে শুভাশুভ
ফল প্রাপ্ত হওয়া যায় । এবিষয়ের দুই এক
উদাহরণ প্রদর্শিত হইতেছে, তৎপাঠেই প্র-
তীতি হইবে । বিপদ ও অপমান উপস্থিত
হইলে আশ্রয়দেয় সাবধানতা, আত্মাদর,
ও লোকানুরাগপ্রিয়তা এই সকল বৃত্তি যৎ-
পরোক্ষাঙ্গি প্রবল হইয়া মহা ক্লেশানুভব হয়,
এবং তদ্বারা হৃদয়, পাকস্থলী ও তদনুষঙ্গে
অন্যান্য অঙ্গও অসুস্থ হয়, ক্ষুধা-মান্দ্য হয়,
এবং সর্ব শরীর ক্ষয় পাইতে থাকে । কিন্তু

১৭৬ শারীরিক নিয়ম লঙ্ঘনের ফল

যখন মনোবৃত্তি চালনায় ক্লেশানুভব না হইয়া মনস্তৃষ্টি জন্মে, তখন সর্ব শরীরের ক্ষুধা ও সুখানুভব হইয়া সমস্ত শারীরিক ক্রিয়া সুচারু রূপে সম্পন্ন হয়, এবং তখন যে সকল মনোবৃত্তির যুগপৎ চালনা করা যায়, তাহার সংখ্যা ও প্রাবল্যানুসারে দেহের ক্ষুধা ও স্বাস্থ্য বিধান হয়। যদি কোন দিবস অলস ও অবসন্ন শরীরে উপবিষ্ট বা নিজীব-প্রায় শরীর হইয়া থাকি, আর তখন যদি প্রবাসী পুত্র বহু দিবসের পর গৃহে প্রত্যাগমন করে, অথবা যদি অকস্মাৎ একপ সংবাদ পাই, যে কোন পরম মিত্র মহাসঙ্কটে পতিত হইয়াছেন, এবং তাঁহার উদ্ধারার্থে আমার আশু উদ্যোগী হওয়া আবশ্যক, তবে তৎক্ষণাৎ আলস্য পরিত্যাগ পূর্বক অসামান্য আগ্রহ ও উৎসাহ প্রকাশ করিতে থাকি। আমারদের বুদ্ধি-বৃত্তি, উপচিকীর্ষা, অপত্যস্নেহ বা অসঙ্গলিপ্সা, লোকানুরাগপ্রিয়তা ইত্যাদি যে সকল বৃত্তি পূর্বে নিশ্চেষ্ট ছিল, তাহারা সচেষ্টি হইয়া মনেতে উৎসাহ দান ও শরীরে বলাবান করে। যৎকালে কেহ প্রফুল্ল চিত্তে মহোৎসাহ

সহকারে আনন্দ-পরায়ণ থাকেন, অথবা কোন বৈষয়িক বা উৎসব-ঘটিত ব্যাপারে সাতিশয় নিবিষ্ট থাকেন, আর যদি অকস্মাৎ পুঞ্জশোকের সমাচার বা প্রাণাধিক প্রিয় পতির মৃত্যু সংবাদ শ্রবণ করেন, তবে তৎক্ষণাৎ তাহার সকল আনন্দ ও সমুদায় উৎসাহ নষ্ট হয় ; তিনি শোকে পীড়িত, বিবর্ণ ও নিতান্ত বল-হীন হইয়া ভূতলে পতিত হইবেন, এবং ক্রমে ক্রমে অবসাদ ও ক্ষয় প্রাপ্ত হইতে থাকেন । এবিষয়ের আর এক সুন্দর উদাহরণ দিতেছি । স্পার্মান্ নামক এক ব্যক্তি পোতাকড় হইয়া দেশান্তর গমন করিতেছিলেন ; পথমধ্যে মাংসভাব হওয়াতে তাহার লোকেরা অতিশয় অসন্তোষ প্রকাশ করিতে লাগিল । পরে তাহারদিগের প্রার্থনায় ক্রমে তিনি লোক সমভিব্যাহারে করিয়া মৃগয়ার্থে এক বনাকীর্ণ দুর্গম পর্বতে গমন করিলেন । কিন্তু তাহারা আরোহণ-ক্লেশ ও প্রথর রৌদ্র ভোগে একান্ত ক্লান্ত হইয়া ঘন ঘন নিশ্বাস পরিত্যাগ করিতে লাগিল, এবং অবশেষে গতি-শক্তি-রহিত-প্রায় হইল । কিন্তু কি আশ্চর্য্য ! এমত কালে দূর হইতে

১৭৮ শারীরিক নিয়ম লঙ্ঘনের ফল

এক মৃগ দর্শন করিবা মাত্রে তাহারদের নিঃশেষে আলস্য ত্যাগ ও শরীরে বলাধান হইল, এবং তৎক্ষণাৎ সকলে দিগ্বিদিক জ্ঞান-শূন্য হইয়া মৃগ পশ্চাৎ ধাবমান হইল, ও সেই মৃগকে লক্ষ্য করিয়া উপযুপরি বন্দুক করিতে লাগিল।

যদি কোন পৈতৃক-ধনাধিকারী ব্যক্তি ভোগাসক্ত ও আলস্য-পরবশ হইয়া বিদ্যা বিষয়ে ও সাংসারিক হিতার্থে কোন শ্রম-সাধ্য ব্যাপারে লিপ্ত না থাকেন, এবং ব্যায়াম ও শাস্ত্র চিন্তাদি কোন প্রকার শারীরিক ও মানসিক পরিশ্রম না করেন, তবে তিনি পরমেশ্বরের নিয়ম লঙ্ঘনের সম্যক্ প্রতিফল প্রাপ্ত হইবেন। শরীর সঞ্চালন না করাতে তাহার ক্ষুধা-মান্দ্যাদি নানা প্রকার শারীরিক রোগ উপস্থিত হয়, এবং মানসিক চেষ্টা না করাতে শরীরের উপর মনের প্রভাব ব্যাপ্ত না হইয়া সেই সকল রোগের ক্রমশঃ বৃদ্ধি হইতে থাকে। এই রূপে ক্রমে ক্রমে কায়িক ও মানসিক শক্তি সমুদায় ক্ষীণ হয়; কার্যা-দ্বेष, অস্বাস্থ্য, অস্থৈর্য্য, অবসাদ ও অন্যান্য শত শত প্রকার যাতনার উৎপত্তি হয়, এবং অবশেষে তাহার

জীবন ধারণ করা কেবল ক্লেশের বিষয় হইয়া উঠে। একারণ অনেকানেক ধনাঢ্য ব্যক্তিকে সর্বদাই বৈদ্য সংসর্গ ও ঔষধ সেবন করিতে দৃষ্টি করা যায়।" ইহা লিখিতে লিখিতে স্বদেশীয় কোন কোন ধনি সন্তানের অত্যন্ত অবিহিত চরিত্র অন্তঃকরণে স্পষ্ট রূপে অবভাসিত হইতে লাগিল। সর্ব প্রকার নিয়ম লঙ্ঘন করা তাঁহারদের অভ্যাস পাইয়া গিয়াছে। সূর্য্য যখন গগন মণ্ডল আরোহণ পূর্ব্বক প্রথর কিরণ বিস্তার করিয়া চতুর্দিক্ আলোকপূর্ণ করেন, তখন তাঁহারদের শয্যা হইতে গাত্রোত্থান হয়; পরে অতি মৃদুভাবে অঙ্গে অঙ্গে অবশ্য-কর্তব্য নিত্য ক্রিয়া সমস্ত সমাপন করিতে করিতেই সূর্য্য মস্তকোপরি প্রথর কর বর্ষণ করিতে থাকে; তদনন্তর যৎকিঞ্চিৎ অনায়াস-সাধ্য কর্ম্ম ও স্নান ভোজন করিয়া শয্যায় গাত্রপাত পূর্ব্বক আলস্য ত্যাগ করিতেই দিবাবসান হয়। আহা! ভোজনে তাঁহারদের তৃপ্তি জন্মে না, ও শরীরে স্বচ্ছন্দতা বোধ হয় না। প্রায়ই ক্ষুধা-মান্দ্য আছে—অতি সুস্বাদ দ্রব্যও তাঁহারদের বিশ্বাদ জ্ঞান হয়। এইরূপ কোন ক্রমে কাল হরণ করা

১৮০ শারীরিক নিয়ম লঙ্ঘনের ফল

তঁাহারদের নিত্য-ব্রত হইয়া উঠে। তঁাহারা দিবসে এইরূপ শারীরিক ও মানসিক নিয়ম লঙ্ঘন করিয়া পুনর্বার রাত্রি জাগরণ ও অন্যান্য বিস্তর অহিতাচরণ করেন। হাঁ! তঁাহারা পরমেশ্বরের আজ্ঞা লঙ্ঘন করাতেই এইরূপ অশেষ প্রকার ক্লেশ প্রাপ্ত হইবেন। ইহা ব্যক্ত করিতে হৃদয় বিদীর্ণ হয়, যে আমারদের দেশের সমুদায় লোকই কোন না কোন বিষয়ে পরমেশ্বরের নিকট অত্যন্ত সাপরাধ আছেন, নতুবা আমারদের এমত দুর্দশা কেন ঘটিবেক?

যত প্রধান প্রধান মনোবৃত্তি চালনা করা যায়, ততই নির্মল ও প্রগাঢ় সুখের উদয় হয়; অতএব উত্তমোত্তম বিষয়ে উৎসাহ সহকারে যথা নিয়মে বুদ্ধিবৃত্তি ও ধর্ম্যপ্রবৃত্তি সমুদায়ের চালনা রাখিলে মানসিক বীৰ্য্য ও শারীরিক স্বাস্থ্য সাধন পক্ষে বিস্তর উপকার হয়।

নানা প্রকার প্রাকৃতিক নিয়মের যেকোন বিচার করা গেল, তাহাতে যাঁহার বুদ্ধির লেশ মাত্রও আছে, তিনি আর কখনই আলস্যবে মুখকর বলিয়া নির্দেশ করিতে পারেন না এবং নিয়মানুযায়ি শরীর ও মনোবৃত্তি চাল-

শারীরিক নিয়ম লঙ্ঘনের ফল ১৮১

নাকে জগদীশ্বরের প্রসাদ-লব্ধ পরম মুখ-ব্যা-
পার ব্যতীত আর কিছুই কহিতে সমর্থ হইবেন
না। নিয়মাতিক্রম পূর্ব্বক শরীর ও মন চা-
লনা করিলে ক্লেশ হয় বলিয়া নিয়মিত পরি-
শ্রম ও চিন্তাকে গার্হিত কহা কখনই উচিত
নহে। নিয়মিত পরিশ্রমকে দুঃখ-জনক মনে
করা কেবল মূর্থতার কর্ম্ম।

আমরা চতুঃপাশ্ববর্ত্তি লোকের রোগ,
শোক, জরা প্রভৃতি যাবতীয় ক্লেশ প্রত্যক্ষ করি,
যদি তাহার প্রত্যেকের কারণ অনুসন্ধান করা
যায়, তবে তৎ সমুদায় যে সেই সেই লোকের
অপরাধের ফল,—পরম কারুণিক পরমেশ্বর
আমাদের কল্যাণার্থে যে সকল হিত-জনক
নিয়ম সংস্থাপন করিয়াছেন, তাহা লঙ্ঘন
করিবার ফল, ইহার বিস্তর প্রমাণ প্রাপ্ত হ-
ওয়া যায়। ইহা অবধারিত জানা উচিত,
যে পরমেশ্বর কোন অনির্দেশ্য অলৌকিক
কারণে দুঃখ প্রদান করেন না, এবং লৌকিক
কার্য্য কারণ বিবেচনা না করিয়া কোন বোধা-
তীত মনঃ-কম্পিত ব্যাপারকে ক্লেশ নিবার-
ণের উপায় মনে করিয়া তাহার অনুষ্ঠান করি-
লেও উপস্থিত দুঃখের নিবৃত্তি হয় না, ও শত

১৮২ শারীরিক নিয়ম লঙ্ঘনের ফল

বৎসর ব্যাপিয়া তাঁহার স্তুতি করিলেও তিনি কদাপি নিয়ম ভঙ্গ করিয়া ভক্তের অনুচিত প্রার্থনা পূর্ণ করেন না। এ বিষয়ের দুই এক উদাহরণ প্রদর্শন করা যাইতেছে।

দুই তিন শত বৎসর পূর্বে ইউরোপের অনেকানেক নগরে অত্যন্ত মরক হইত, বিশেষতঃ দ্বিতীয় চার্লস নামক রাজার রাজত্ব কালে লণ্ডন নগরে ভয়ানক মারী উপস্থিত হইয়াছিল। তৎকালের লোকে মনে করিত, পরমেশ্বরের বিড়ম্বনায় বা ধর্ম-বিষয়ক নিয়ম লঙ্ঘনের ফলে এই দুর্ঘটনা ঘটিয়াছে। কিন্তু এই গ্রন্থে যে সমস্ত যথার্থ তত্ত্বের বিবরণ করা গিয়াছে, তদনুসারে স্পষ্ট বোধ হইতেছে, যে লোকের শারীরিক নিয়ম লঙ্ঘন ইহার মুখ্য কারণ। তখন, লণ্ডন নগরের পথ সকল প্রশস্ত ছিল না, লোকের পরিষ্কার পরিচ্ছন্ন থাকাও অভ্যাস ছিল না, দুর্গন্ধ দূরীকরণের ও যথেষ্ট জল প্রাপ্তির উপায় ছিল না, এবং তাহারা পুষ্টিকর অন্নও প্রাপ্ত হইত না। ঐ মরকের কিছু দিন পরেই অগ্নি সংলগ্ন হইয়া তথাকার বিস্তর গৃহ দগ্ধ হওয়াতে পথ সকল পূর্বাপেক্ষা প্রশস্ত করিবার সুযোগ হইল,

তদ্বিন্ত্র তত্রতা লোকেরাও ক্রমে ক্রমে বস্ত্র গৃহা-
দি পরিস্কৃত রাখিতে আরম্ভ করিল। ইহাতে,
পূর্বে যেকপ শারীরিক নিয়ম লঙ্ঘন হইয়া
আসিতেছিল, তাহার অনেক নিবারণ হও-
য়াতে তদবধি লগুন নগরে আর তক্রপ মারী
ঘটনা হয় নাই।

পূর্বে এডিন্‌বরা নগরের তিন কোশ প-
শ্চিমে কতক স্থান এ প্রকার অস্বাস্থ্যকর ছিল,
যে প্রতি বৎসর বসন্ত কালে তথাকার কৃষক-
দিগের কম্পাদর হইত। তাহারা মনে করি-
ত, পরমেশ্বরের বিড়ম্বনাতেই এই দুর্ঘটনা
ঘটিয়া থাকে। পরে, যখন তথাকার প্রবা-
হ-শূন্য পীড়াদায়ক জলাশয় সকল শোধিত
হইল, সুনিয়মানুসারে কৃষিকার্য্য সম্পন্ন হইতে
লাগিল, গৃহ সমুদায় প্রশস্ত ও পরিস্কৃত হইল,
এবং দ্বার সন্নিধানে যে সকল দুর্গন্ধময় রাশী-
কৃত আবর্জনা থাকিত তাহা দূরীকৃত হইল,
তখন পূর্বকার সমুদায় রোগ তথা হইতে অ-
ন্তর্হিত হইয়া সে স্থান অতিশয় স্বাস্থ্যকর হই-
য়া উঠিল।

ঐশ্বরিক নিয়ম লঙ্ঘন করিলে কত দুঃখ
হয়, তাহা এদেশে স্বেচ্ছায় সকল বিষয়েই

১৮৪ শারীরিক নিয়ম লঙ্ঘনের ফল

সম্যক্ রূপে প্রত্যক্ষ করা যাইতেছে। পল্লী-গ্রামের অপেক্ষা কলিকাতার লোক যে অধিক দুর্বল ও রোগাক্রান্ত হয়, এখানকার বিষম দুঃখদায়ক ছরবস্থা একবার বিবেচনা করিয়া দেখিলেই তাহার যথার্থ কারণ অবধারণ করা যায়। পুতিগন্ধিক জল-প্রণালী, স্থানে স্থানে রাশীকৃত জঞ্জাল, সংকীর্ণ স্থানে বাস, অস্বাস্থ্য-দায়ক বায়ু সেবন ইত্যাদি ভুরি ভুরি কারণে কলিকাতার লোক রুগ্ন ও জীর্ণ-শরীর হয়। এই রাজধানীর যে অংশে এদেশীয় লোকের বসতি, তাহার জল-প্রণালী সকল ইষ্টক-বদ্ধ ও সমতল নহে; তাহার মধ্যে মধ্যে গভীর গর্ত হইয়া তাহাতে যে সমস্ত দুর্গন্ধ দ্রব্য সঞ্চিত থাকে, তাহা কখনই সম্যক্ রূপে নির্গত হয় না। ঐ সকল মল-পূর্ণ ছরা-ঘ্রেয় জল-প্রণালী কদাপি পরিষ্কৃত হয় না, একারণ তাহা হইতে অনবরতই বিষ-তুল্য বাম্পোদ্গম হইয়া লোকের নানা প্রকার রোগোৎপত্তি করে। তন্মিন্ন, স্থানে স্থানে যে সকল অপরিষ্কৃত পুষ্করিণী আছে, তাহাও বিষম অনিষ্টদায়ক। তৎ সমুদায় বর্ষা কালে জল-পূর্ণ হয়, তটস্থ তৃণ ও গলিত ক্ষুদ্র পত্র

ও নানাবিধ মৃত জন্তু তাহাতে মগ্ন হইয়া প-
চিতে আরম্ভ হয়, এবং অনন্তর তাহার জল
যত শুষ্ক হয়, ততই দুঃসহ প্রাণ-ঘাতক বাষ্প
নিৰ্যাস্ত হইয়া চতুর্দিকে মরক বিস্তার করিতে
থাকে। এইরূপে নগর মধ্যে সুনির্মল স্বাস্থ্য-
কর জলাভাবে যৎপরোনাস্তি অকল্যাণ ঘটি-
তেছে। সর্ব সাধারণের পানীয় যে গঙ্গা-
জল তাহা সামান্যতই অশুদ্ধ ও পীড়াদায়ক
দ্রব্যেতে পরিপূর্ণ; বিশেষতঃ ৩।৪ মাস যেকপ
কর্দমান্বিত লবণায়ু হয়, তাহা পান করিলে
সদ্য মৃত্যুর সম্ভাবনা। বাঙ্গালি পল্লীতে উ-
ত্তম সরোবর প্রায় নাই, এ প্রযুক্ত ধনাঢ্য
ব্যক্তিরা দূর হইতে পানীয় জল আনয়ন ক-
রিয়া রাখেন; দুঃখ ও মধ্যবর্তি লোকদিগকে
মুতরাং গঙ্গাজল ও নিকটবর্তি অপকৃষ্ট শুল্ক-
রিণীর জলই ব্যবহার করিতে হয়। ইহাতে
যে কলিকাতার অধিক লোককে সর্বদা পী-
ড়িত দেখা যায়, তাহার আশ্চর্য্য কি? বিষ
পানে কাহার না অপমৃত্যু ঘটে?

যাহারা কলিকাতা রূপ কারাগারে রুদ্ধ
আছে, তাহারদের জীবন স্বরূপ জল প্রাপ্তি
যেমন দুষ্কর, যথেষ্ট নির্মল বায়ু লাভ তদ-

১৮৬ শারীরিক নিয়ম লঙ্ঘনের ফল

পেক্ষাও দুৰ্দ্ধ। অপ্রতিহত সুলভ বায়ু প্রাপ্তির আবশ্যকতা বিবেচনা করিয়া বাঙ্গালি পল্লীর পথ সমুদায় নির্মিত হয় নাই, কারণ তাহার সমুদায় পথই বক্র ও অপ্রশস্ত। নগরান্তর্গত জল-প্রণালী ও অন্যান্য নরক-তুল্য ঘৃণিত স্থানের বিষময় বাষ্প সংযোগে নগরের বায়ু অনবরতই দূষিত হইতেছে; তাহাতে কলিকাতার দক্ষিণ প্রান্তরীয় নির্মল বায়ু অবকাশ-শূন্য নিবিড় গৃহ-শ্রেণী দ্বারা প্রতিবদ্ধ হওয়াতে নগর প্রবেশ পূৰ্ব্বক তদীয় অস্বচ্ছ বায়ুকে বহির্গত করিতে পারে না, এবং সূর্য্য-করণও সম্যক্ রূপে বিকীর্ণ হইয়া ঐ সকল প্রাণ-সংহারক বাষ্পকে উৎক্ষিপ্ত করিতে সমর্থ হয় না। বায়ু ও রৌদ্রাভাবে কলিকাতার যাবতীয় একতলা গৃহ যে প্রকার আর্দ্র ও গীড়াদায়ক তাহা কাহার অবদিত আছে? ইহা চিন্তা করিলে চিত্ত ব্যাকুল হয়, যে সহস্র সহস্র সহায়হীন নিরুপায় ব্যক্তি এই প্রকার অতি জঘন্য সংকীর্ণ গৃহে বদ্ধ থাকিয়া ও রোগের সময়ে শয্যায় লোলুপ্তমান হইয়া প্রাণ পরিত্যাগ করে! কত শত ব্যক্তি ক্লেদান্বিত দুর্গন্ধ জল-প্রণালীর সন্নি-

ধানে উপবেশন ও শয়ন করিয়া নিশ্বাস সহকারে তদীয় বাষ্প রূপ বিষম বিষ অবিরতই শরীরস্থ করিতে থাকে !

এই সমস্ত ভয়ানক ব্যাপার, মৃত-জীবাদি-পরিপূর্ণ পুরাতন বাণী, বাজারের অপরিষ্কৃত দুর্গন্ধ স্থান, নরক-তুল্য ন্যাকার-জনক গোপালয়, গৃহ সমুদায়ের অপ্রাশস্ত্য ও অস্বচ্ছতা, লোকের ইন্দ্রিয়-দোষ, তাহারদের আলস্য-স্বভাব, দারিদ্র্য-দশা, কুচিকিৎসা ইত্যাদি ভূরি ভূরি প্রত্যক্ষ কারণে এ রাজধানীর উৎসেদ-দশা প্রাপ্তির উপক্রম হইতেছে। বাঙ্গালি পল্লীর সর্বস্থানেই ভগ্ন দেহ দেখিতে হয় ! কোন না কোন প্রকার রোগ প্রায় সকলের শরীরেই প্রকুপিত বা অন্তর্ভূত হইয়া রহিয়াছে ! সহস্র সহস্র লোকের মুখশ্রী ভ্রষ্ট হইয়া অগ্নি-মান্দ্য, উদরাময়, বাত ও জ্বর রোগের স্পর্শে চিরু প্রকাশ করিতেছে ! লোকের দারিদ্র্য-দশায় এই সকল যাতনা শত গুণে বৃদ্ধি হয় ! সহস্র সহস্র নির্দীন নিরাশ্রয় ব্যক্তি চিকিৎসাভাবে, পথ্যাভাবে, স্থানাভাবে, স্বজনাভাবে কাল-গ্রাসে পতিত হইতেছে ! শীতে অঙ্গ অবশ হইতেছে, তথাপি

১৮৮ শারীরিক নিয়ম লঙ্ঘনের ফল

এক চীর বসন নাই! শ্বাসাগত-প্রাণ হইয়াছে, তথাপি জল-বিন্দু দিবার লোক নাই! অব্যাকুলিত স্থির চিত্তে এসকল বর্ণনা করা কাহার সাধ্য? এসকল ভয়ানক ব্যাপার—বিষম দুঃসহ যাতনা মনে করিলেও অন্তঃকরণ শোকাকুল হয়, হৃদয় বিদীর্ণ হয়, অজস্র অশ্রু পাত হয়! কেবল পরমেশ্বরের নিয়ম লঙ্ঘনেই এই সমস্ত দুঃখের ঘটনা হইয়াছে! এক্ষণে এই অচিন্ত্য অনির্বচনীয় বিষম দুঃখ-রাশির সম্যক্ প্রতীকার হওয়া সাধ্যাতীত বোধ হইতেছে। আমারদের দেশীয় লোক পরমেশ্বরের নিয়ম ও তৎ প্রতিপালনের ফল সবিশেষ জ্ঞাতই নহেন, আর যদিও কোন কোন ব্যক্তি এক্ষণে তাহার মৰ্ম্ম অবগত হইতেছেন, তাঁহারদের স্বাভীষ্ট সাধনের উপায় নাই। কিন্তু রাজপুরুষেরা অহরহ লোকের এইরূপ ক্লেশ ও মৃত্যু ঘটনা দেখিয়াও যে তৎ প্রতীকারের যত্ন করেন না, ইহা যৎপরোনাস্তি আক্ষেপের বিষয়। যে নির্দয় রাজা পুত্র-তুল্য প্রজাদিগকে মৃত্যু-গ্রাসে পতিত হইতে দেখিয়া শক্তি সত্ত্বে তাহারদের প্রাণ রক্ষা না করেন, তাঁহাকে কি রূপে ভদ্র রাজা

বলা যায়? শক্তি সত্ত্বে মুমূর্ষু ব্যক্তির প্রাণ রক্ষা না করা, আর স্বহস্তে খড়্গ প্রহারে কাহারও মুণ্ডচ্ছেদ করা উভয়ই তুল্য। রাজপুরুষেরা এ বিষয়ের তত্ত্বাবধানার্থ কতিপয় কমিস্যনর নিয়োগ করিয়াছেন বটে, কিন্তু তাহাও বিফল হইল। কমিস্যনরেরা স্বকীয় পদ গ্রহণ করিয়া কেবল সর্বসাধারণের হাঙ্গাম্পদ হইয়াছেন। গতানুশোচনা করা বৃথা। এক্ষণে রাজপুরুষদিগের এ বিষয়ে সম্যক্ রূপ মনোযোগি হইয়া প্রতি বর্ষে সহস্র সহস্র লোকের মৃত্যু ও লক্ষ লক্ষ লোকের ক্লেশ ঘটনা নিবারণ করা সম্ভবতোভাবে কর্তব্য।

কেবল আত্ম-শরীর বিষয়ক নিয়ম লঙ্ঘন করাতে ভূমণ্ডল যে প্রকার দুঃসহ দুঃখানলে দগ্ধ হইতেছে, তাহার সংক্ষেপ বিবরণ করা গেল। এক্ষণে তদনুক্রম অন্য প্রকার দুঃখ রাশির কারণ অনুসন্ধান করিতে প্রবৃত্ত হওয়া যাইতেছে।

বিশ্ব-নিয়ন্তার নিয়ম লঙ্ঘন হওয়াতে পরম সুখোদ্দেশ্য উদ্ধাহ-ক্রিয়াও অশেষ যাতনার মূল হইয়াছে। পরস্পর বিরুদ্ধ-স্বভাব, অসম-বুদ্ধি ও বিপরীত-মতাবলম্বি স্ত্রীপুরু-

স্বামী যদৃচ্ছা লাভে সন্তুষ্ট থাকিয়া কোন ক্রমে সংসার-যাত্রা নির্বাহ করিতে পারিলেই আপনাকে সুখি চরিতার্থ বোধ করেন, আর তাঁহার চির-সহচরী ভোগাভিলাষিণী পত্নী পরম শোভাকর বেশ ভূষা ও বৈষয়িক আড়ম্বর প্রকাশার্থেই সতত ব্যাকুলা থাকে, সে স্থলে যেকপ অসুখের সম্ভাবনা, তাহা অনেক স্বামিই প্রত্যক্ষ অনুভব করিয়া থাকেন। ফলতঃ, বিদ্যাবান্, উদার-স্বভাব, মহাশয় পুরুষের সহিত কোন বিদ্যাহীনা, কলহপ্রিয়া, ক্ষুদ্রাশয়া রমণীর পাণিগ্রহণ হওয়া অশেষ ক্লেশের বিষয়। ইহার উদাহরণ সংগ্রহার্থে আর অধিক দর্শনের প্রয়োজন নাই; এদেশীয় অনেক বিদ্যার্থি ব্যক্তিই এ বিষয়ের বিশিষ্টরূপ দৃষ্টান্ত-স্থল। বিদ্যাবান্ পতি মানব জন্মের সার্থক্য-সাধক জ্ঞান রসের রসিক হইয়া তদ্বিবয়ের প্রসঙ্গেই পরম পরিতোষ প্রাপ্ত হইবেন, ইহাতে মূর্থ স্ত্রীর সহবাসে কোন ক্রমেই তাঁহার মনস্তৃষ্টি জন্মে না, এবং স্ত্রীও পতির ভিন্ন মতি দেখিয়া কখনই সন্তোষ প্রকাশ করেন না। স্বামী যে সকল বিষয় অলীক ও অপকারি বলিয়া জানেন, তাঁহার

১৯২ শারীরিক নিয়ম লঙ্ঘনের ফল

কুসংস্কারাবিষ্ঠ। পত্নী তাহাই অবশ্য-কর্তব্য
রূপে অনুষ্ঠান করিয়া থাকেন। ধর্ম বিষয়ে
উভয়ের অতিশয় অনৈক্য বশত একের অতি
শ্রদ্ধেয় পরম পূজনীয় পদার্থও অন্যের উ-
পেক্ষা ও অনাদরের আশ্রয় হইয়া উঠে। এ-
ক্ৰমে এ দেশীয় বিদ্যাবান্ যুবক মণ্ডলীর মধ্যে
এইরূপ শত শত ঘটনা ঘটিতেছে, এবং তাহা
অনেকেরই মনস্তাপ ও ছুস্প্রবৃত্তিরও কারণ
হইয়াছে।

এইরূপে, সর্ব বিষয়ে একীভূত হওয়া
যাহারদের পণ, কোন বিষয়েই তাহারদের
ঐক্য থাকে না!—তাহারদের অন্তঃকরণ পর-
স্পর যত অন্তর, ভূতল ও অন্তরিক্ষেও তত
অন্তর নহে! কোন অপরিচিত ব্যক্তির—
কোন অজ্ঞাত-কুল-শীল মনুষ্যের—কোন বি-
দেশীয় লোকেরও সহিত যে সকল বিষয়ে
কথোপকথন করা যায়, যাহার অর্দ্ধাঙ্গ স্বরূপ
—একাত্ম স্বরূপ হওয়া উচিত, তাহার নিক-
টে সে সকল কথার প্রসঙ্গও করিবার সম্ভাবনা
নাই! কি আক্ষেপের বিষয়! যৎ সামান্য
সাংসারিক কথা এবং কোন ইতর সুখের প্র-
সঙ্গ ব্যতিরেকে তৎ সন্নিধানে আর কোন

বিষয়েরই উত্থাপন করিবার উপায় নাই! বিদ্যার প্রসঙ্গ, ধর্মের যথার্থ তত্ত্ব, সংসারের সুখ-জনক কোন নূতন প্রথা সংস্থাপন ইত্যাদি হৃদয়-ভাণ্ডারের অমূল্য রত্ন সকল তাহার নিকটে প্রকাশ করা যায় না। ইহাতে এমন যে সুলভ-সুখ সংসার ধাম, তাহাও বিবাদ রূপ বিষম-বিষ-দূষিত হইয়া সর্বদাই দুঃখ রূপ দারুণ রোগের উৎপত্তি করে।

এই সকল কারণে স্ত্রী লোকের বিদ্যা শিক্ষা যে কি পর্য্যন্ত আবশ্যিক, তাহা বলা যায় না; তৎপক্ষে যে শত শত যুক্তি আছে, তন্মধ্যে ইহাকেও এক অখণ্ডনীয় যুক্তি বলিয়া স্বীকার করিতে হইবে।

অতএব, এ বিষয়ে পিতা মাতার উপর কি গুরুতর ভার সমর্পিত রহিয়াছে, তাহা সকলেরই বিবেচনা করা কর্তব্য। যাহারা কন্যা ও পাত্রের শুভাশুভ চরিত্র বিবেচনা না করিয়া সন্তানের বিবাহ দেন, তাহারা পদে পদে পরমেশ্বরের নিয়ম লঙ্ঘন করিতেছেন, তদ্বারা সংসার রূপ অপার সাগরের দুঃখ-প্রবাহ প্রবল করিতেছেন, এবং আপনারাও সন্তানের দুঃখে দুঃখি হইয়া

১৯৪ শারীরিক নিয়ম লঙ্ঘনের ফল

সে অপরাধের প্রতিকূল স্বরূপ অশেষ যাতনা ভোগ করিতেছেন। তাঁহারা পুত্র কন্যার সম্বন্ধ নির্ণয় কালে পণাপণের আন্দোলন করেন, কোলীনা-মর্যাদা রক্ষার উপায় চিন্তা করেন, আর আর সকল বিষয়েরই বিবেচনা করেন, কেবল যাহা পিতা মাতার নিতান্ত কর্তব্য তাহাতেই মনোযোগি হয়েন না। তাঁহারা ইহা জ্ঞাত নহেন, যে পুত্র ও কন্যা উভয়কেই শিক্ষা দেওয়া ও তাহাদের যেকোন স্বভাব তত্পরযুক্ত কন্যা ও পাত্রের সহিত বিবাহ দেওয়া পিতা মাতার অবশ্য-পরিশোধ্য ঋণ স্বরূপ; তাহা নিঃশেষে পরিশোধ না করিলে পরম ন্যায়বান্ পরমেশ্বর সমীপে সাপরাধ থাকিতে হয়।

সবিশেষ অনুসন্ধান দ্বারা এবং হৃদয়-বিবেক বিদ্যার মতানুসারে মস্তকের ভাগ বিশেষের পরিমাণ দ্বারা লোকের শুভাশুভ চরিত্র অবগত হওয়া যাইতে পারে।

এ প্রস্তাবের মধ্যে স্বদেশ সম্পর্কীয় কোন বিষয় কেবল উদাহরণ স্বরূপে ও প্রসঙ্গ ক্রমে অবতীর্ণ করিতে হয়, অতএব আর বাহুল্য করা কর্তব্য নহে। ফলতঃ কাহার

নিকটে ক্রন্দন করি ? কেবা আমারদের আত্মনাদ শ্রবণ করে? চৈতন্য-শূন্য বৃক্ষ বা নিজীব পর্বত সন্নিধানে রোদন করিলে কি হইবে ! জন্মান্তরের নিকটে পরম মনো-হর চিত্র-ফলক উপস্থিত করিলে কি ফলোদয় হইবে? কত কালে আমারদের দেশস্থ লোক এ সকল বিষয়ের যথার্থ তত্ত্ব শিক্ষা করিতে সমর্থ হইবেন !

অবৈধ পানিগ্রহণের ফল কেবল দম্প-তীর দুঃখ ভোগ মাত্রে পর্যাপ্ত হয় না, সন্তানের মঞ্জলামঞ্জলও তছুপরি বিস্তর নির্ভর করে।

ইহা এক প্রকার নিকপিত হইয়াছে, যে পিতা মাতার শরীর সুস্থ ও সবল হইলে সন্তানও তদনুরূপ সুস্থ ও সবল শরীর প্রাপ্ত হয়, এবং তদ্বিপরীত হইলে বিপরীত ফলের উৎপত্তি হয়। সর্ব সাধারণেই অবগত আছেন, যে শ্বাস, যক্ষ্মা, কুষ্ঠ, উন্মাদ, বাত, উদরাময় প্রভৃতি নানা রোগ কোন বংশে একবার প্রবিষ্ট হইলে পুরুষানুক্রমে চলিয়া আইসে, এবং প্রত্যক্ষ দেখা গিয়াছে, যে কোন কোন পরিবারে অস্কতা রোগ

১৯৬ শারীরিক নিয়ম লঙ্ঘনের ফল

ও অঙ্গ-বৃদ্ধিও পুত্র পৌত্র দৌহিত্রাদিক্রমে অনেক পুরুষ পর্যন্ত হইয়া আসিতেছে। এই বাঙ্গলা দেশের অনেকানেক ব্যক্তির হস্ত পাদে অধিকাকুলি ও লিণ্ডাকুলি হওয়াতে তাহারদিগের সন্তান-পরম্পরারও সেইরূপ অঙ্গ-বৈলক্ষণ্য ঘটিয়াছে। অতএব, সন্তানেরা পিতা মাতার বিষয় সহকারে তাহারদের শারীরিক রোগেরও অধিকারি হয়। ফলতঃ তাহারা রোগাক্রান্ত হইয়া ভূমিষ্ঠ না হউক, পিতা মাতার একপ রোগাই দুর্বল প্রকৃতি প্রাপ্ত হয়, যে শারীরিক নিয়মের অত্যুপ ব্যতিক্রম ঘটিলেই পীড়া জন্মে। কোন কোন পরিবারস্থ ব্যক্তিরা পুরুষানুক্রমে দীর্ঘায়ু বা অম্পায়ু প্রাপ্ত হইয়া থাকে। টামস্ পার্ন্ নামে এক ব্যক্তি ১৫২ বৎসর বয়সে প্রাণ পরিত্যাগ করে। তাহার এক পুত্র ১০৯, এক পৌত্র ১১৩, এবং এক প্রপৌত্র ১২৪ বৎসর জীবিত ছিল। স্কটল-ণ্ডের অন্তঃপাতি গ্লাস্গো নগরের এক স্ত্রী ১৩০ বৎসর বয়ঃক্রমেও সুস্থ শরীরে কাল যাপন করিতেছিল। তাহার পিতা ১২০ এবং পিতামহ ১২৯ বৎসরে পরলোক প্রাপ্ত হয়।

শরীরের অপরাপর অঙ্গের ন্যায় কপা-
লস্থ মস্তিষ্ক-রাশি এবং তদনুসারে মনোবৃত্তি
সমুদায়ও পুরুষানুক্রমে এক রূপ হইয়া আ-
ইসে। এইরূপে, জনক জননীৰ জ্ঞান-জ্যোতিঃ
স্বকীয় সন্তানে অবভাসিত হয়, এবং এই রূপেই
তদীয় পুণ্যবল সন্তানেতে প্রকাশ পায়। যদি
পিতা মাতা উভয়েই অতি দুঃশীল ও বুদ্ধি
অংশে অত্যন্ত হীন হয়েন, তবে তাঁহাদের
সন্তানদিগকে কখনই পরম ধার্মিক ও বিশি-
ষ্টরূপ বুদ্ধিমান হইতে দেখা যায় না। কোন
কোন পরিবারের প্রায় সমস্ত ব্যক্তিকেই
চৌর্য্য-ক্রিয়া, প্রতারণা, মিথ্যা কথন, মদমত্ততা
আত্ম হত্যা বা অন্যান্য দুষ্ক্রিয়াতে আসক্ত
হইতে দেখা যায়। ডাক্তর গাল্ সাহেব
আত্ম হত্যার বিষয়ে এক আশ্চর্য্য উদাহরণ
প্রদর্শন করিয়াছেন। পারিস্-নগর-নিবাসী
এক বণিক্ সাত পুত্র ও তাহাদের ভরণ
পোষণোপযোগি বিষয় রাখিয়া প্রাণ পরি-
ত্যাগ করেন। তাহাদের যথেষ্ট সম্পত্তি
ছিল, শরীর সুস্থ ছিল, কোন উদ্বেগের বি-
ষয় ছিল না। কিন্তু তাহারা এ বিষয়ে কে-
মন দুর্দান্ত দুষ্প্ৰবৃত্তি প্রাপ্ত হইয়াছিল, সক-

১৯৮ শারীরিক নিয়ম লঙ্ঘনের ফল

লেই এক এক করিয়া আত্মঘাতী হইল। ও, স, ফৌলুর্ সাহেব লিখিয়াছেন, শত বর্ষের অধিক হইল, এক ব্যক্তির কাম রিপু অত্যন্ত প্রবল ছিল; যখন তাহার ৯৫ বৎসর বয়ঃ-ক্রম, তখন চারি স্ত্রী থাকিতেও সে এক গৃহ-স্থের স্ত্রীতে আসক্ত হইয়া তাহাকে গৃহ হইতে বহির্গত করিয়া আনে। এক্ষণে, তাহার বংশোদ্ভব এক বুদ্ধিমান ব্যক্তি লাম্পাট্য কর্ম্মে বর্ষে বর্ষে সহস্র সহস্র মুদ্রা ব্যয় করেন। এবং বহু দিন পর্য্যন্ত আপনার কাম রিপুকে চরিতার্থ করিবার নিমিত্ত কতকগুলি ভ্রষ্টা স্ত্রীকে প্রতিপালন করিয়া আসিয়াছেন। তাঁহার ভগিনীদিগেরও বিবাহ না হইতেই সন্তান উৎপন্ন হইয়াছে, এবং তাহারা সকলেই যে অত্যন্ত কাম-পরায়ণা তাহার যথেষ্ট প্রমাণ প্রাপ্ত হওয়া গিয়াছে। তাঁহার এক ভাগিনেয়ী চতুর্দশ বর্ষ বয়ঃক্রম না হইতেই এক জারজ সন্তান প্রসব করে। এই বংশের পুরুষদিগের মধ্যে সকলে এবং স্ত্রীদিগের মধ্যে অধিকাংশেই ইন্দ্রিয়-পরায়ণ। ফলতঃ, পিতৃ-গত মাতৃ-গত গুণ যে সন্তানে বর্ত্তে তাহার দুই এক প্রমাণ কি? শরীরের অঙ্গ-সৌষ্ঠব, অঙ্গ-

বৈলক্ষণ্য, বল, পুষ্টি, দীর্ঘতা, ত্রুষ্ণতা, ক্লান্ততা
 প্রভৃতির ন্যায় মনেরও সকল প্রকার নিকৃষ্ট
 প্রবৃত্তি, বুদ্ধিবৃত্তি ও ধর্মপ্রবৃত্তি যে পুরুষানু-
 ক্রমে এক রূপ হইয়া আইসে, তাহার ভূরি
 ভূরি দৃষ্টান্ত সকল দেশেই দৃষ্টি করা যায়।
 এমন কি, এই অখণ্ডনীয় নিয়ম বশতঃ জাতি
 বিশেষের বিশেষ বিশেষ গুণ বা দোষ উৎপন্ন
 হইয়াছে। বাঙ্গালিদের অনৈক্য ও ভীক
 স্বভাব, শিখদিগের বীর্য ও সাহস, ইংরা-
 জদিগের দুর্জয় অর্জনস্পৃহা, কাফ্রিদের বুদ্ধি-
 হীনতা ইত্যাকার এক এক জাতির এক এক
 প্রকার স্বভাব কাহার না বিদিত আছে?
 মনুষ্যদিগের স্বজাতীয় স্বভাব প্রাপ্তি বিষয়ে
 সংশয় করা দূরে থাকুক, তাহা এ প্রকার
 স্থায়ী যে পরিবর্তিত হওয়া সুকঠিন। স-
 কল জাতীয় লোকের পুরাতনই এ বিষয়ের
 সাক্ষ্য প্রদান করিতেছে। বিশেষতঃ যিহুদিরা
 ইহার যেমন দৃষ্টান্ত-স্থল, এমন আর দ্বিতীয়
 নাই। তাহারা বহু কালাবধি ভূমণ্ডলের
 নানা ভাগে বাস করিতেছে, কিন্তু সর্ব স্থা-
 নেই তাহারদের আকৃতি প্রকৃতি ও ভাব ভক্তি
 এক প্রকার দেখা যায়। তিন শত বৎসর

২০০ শারীরিক নিয়ম লঙ্ঘনের ফল

ও তিন সহস্র বৎসর পূর্বকার যিহুদিদিগের চিত্রময় প্রতিকৃপ প্রাপ্ত হওয়া গিয়াছে, তাহার সহিত এক্ষণকার যিহুদিদিগের মুখশ্রীর কিছু মাত্র বিভিন্নতা নাই। প্রায় তিন সহস্র বৎসর পূর্বের এক মিশর দেশীয় রাজার সমাধিস্থানে তাহারদের যেকৃপ চিত্রময় প্রতিকৃপ ছিল, তাহা দেখিয়া ডাক্তর এডোয়ার্ড সাহেব কহিয়াছিলেন, “কল্যা আমি লণ্ডন নগরে যে সকল যিহুদিকে দৃষ্টি করিয়াছি, বোধ হইল এক্ষণে তাহারদেরই প্রতিকৃপ দর্শন করিতেছি। তাহারদের শরীরের ন্যায় মনের ভাবও সর্ব কালে ও সর্ব স্থানে এককৃপ হইয়া আসিতেছে। তাহারদিগের পুরাবৃত্ত পাঠ করিলে জ্ঞাত হওয়া যায়, যে অতি পূর্বকালীন যিহুদিদিগের অর্জ্জুনস্পৃহা ও জুগোপিষা রুত্তি অত্যন্ত প্রবল ছিল, এক্ষণেও যে তাহারদিগের এই দুই রুত্তি অতি বলবতী তাহা প্রসিদ্ধই আছে। তাহারা কি ইউরোপ, কি আসিয়া, কি আমেরিকা যে খণ্ডে যে স্থানে বাস করুক, অর্থোপার্জনকেই প্রধান পুরুষার্থ জ্ঞান করিয়া যাবজ্জীবন তদনুযায়ি কার্য্যে প্রবৃত্ত থাকে। যদি জনক জননীর পৈতৃক বা স্নো-

পার্জিত সম্পত্তির ন্যায় তাঁহারদের শারীরিক ও মানসিক গুণাগুণও সন্তানে না বর্তিত, তবে এক এক দেশের সর্বসাধারণ লোকের এক এক প্রকার প্রকৃতি হওয়া কোন ক্রমেই সম্ভাবিত হইত না। বস্তুতঃ, লোকের স্বভাব বাস্তব ভূমির গুণ এবং সন্তানোৎপাদনের নিয়মের উপর সম্যক্ নির্ভর করে। আমারদিগের পূর্ব পুরুষেরা নিরুপদ্রব ভীকু-স্বভাব ছিলেন, আমরাও তদনুকূপ বা তদপেক্ষায় অপকৃষ্ট প্রকৃতি প্রাপ্ত হইয়াছি, এবং আমারদিগের সন্তানেরাও আমারদের স্বভাব ও চরিত্রের উত্তরাধিকারি হইবেক। যাবৎ পরমেশ্বর-প্রতিষ্ঠিত নিয়ম সমুদায় অবগত হইয়া তৎ প্রতিপালন দ্বারা এ বিষয়ের প্রতীকার চেষ্টা না করা যাইবে, তাবৎ আমারদের এ স্বভাব এবং এইরূপ অন্যান্য ভূরি ভূরি কুস্বভাব নির্মূল হইবার সম্ভাবনা নাই।

পিতা মাতার স্বভাব-সিদ্ধ গুণ দোষ যে সন্তানে বর্তে তাঁহার সংশয় নাই। কিন্তু ইহাতে একপ স্থির করা উচিত নহে, যে সন্তান অবাধে জনক জননী উভয়েরই মিলিত প্রকৃতি প্রাপ্ত হইয়া তাঁহারদের দোষ ভাগ ও গুণ

২০২ শারীরিক নিয়ম লঙ্ঘনের ফল

ভাগের অধিকারি হয়, ফলতঃ ইহাই প্রামাণিক বোধ হয়, যে পিতা মাতার বিশেষ বিশেষ স্বাভাবিক গুণ এবং অপত্যোৎপাদন কালে তাঁহারদের যে সকল মনোরুত্তি অধিক প্রবল থাকে, তাহাই অধিকার করিয়া ভূমিষ্ঠ হয়। এই নিয়মের শেষোক্ত সংস্থাপন পক্ষে ৩১৪ টি বিষয় বিবেচনা করা কর্তব্য।

প্রথমতঃ।—কারণ বিশেষ দ্বারা শারীরিক প্রকৃতির অন্যথাভাব ঘটিলে তাহাও সন্তানেতে বর্ত্তিতে পারে। পিতা মাতার হস্ত পাদে অধিকাঙ্গুলি ও লিপ্তাঙ্গুলি হইলে সন্তানও যে তদনুরূপ অধিকাঙ্গ ও বিকলাঙ্গ হয়, ইহা পূর্বেই উল্লেখ করা গিয়াছে। কোন ব্যক্তির প্রথম পুত্র যথাবৎ ধীর ও সুস্থমনা হইয়াছিল; তদনন্তর অশ্ব-পৃষ্ঠ হইতে পতিত হইয়া তিনি শিরোদেশে আহত ও বিচলিত-চিত্ত হন, তদবস্থায় তাঁহার যে দুই সন্তান জন্মে দুটিই জড় হয়; অবশেষে চিকিৎসা দ্বারা প্রতীকার হইলে তাঁহার আর দুই সন্তান উৎপন্ন হয়, তাহারদের কাহারও চিত্ত-বৈকল্য ও বুদ্ধি-ভ্রংশ হয় নাই।

দ্বিতীয়তঃ।—অভ্যাস বশতঃ মেঘ, অশ্ব,

কুকুরাদির ভোজন গমন মূগয়াদি বিষয়ে প্রকৃতি-সিদ্ধ ব্যবহারের অন্যথা হইলে তাহারদের শাবকেরাও তত্তৎ বিষয়ে স্বস্থপিতা মাতার অনুবর্ত্তি হইয়া চলে । তদনুসারে ইহাও সম্ভাবিত বোধ হয়, যে মনুষ্যেরাও পিতা মাতার অভ্যাস-কৃত গুণ প্রাপ্ত হইতে পারেন ।

তৃতীয়তঃ ।—স্ত্রীলোকেৱা যৎকালে সমস্ত্রা থাকে, তাহারদের তৎকালীন মানসিক ভাবানুসারে সন্তানের শুভাশুভ প্রকৃতির উৎপত্তি হয় । বস্তুতঃ, যখন জরায়ু শয্যায় থাকিয়া জীবের অবয়ব সংস্থান হইতে থাকে, তৎকালে মাতার মনোমধ্যে কোন প্রগাঢ় ভাবের উদয় হইলে, তদ্বারা সন্তানের স্বভাবেরও কিঞ্চিৎ ইতর বিশেষ হইবার সম্ভাবনা । স্কটলণ্ড দেশীয় এক চর্ম্মকারের পত্নী সমস্ত্রাবস্থায় আপন আলয়ে এক জড়কে দেখিয়া অতিশয় চমকিত হইয়াছিলেন; তিনি কহিতেন “এ জড়ের মূর্ত্তি আমার এ প্রকার প্রগাঢ়রূপ হৃদয়ঙ্গম হইল, যে আমি তাহাকে বিস্মৃত হইয়া অন্য-মনস্কা হইতে পারিলাম না ।” পরে সেই গর্ভে তাঁহার যে সন্তান জন্মিল, সেও জড় হইল ।

তত্ত্বিন্ন ইহাও দৃষ্ট হইয়াছে, যে পরিবার মধ্যে দৈবাৎ এক জন মূক ও বধির হইলে তৎপরে অন্য অন্য যাহারা জন্মে, তাহারাও সেইরূপ বিকলেন্দ্রিয় হয়। কিছু কাল পূর্বে সবিশেষ অনুসন্ধান দ্বারা বিদিত হইয়াছিল, যে তৎকালে আয়র্লণ্ডদ্বীপে অনেক পরিবারেই দুই, তিন, বা চারি করিয়া মূক ও বধির ছিল। কোন কোন পরিবারে একপ বিকলেন্দ্রিয় পাঁচ, সাত, ও দশ জনও ছিল, এবং এক যুদ্ধ-ব্যবসায়ি দরিদ্র ব্যক্তির বংশে উপর্যুপরি মূক ও বধির দশ সন্তান জন্মে। তদ্ব্যতীত ইংলণ্ড ও স্কটলণ্ড প্রভৃতি অপরাপর অনেক দেশে এইরূপ বিষম যন্ত্রণা জনক ভূরি ভূরি ঘটনা ঘটিয়া থাকে।

স্কটলণ্ড দেশে অনেকের বিষয়েও এই প্রকার সমূহ স্থল উপস্থিত হইয়াছে। তথাকার কোন ব্যক্তির ছয় সন্তান জন্মে; দুই পুত্র, চারি কন্যা। পিতা মাতার নেত্র রোগ মাত্র ছিল না, এবং পুত্র দুইটিও চক্ষুস্থান্ হইয়াছিল, কিন্তু কন্যা গুলি সমুদারই অন্ধ হয়। এক পরিবারস্থ চারি সন্তানের তিনটি একরূপ চক্ষুঃ পীড়ায় পীড়িত হয়।

শারীরিক নিয়ম লঙ্ঘনের ফল ২০৫

গ্রন্থকর্তারা এই প্রকার ভূরি ভূরি উদাহরণ সংগ্রহ করিয়াছেন বটে, এবং যদিও তদনুসারে এই অনুভব করেন, যে গুর্কিণী স্ত্রী অন্ধ বধিরাদি দৃষ্টি করিলে তদ্বারা তাঁহার মানসিক ভাব বিশেষের প্রগাঢ়তা হইয়া সেই বাদের সন্তানও তদনুরূপ বিকলেন্দ্রিয় হয়, কিন্তু বোধ হয়, এবিষয়ের চরম সিদ্ধান্ত করিবার সময় অদ্যাপি উপস্থিত হয় নাই। তবে স্ত্রীলোকের অন্তঃসত্ত্বা কালীন শরীর ও মনঃসম্বন্ধীয় অবস্থানুসারে সন্তানের শুভাশুভ প্রকৃতি হওয়া অবশ্যই সম্ভবে। অতএব, এদেশীয় লোকেরা যে সগর্ভা স্ত্রীদিগের আতঙ্ক প্রাপ্তি ও অন্য কোন বিঘ্ন ঘটিবার আশঙ্কায় তাহারদিগকে কোন স্থানে এবং বিশেষতঃ বন্ধুর ভূমিতে একাকী গমন করিতে দেন না, এ ব্যবহার প্রামাণিক ও প্রশংসনীয় বটে।

চতুর্থতঃ সন্তান পিতা মাতার শারীরিক ও মানসিক নৈমিত্তিক গুণ সমুদায়ও প্রাপ্ত হন। অপত্যোৎপাদন কালে পিতা মাতার এবং বিশেষতঃ মাতার শরীর ও মনের যাদৃশ ভাব থাকে, সন্তানের স্বভাবও কিয়দংশে তদনুরূপ হয়। ইহা কাহার অবিদিত আছে,

২০৬ শারীরিক নিয়ম লঙ্ঘনের ফল

যে পাঁচ সহোদরের মধ্যে কেহ নম্র, কেহ উগ্র, কেহ লোভি, কেহ ভোগাসক্ত, কেহ বা পরম ধার্মিক শাস্ত-স্বভাব হয়। বিশেষ অনু-সন্ধান করিয়া দেখিলে প্রতীতি হয়, যে সন্তান-নোৎপত্তি কালে পিতা মাতার 'মানসিক অবস্থা' বিশেষই সন্তানদিগের একপ প্রকৃতি ভেদের প্রধান কারণ। প্রত্যক্ষ দেখা গিয়াছে, যে অনেকানেক ব্যক্তি মদিরিকা পানে আসক্ত থাকিয়া যত গুলি কন্যা পুত্র উৎপন্ন করিয়াছেন, সকলেই পানাসক্ত, এবং সেই দুর্জয় দুঃস্বভাব পরিচ্যাপ্ত করিলে পরে তাঁহারদের যত সন্তান জন্মিয়াছে, সকলেই এবি-ষয়ে নিতান্ত নিষ্ফল। কলিকাতার কোন কোন পরিবারস্থ সমস্ত ব্যক্তিই যে মদ্যপায়ী হয়, পৈতৃক দোষ ও কুদৃষ্টান্ত উভয়ই তাহার প্রধান কারণ। ফরাশিশ দেশস্থ ভুবন-বিখ্যাত মহাবীর বোনাপাটির পিতা ঘোরতর যুদ্ধ বিগ্রহাদির সময়ে ভার্যাপরিগ্রহ করেন। এই পরম সুন্দরী রমণীও বিলক্ষণ বীর্যবতী ছিলেন, স্বামির সহিত ঐ সকল উৎপাত ও কলহ ব্যাপারে ব্যাপ্ত হইয়াছিলেন, এবং এ প্র-কার প্রবাদ আছে, যে তাঁহার অতুল-কীর্তি-

মান্ পুত্র প্রসবের অত্যুৎপ কাল পূর্বেও অশ্বারোহণ করিয়া স্বামি সমভিব্যাহারে যুদ্ধ-যাত্রায় গিয়াছিলেন । তৎকাল-জাত মহাবল পরাক্রান্ত বোনাপাটির অদ্বিতীয় শূরত্ব ভূমণ্ডলের সৰ্ব্বাংশে বিশিষ্ট রূপে বিখ্যাত আছে । ফরাশিশ দেশের সুপ্রসিদ্ধ ভয়ানক রাজবিপ্লবের অত্যুৎপ কাল পরে দু-কল, ক্রুদ্ধ-স্বভাব ও অব্যবস্থিত-চিত্ত অনেক ব্যক্তির জন্ম হয় ; ক্রোধ ও উৎসাহ-জনক কোন সামান্য ব্যাপার উপস্থিত হইলেই তাহারা এককালে উন্মত্ত হইত । এইরূপ, সম্ভান উৎপাদন কালে যাহার যে বিষয়ে অনুরাগ, উৎসাহ ও চর্চা থাকে, তাহার সম্ভানেরা যে তদ্বিষয়ে রত ও কৃতকর্মা হয়, ইহার ভূরি ভূরি প্রমাণ প্রাপ্ত হওয়া গিয়াছে ।

এই সমস্ত বৃত্তান্ত দ্বারা ইহা অত্যন্ত সম্ভাবিত বোধ হইতেছে, যে পিতা মাতার প্রাকৃতিক ও উপার্জিত গুণের উপর সম্ভানের গুণাগুণ ও মঙ্গলামঙ্গল বিস্তর নির্ভর করে । ইহা কি পরম মঙ্গলকর মনোহর নিয়ম ! ইহা দ্বারা ভূমণ্ডলের মুখ সৌভাগ্য সমুন্নতির কত আশা ও কত সম্ভাবনা রহিয়াছে ! এই নিয়-

২০৮ শারীরিক নিয়ম লঙ্ঘনের ফল

মের অনুবর্তি হইয়া শারীরিক ও মানসিক উৎকর্ষ সাধনে চেষ্টা করিলে মানব বর্গের ক্রমাগতই শ্রীবৃদ্ধি হইবেক। পুরুষে পুরুষে জ্ঞান, শক্তি ও সুখ স্বচ্ছন্দতার আধিক্যই হইতে থাকিবে।

কিন্তু কর্তব্যের শতাংশের একাংশও কে অনুষ্ঠান করে? মনুষ্যেরা গো, অশ্ব, মেঘাদি পশুগণের উৎকর্ষ সাধনার্থে যাদৃশ যত্ন ও কৌশল করিয়া থাকেন, আপনার কুলোন্নতি নিমিত্তে তদনুরূপ কিছুই করেন না। পালিত পশুর কুলোৎকর্ষ সাধন করিতে হইলে পশু-পালকেরা কখন তাহাকে হীন জাতি সমাগম করিতে দেয় না, এবং কৃষাণেরাও কখন সাধ্য পক্ষে স্বীয় ক্ষেত্রে অপকৃষ্ট বীজ বপন করে না। কিন্তু মনুষ্য সর্ব বিষয়ে এইরূপ স্বার্থপর হইয়াও কেবল অজ্ঞান দোষে স্বজাতির উত্তমতা সম্পাদনে তৎপর নহেন।

উদ্ধাহ ক্রিয়া যে কি পর্য্যন্ত গুরুতর ব্যাপার তাহা কেহ বিবেচনা করেন না। এই এক কার্যের উপর প্রায় ৫।৬ ভাবি জীবের মরণ, জীবন, রোগ, আরোগ্য, দুঃখ, সুখ সম্যকরূপে নির্ভর করে। ইহা অতি শুভ কর্ম বটে,

কিন্তু যাহাতে পরিণামে অশুভজনক না হয়, —পুত্র-পীড়ক, সন্তান-ঘাতক, ও ভ্রূণঘাতী না হইতে হয় এ বিবেচনা করিয়া কয় ব্যক্তি পাণিগ্রহণ করে? সহস্র সহস্র ব্যক্তি অযোগ্য কন্যা পাত্রের সহিত পুত্র কন্যার বিবাহ দিয়া এক কালে স্ববংশ ও দৌহিত্র বংশের মুখ সৌভাগ্যে জলাঞ্জলি দিতেছেন, বা তাহার উচ্ছেদ-দৃশ্য সাধনের অমোঘ সূত্র সঞ্চার করিতেছেন। এখনও সচেতন হওয়া উচিত, এবং উদ্ধাহ বিষয়ক ঐশিক নিয়ম বিশিষ্টরূপে শিক্ষা করিয়া সম্যক্ রূপে পালন করা কর্তব্য। বিশেষতঃ পশ্চাল্লিখিত নিয়মত্রয় সবিশেষ মনোযোগ পূর্বক পালন করা আবশ্যিক, এবং ইহা নিশ্চিত জানা উচিত, যে যত দিন আমারদের তদ্বিষয়ে ত্রুটি থাকিবে, তত দিন পরমেশ্বর সন্নিধানে সাপরাধ থাকিয়া অশেষ যন্ত্রণা ভোগ করিতে হইবে।

১—ভূয়োভূয়ঃ উল্লেখ করা গিয়াছে, যে অল্প বয়সে ও বৃদ্ধকালে বিবাহ করা উচিত নহে, এবং যক্ষ্মা, শ্বাস, বাত, কুষ্ঠ, উন্মাদ ইত্যাদি উৎকট রোগগ্রস্ত ও বিকলাঙ্গ ব্যক্তি-দিগের কখনই পাণিগ্রহণ করা কর্তব্য নয়।

২১০ শারীরিক নিয়ম লঙ্ঘনের ফল

প্রাচীন হিন্দুরা এ বিষয় অজ্ঞাত ছিলেন না*। তাঁহারা এ বিষয়ে আমারদের অপেক্ষায় বিচক্ষণ ছিলেন, এবং অপেক্ষাকৃত বিহিত বিধানে উদ্ধাহ সংস্কার সমাধান পূর্বক পরমেশ্বরের প্রসাদ-ভাজন হইয়া স্বজাতির শ্রীবৃদ্ধি সম্পন্ন করিয়া সুখে কাল যাপন করিতেন। আমরা তদ্বিপরীত ব্যবহার করিয়া বিপরীত ফল ভোগ করিতেছি।

জর্মেণি দেশে উদ্ধাহ বিষয়ে এক উত্তম নিয়ম প্রচলিত আছে। তথায় পুরুষের ২৫ ও স্ত্রীলোকের ১৮ বৎসর বয়ঃক্রম না হইলে পাণিগ্রহণে অধিকার হয় না, এবং যিনি বিবাহ করিবার মানস করেন তাঁহার স্ত্রীপরিবার প্রতিপালনে সামর্থ্য ও আশা ভরসা আছে কি না, শান্তিরক্ষক ও ধর্মযাজকের নিকট তাঁহার প্রমাণ প্রদর্শন করিতে হয়। এই নিয়ম যে তত্রত্য লোকের শ্রীবৃদ্ধির এক প্রধান কারণ তাঁহার সন্দেহ নাই।

* মনু সংহিতায় আছে ক্ষয়, আমন, অপমান, শত্রু, কুষ্ঠ ইত্যাদি রোগাক্রান্ত ব্যক্তিদিগের বংশে এবং অধিকাঙ্গী, রোগিণী, অতিলোম্বিকা প্রভৃতি দোষান্বিত কন্যাকে বিবাহ করিবেক না।

২—স্বকুল-সম্বিহিত কোন বংশের কন্যা গ্রহণ করাও কর্তব্য নহে। যেকোন এক ভূমিতে পুনঃ পুনঃ একরূপ শস্য বপন করিলে সুচারুরূপে শস্যোৎপত্তি হয় না, সেইরূপ সমকুলোদ্ভব ব্যক্তিদিগের পরস্পর পাণিগ্রহণ হইলে সে কুলে অত্যন্ত দোষ স্পর্শে। তদীয় সন্তান সকল সর্ব্বাংশে অশক্ত ও নিবীৰ্য্য হইতে থাকে, এবং ক্রমে ক্রমে তদ্বংশের লোপাপত্তি হইবার উপক্রম হয়। স্পেন রাজ্যের রাজবংশীয় অনেকানেক ব্যক্তি ভাগিনেয়ী ও ভ্রাতৃকন্যাকে বিবাহ করিয়া অতি হীন হইয়াছেন, এবং এই গুরুতর দোষে তত্রত্য ও পোৰ্ত্তুগিশ ধনাঢ্য লোকদিগের বংশে অনেক জড়েরও উৎপত্তি হইয়াছে। ইংরাজদিগেরও এই প্রকার নিকট-সম্পর্কীয় কন্যার পাণিগ্রহণ করিবার প্রথা আছে। কিন্তু আমারদের পরম সৌভাগ্য, যে স্মৃতিশাস্ত্র-প্রয়োজক মহানুভাব পণ্ডিত গণ এই অতুল মঙ্গলদায়ক ঐশিক নিয়ম বিশিষ্টরূপে অবগত ছিলেন, এবং অদ্যাপি আমরা তাঁহাদের সুখাবহ ব্যবস্থানুসারে এই উদ্ধাহ বিষয়ক নিয়ম প্রতি-

পালনে নিয়োজিত হইতেছি* । তাহারদের নিয়মানুসারে অদ্যাপি এই লোক-প্রবাদ প্রচলিত আছে, যে পিতা মাতার সগোত্রা ও সপিণ্ডা কন্যায় পাণিগ্রহণ করিলে কখনই বংশ বৃদ্ধির সম্ভাবনা থাকে না । কিন্তু মনুষ্য কখন যথা বিধানে স্বকর্তব্য সম্পন্ন করিতে ও তদ্বারা পরমেশ্বর সমীপে নিরপরাধ থাকিতে পারেন না । ইহা প্রত্যক্ষ দেখা গিয়াছে, যে এমত প্রবল শাসন সত্ত্বেও বাঙ্গলা দেশীয় কোন কোন ব্যক্তি এই কল্যাণকর নিয়ম লঙ্ঘন করিয়া স্বকুলের লোপাপত্তি সম্ভাবনা উপস্থিত করিয়াছেন ।

৩—কিন্তু আর আর সমুদায় নিয়ম পালন করিলেও যদি কোন দেশে বিজাতীয় স্ত্রীর পাণিগ্রহণ করা নিতান্ত ব্যবহার-বিরুদ্ধ হয়, তবে তত্রত্য লোকের বিশিষ্টরূপ বংশোন্নতি হওয়া সম্ভাবিত নহে, কারণ তাহারদের যে সমুদায় মূলীভূত প্রাকৃত দোষ থাকে, তাহা আর কোন ক্রমেই দূরীভূত হয় না । কোন জাতির কোন অংশে বৈলক্ষণ্য থাকিলে তত্তৎ

অংশে মূলক্ষণ-সম্পন্ন অন্য জাতির সহিত উ-
 দ্বাহ সূত্রে সংযুক্ত না হইলে তাহা নিরাকৃত
 হইতে পারে না। এইরূপ বৈজাত্য বিবা-
 হের প্রথা না থাকায় আমারদের যৌপর্যাস্ত
 অনিষ্ট ঘটিতেছে, তাহা বলিবার নহে। যত
 অকল্যাণের বীজ আমারদের মানস ক্ষেত্রকে
 দূষিত করিয়া রাখিয়াছে, এবং অন্যান্য নানা
 কারণ সহকারে আমারদিগকে ক্রমাগতই
 নিবীৰ্য্য ও নিস্তেজ করিতেছে, তাহা নিঃশেষে
 নিষ্কাশিত হইবার আর দ্বিতীয় পথ নাই।
 কিন্তু ভিন্ন দেশীয় লোকের সহিত আমারদের
 উদ্বাহ-সম্পর্ক থাকা দূরে থাকুক, স্বদেশীয়
 সকল বংশে সকলের বিবাহ করিবারও বিধি
 নাই। প্রথমে বর্ণ-ভেদ রূপ বিষ-বৃক্ষে এই
 গরলময় ফল উৎপন্ন হয়, পরে পরম্পরাগত
 কৌলীন্য-প্রথা তাহাকে আরও দূষিত করিয়া
 রাখিয়াছে। এই প্রতিবন্ধক নিরাকরণ করা
 সর্বপ্রায়ে আবশ্যিক। ইহা হইলেও অনেক
 উপকার দর্শে। ভিন্ন ভিন্ন বর্ণের পরম্পর
 বিবাহের রীতি না থাকাতে যে বর্ণের যে প্র-
 কৃতি-সিদ্ধ দোষ আছে, তাহা কোন ক্রমেই
 নিরাকৃত হইতেছে না। কিন্তু এদেশে ভিন্ন

২১৪ শারীরিক নিয়ম লঙ্ঘনের ফল

জাতীয় স্ত্রীর পাণিগ্রহণের প্রথা প্রচলিত না হইলে আমারদিগের বিশিষ্টরূপ বংশোন্নতি হওয়া সম্ভাবিত নহে। হিন্দুস্থানিদিগের সহিত উদ্ধাহ-সূত্রে সংযুক্ত হইলে অবশ্যই আমারদিগের বল ও সাহস বৃদ্ধি হয়। শিখদিগের কন্যা গ্রহণ করিতে পারিলে আমারদিগের কি উপকার না দর্শে? আমারদিগের প্রথর বুদ্ধির সহিত তাহারদিগের বল ও বীর্যের সংযোগ হইলে আমরা এক প্রধান জাতি রূপে গণ্য হইতে পারি। কিন্তু ইউরোপীয় লোকের সহিত আমারদিগের উদ্ধাহ-সম্বন্ধ থাকা সর্বাপেক্ষা প্রার্থনীয়। আমারদিগের মানস ক্ষেত্রে তাহারদিগের বল, বীর্য, সাহস, অধ্যবসায় ও তেজস্বিনী বুদ্ধিবৃত্তির অঙ্কুর রোপিত হইলে, আমরা ভূমণ্ডলে অতি বিখ্যাত, বহু-ক্ষমতাপন্ন, মহামান্য হইতে পারি। এ সমুদায় কম্পিত কথা নহে, এ সমস্ত যথার্থ তত্ত্ব পরমেশ্বর-প্রতিষ্ঠিত নিয়মানুসারে প্রতিপন্ন। যত দিন আমরা বিশ্বাধিপতির বিশ্ব-রাজ্যের এই শুভকর নিয়ম প্রতিপালন পূর্বক এই পরম কল্যাণকর অভিপ্রায় সম্পন্ন করিতে না পারিব, তত দিন আমার-

দিগের সম্যক্ রূপে শ্রীরুদ্ধি হওয়া সম্ভাবিত নহে।

পূর্বে ভারতবর্ষে উদ্বাহ বিষয়ে এপ্রকার কঠিন-নিয়ম ছিল না। তখন, যদিও বর্ষান্ত-রীয লোকের সহিত আমারদিগের বিবাহের রীতি ছিল না, কিন্তু ভারতবর্ষের অন্তঃপাতি বিভিন্ন দেশীয় লোকের পরস্পর বিবাহের প্রথা প্রবলরূপে প্রচলিত ছিল তাহার সন্দেহ নাই। ইহার আর অন্য প্রমাণ কি? রামায়ণ, মহাভারত, পুরাণাদি সংস্কৃত শাস্ত্র সমুদায়ই ইহার সাক্ষি আছে। প্রাচীন সম্প্রদায়ি ব্যক্তির। এ প্রসঙ্গ শ্রবণ করিয়া কহিবেন, যদিও ইহা শাস্ত্র-বিরুদ্ধ নহে, ব্যবহার-বিরুদ্ধ বটে। এ কথাতে যন্ত্রণানল চতুর্গুণ—চতুঃস-হস্র গুণ প্রজ্বলিত হইয়া উঠে। স্বদেশ-হিতৈষি দয়াদ্র মহাত্মারা পরপীড়া পরিহারার্থে যত শুভ প্রস্তাব উত্থাপন করেন, স্বদেশের অহিতকারি—আপনার অশুভকারি—আত্ম-ঘাতি নিদারুণ লোকের। কেবল ব্যবহার ব্যপদেশ করিয়া সমুদায় অগ্রাহ করে। স্বদেশের শুভানুরাগী ব্যক্তি স্বপরিবার স্বরূপ দেশস্থ লোকের হীনতা ও দারিদ্র্য দশা দেখিয়া

২১৬ শারীরিক নিয়ম লঙ্ঘনের ফল

যে রূপ মৰ্ম্ম-বেদনা প্রাপ্ত হন, তাহারা তাহা কিছুই অনুভব করে না। যে দিন জন্মভূমির দারুণ ছুরবস্থা মনে হয়, কত অসুখেই সে দিন যাপন হয়! এমন ছুঃখের দিন কত দীর্ঘই বোধ হয়! তাহার প্রত্যেক মুহূর্ত্ত কত ছুঃসহ যাতনাই দিতে থাকে! সৰ্ব্ব দেশীয় দয়ালু-দিগেরই এই যন্ত্রণা আছে, কিন্তু বাঙ্গলা দেশের হিতৈষি ব্যক্তির ছুঃখের আর পরিসীমা নাই; তাহার অন্তঃকরণে কারুণ্য রসের উদয় দ্বারা নয়ন যুগলে অবিরল অশ্রু জল বিগলিত হইতে দেখিলেও অন্য লোকে ক্রক্ষেপ করে না! তাহারদের পাষণময় চিত্ত কিছুতেই আর্দ্র হয় না! তাহারা কুব্যবহার সমীপে দয়াধৰ্ম্ম সমুদায় বিসৰ্জন দিয়াছে! তাহারা ব্যবহার-বিরুদ্ধ বলিয়া ঈশ্বরের সাক্ষাৎ আজ্ঞাও তুচ্ছ করে! হায়! কুব্যবহার রূপ দুর্ভেদ্য লৌহ-শৃঙ্খলে বদ্ধ থাকিয়া আমরা অচল-প্রায়—জীবন-শূন্য-প্রায় হইয়াছি! আমারদের জড়ীভূত হইবার উপক্রম হইয়াছে! মনুষ্যের আত্মা—সচেতন পদার্থ যত দূর বিকৃত হইতে পারে, আমারদের বিষয়ে তাহার আর কিছুই অবশিষ্ট

নাই। স্বকপোল-কল্পিত কদাচারের অনু-
রোধে পরম মঙ্গলালয় পরমেশ্বরের নিয়ম
লঙ্ঘন করা অপেক্ষা হতজ্ঞান হইবার স্পষ্টতর
চিহ্ন আর কি আছে! হে স্বদেশস্থ ব্যক্তি সক-
ল! একবার স্থির চিত্তে বিবেচনা করিয়া দেখ;
কুসংস্কার পরিত্যাগ পূর্বক পক্ষপাত-শূন্য হ-
ইয়া বিবেচনা করিলে এই সকল পরম মঙ্গলকর
নিয়ম কখনই যুক্তি-বিরুদ্ধ বোধ হইবে না।

যেহেতু, উদাহ সংস্কার বিষয়ে কন্যা
পাত্রের গুণাগুণ বিচার করা কর্তব্য, সেই রূপ
ভৃত্য মিত্রাদি অন্যান্য যত লোকের সহিত
সংস্রব রাখিতে হয়, সকলেরই দোষাদোষ
বিবেচনা করা আবশ্যিক।

যাহার অর্জ্জুনস্পৃহা ও জুগোপিষা বৃত্তি
অতি প্রবল, ও ন্যায়পরতা বৃত্তি অতি ক্ষীণ,
তাহাকে যদি ভৃত্যরূপে নিযুক্ত করা যায়, তবে
সে কখন না কখন আপনার চৌর্য্য স্বভাব
নিশ্চয়ই প্রকাশ করে, এবং তখন প্রভুকে আ-
পনার অদূরদর্শিত্ব দোষ বশতঃ অনুতাপে
তাপিত হইতে হয়।

এ নিয়মের ভুরি ভুরি উদাহরণ-স্থল
সর্বদাই উপস্থিত হয়। অনেকে কথা প্রসঙ্গে

২১৮ শারীরিক নিয়ম লঙ্ঘনের ফল

ভৃত্যের চৌর্য্য-স্বভাব ও কার্যালয় বিশেষের প্রধান প্রধান কর্মচারির অন্যায় আচরণের বিষয় উত্থাপন করেন। কর্মচারিদিগের কুব্যবহারে অনেকানেক বণিকের ক্ষিত্তর ক্ষতি হইয়াছে ; এক জন কর্মচারী বহুবন হরণ করিয়া আমেরিকা খণ্ডে পলায়ন করাতে, লণ্ডন নগরস্থ কোন বহু-সমৃদ্ধিযুক্ত অতি সম্ভ্রান্ত বাণিজ্যাগারের অসম্ভ্রম ও কর্ম বন্ধ হয়। এইরূপ, যে কার্য্য নির্বাহার্থে ধৈর্য্য, দাঢ্য, ও স্থির বুদ্ধি আবশ্যিক, কোন অধ্যবসায়-হীন নির্বোধ ব্যক্তির উপর তাহার ভার অর্পণ করিলে সে কর্ম কোন ক্রমেই সুচারুরূপে সম্পন্ন হইবার নহে। এইরূপ, মিত্র হউক, অন্য স্বজন হউক, ভৃত্য হউক, কোন বিষয় ব্যাপারের অংশিই বা হউক, অপাত্রে বিশ্বাস বিন্যস্ত করিলে বা তাহার উপর কোন গুরুতর কর্মের ভারার্পণ করিলে অনিষ্ট ঘটনার বিলক্ষণ সম্ভাবনা। অতএব, বুদ্ধিবৃত্তি চালনা করিয়া এই সমস্ত সামান্য বিষয়ের অনুসন্ধান করাও সর্বনিয়ন্তা পরমেশ্বরের নিয়মাবধীন। তত্ত্বান্বেষণ দ্বারা ও হস্তত্ববিবেক-ব্যবসায়িদিগের মতে মন্তকের ভাগ বিশেষের পরিমাণ

দ্বারা এ বিষয় সম্পাদনের চেষ্টা করা যাইতে পারে ।

আঘাত-ক্লেশ, শারীরিক পীড়া, অবৈধ বিবাহ দ্বারা সাংসারিক দুঃখের উৎপত্তি, ও ভৃত্যাদির দোষে নানা প্রকার অনিষ্ট ঘটনা এই সমুদায় বিষয়ের বিবরণ করিয়া এক্ষণে আরও এক ভয়ানক ব্যাপারের বিবেচনায় প্র-
বৃত্ত হওয়া যাইতেছে । ইহার নাম শ্রবণ মাত্রে সকলেই কম্পমান হয়,—ইন্দ্রিয় সকল অবশ্য হয়,—লোকের আশা ভরসা উচ্ছিন্ন হইয়া যায় । ইহার নাম মৃত্যু ।

এই গ্রন্থের অনুক্রমণিকায় প্রতিপন্ন করা গিয়াছে, যে ভূমণ্ডল মনুষ্যের নিবাস-ভূমি হইবার পূর্বেও মৃত্যুর অধিকার-ভূমি ছিল, এবং তখনও যাবতীয় প্রাণী ও উদ্ভিজ্জ একগ-
কার ন্যায় যথাক্রমে বর্জিত ও বিনষ্ট হইত । জগদীশ্বর সৃষ্টি-প্রক্রিয়ার সঙ্গে সঙ্গেই সংহা-
রের নিয়ম সংস্থাপন করিয়াছেন । কি কারণে এপ্রকার ব্যবস্থা করিলেন, তাহা সম্যক্ অনুধা-
বন করা আমারদের সাধ্য নহে ; যে পরাৎ-
পর পরমপুরুষ অনন্ত কাল, অনন্ত বিশ্ব ও
অনন্ত জীবের মঙ্গলামঙ্গল একেবারেই অব-

২২০ শারীরিক নিয়ম লঙ্ঘনের ফল

লোকন করিতেছেন, তিনিই তাহার নিগূঢ় তত্ত্ব অবগত আছেন, এবং জীবের কল্যাণার্থেই তাহার বিধান করিয়াছেন ইহাতে সন্দেহ নাই ।

মৃত্যু-ঘটনা সমস্ত শারীরিক বস্তুর প্রকৃতি-সিদ্ধি । ইউরোপস্থ প্রধান প্রধান চিকিৎসকেরা একবাক্য হইয়া স্বীকার করেন, যে মৃত্যুর বীজ শরীর মাত্রেরই অন্তর্ভূত আছে ; শরীরের জীবনী শক্তি সমুদায় পরমেশ্বর-প্রতিষ্ঠিত নির্দিষ্ট নিয়মানুসারে কিছু কাল সম্পূর্ণ থাকিয়া পরে বয়োবৃদ্ধি সহকারে ক্রমে ক্রমে ক্রাস পাইতে থাকে, এবং পরিণামে নিঃশেষ হইয়া দেহ-ভঙ্গ সমাধান করে । ফলতঃ যখন শারীরিক বস্তুর অবস্থানার্থে স্থানের আবশ্যকতা আছে, তখন জন্ম ও বৃদ্ধির বিধান থাকিলে মৃত্যুর নিয়ম না থাকা কোন ক্রমেই যুক্তি-সিদ্ধি বোধ হয় না । সৃষ্টিকালাবধি যত প্রাণী ও যত উদ্ভিদ উৎপন্ন হইয়াছে, সমুদায়ই যদি বর্দ্ধিত ও পূর্ণাবস্থ হইয়া এ পর্য্যন্ত সজীব থাকিত, তবে ভূমণ্ডলে তাহার সহস্রাংশের একাংশেরও স্থান হইত না ।

যদিও আমারদের স্বার্থপরতা ও দুর্জয় জিজীবিষা বশতঃ আপাততঃ এ নিয়মকে অতি-শয় অশুভদায়ক বোধ হয়,—মৃত্যুকে আপ-নার সর্ব-সুখ-সংহারক বলিয়া জ্ঞান হয়, এবং যদিও আমারদের বুদ্ধি যোগে তদ্বিষ-য়ের সম্যক্ নির্বচন করিবার সামর্থ্য নাই, কিন্তু এ নিয়ম যে ভূমণ্ডলের পরম শোভা বৃদ্ধি ও লোক রক্ষার উপযোগী, তাহার সন্দেহ নাই। উদ্ভিজ্জ সকল এ নিয়মের অধীন থা-কাতে, নীরস পুরাতন প্রকাণ্ড বৃক্ষ সমুদা-য়ের পরিবর্তে অভিনব সুকুমার মনোহর তরু সকল উৎপন্ন হইতেছে, সরস বসন্ত স-ময়ে নব পল্লব ধারণ পূৰ্ব্বক অপূৰ্ব শোভা বিস্তার করিতেছে, এবং সুগন্ধি সুবর্ণ রমণীয় কুসুম সমুদায় প্রসব করিয়া চতুর্দিক্ আমো-দিত করিতেছে। বিশেষতঃ আমারদের আ-শ্চর্য্য ও শোভানুভাবকতা বৃত্তির সহিত এই সমুদায় বিষয়ের সুন্দর সামঞ্জস্য রহিয়াছে; কারণ পৃথিবীস্থ সমস্ত বস্তুর নাশ-স্বভাব বশ-তঃ যে সকল অভিনব ও শোভাকর ব্যাপা-রের ঘটনা হয়, সমুদায়ই এই দুই পরম মুখা-বহ বৃত্তির উপভোগ্য বিষয়। প্রাণি গণের

২২২ শারীরিক নিয়ম লঙ্ঘনের ফল

পক্ষেও এইরূপ। মৃত্যু এই ধরণী রূপ রক্ষভূমি হইতে অস্থি-চর্ম-সার, জীর্ণ, শ্রীহীন লোক-দিগকে এবং গলিতাঙ্গ, লোলচর্ম, কদাকার, কম্পিত-কলেবর, প্রাচীন সম্প্রদায়কে ক্রমে ক্রমে নিষ্কান্ত করিতেছে, এবং মনুষ্যের অপত্যোৎপাদিকা শক্তি তৎপরিবর্তে হৃষ্ট পুষ্ট সুন্দর নবতনু সকলকে প্রবেশিত করিয়া পৃথিবীর পরম শোভা সাধন করিতেছে। অতএব, নাশ ও ক্লেশ মাত্রই এ নিয়মের উদ্দেশ্য নহে, ইহা সুখ-দায়কও বটে।

আনারদের নিবাস-ভূমি পৃথিবী কিছু অসীমা নহে, সুতরাং তাহাতে নিরূপিত সংখ্যাতিরিক্ত অধিক প্রাণির স্থান ও অন্ন প্রাপ্ত হওয়া অসম্ভব। বিশেষতঃ ইতর প্রাণিদিগের অপত্যোৎপাদিকা শক্তি এত প্রবল, যে নিয়মানুযায়ি দেহ ভক্ষ দ্বারা যত জন্তুর মৃত্যু হয়, তদপেক্ষা তুরি গুণ প্রাণির উৎপত্তি হইয়া থাকে। তাহারদের এমত বুদ্ধি নাই, যে সেই শক্তিকে সংযম করিয়া রাখিবে। অতএব, জগদীশ্বর কতক গুলি মাংস-সাশি জন্তুর সৃজন করিয়াছেন, তাহারা উৎসাহ সহকারে অন্যের মাংস ভোজন করিয়া

জীব-সংখ্যার আতিশয্য নিবারণ করিতেছে। পতঙ্গের বিষয় বিবেচনা করিয়া দেখিলে এ বিষয়ের প্রচুর প্রমাণ প্রাপ্ত হওয়া যায়। এক জাতীয় পতঙ্গ অন্য জাতীয় পতঙ্গদিগকে ভক্ষণ করে, এবং ঐ ভক্ষক জাতির অধিক সংখ্যা হইলে অন্য জাতীয় পতঙ্গ তাহারদিগকে আহার করিয়া থাকে। তৃণাহারি পশুদিগেরও বহু সন্তান জন্মে, তাহারদের অপঘাত মৃত্যু না ঘটিলে সমুদায় ভূমণ্ডলেও তাহারদের স্থান হইত না; তাহারদিগকে যৎপরোনাস্তি যন্ত্রণাদায়ক অনাহার মৃত্যু দ্বারা শরীর পরিত্যাগ করিতে হইত, এবং তাহা হইলে তাহারদের প্রকৃতি ক্রমে ক্রমে অপকৃষ্ট হইয়া আসিত*। কিন্তু মাংসাশি জন্তুর সৃষ্টি হওয়াতে এ সমস্ত অমঙ্গল নিরাস হইয়াছে। তদ্বারা কেবল মাংসাশি জন্তু মাত্রের মুখ সাধন হয় না, অন্ন অপেক্ষা করিয়া জীবের সংখ্যা অধিক না হওয়াতে তৃণাহারি প্রাণিদিগেরও দুঃখ নিবারিত হয়। পরন্তু মাংসাশি জন্তু-

* কারণ যথেষ্ট অন্ন অভাবে পিতা মাতার শরীর ক্ষীণ হইলে সন্তানেরাও তদনুরূপ দুর্বল প্রকৃতি প্রাপ্ত হয়।

২২৪ শারীরিক নিয়ম লঙ্ঘনের ফল

দিগের স্বকীয় নিষ্ঠুর স্বভাব প্রচারের সীমা নিকৃপিত আছে। তাহারা বহু সংখ্যক হইয়া নির্দিষ্ট নিয়ম লঙ্ঘন পূৰ্ব্বক আপনারদের সংহার-শক্তি চালনায় প্রবৃত্ত হইলে তদগোঁই তাহারদের অন্ন ভ্রাস এবং তৎফল স্বরূপ অনাহার-মৃত্যু ঘটনা আরম্ভ হয়, এবং তদ্বারা তাহারদিগের সংখ্যা ক্রমে ক্রমে ন্যূন হইয়া ভূমণ্ডলের সর্ব-সামঞ্জস্য-ভাব রক্ষা পায়। কোন জীবের অনশনে প্রাণ বিয়োগ হয়, ইহা কখনই জীবন-দাতা জগদীশ্বরের অভিপ্রেত নহে, অতএব তিনি সংসারের সকল নিয়ম দ্বারাই তাহার প্রতিবিধান করিয়াছেন। ইহাও সর্বতোভাবে যুক্তি-সিদ্ধ বলিতে হয়, যে মাংসাশি জন্তুদিগের নৃশংস-শক্তি সঞ্চারের পূর্বে বহু সংখ্যক তুণাহারি জীব অবশ্যই বিদ্যমান ছিল, কারণ শেষোক্ত জাতীয় বহু জীবের দেহ পাত না হইলে প্রথমোক্ত জাতীয় একটি জন্তুরও চির জীবন উদর পূর্তি হইতে পারে না। যদি প্রথমে একটি মেঘ ও এক মাত্র ব্যাঘ্র একত্র স্থাপিত হইত, তবে ব্যাঘ্র অবিলম্বেই সেই মেঘটিকে আহার করিয়া ফেলিত, পরে অন্নাভাবে তাহার আপ-

শারীরিক নিয়ম লঙ্ঘনের ফল ২২৫

নারও প্রাণ বিয়োগ হইত। অতএব মৃত্যু-বিধান ভূমণ্ডলের মূলীভূত নিয়ম, এবং পৃথিবীস্থ অন্যান্য সমস্ত বিষয়ের যাদৃশ ব্যবস্থা আছে, তাহাতে মরণ-ধর্মকে এক প্রকার আবশ্যকই বোধ হয়। এই নিমিত্ত পরমেশ্বর তাহার সহিত সকল বস্তুকে পরস্পর সম-ঞ্জসীভূত করিয়া সৃষ্টি করিয়াছেন।

মৃত্যু-কালে ক্লেশ হয় বটে, কিন্তু তাহাও শারীরিক নিয়ম লঙ্ঘনের ফল। নিজীব জড় পদার্থ আহত বা ভগ্ন হইলে তাহার আর স্বতঃ প্রতীকারের উপায় নাই। যদি শরাব বা দর্পণ হস্ত হইতে পতিত হইয়া ভগ্ন হয়, তবে তাহা চিরকালই ভগ্নাবস্থায় থাকে, তাহার আর আপনা হইতে কখন প্রতীকার হইতে পারে না। কিন্তু প্রাণি ও উদ্ভিজ্জের স্বভাব সেক্ষপ নহে, তাহারদের ভগ্ন-প্রতীকার ও ক্ষতি পূরণের সুন্দর উপায় আছে। কোন সতেজ রুক্ষ প্রবল বায়ু বেগে পতিত হইলে তাহার ভূমিস্থিত সমুদায় মূল তাহার জীবন রক্ষার্থে পূর্বাপেক্ষা অধিক তেজধারণ করে। কোন শাখাচ্ছেদ করিলে তৎস্থানে নব পল্লব সকল উৎপন্ন হয়। কোন জন্তুর

২২৬ শারীরিক নিয়ম লঙ্ঘনের ফল

জজ্ঞা ভঙ্গ হইলে সে স্থানের অস্থি ক্রমে ক্রমে যুক্ত হইয়া যায় । কোন রক্তবহা নাড়ী নষ্ট হইলে তাহার সমীপবর্তি অন্য অন্য নাড়ী পূৰ্ব্বাপেক্ষায় স্থূলতর হইয়া পূৰ্ব্বোক্ত নাড়ীর কার্য্য সমাধা করে । • এই প্রকার শরীরের কত কত স্থান আহত ও ক্ষত হইয়া পুনর্বার পূৰ্ব্ববৎ প্রকৃতিস্থ হইতেছে । জগদীশ্বর রূপা করিয়া এই পরম শুভদায়ক শারীরিক নিয়ম সংস্থাপন করিয়াছেন, এবং আমরা এই করুণার উপর নির্ভর করিয়া অহিতাচার না করি এই বিবেচনায় যাবতীয় কায়িক নিয়ম লঙ্ঘনে দুঃখ নিয়োজন করিয়াছেন । এইহেতু, কোন ক্ষত বা আহত অঙ্গ প্রকৃতিস্থ হইবার সময়েই ক্লেশের অনুভব হয় ; সেই ক্লেশকে পরমেশ্বরের আজ্ঞা লঙ্ঘনের প্রত্যক্ষ ফল জানিয়া তাহা হইতে সম্যক সাবধান হওয়া উচিত ।

মৃত্যু কালে যে যাতনা হয় তাহারও এই কারণ । আকস্মিক মৃত্যুর ক্লেশ অত্যপ্প কাল স্থায়ী । প্রথম বয়সে বা প্রৌঢ়াবস্থায় রোগাক্রান্ত হইয়া অনেক কষ্টে যাহার প্রাণ বিয়োগ হয়, তাহাকেই দুঃসহ যাতনা ভোগ করিতে

শারীরিক নিয়ম লঙ্ঘনের ফল ২২৭

হয়, কারণ তৎকালে মৃত্যু ঘটনা হওয়া ঐশ্বরিক বিধানের উদ্দিষ্ট নহে, প্রত্যুত তাহা শারীরিক নিয়ম লঙ্ঘনেরই ফল। কিন্তু প্রথমে তাঁহার দ্রুতি ও বলিষ্ঠ শরীর থাকে, ও যিনি যাবজ্জীবন শারীরিক নিয়ম সমুদায়ের অনুগামী হইয়া চলে, তিনি বহুকাল জীবিত থাকিয়া বৃদ্ধাবস্থা প্রাপ্ত হইবেন, এবং ক্রমে ক্রমে ক্ষীণ হইয়া অনতিক্রমে কলেবর পরিত্যাগ করেন; তাঁহার অধিক মৃত্যু-যাতনা হয় না। অতএব, যখন মানববর্গ পরম কারুণিক পরমেশ্বর-প্রতিষ্ঠিত সমুদায় শারীরিক নিয়ম শিক্ষা করিয়া যথা বিধানে পালন করিতে সমর্থ হইবেন, তখন মৃত্যু-যাতনার ও লাঘব হইয়া আসিবে।

অশিক্ষিত অস্প-বুদ্ধি লোকেরা রোগ ও মৃত্যু কোন দৈব বিড়ম্বনা বা পূর্ক ছুরদৃষ্টির ফল বলিয়া অঙ্গীকার করেন; তাঁহারা নিয়মানিয়মের বিষয় কিছুই বিবেচনা করেন না। কিন্তু এফগকার মহানুভাব বিদ্যাবান্ ব্যক্তির সকলেই স্বীকার করেন, যে এই চরাচর অথও ব্রহ্মাণ্ডের কোন কার্য নিয়মাতীত নহে; তাহার এক মাত্র অণুও কোন নিয়ম অবলম্বন না

২২৮ শারীরিক নিয়ম লঙ্ঘনের ফল

করিয়া স্থানান্তর হয় না। গোমুখী-নিঃসৃত অতি সূক্ষ্ম বারি-বিন্দুও নির্দিষ্ট নিয়মের অ-
 তীত নহে ; তাহা বাষ্প-বিন্দু হইয়া গগন
 মণ্ডল আরোহণ পূৰ্ব্বক বায়ু-বেগে পরিচা-
 লিত হইয়া কোন দূরদেশীয় জুচারু শস্য-
 ক্ষেত্রে বর্ষিত হউক, কি কোন সন্নিহিত তরু-
 শাখায় শোষিত হইয়া তাহার সুদৃশ্য কুসুম
 দলেই বা পুনঃ প্রকাশিত হউক, অথবা কোন
 তৃষ্ণাতুর জীব কর্তৃক পীত হইয়া তাহার
 পরমাশ্চর্য্য দেহ-যন্ত্রের রক্ত-প্রণালীর মধ্য
 ভ্রমণ করুক, ইহার সমুদায় গতি ও সমুদায়
 ব্যাপার পরমেশ্বর-প্রতিষ্ঠিত অখণ্ডনীয় নিয়ম
 ক্রমেই ঘটিয়া থাকে। যে ব্যক্তি যথার্থ
 জ্যোতিঃশাস্ত্র অবগত নহে, সে ব্যক্তি সূর্য্য,
 চন্দ্র, গ্রহ, নক্ষত্রাদিকে কতকগুলি পরস্পর অ-
 সম্বন্ধ পদার্থ মাত্র জ্ঞান করে, এবং তৎসম্ব-
 ন্ধীয় কোন অসাধারণ ব্যাপার ঘটিলে তা-
 হাকে দৈব বিড়ম্বনা বা অন্য কোন কুলক্ষণ
 বলিয়া প্রত্যয় যায়। কিন্তু জ্যোতিষ-সিদ্ধান্ত-
 পারদর্শী সুপণ্ডিত ব্যক্তি জ্যোতির্শাস্ত্রগুলীর বি-
 ষয় আলোচনা করিয়া তাহারদের প্রকাণ্ড
 আকৃতি, পরিপাটী রচনা, গতি বিধির সুপ্রণালী,

এবং তাহাতে পরম শিষ্যকর বিশ্ব-নিষ্ঠা-
তার আশ্চর্য্য কৌশল অবগত হইয়া আনন্দা-
র্নবে মগ্ন হইলেন। তিনি আর চন্দ্র সূর্য্যকে
রাছ-গ্রাস্ত ও ধূমকেতুর উদয়কে কুলক্ষণ বলিয়া
বিশ্বাস করেন না। তাঁহার নিশ্চয় আছে,
যে চন্দ্র সূর্য্যের প্রাত্যহিক উদয়, বা তাহা-
রদের নৈমিত্তিক গ্রহণ ঘটন, অথবা ধূমকে-
তুর পরিভ্রমণ, সমুদায়ই পরমেশ্বর-প্রতিষ্ঠিত
নির্দিষ্ট নিয়মানুসারে ঘটিয়া থাকে। এই
রূপ অনুশিক্ষিত ভ্রান্ত ব্যক্তির। ভূমণ্ডলস্থ বস্তু
সমুদায়ের প্রকৃত স্বভাব ও যথার্থ নিয়ম না
জানিয়া নানা কার্য্যের নানা প্রকার দৈব কা-
রণ কল্পনা করে; কিন্তু যিনি পদার্থ বিদ্যায়
পারদর্শী, তিনি দূর্যাদলস্থ শিশিরবিন্দু ও
হিমালয়ের জলপ্রপাত, এবং চন্দ্রশেখরের
অগ্নিশিখা ও প্রভাকরের প্রচণ্ড জ্যোতিঃ সমু-
দায়ই এক মাত্র মহান্ পরমেশ্বরের নিয়মা-
নুযায়ী কার্য্য জানিয়া পারতৃপ্ত হইলেন। তিনি
কুত্রাপি অগ্নির তেজ ও জলের প্রভাব দেখিয়া
তথায় দেব বিশেষের অবিষ্ঠান কল্পনা করেন
না। তিনি ভারতবর্ষের ভাগীরথী বা আমেরি-
কার মিসিসিপী নদী সমুদায়ের অধ্বিতীয়

২৩০ শারীরিক নিয়ম লঙ্ঘনের ফল

অনন্ত স্বরূপ বিশ্বপতির অপার মহিমা প্রত্যক্ষ দেখেন । এইরূপ, যিনি চিকিৎসা বিদ্যার মতার্থ তত্ত্ব বুঝিয়াছেন, তিনি নিশ্চিত অবগত আছেন, যে শারীরিক নিয়ম লঙ্ঘন না করিলে রোগ উৎপন্ন হয় না । বাস্তবিক, জগদীশ্বরের আজ্ঞা অবহেলন ব্যতিরেকে দুঃখ হয় একথা বলা কেবল অজ্ঞানের কৰ্ম্ম । যদি শরবেব দ্বারা কাহারও নেত্র অন্ধ হয়, তবে সকলেই বুঝিতে পারে, যে কেবল শরবেবই তাহার অন্ধতার কারণ ; কিন্তু যদি কোন শিষ্পকার সাতিশয় নেত্র চালনা করিয়া অন্ধ বা চক্ষুঃপীড়ায় পীড়িত হয়, তবে এপ্রকার অত্যাচার শরবেবের ন্যায় স্পষ্টরূপ প্রতীত না হওয়াতে অজ্ঞ লোকে তাহার কারণান্তর কল্পনা করিয়া থাকে । কিন্তু এক্ষণকার বিজ্ঞোত্তম ইউরোপীয় চিকিৎসকেরা নিশ্চিত জানেন, যে কেবল শারীরিক নিয়ম লঙ্ঘনেই রোগের উৎপত্তি হয়, এবং নিঃসংশয়ে কহেন, যে ঈশ্বরের নিয়মানুসারে অনতিশয় অঙ্গ চালনা করা বিধেয়, কেবল নেত্র চালনার আতিশয়া দ্বারাই শিষ্পকারের চক্ষুরোগ জন্মিয়ছে তাহার সন্দেহ নাই । অতএব,

আমরা সর্বস্থলে পীড়ার সূত্র নিশ্চয় নিরূপণ করিতে পারি বা না পারি, সামান্যতঃ, শারীরিক নিয়ম ভঙ্গনই যে প্রত্যেক রোগের কারণ তাহার সংশয় নাই। কাহারও কোন উৎকট রোগ উপস্থিত হইলে অনেকে অনেক প্রকার কারণ কল্পনা করেন ; কেহ পূর্ব দুর্দৃষ্ট, কেহ দৈব বিড়ম্বনা, কেহ বা কুযাত্রার ফল বলিয়া উল্লেখ করেন। কিন্তু যিনি কহেন, পরম মঙ্গলালয় পরমেশ্বরের শুভদায়ক নিয়ম লঙ্ঘনই যৌবন ও প্রৌঢ় কালের সমস্ত রোগের অদ্বিতীয় হেতু, তাঁহারই কথা যথার্থ, এবং তাঁহারই উপদেশ আদরণীয় ও গ্রাহ্য। অতএব, অনভিজ্ঞ লোকে শারীরিক রোগ ও অকাল মৃত্যুর কারণ নির্ধারণ করিতে পারে না বলিয়া পরমেশ্বর-প্রতিষ্ঠিত শারীরিক নিয়মের যথার্থ্য ও অমোঘত্ব বিষয়ে সংশয় করা কোন ক্রমেই যুক্তি-সিদ্ধ নহে। মনুষ্যের দীর্ঘ জীবন প্রাপ্তিই সমস্ত শারীরিক নিয়মের উদ্দেশ্য ; তবে যে বাল্য ও প্রৌঢ়াবস্থায় রোগ ও মৃত্যু ঘটনা হয়, তাহা সেই সমুদায় নিয়ম লঙ্ঘনের ফল। আর ইহাও নিতান্ত সম্ভাবিত বোধ হয়, যে আমরা তদ্বি-

২৩২ শারীরিক নিয়ম লঙ্ঘনের ফল

যে অত্যাচার না করি এই অভিপ্রায়ে পর-
মেশ্বর অকাল-মৃত্যুকে এ প্রকার ক্লেশ-দায়ক
করিয়েছেন ।

কিন্তু এই অকাল মৃত্যুর বিধানেও করু-
ণারূপ বিশ্বকর্তার মঙ্গলাভিপ্রায় প্রকাশ পা-
ইতেছে । তাঁহার জীবগণ জীবন-ব্রত উদ্-
যাপন কালেও তাঁহার অসীম মহিমা প্রদ-
র্শন করিয়া যায় । শরীর বিষয়ে অত্যা-
চার হইলে তাহার স্বতঃ প্রতীকার হইতে
পারে, এবং তন্নিমিত্ত তিনি সহস্র সহস্র প্র-
কার ঔষধ সৃজন করিয়া রাখিয়াছেন । কিন্তু
যে স্থলে মস্তিষ্ক, পাকস্থলী, হৃদয়াদি প্রাণা-
শ্রয় অঙ্গের অতিশয় ব্যতিক্রম ঘটিয়া প্রতী-
কারের সম্ভাবনা না থাকে, সে স্থলে মৃত্যুই
মহৌষধ, এবং তন্নিমিত্তই অকাল মৃত্যুর
সৃষ্টি হইয়াছে । যদি অস্ত্রাঘাত দ্বারা কাহা-
রও মস্তকের মস্তিষ্ক রাশি নির্গত হয়, তবে
বুদ্ধি ও ধর্ম-প্রবৃত্তি সমুদায় বিহীন হইয়া
জীবিত থাকিতে হইলে তাহা কত দুঃখেরই
বিষয় হইত ! যদি প্রজ্বলিত দাবানলে বেষ্টিত
হইয়া পশু, পক্ষি বা অন্য কোন প্রাণির
সর্বাঙ্গ দগ্ধ হয়, এবং তৎপ্রতীকারের আর

সন্তান না থাকে, তবে সে অবস্থায় ক্রমাগত দাহজ্বালা সহ্য করা ও পরে দীর্ঘকাল জীবিত থাকা যে প্রকার যাতনা-দায়ক, তাহা মনে করিলেও যন্ত্রণা বোধ হয়। নৌকাঝড় ব্যক্তিকে নদী বা সমুদ্র-গর্ভে নিমগ্ন হইয়া তথায় চিরজীবন অবাস্থিতি করিতে হইলে কি ভয়ানক ব্যাপারই হইত! এ সকল স্থলে মৃত্যুই পরম মঙ্গল, এবং সে সময়ে যিনি মৃত্যুকে প্রেরণ করেন তিনি পরম বন্ধু।

অকাল মৃত্যু দ্বারা মানব বর্গের আর এক মহোপকার সাধিত হয়। তাঁহারা অসাধ্য রোগে আক্রান্ত হইয়া যদি দীর্ঘ কাল জীবিত থাকিয়া সন্তান উৎপাদন করিতেন, তবে তাঁহাদের সন্তানদিগকে পিতা মাতার বিকৃত প্রকৃতি প্রাপ্ত হইয়া চিরজীবন বিজাতীয় যন্ত্রণা ভোগ করিতে হইত। অতএব, একপ স্থলে যে মৃত্যু উপস্থিত হইয়া তাঁহাদের সন্তানবিত সন্তান সন্ততির অশেষ ক্লেশ নিবারণ করে, ইহা মঙ্গলের কারণ বলিয়াই স্বীকার করিতে হইবে। এই বিবেচনানুসারে অসাধ্য-রোগাক্রান্ত ক্ষীণজীবি পীড়িত বালকের মৃত্যুও কল্যাণদায়ক বলিতে হয়।

২৩৪ শারীরিক নিয়ম লঙ্ঘনের ফল

কারণ তদ্বারা তাহার উত্তর-কালিক সমুদায় নিষ্প্রয়োজন যাতনা নিবারিত হয়, এবং তাহার সম্ভানদিগের ভগ্ন প্রকৃতি প্রাপ্ত হইয়া যেকপ দুঃখ ভোগের সম্ভাবনা থাকে তাহাও নিরাকৃত হয় ।

অতএব রোগ, ক্লেশ, ও অকাল মৃত্যু কেবল শারীরিক নিয়ম লঙ্ঘনের ফল, এবং তাহাও ভূমণ্ডলের শুভাভিপ্রায়ে সঙ্কল্পিত । এই সমস্ত স্বীকার করিলে ইহাও অঙ্গীকার করিতে হয়, যে মানব জাতির সম্পূর্ণ বয়সে কলেবর পরিভ্রাণ করাই পরমেশ্বরের অভি-
প্রেত ; শারীরিক নিয়ম লঙ্ঘন দ্বারা তাহার অন্যথা হইলেই ক্লেশের উৎপত্তি হয় । যখন ইচ্ছায় সমুদায় নিভেজ হয়, ও সুখ ভোগের সামর্থ্য এক কালে নষ্ট হয়, তখন যদি কেহ আপনার অজ্ঞাতসারে অন্যায়সে পরলোক প্রাপ্ত হইতে পারে, এবং তৎপরিবর্তে তাহার উত্তরাধিকারী আসিয়া সুখ সৌভাগ্য সম্ভোগ করে, তাহা হইলে পরাৎপর পর-
মেশ্বরের অপার কারুণ্য-স্বভাবের কিছু ক্রটি বোধ হয় না । এক্ষণে আমরা শারীরিক নিয়ম সমুদায় বিহিত বিধানে প্রতিপালন

করিতে পারি না, অতএব বোধ হয়, এক্ষণে যৌবনাবস্থা দূরে থাকুক, প্রাচীনায়ুস্থায় মৃত্যু ঘটনা হইলেও অতিরিক্ত ক্লেশ ভোগ করিতে হয়।" কিন্তু এক্ষণকার অপেক্ষায় শারীরিক নিয়ম প্রতিপালনে সমর্থ হইলে মৃত্যু-যাতনার বিস্তর লাঘব হইতে পারে; তবে কত দূর ভ্রাস হওয়া সম্ভব তাহা নিরূপণ করিবার কাল অদ্যাপি উপস্থিত হয় নাই। ফলতঃ পূৰ্ব্বোক্ত সমস্ত রূত্তান্ত আলোচনা করিয়া দেখিলে ইহা সৰ্ব্বতোভাবে সম্ভাবিত বোধ হয়, যে যদি কোন ব্যক্তি সুস্থ শরীর গ্রহণ করিয়া ভূমিষ্ঠ হয়, এবং পরমেশ্বরের নিয়মানুগত থাকিয়া সমুদায় জীবন যাপন করে, তবে মৃত্যু কালে তাহার উৎকট যন্ত্রণা ঘটিবেক না; সে ব্যক্তি অপ্পে অপ্পে ক্ষীণ হইয়া এবং বিশেষ ক্লেশানুভব না করিয়া ইহ লোক হইতে অবসৃত হইবে।

ইহা সুখের বিষয় বলিতে হয়, যে ইতিমধ্যেই এ বিষয়ের কিছু কিছু অমাণও প্রাপ্ত হওয়া যাইতেছে। ন্যূনাধিক শতবৎসর পূৰ্বে ইংলণ্ড দেশস্থ লোকদিগের পরমাযু পরিমাণ হইয়া গড়ে প্রত্যেক ব্যক্তির ২৮ বৎসর

২৩৬ শারীরিক নিয়ম লঙ্ঘনের ফল

নির্দিষ্ট হয়*, কিন্তু সম্প্রতি এ বিষয়ের যত বিবরণ প্রাপ্ত হওয়া গিয়াছে, তাহাতে বোধ হয়, এই শতবর্ষ মধ্যে ইউরোপ খণ্ডের অন্তঃপাতি অনেকাংক স্থানের লোকের পরমাযু তদপেক্ষায় বৃদ্ধি হইয়াছে । ১৮৪৬ খ্রীষ্টাব্দে স্কটল্যান্ডের অন্তঃপাতি কোন কোন নগরো যত লোকের পরলোক প্রাপ্তি হয়, তাহার সবিশেষ বিবরণ প্রকাশিত হইয়াছে; তাহা হইতে এই সংগ্রহ করিয়া প্রকাশ করা গিয়াছে । যথা

কোন শ্রেণীর লোক

গড়ে পরমাযুর
সংখ্যা

প্রধান শ্রেণীস্থ লোক, অর্থাৎ ধনাঢ্য ও শ্রেষ্ঠ- ব্যবসায়ি মনুষ্য	}	৪৩। বৎসর
দ্বিতীয় শ্রেণীস্থ লোক, অর্থাৎ বণিক ও লিপি- ব্যবসায়ী প্রভৃতি.....		

* অর্থাৎ তৎকালের ১০০০ মনুষ্যের পরমাযুর সমষ্টি করিয়া এবং তাহা ১০০০ দিয়া হরণ করিয়া ২৮ বৎসর হইয়াছিল ।

* এডিনবরা ও লিথ ।

তৃতীয় শ্রেণীস্থ লোক, }
 অর্থাৎ শিশুপকার, শ্র- } ২৭।। বৎসর
 মোপজীবী ও ভৃত্য }
 প্রভৃতি,..... }

ইউরোপের অন্তঃপাতি জিনেবা দেশীয় লোকের যেকোন আয়ুর্বাদ্ধি হইয়া আসিয়াছে, পশ্চাৎ তাহার বিবরণ করা যাইতেছে।

সময়			গড় পরমাণু		
খ্রীষ্টাব্দ			বৎসর মাস		
১৫৬০	অবধি	১৬০০	পর্যন্ত	১৮	৫
১৬০৪	"	১৭০০	"	২৩	৫
১৭০১	"	১৭৬০	"	৩২	
১৭৬১	"	১৮০০	"	৩৩	৭
১৮০১	"	১৮১৪	"	৩৮	৬
১৮১৫	"	১৮২৬	"	৩৮	১০

জিনেবা দেশীয় লোকের সন্ধ্যাতা ও সুখস্ব-
 চন্দতা বৃদ্ধিসহকারে যে আয়ুর্বাদ্ধি হইয়া
 আসিয়াছে, তাহা এই বিবরণ দ্বারা স্পষ্ট
 প্রকাশ পাইতেছে।

বিশেষতঃ ইউরোপখণ্ডে গোমস্ত্রীয়া
 ধানের * আরম্ভ দ্বারা এবিষয়ে মহোপকার

* গরুর বীজ নিয়া ঢাকা দেওয়া।

২৩৮ শারীরিক নিয়ম লঙ্ঘনের ফল

দর্শিয়াছে; বৎসর বৎসর লক্ষ লক্ষ লোকের মৃত্যু ঘটনা নিবারিত হইয়াছে। ১৭৯৫ খ্রী-ষ্টাব্দে যে গণনা হয় তদ্বারা দৃষ্ট হইয়াছিল, সে বৎসর ব্রিটিশ দ্বীপ সমুদায়ে ৩৬০০০ লোক বসন্তরোগে পরলোক প্রাপ্ত হয়, অর্থাৎ সে বর্ষে তত্রস্থ যত মনুষ্যের মৃত্যু ঘটনা হয়, তাহার শতাংশের একাদশ অংশ বসন্ত রোগে প্রাণ পরিত্যাগ করে; কিন্তু এক্ষণে ১ বা ১।। অংশের অধিক মরে না। অতএব ইহা অবধারিত বলিতে হয়, যে গোমস্ত্র্যসাধান দ্বারা বৎসর বৎসর ভুরি ভুরি লোকের জীবন রক্ষা পাইতেছে।

পৃথিবীতে এত অত্যাচার ও এত দুঃখ সত্ত্বেও যে স্থান বিশেষে লোকের আয়ুর্কৃদ্ধি হইয়া আসিতেছে, এই বিস্তর। পূর্বে যে স্কটলণ্ড-বাসিদিগের অবস্থার তারতম্যানুসারে পরমাযুর ন্যূনাধিক্য হইবার বিষয় উল্লেখ করা গিয়াছে, কেবল শারীরিক নিয়ম লঙ্ঘন বা প্রতিপালনের ইতর বিশেষই তাহার কারণ। জগদীশ্বর ভিন্ন ভিন্ন লোকের নিমিত্তে ভিন্ন ভিন্ন নিয়ম সংস্থাপন করেন নাই; তিনি ধনি নির্দীন, অজ্ঞ বিজ্ঞ, বাল বৃদ্ধ সকলকেই

শারীরিক নিয়ম লঙ্ঘনের ফল ২৩৯

সমান নিয়মে শাসন করেন। মনুষ্য মাত্রে-
রই অঙ্গ-সংস্থান ও ইন্দ্রিয়-স্বভাব এক প্রকার,
এবং জল, বায়ু, জ্যোতিঃ প্রভৃতি ভৌতিক
পদার্থ সর্বত্রই সমান গুণ প্রকাশ করে।
পূর্বোক্ত রূতান্তে যাবতীয় লোকের বিবরণ
আছে, তন্মধ্যে যাহারা সর্বাপেক্ষায় শারী-
রিক নিয়মের অনুগামি হইয়া কার্য্য করি-
য়াছিল, তাহারদের পরমাযু গড়ে ৪৩। বৎ-
সর হয়, এবং যাহারা সর্বাপেক্ষায় তাহা
অতিক্রম করিয়াছিল, তাহারদের ২৭। বৎ-
সর মাত্র হয়। অতএব এই সমস্ত প্রমাণ
দৃষ্টে অবশ্যই এ প্রকার নির্দেশ করিতে
পারা যায়, যে যৎ পরিমাণে আমরা শারী-
রিক নিয়ম অবগত ও অবগত হইয়া তৎ
প্রতিপালনে সমর্থ হইব,—যৎ পরিমাণে প-
রম পিতা পরমেশ্বরের আজ্ঞাবহ হইয়া চ-
লিব, তৎ পরিমাণে সুখ স্বচ্ছন্দতা সহকারে
দীর্ঘ আয়ু প্রাপ্ত হইব।

মৃত্যু বিষয়ে যে সকল অভিপ্রায় প্রকাশ
করা গিয়াছে, এক্ষণে তৎসমুদায়ের উপসং-
হার করা যাইতেছে। যথা

প্রথমতঃ।—প্রাচীন অবস্থায় ক্রমে ক্রমে

২৪০ শারীরিক নিয়ম লঙ্ঘনের ফল

শরীর ক্ষয় পূর্বক মৃত্যু ঘটনা হওয়া পৃথিবীস্থ জীবমাত্রেরই স্বভাব-সিদ্ধ, এবং ভূমণ্ডলস্থ সমস্ত বস্তুর যেকোন ব্যবস্থা দৃষ্টি করা যাইতেছে, তাহাতে মৃত্যু নিতান্ত আবশ্যিক বোধ হয়।

দ্বিতীয়তঃ।—মনুষ্যের বাল্য ও প্রৌঢ়াবস্থায় প্রাণ বিয়োগ এবং মৃত্যু-কালে ক্লেশ ঘটনা উভয়ই শারীরিক নিয়ম লঙ্ঘনের ফল। পরম কারুণিক পরমেশ্বর আমারদের অধিক দুঃখ নিবারণার্থে অল্প দুঃখের সৃজন করিয়াছেন, কিন্তু আমরা পুনঃ পুনঃ তাঁহার অমোঘ আজ্ঞা অবহেলন করিয়া নিরন্তর যাতনা ভোগ করিতেছি। যদি আমরা তাঁহার নিয়ম পালনে সম্যক্ সমর্থ হই, তবে এই সমুদায় দুঃখটনা সম্যক্ নিরাকৃত হয়; এমন কি, মৃত্যু-যাতনা ও অকাল মরণ পৃথিবী হইতে নির্বাসিত হইতে পারে।

তৃতীয়তঃ।—মৃত্যু অনেকানেক বিষয়ে লোকের কল্যাণদায়ক। তদ্বারা জরা-জীর্ণ, শ্রীহীন, বৃদ্ধ লোকের পরিবর্তে দ্রুতিষ্ঠ, বলিষ্ঠ, তেজোবিশিষ্ট যুবক সকল বিদ্যমান থাকিয়া পৃথিবীর পরম শোভা সম্পাদন করে, কাম ও

স্নেহ প্রভৃতি ভুরি ভুরি সুখদায়ক বৃত্তি যথোচিত চরিতার্থ হইয়া প্রচুর আনন্দ প্রদান করে, এবং ক্রমে ক্রমে মানব বর্গের শারীরিক ও মানসিক গুণের উৎকর্ষ হইতে পারে* ।

চতুর্থতঃ।—এই মৃত্যু-বিষয়ক-নিয়মের সহিত আমারদের উৎকৃষ্ট বৃত্তি সমুদায়ের সম্পূর্ণ সামঞ্জস্য আছে । সর্ব সাধারণের কল্যাণার্থে ভূমণ্ডলস্থ জীবগণের মরণ-ধর্ম অত্যন্ত আবশ্যিক বিবেচনা করিয়া আমারদের বুদ্ধি-বৃত্তি সমুদায় চরিতার্থ হয় । যে শুভকর বিধান বশতঃ জরাগ্রস্ত অশক্ত ব্যক্তি সকল পৃথিবী হইতে নিষ্ক্রান্ত হইয়া ভোগ-সমর্থ সবলেন্দ্রিয় যুবক-সম্প্রদায়কে সুখ সন্তোষার্থে স্থান দান করে, এবং তাহারা ধরণী রূপ রক্ত-ভূমিতে উপস্থিত হইয়া পূর্ব-সঙ্কল্পিত শুভ কৌশল সম্পাদনের পথ পূর্বাপেক্ষায় অধিকতর পরিষ্কৃত করিতে পারে, তাহাতে আমারদের পরহিতৈষিনী, উপচিকীর্ষা বৃত্তির অবশ্যই পরিতৃপ্ত হওয়া উচিত । যে ব্যক্তি

* কারণ পিতা মাতা নিয়ম প্রতিপালনে যত সমর্থ হইবেন, তাহাদের সম্মানদিগের তত উৎকৃষ্ট প্রকৃতি হইবেক । এইরূপে মানব জাতির ক্রমাগত উন্নতি হইতে পারে ।

ভুরি ভোজন দ্বারা গ্রাসনযুক্ত বা জীর্ণেন্দ্রিয় হইয়া অন্ন পান গ্রহণে অশক্ত হইয়াছে, তাহাকে স্থানান্তর করিয়া তৎপরিবর্তে কোন সবলেন্দ্রিয় ক্ষুধাতুর পথিককে আস্থান করা কখনই অন্যায়ে নহে। অতএব, ন্যায়-পরতা বৃত্তি তাহাতে কোন ক্রমে ক্ষুব্ধ হইতে পারে না। আর সকল মঙ্গলালয় পরমেশ্বর পৃথিবীর হিতার্থে যে নিয়ম সংস্থাপন করিয়াছেন, ভক্তি অতি আগ্রহ প্রকাশ পূর্বক বিনীতভাবে তাহা অঙ্গীকার করিবেক। যদি কোন ব্যক্তির এই সকল বুদ্ধিবৃত্তি ও ধর্ম-প্রবৃত্তি যথোচিত তেজস্বিনী হয়, এবং অপরাপর সমুদায় বৃত্তি তাহারদের আয়ত্ত থাকে, এবং তিনি শৈশব কালাবধি এই সমস্ত শুভ তত্ত্বে উপদিষ্ট হইয়া থাকেন, তবে তাহার আর মৃত্যুকে ভয়ঙ্কর বোধ হইবে না; তিনি জগদীশ্বরের অন্যান্য নিয়মের ন্যায় এ নিয়ম-কেও প্রশস্ত মনে স্বীকার করিয়া লইবেন।

পঞ্চমতঃ—এস্থলে মৃত্যু কর্তৃক ঐহিক শুভা-শুভ ঘটনার বিষয়ই বিচার করা গেল; পার-ত্রিক ফলাফল বিবেচনা করা এ প্রস্তাবের উদ্দেশ্য নহে।

পরিশিষ্ট

—

আমিষ ভক্ষণ

৬৬ পৃষ্ঠায় এই প্রকার লিখিত হইয়াছে, যে ইউরোপ ও আমেরিকা প্রদেশীয় যে সকল ব্যক্তি মৎস্য মাংসাহার নিষিদ্ধ বলিয়া থাকেন, তাঁহাদের অভিপ্রায় সমুদায় যুক্তি-বিরুদ্ধ বোধ হয় না। অতএব, আমিষ ভোজনের প্রতিষেধ পক্ষে যে সকল যুক্তি আছে, সংক্ষেপে তাঁহার বিবরণ করা যাইতেছে। পাঠকবর্গ পাঠ করিয়া যে পক্ষ সঙ্গত বোধ হয়, তাহাই অবলম্বন করিবেন।

জীব হিংসা করা যে নিষিদ্ধ কর্ম, ইহা কোন না কোন সময়ে প্রায় সকলের মনেই উদয় হয়। যাহারা আমিষ ভোজনে বিধি দিয়া থাকেন, তাঁহারাও কহেন, বৃথা জীব হিংসা কর্তব্য নহে। ফলতঃ মনুষ্যের স্বভাব পর্যালোচনা করিয়া দেখিলে স্পষ্ট প্রতীতি

হয়, যে জগদীশ্বর আমারদিগের যেকোন স্ব-
 ভাব করিয়াছেন, এবং বাহ্য বিষয়ের সহিত
 তাহার যেকোন সম্বন্ধ নিকপণ করিয়া দিয়াছেন,
 তাহাতে আমারদের আহারার্থে জীবহিংসা
 করা তাহার অভিপ্রেত হইতে পারে না।
 তিনি আমারদিগকে উপচিকীর্ষা বৃদ্ধি প্রদান
 করিয়া সঙ্কেতে ইহা জ্ঞাপন করিয়াছেন, যে
 যে কর্ম দ্বারা জীবের যন্ত্রণা হয়, তাহা কোন
 ক্রমেই বিহিত নহে। প্রাণিগণ হত হইবার
 সময়ে যে প্রকার আর্তনাদ, অঙ্গ-বৈকল্য ও
 অশ্রু বিসর্জন দ্বারা অন্তরের যাতনা প্রকাশ
 করে, তাহা দেখিয়া শুনিয়া কাহার অন্তঃ-
 করণে কারুণ্য রসের সঞ্চার না হয়? আর,
 যিনি জীবনদাতা, তিনিই সংহর্তা। জীবগণ
 তাহার নিয়মানুসারে জন্ম গ্রহণ করে, এবং
 তাহারই নিয়মানুসারে নষ্ট হয়। অতএব, তা-
 হার অনুমতি ব্যতিরেকে জীবের জীবন নাশ
 করা ন্যায়যুক্ত নহে, একারণ প্রাণিহিংসা
 আমারদের ন্যায়পরতা বৃদ্ধিরও বিরুদ্ধ।
 জীবহিংসা, সুতরাং আমিষ ভোজন যেমন
 আমারদের ধর্ম-প্রবৃত্তির অভিমত নহে,
 তদ্রূপ, বাহ্য বিষয়েও তাহার উপযোগিতা

নাই, কারণ মৎস্য মাংস আহার করিলে নিকৃষ্ট প্রবৃত্তির প্রবলতা প্রভৃতি নানা প্রকার অনিষ্ট ঘটনা হয়। যে কার্য্য ধর্ম্মপ্রবৃত্তির বিরুদ্ধ, এবং যাহার অনুষ্ঠান করিলে অশুভ ঘটনা হয়, তাহা কিপ্রকারে পরমেশ্বরের অভিপ্রেত বলিয়া স্বীকার করা যায়? যাহা পরমেশ্বরের অভিপ্রেত নহে, তাহা কোন ক্রমেই কর্তব্য নহে।

এবিষয়ের এপ্রকার মীমাংসা করা সম্পূর্ণ সম্ভব বোধ হইলেও, অনেকানেক বিচক্ষণ ব্যক্তি তৎ প্রতিপক্ষে যে সকল যুক্তি প্রদর্শন করেন, তাহা বিবেচনা করিয়া দেখা উচিত।

প্রথমতঃ।— তাঁহারা কহেন, যদি আহারার্থে জীবহিংসা পরমেশ্বরের অভিপ্রেত না হইত, তবে তিনি সিংহ, ব্যাঘ্র প্রভৃতি হিংস্র জন্তুদিগকে মাংসাশি করিতেন না। যখন তাহারা পরমেশ্বরের প্রদত্ত প্রবৃত্তি বিশেষের বশবর্ত্তি হইয়া প্রাণি বধ করে, তখন মনুষ্যেরও ভক্ষণার্থে জীবহিংসা করা তাঁহার অভিপ্রেত, তাহার সন্দেহ নাই।

ইতর জন্তুরা মাংস ভক্ষণ করে বলিয়া, মনুষ্যের পক্ষেও তাহাই কর্তব্য স্থির করা

অতিশয় অদূরদর্শিতার কার্য্য। সকল বিষয়ে পশু, পক্ষ্যাদি ইতর প্রাণির অনুগামি হইয়া চলিলে, অশেষ অনর্থের উৎপত্তি হয়। কোন কোন জন্তু স্বীয় শাবকদিগকে 'ভক্ষণ করে, 'অনেকানেক জন্তু ভগিনী ও গর্ভধারিণীর সহযোগে সন্তান উৎপাদন করে, প্রায় সকল জন্তুই আহার পাইলে স্বত্বান্বিত বিবেচনা না করিয়া ভোজন করে। ইতর জন্তুদিগের ইত্যাচার ব্যবহার দৃষ্টে তদনুরূপ আচরণ করিলে ধর্মাধর্ম ও কর্তব্যাকর্তব্য বিচার একেবারে উঠিয়া যায়। অতএব, ইতর প্রাণিতে আহারার্থে জীবহিংসা করে বলিয়া, মনুষ্যের পক্ষেও তাহা ঈশ্বরপ্রাপ্ত জ্ঞান করা কোনক্রমেই যুক্তিসিদ্ধ নহে। এক্ষণে, মৎস্য মাংস ভোজনের গুরুতর প্রতিকল যে নিরুক্ত প্রবৃত্তির প্রবলতা তাহা প্রতিপন্ন করা যাইতেছে; তাহা পাঠ করিলে প্রতীতি হইবে, যে আমিষ ভোজন ব্যাভ্রাদি হিংস্র জন্তুর পক্ষে যেমন সঙ্গত, মনুষ্যের পক্ষে তেমনি অসঙ্গত।

আমিষ ভোজন করিলে যে জিহ্বাংসাদি নিরুক্ত প্রবৃত্তি প্রবল হয়, ও তৃণ, পত্র, শস্য-

দি ঔষ্টিদ বস্তু ভক্ষণ করিলে যে ঐ সকল প্র-
বৃত্তি দুর্বল হয়, ইহা যাবতীয় প্রাণির ভক্ষ্যা-
ভক্ষ্য বিচার করিয়া দেখিলেই বিশিষ্টরূপে
অবগত হওয়া যায়। সমুদায় মাংসাশি প-
শুরই অত্যন্ত উগ্র স্বভাব, কারণ মাংসাহার
ও তদর্থ প্রাণিবধ উভয় কারণেই তাহার-
দের জিঘাংসাদি প্রবৃত্তি উত্তেজিত ও বর্দ্ধিত হ-
ইতে থাকে। ইহা অনায়াসে পরীক্ষা করিয়াও
দেখা যাইতে পারে। কোন কুকুরকে ক্রমা-
গত কয়েককাল নিরবচ্ছিন্ন নিরামিষ ভোজন
করাইলে, তাহার উগ্র স্বভাব হ্রাস হইয়া স্নিগ্ধ
স্বভাব বৃদ্ধি হয়। সেইরূপ, যদি ক্রমাগত
মাংস ভক্ষণ করান যায়, তবে তাহার ক্রোধ
ও হিংস্রতা প্রবল হইতে থাকে। পশু বধ
পূর্বক মাংস বিক্রয় করা যাহারদের উপ-
জীবিকা, তাহারদের কুকুর যে অত্যন্ত হিংস্র
ও নৃশংস হয়, তাহার এই কারণ। শব-
ভোজি কুকুরদিগের অসামান্য উগ্রতা ও হিং-
স্রতা প্রসিদ্ধই আছে। ব্যাঘ্রের ন্যায় হিংস্র
স্বভাব প্রায় অন্য কোন জন্তুরই দৃষ্টি করা
যায় না, কিন্তু শস্য ফলাদি ভক্ষণ করাইলে,
তাহারও হিংস্রতা হ্রাস হইয়া স্নিগ্ধতা বৃদ্ধি

হয়। কোন ব্যক্তি একটা ব্যাঘ্র-শাবক ধৃত করিয়া ক্রিয়াকাল শস্য ভক্ষণ করাইয়া রাখিয়াছিল। তাহাতে সেই ব্যাঘ্রের জিঘাংসা প্রবৃত্তির একপ্রকার দমন হইল, যে তাহার বন্ধন মোচন করিয়া দিলে গৃহের পাশ্বে ইতস্তত গমনাগমন করিত, এবং হস্তে করিয়া খাদ্য-দ্রব্য দিলে আহার করিত, তাহাতে কাহারও হিংসা করিত না। নিরবচ্ছিন্ন মাংস ভক্ষণ দ্বারা কুকুরের উগ্রতা ও নৃশংসতা বৃদ্ধি এবং শস্য ভোজন দ্বারা ব্যাঘ্রের ন্নিক্ততা বর্জন ও হিংস্রতা দমন হওয়া অপেক্ষায়, মাংস ভক্ষণের দোষ গুণ পরীক্ষার উত্তম উপায় আর কি আছে* ?

মনুষ্যের বিষয় পর্যালোচনা করিয়া দেখিলেও এইরূপ দেখা যায়। মাংসাশি লোকদিগের দুর্নিবার্য্য ক্রোধ ও হিংসা এবং ফল-মূল-শস্যভোজিদিগের নম্রতা ও শিষ্টতা একপ্রকার প্রসিদ্ধ আছে। একপ্রকার যাব-তীয় জাতির স্বভাব ও চরিত্রই ইহার প্রমাণ। যে সকল পর্ব্বত ও বনবাসি লোকে পশু হিংসা

*Fowler's Physiology. Chapter 11. Section 1.

করিয়া উদর পূর্তি করে, তাহারদের নৃশংস স্বভাব, এবং যাহারা ফল, মূল, শস্যাদি ভক্ষণ করিয়া দিন যাপন করে, তাহারদের অপেক্ষাকৃত শিষ্ট ব্যৱহার অনেকেরই বিদিত আছে। নবজীলণ্ড-বাসি ও আমেরিকার আদিম নি-বাসি ঘোরতর মাংসাশি মনুষ্যদিগের নিষ্ঠুরতা ও হিংস্রতার সহিত অম্প-আমিষ-ভোজি চীন ও হিন্দুদিগের অপেক্ষাকৃত শিষ্টতা ও সুশীলতার তুলনাকরিয়া দেখিলেই চরিতার্থ হওয়া যায়। এই প্রকার, মাংসাশি পশু-দিগের ন্যায় মাংসাশি মনুষ্যদিগের জিঘাংসা প্রবৃত্তি যে প্রবল হয়, এবং শস্যাদি-ভোজি প্রাণিদিগের ন্যায় শস্যাদি-ভোজি মনুষ্যদিগের ঐ প্রবৃত্তি যে দুর্বল থাকে, সর্বত্রই তাহার প্রচুর প্রমাণ প্রাপ্ত হওয়া যায়। অতএব, আমিষ ভোজন যে জিঘাংসা প্রবৃত্তি প্রবল হইবার এক প্রধান কারণ, ইহাতে সন্দেহ নাই।

নিকৃষ্ট প্রবৃত্তি প্রবল হইলে, ধর্ম্যপ্রবৃত্তি তাহার নিকট পরাভূত থাকিবার সম্ভাবনা। যাহার অন্তঃকরণে দয়ার লেশ মাত্র আছে, তিনি পশু, পক্ষী প্রভৃতির বধ-দশা দৃষ্টি

করিয়া অবশ্যই কাতর হন, তাহার সন্দেহ নাই। আর, যাহারা পুনঃ পুনঃ পাপাচরণ করিয়া এপ্রকার নির্দয় হইয়া উঠে, যে জন্তুদিগের মৃত্যু-যন্ত্রণা দেখিয়া যন্ত্রণা বোধ হয় না, দয়া-শূন্য হিংস্র জন্তুর সহিত তাহারদের আর কি বিশেষ থাকে? মাংসবিক্রয়োপজীবী লোকে পুনঃ পুনঃ প্রাণি বধ করাতে, এক্রপ করুণা-শূন্য হয়, যে তাহারা এই অতি নিদারুণ বিষম কর্ম করিতে আর কিছুমাত্র সঙ্কুচিত হয় না। তাহারদের প্রচণ্ড ও নির্দয় স্বভাব সর্বসাধারণেরই বিদিত আছে। একারণ কোন কোন দেশে এপ্রকার রাজনিয়ম প্রচলিত আছে, যে কোন বিচারালয়ে মরণ জীবন বিষয়ক বিচার উপস্থিত হইলে, তাহারা জুরি হইতে পারিবে না। অতএব, মাংসাশি মহাশয়েরা মাংস ভোজন করিয়া কেবল আপনারদের অনিষ্ট করিতেছেন এমত নহে, পূর্বোক্ত প্রাণিঘাতকদিগকে পশুর সমান করিতেছেন।

এক্ষণে, আনিষ ভক্ষণ করিয়া মনুষ্যের ক্রোধ হিংসাদি প্রবল ও ধর্মপ্রবৃত্তি সকল দুর্বল করা কর্তব্য কি না, তাহা বিবেচনা করা উচিত। পরমেশ্বর প্রাণি বিশেষ-

যে বিশেষ বিশেষ প্রকৃতি প্রদান করিয়া বাহ্য বিষয়ে তাহার সম্পূর্ণ উপযোগিতা রাখিয়াছেন। তিনি যে জন্তুর যেকোন স্বভাব করিয়াছেন, তাহার তদুপযোগি খাদ্য নিকৃ-
পণ করিয়া দিয়াছেন। পশুহিংসা করিতে সিংহ ব্যাঘ্রাদির জিঘাংসা প্রবৃত্তি চরিতার্থ হয়, অথচ তাহারদের অন্য কোন প্রবৃত্তির বিরুদ্ধ কার্য্য করা হয় না; অতএব, তাহার-
দের পক্ষে প্রাণিবধ অকর্তব্য নহে। যদি মনুষ্যদিগেরও কেবল জিঘাংসাদি নিকৃষ্ট প্রবৃত্তি থাকিত, তবে আহারার্থ জীব-
হিংসা করা তাহারদের পক্ষেও অসঙ্গত হ-
ইত না। কিন্তু জগদীশ্বর মনুষ্যকে বুদ্ধিবৃত্তি ও ধর্ম্মপ্রবৃত্তি প্রদান করিয়া সর্ব্বাপেক্ষা শ্রেষ্ঠ করিয়াছেন; তন্মধ্যে, বুদ্ধিবৃত্তি দ্বারা আমিষ ভোজনের সমূহ দোষ নিকৃপিত হইতেছে, এবং আহারার্থে জীব হিংসা ও জীবের প্রতি নিষ্ঠুর ব্যবহার যে ধর্ম্মপ্রবৃত্তির বিরুদ্ধ, তাহা পূর্বে প্রতিপন্ন করা গিয়াছে। অতএব, যে বর্ষ্য করিতে গেলে, ধর্ম্মপ্রবৃত্তির বিরুদ্ধ ব্যব-
হার করিতে হয় ও নিকৃষ্ট প্রবৃত্তি প্রবল হয়, তাহা কদাপি কর্তব্য নহে; কারণ যে কার্য্য

সমুদায় মানসিক বৃত্তির অভিমত, তাহাই কর্তব্য; যেস্থলে নিকৃষ্ট প্রবৃত্তির সহিত ধর্ম-প্রবৃত্তির বিরোধ হয়, সে স্থলে ধর্মপ্রবৃত্তির উপদেশানুযায়ি ব্যবহার করাই বিধেয়* ১।

দ্বিতীয়তঃ ১—কেহ কেহ কহেন, ইতর জন্তু সমুদায় মনুষ্যের হিতার্থেই সৃষ্ট হইয়াছে, অতএব যে প্রকারে তাহারা মনুষ্যের ব্যবহারে আইসে, তাহাই কর্তব্য। এ কথা কোন ক্রমেই সর্বতোভাবে প্রামাণিক হইতে পারে না। যদিও মনুষ্যের পক্ষে কতকগুলি পশুকে স্বীয় কার্যে নিযুক্ত করা ন্যায়যুক্ত বলিয়া স্বীকার করা যায়, তথাপি তাহারদের প্রতি নিষ্ঠুর ব্যবহার ও তাহারদের প্রাণ সংহার করা যে অতি গর্হিত, ইহা আমারদের সমুদায় ধর্মপ্রবৃত্তি একমত হইয়া অঙ্গীকার করিতেছে। আমারদের প্রাণিবধ করিবার সামর্থ্য আছে বলিয়াই যদি তাহারদিগকে বধ করা বিধেয় হয়, তবে কর্তব্য-কর্তব্য বিবেচনার আর প্রয়োজন কি? যে কার্য্য আমারদের পরমোৎকৃষ্ট উপচিকীর্ষা

*Fowler's Physiology. Chapter 11. Section 1.

ও ন্যায়পরতা বৃত্তির বিরুদ্ধ, তাহা সমস্ত নি-
রুষ্ট প্রবৃত্তির সম্পূর্ণরূপে অভিমত হইলেও
কর্তব্য নহে ।

আর যাঁহারা কহেন, সমস্ত ইতর
জন্তু কেবল মনুষ্যের উপকারার্থেই সৃষ্ট হই-
য়াছে, তাঁহাদের এ অভিপ্রায় নিতান্ত
ভ্রান্তি-মূলক, তাহার সন্দেহ নাই । ভূতত্ত্ব-
বিদ্যা দ্বারা ইহা নিঃসংশয়ে নিরূপিত হই-
য়াছে, যে মনুষ্য উৎপন্ন হইবার কোটি কোটি
বৎসর পূর্বে এ পৃথিবীতে অপরাপর অশেষ
প্রকার জীবের বসতি ছিল, এবং তৎ পূর্বেই
তাহার অনেক জাতি একেবারে নষ্ট হইয়া
গিয়াছে । এক্ষণেও, ভূচর, খেচর ও জল-
চর যত ইতর জন্তু আছে, তাহারই বা কয়
প্রকার প্রাণি মনুষ্যের ব্যবহারে আসিয়া
থাকে ?

তৃতীয়তঃ ।—মাংসাশি মহাশয়েরা স্ব-
পক্ষ রক্ষার্থে কহিয়া থাকেন, আমিষ ভক্ষণ
করিলে শরীরের বল ও পুষ্টি বৃদ্ধি হয়, ওস্তিদ
বস্ত্র ভোজন করিলে সেক্ষপ হয় না । কিন্তু
তাঁহাদের এ কথা কত দূর প্রামাণিক, তাহা

বিচার করিয়া দেখা উচিত । মাংসাশি প্রাণি সকল অত্যন্ত ক্রোধ-পরবশ হইয়া অন্যের উপর অত্যাচার করে ও অন্যের প্রাণ নাশ করে, ইহা দৃষ্টি করিয়া আপাততঃ বোধ হইতে পারে, যে মাংস আহার করিলে বল বৃদ্ধি হয় । কিন্তু অনেকানেক তৃণ-পত্র-শস্যাহারি পশুকেও প্রভূত-বল-বিশিষ্ট দেখা যায় । যে বৃষ ও অশ্ব উভয়ই অত্যন্ত বলবান্ ও মনুষ্যের বিশিষ্টরূপ উপকারি, তাহারা তৃণ, পত্রাদি ঔদ্ভিদ বস্তুমাত্র ভক্ষণ করিয়া থাকে । তৃণ-পত্র-ভোজি গণ্ডার ও হস্তী মাংসাশি সিংহ ও ব্যাঘ্র অপেক্ষায় বলবান্ । তৃণাহারী হরিণ সমস্ত মাংসাশি পশু অপেক্ষায় দ্রুতগামী । বানরের বল ও পরাক্রম অপর সাধারণ সকলেরই নিদিত আছে । অতএব, মাংসাশি পশুদিগের অপেক্ষায় ঔদ্ভিদ-ভোজি পশুদিগের বল অল্প নহে । বরং মাংসাশি অপেক্ষায় ঔদ্ভিদ-ভোজি প্রাণিদিগের মধ্যেই অধিক বলবান্ জন্তু দৃষ্টি করা যায় ।

এক্ষণে, মনুষ্যের বিষয় বিবেচনা করিয়া দেখা উচিত । শারীরবিধান বিদ্যায় পারদর্শী বিচক্ষণ পণ্ডিত শ্রীযুক্ত উ, লারেঞ্জ সা-

হেব এই প্রকার লিখিয়াছেন, যে মৎস্য মাংস ভক্ষণ করিলে যে বল ও সাহস বৃদ্ধি হয়, ইউরোপ ও আসিয়া খণ্ডের উত্তর-প্রদেশ-নিবাসি কতিপয় জাতির বিষয় পর্যালোচনা করিয়া দেখিলে, একথা নিতান্ত অপ্রামাণিক বোধ হয়। সেমোইড্, অস্ট্রিয়াক্, বুরাট্, তঙ্গুসি, কেম্শাডেল্, লাম্বাও-নিবাসি লোক, আমেরিকা খণ্ডের উত্তর-প্রান্ত-নিবাসি একুইমাক্স জাতি, ও দক্ষিণ-প্রান্ত-সন্নিহিত-টেরাডেল ফিউগো-দ্বীপ-নিবাসি লোক, এই সমুদায় জাতি প্রায় নিরবচ্ছিন্ন মাংস, বরং আম মাংস পর্যন্ত ভক্ষণ করিয়া থাকে, অথচ ভূমণ্ডলের অন্য কোন জাতি তাহারদের ন্যায় খর্ব, দুর্বল ও সাহসহীন নহে। তিনি আরও লিখিয়াছেন, যে কি উষ্ণ কি শীতল সকল দেশেই যে নিরবচ্ছিন্ন নিরামিষ ভোজন দ্বারা শরীরের সম্পূর্ণরূপ পুষ্টি বর্দ্ধন এবং শারীরিক ও মানসিক শক্তি সমুদায়ের সম্যক প্রকার উন্নতি হইতে পারে, তাহার যথেষ্ট প্রমাণ প্রাপ্ত হওয়া যায়*। বস্তুতঃ,

* Lectures on Comparative Anatomy &c
by W. Lawrence. Lecture IV. Chapr. VI.

যখন রসায়ন বিদ্যা দ্বারা ইহা নিঃসংশয়ে
নিকপিত হইয়াছে, যে শরীরের পুষ্টিবদ্ধন
ও বল সাধনার্থে যে সমস্ত পদার্থ আবশ্যক
করে, ফল শস্যাদি ঔদ্ভিদ দ্রব্যে তাহা যথেষ্ট
আছে, তখন নিরামিষ ভোজন দ্বারা বলা
ধান হওয়া কোনক্রমেই অসম্ভব নহে। ফলতঃ
তদ্বারা যে সম্যক্ প্রকার বলবান্ হওয়া যায়,
তাহার প্রচুর প্রমাণ প্রদর্শন করা যাইতেছে।

নিরবচ্ছিন্ন শস্যাহারি হিন্দুস্থানিরা মৎস্য-
হারি বাঙ্গালিদিগের অপেক্ষায় অধিক বল-
বান্। এতদেশীয় বিধবা স্ত্রীলোকে নিরামিষ
ভোজন করে, তাহাতে অসুস্থ ও দুর্বল হওয়া
দূরে থাকুক, মৎস্যশি সধবাদিগের অপেক্ষায়
সবল ও সুস্থ-শরীর হইয়া দীর্ঘ কাল জীবিত
থাকে। একাহার তাহারদের স্বাস্থ্যাবস্থার
এক প্রধান কারণ বোধ হয় ; কিন্তু মৎস্য
মাংস পরিত্যাগ করাতে তাহারা যে দুর্বল
হয় না, ইহাতে সন্দেহ নাই। যে সময়ে
গ্রীক ও রোমীয় লোকেরা অত্যন্ত বল ও
বীর্য প্রকাশ করিয়াছিল, তখন তাহারা
সামান্য প্রকার নিরামিষ দ্রব্য ভক্ষণ করিত।

স্পার্টা দেশীয় যে সকল ব্যক্তি থর্মাপলি নামক স্থানে অসামান্য বল, বীৰ্য্য, পরাক্রম প্রকাশ দ্বারা অবিনশ্বর কীর্তি লাভ করিয়া গিয়াছে, তাহারা নিরামিষ-ভোজি ছিল। আর এক্ষণেও ইউরোপের অন্তঃপাতি অনেক প্রদেশের ইতর লোকেরা প্রায় শস্য, ফল, মূলাদি ভক্ষণ করিয়া থাকে, অথচ তত্তৎ প্রদেশের মধ্যে তাহারাই সর্বাপেক্ষা বলিষ্ঠ। আয়র্লও দ্বীপের শ্রমোপজীবী লোকেরা কেবল গোল আলু আহাৰ করিয়া থাকে, অথচ তাহারা যেকপ বলবান্ ও পরিশ্রমি, তাহা প্রসিদ্ধই আছে। নারোয়ে নামক অতিশয় শীতল দেশীয় সামান্য লোকেরা সচরাচর রাইণ, দুগ্ধ ও পনির ভক্ষণ করে, বিশেষতঃ তদন্তঃপাতি কোন কোন প্রদেশের লোকে অবাধে নিরবচ্ছিন্ন নিরামিষ ভোজন করে, অথচ তাহারা শ্রীমান্, বলবান্, দীর্ঘাকার ও দীর্ঘ-জীবী হয়। রুশ দেশীয় সৈন্য ও অন্যান্য সামান্য লোকেরা প্রায়ই নিরামিষ ভোজন করিয়া থাকে, অথচ তাহারা অত্যন্ত বলিষ্ঠ ও বহু-পরিশ্রমি। ম, দুপাঁ সাহেব লিখিয়াছেন, করা-

শিশদিগের তিন ভাগের দুই ভাগ লোক কেবল আলু জনার প্রভৃতি নিরামিষ দ্রব্য আহার করিয়া থাকে। পোলণ্ড, হঙ্গেরি, সুইজার্লণ্ড, স্পেইন, ইটালি, গ্রীশ প্রভৃতি অন্যান্য দেশের ও অনেকানেক স্থানের সামান্য লোকেরা শস্য, ফলাদি ভক্ষণ করিয়া বিলক্ষণ হৃষ্ট, পুষ্ট, বলিষ্ঠ ও পরিশ্রমি হয়। আমেরিকার অন্তঃপাতি মেক্সিকো, ব্রাজিল প্রভৃতি অনেক স্থানের ইতর লোকে ফল, মূল, শস্য ভক্ষণ করিয়া শ্রীমান্, বলবান্, পরিশ্রমি ও সুস্থ-শরীর হয়। আফ্রিকা খণ্ডের মধ্য-ভাগ-নিবাসি অনেকানেক জাতি নিরবচ্ছিন্ন নিরামিষ ভোজন করিয়াও অসঙ্গত বলবিশিষ্ট হয়। তদন্তঃপাতি জেন্না দেশীয় লোকে কেবল শস্য-মূলাদি আহার করিয়া থাকে, অথচ অন্য কোন স্থানে তাহারদের ন্যায় বলবান্ পরিশ্রমি মনুষ্য প্রাপ্ত হওয়া দুষ্কর। নিগ্রো-জাতীয় লোক যে সমস্ত বস্তু আহার করে, তাহার অধিকাংশই নিরামিষ, অথচ তাহারদের যেকোন শারীরিক শক্তি তাহা প্রসিদ্ধই আছে। দক্ষিণসমুদ্রস্থ অনেকানেক দ্বীপ-নিবাসি লোকেও ঐক্য আহার করিয়া

থাকে, অথচ তাহারদের এপ্রকার প্রভূত বল, যে অত্যন্ত বলিষ্ঠ ইংলণ্ডীয় মাল্লারাও মল্লযুদ্ধে তাহারদের নিকট এপ্রকার পরাজিত হইয়াছিল, যে তাহাতে কোন ক্রমেই তাহারদিগের সর্মকক্ষ বলিয়া পরিগণিত হইতে পারে না। ইংলণ্ড ও আমেরিকার অন্তঃপাতি ফিলেডেলফিয়া নগরে বাইবেল্ খ্রীষ্টান্ নামে এক খ্রীষ্টান সম্প্রদায় আছে, তাহারা আমিষ ভোজন ও সুরাপান করে না ; অথচ এপ্রকার অবগত হওয়া গিয়াছে, যে তৎসম্প্রদায়ি লোকে পরিশ্রম বিষয়ে তত্তৎপ্রদেশীয় মাংসাশি ব্যক্তিদিগের অপেক্ষায় কোন ক্রমেই হীন নহে। তৎসম্প্রদায়ি বিচক্ষণ ব্যক্তিরা কহিয়া থাকেন, যে পরীক্ষা করিয়া আমারদের নিশ্চিত প্রতীতি হইয়াছে, যে বলবান্ ও শ্রমক্ষম হইবার নিমিত্তে সুরাপান ও মাংস ভোজন আবশ্যক করে না*।

অতএব, মৎস্য মাংস ভোজন করিলেই যে বল বৃদ্ধি হয়, নতুবা হয় না, অনেক স্থলেই এ ক-

* Fruits and Farinacea the proper food of man, by John Smith. Part III. Chap. IV. Lectures on Comparative Anatomy &c. by W. Lawrence. Lecture IV. Ch. VI.

থার অন্যথা দেখা যাইতেছে । কলতঃ, বলিষ্ঠ হইবার প্রতি বাসস্থানের গুণ, পিতা মাতার বলাধিক্য, ব্যায়াম ও যুদ্ধ শিক্ষা প্রভৃতি অন্যান্য অনেক কারণ আছে । আর যদি মাংস ভক্ষণ করিলে যথার্থই অপেক্ষাকৃত বলাধিক্য হইত, তাহাতেই বা কি ? সর্ব প্রকার সাংসারিক কার্য্য সম্যকরূপে সম্পন্ন করিবার নিমিত্তে আমারদের যত শক্তি আবশ্যক করে, আমিষ ভক্ষণ না করিয়াও যদি তাহা অনায়াসে প্রাপ্ত হওয়া যায়, তবে মৎস্য মাংস আহার করিয়া রিপু প্রবল ও তদর্থ প্রাণি নষ্ট করিবার প্রয়োজন কি ? কোন ধনাঢ্য ব্যক্তির ধন হরণ করিয়া ধনী হওয়া যদি ন্যায়-বিরুদ্ধ হয়, তবে যখন জগদীশ্বর আমারদের সম্পূর্ণ স্বাস্থ্যলাভ ও যথেষ্ট বল প্রাপ্তির অন্যান্য উপায় করিয়া দিয়াছেন, তখন আহারার্থে প্রাণি বধ রূপ দোষাকর কার্য্য করা কি অন্যায় নহে ?

যদিও এ স্থলে অনুজ্ঞাধীন শারীরিক সুস্থতার বিষয় উল্লিখিত হইয়াছে ; তথাপি আমিষ ও নিরামিষ ভোজনের ফলাফল বিবেচনার্থে তদ্বিষয়ে কিঞ্চিৎ লেখা অসঙ্গত নহে । সিল্বেস্টার্ প্রেহাম্, ও, স, ফৌলর্,

জ, ফ, নিউটন, জ, স্মিথ, ডাক্তর উ, অ, আলকট, হিউফলও, চীন, লেঘ, বকান, ক্রেজি, আ, লার্স, পেয়টন, ছইট্‌লা প্রভৃতি অনেকাণে বিচক্ষণ পাণ্ডিত ও বহুদর্শি চিকিৎসক প্রচুর প্রমাণ দিয়া কহিয়াছেন, আমিষ ভোজন করিলে শরীর অসুস্থ হইয়া যকৃৎ, যক্ষ্মা, রাজযক্ষ্মা, পাদশোথ, বাত, অপস্মর, বহুবিধ অঙ্গ-ক্ষত ইত্যাদি নানা প্রকার রোগ উৎপন্ন হয়, এবং অনেক উদাহরণ প্রদর্শন পূর্বক প্রতিপন্ন করিয়াছেন, যে মাংসাহার পরিত্যাগ করিলে অনেকাণে অত্যন্তকট প্রগাঢ় রোগ নষ্ট হইয়া শরীর সুস্থ ও সবল হয়। স, গ্রেহাম্, ও স ফৌলর্, ডাক্তর পার্মলি, লেঘ, ব্যানিস্টর্, টেলর্, জ, পোর্টর্, ন, জ, নাইট, জ, স্মিথ প্রভৃতি প্রসিদ্ধ সুপাণ্ডিত চিকিৎসকেরা স্বয়ং মাংসাহার পরিত্যাগ করাতে যক্ষ্মা, ক্ষত, অজীর্ণতা, অতিসার, অপস্মর প্রভৃতি অনেকাণে গাঢ় রোগ হইতে উত্তীর্ণ হইয়া সম্পূর্ণ সুস্থ, সবল ও শ্রমক্ষম হইয়াছেন, এবং নিরবচ্ছিন্ন নিরামিষ ভোজনের বিধি দিয়া কত কত চিররোগির দুঃসাধ্য রোগের শান্তি করিয়া তাহার-

দের ভগ্ন শরীর সুস্থ করিয়াছেন। পূৰ্বোক্ত লেখ্ ও নিউটন্ সাহেবেরা সপরিবারে আমিষ ভোজন পরিত্যাগ করেন, ইহাতে তাঁহারা ও তাঁহাদের পরিবারস্থ সমস্ত ব্যক্তি রোগ শান্তি ও স্বাস্থ্য লাভ বিষয়ে বিশিষ্টরূপ উপকার প্রাপ্ত হইয়াছিলেন। ডাক্তর এবকুন্নি স্বপ্রণীত পাকস্থলীর রোগ বিষয়ক গ্রন্থে লেখেন, আমার এক রোগী নিরবচ্ছিন্ন নিরামিষ ভোজন আরম্ভ করিয়া উৎকট উদরাময় ও শিরোরোগ হইতে উত্তীর্ণ হইয়াছে। পূৰ্বোক্ত স্মিথ সাহেব নিরামিষ ভোজন অবলম্বন করিতে বহু কাল-ব্যাপি দুঃসাধ্য রোগ হইতে মুক্ত হইয়াছিলেন। তিনি কহিয়াছেন, “তদনন্তর যত বার আমি পুনর্বার আমিষ ভক্ষণ আরম্ভ করিবার চেষ্টা করিয়াছি, তত বার, শারীরিক অসুস্থতা বোধ হওয়াতে, তাহা হইতে নিরুত্ত হইয়াছি।” সুবিখ্যাত শেলি সাহেব কহেন, যত ব্যক্তি আমিষ ভক্ষণ পরিবর্জন পূর্বক নিরামিষ ভোজন আরম্ভ করিয়াছেন, তদ্বারা তাঁহাদের কাহারও কিছুমাত্র অনিষ্ট হয় নাই, বরং অনে-

কেরই বিশেষ উপকার দর্শিয়াছে। পূর্বোক্ত
গ্রেহাম সাহেবের কতক গুলি শিষ্য এ বিষ-
য়ের উত্তম দৃষ্টান্ত স্থল। তাহারা মৎস্য
মাংস পরিত্যাগ পূর্বক সুস্থ ও স্বচ্ছন্দ শরীরে
কাল যাপন করিতেছেন। নিউ ইয়র্কের স্ট্রং-
পাতি আলবেনি নামক নগরে অনাথবালক
দিগের ভরণ পোষণার্থে এক অনাথনিবাস
সংস্থাপিত হয়; তথায় প্রথমে ৭০। ৮০
জন বালক অবস্থিতি করিত। তাহার-
দের মধ্যে নিয়ত ৪, ৫, বা ৬ জন করিয়া পী-
ড়িত থাকিত, এবং প্রায় প্রতিমাসে এক জন
মৃত্যু-মুখে পতিত হইত। পরে, যখন
তথাকার অধ্যক্ষেরা তাহারদের আমিষ ভো-
জন পরিবর্তন প্রভৃতি সুনিয়ম করিয়া দিলেন,
তখন তাহারা রোগের হস্ত হইতে মুক্ত হই-
য়া সুস্থ শরীরে কালযাপন করিতে লাগিল*।

নিরামিষ ভোজন দ্বারা যে রোগ শান্তি
ও সুস্থতা বৃদ্ধি হয়, তাহার এই প্রকার ভূরি
ভূরি উদাহরণ সংগ্রহ করিতে পারা যায়;

* Fruits & Farinacea &ca. Part III.
Chap VI & VIII. Shelly's Poetical works.
Queen Mab. Note 17. Fowler's Physiology.
Chapter II. Section 1.

কিন্তু তাহা হইলে অত্যন্ত বাহুল্য হইয়া পড়ে ।
অতএব, আর দুই একটি দৃষ্টান্ত প্রদর্শন করি-
য়া নিরস্ত হইতেছি ।

আমেরিকার অন্যান্য চিকিৎসকেরা
নিরামিষ ভোজনের বিষয়ে কল্প পরীক্ষা
করিয়া দেখিয়াছেন, ইহা জানিবার নিমিত্তে
ডাক্তর নার্থ নামক সুপ্রসিদ্ধ চিকিৎসক এক
বিজ্ঞাপন প্রকাশ করিয়া দিয়াছিলেন । তাহা-
তে, তৎপ্রদেশীয় চিকিৎসা-ব্যবসায়ি যত
ব্যক্তি তাঁহার প্রশ্নের উত্তর প্রদান করেন,
সকলেই প্রচুর প্রমাণ প্রদর্শন পূর্বক এই
প্রকার লেখেন, যে মৎস্য মাংস পরিত্যাগ
পূর্বক নিরামিষ ভোজন করিলে যে কোন
প্রকার শারীরিক অনিষ্ট ঘটনা হয়, ইহা
কোন স্থলে দৃষ্ট হয় নাই ; প্রত্যুত, তদ্বারা
যে শরীরের সুস্থতা ও বল বৃদ্ধি হয়, এবং
অবিশ্রান্ত অধিক কাল ব্যাপিয়া পরিশ্রম
করিলেও যে ক্লান্তি বোধ হয় না, ইহাই সর্বত্র
প্রত্যক্ষ হইয়াছে* ।

এতদ্দেশীয় হিন্দুদিগের অপেক্ষায় মোসল-

* Fruits & Farinacea &ca. Part III.
Chap. VIII.

মানদিগের মধ্যে যে অধিক অন্ধ ও কুষ্ঠরোগি দেখা যায়, তাহারদের মাংস ভক্ষণ তাহার এক প্রধান কারণ বোধ হয়।

আর ডাক্তর রিজ্. এল্ডার্ন, টেপান্, উ, ডেবিড্‌সন্, এ,পোলার্ড, পূর্বোক্ত স, গ্রে-হাম্‌জ, ষ্ট্রেটল্‌স সাহেব প্রভৃতি অনেকে বিস্তর উদ্যতরূপে সম্বলিত লিখিয়াছেন, যে কোন দেশে মরক উপস্থিত হইলে, তত্রস্থ মাংসাশি লোকেরা তদ্বারা অধিক আক্রান্ত হয়। মহা খ্যাতি্যাপন্ন করুণাময় হোয়ার্ড সাহেব যখন ভূরি ভূরি ঘোরতর-মরকাক্রান্ত স্থানে গমন ও অবস্থিতি করিয়াছিলেন, বহুতর অস্বাস্থ্যকর কারাগারে প্রবিষ্ট হইয়াছিলেন, এবং অনেক কানেক রোগির সহিত সংমিশ্রিত হইয়া বাস করিয়াছিলেন, তখন তিনি মদ্য মাংস পরিত্যাগ পূর্বক কেবল নিরামিষ দ্রব্য ভক্ষণ ও জল মাত্র পান করিতেন। ইহাতে, রোগিদিগের সহিত এত সংস্রুত হইলেও, তিনি সর্ব স্থানে সুস্থ-শরীর থাকিয়া মারীভয় উত্তীর্ণ হইয়াছিলেন। নিরামিষ ভোজনের গুণ তাঁহার এপ্রকার হৃদয়ঙ্গম হইয়াছিল, যে অন্যান্য ব্যক্তিদিগকেও মরকের সময়ে নিঃশেষে মৎস্য

মাংস পরিত্যাগ করিতে উপদেশ দিয়াছিলেন । তিনি পরলোক প্রাপ্তির অত্যাশ্রিত কাল পূর্বে এই প্রকার লিখিয়া গিয়াছেন, যে ফল ও শস্য ভক্ষণ করিলে, মনুষ্যের শরীর মনুষ্যত্বাভাবে যেকপ সুস্থ থাকে, মাংস আহার করিলে সেকপ কখনই থাকে না* ।

মনুষ্য নিরামিষ ভোজন করিয়া যেকপ সুস্থ ও সবল থাকিতে পারেন, সেইকপ যে দীর্ঘজীবীও হইতে পারেন, তাহারও প্রচুর প্রমাণ প্রাপ্ত হওয়া যায় । গ্রীষ্ম দেশীয় স-কেটিজ, প্লেটো, জিনো, এপিকিউরস্ প্রভৃতি নিরামিষ-ভোজি প্রাচীন পণ্ডিতেরা সুস্থ শরীরে দীর্ঘ কাল জীবিত ছিলেন । যিহুদি-জাতীয় জোজেফস্ নামক পুরাতত্ত্ববেত্তা লিখিয়াছেন, এসেনি নামক সম্প্রদায় লোকের নিরামিষ ভক্ষণ করে, এবং একপ দীর্ঘজীবী হয়, যে তাহারদের মধ্যে অনেকে শতবর্ষ অপেক্ষাও অধিক কাল জীবিত থাকে । ইউরোপের অন্তঃপাতি নারোয়ে দেশীয় যে সকল ফল-মূল-শস্য-ভোজি সামান্য লোকের

* Fruits & Farinacea &ca. Part III.
Chap. IX.

বিষয় পূর্বে লিখিত হইয়াছে, তাহারদের মধ্যে গড়ে যত দীর্ঘজীবী লোক পাওয়া যায়, প্রায় অন্য কোন দেশে তত প্রাপ্ত হওয়া যায় না। ইউরোপ খণ্ডের অন্তঃপাতি রুষ দেশীয় সামান্য লোকেরা যে প্রায় নিরামিষ ভক্ষণ করিয়া থাকে, পূর্বে তাহার বিবরণ করা গিয়াছে। খ্রীযুক্ত জান্‌স্মিথ্ সাহেব স্বপ্রণীত ফল ও শস্য ভোজন বিষয়ক গ্রন্থে দীর্ঘ জীবন প্রাপ্তি বিষয়ক প্রসঙ্গ মধ্যে লিখিয়াছেন, যে ইতঃপূর্বে রুষ দেশীয় গ্রীক চর্চ নামক খ্রীষ্টান-সম্প্রদায়-ভুক্ত যে সকল ব্যক্তির বিবরণ প্রাপ্ত হওয়া গিয়াছে, তন্মধ্যে সহ-প্রাধিক ব্যক্তির বয়ঃক্রম শতবর্ষের অধিক, অনেকের আয়ু ১০০ বৎসর অপেক্ষায় অধিক ও ১৪০ বৎসরের অনধিক, আর চারি জনের আয়ু ১৪০ বৎসরের অধিক ও ১৫০ বৎসরের অনধিক। মেক্সিকোর ফল-মূল-শস্য-ভোজি আদিম নিবাসি লোকের মধ্যে অনেকেই শতায়ু প্রাপ্ত হয়, অথচ তাহারদের কেশ পক ও শরীর জরাগ্রস্ত হয় না। আমেরিকা-খণ্ড-সংক্রান্ত পশ্চিম ইণ্ডিয়ানা মক দ্বীপ-স্থিত নিরামিষ-ভোজি দাসেরা একপ দীর্ঘ-

জীবিত হয়, যে তাহারদের মধ্যে ১৩০ বর্ষের অধিক ও ১৫০ বৎসরের অনধিক কাল জীবিত থাকে এক্কার অনেক ব্যক্তির বিবরণ প্রাপ্ত হওয়া গিয়াছে* ।

ইংলণ্ড-নিবাসী বৃদ্ধ পার্ নামক প্রসিদ্ধ দীর্ঘজীবী ব্যক্তি সামান্য প্রকার রুটি, পনির, দুগ্ধ প্রভৃতি নিরামিষ দ্রব্য ভক্ষণ করিয়া ১৫২ বৎসর জীবিত ছিল । আমেরিকার শটেস্বেরি নগরে ই, প্রাট্ নামে এক ব্যক্তি ক্রমাগত ৪০ বৎসর মৎস্য মাংস আহার করেন নাই, অথচ তিনি ১১৬ বৎসর বয়ঃক্রম কালে পরলোক প্রাপ্ত হন, এবং প্রায় মৃত্যুকাল পর্যন্ত তাহার শরীর স্ববশ ও সবল ছিল । জ,এফিজ্যাম্ নামে এক ছুংথি ইংরেজ সচরাচর মাংস ভক্ষণ করিত না ; ফল শস্যাদি আহার করিয়া থাকিত, অথচ ১৪৪ বৎসর জীবিত ছিল । সে ব্যক্তি বিলক্ষণ বলবান্ ও পরিশ্রমী, এবং কয়েককাল যুদ্ধ-ব্যবসায়ে নিযুক্ত ছিল । শত বৎসর বয়ঃক্রমের পূর্বে একবারও পীড়িত হইয়াছিল কি না, সন্দেহ

* Fruits & Farinacea &ca. Part III.
Chap. XV.

স্থল, এবং মৃত্যুর অর্থাৎ পূর্বে ১১১ ক্রোশ পথ পদব্রজে গমন করিয়াছিল। সে সচরাচর ফল, মূল, শস্যই ভক্ষণ করিয়া খাদ্যিকত, তবে কদাচিৎ কখনও মাংসাহার করিত। নির-বচ্ছিন্ন নিরামিষ ভোজন করিয়া, জাঙ্ক ব্রেস্ট ১২৮, পাল নামক বানপ্রস্থ ১১৫, এবং সেন্ট এন্টনি ১০৫ বৎসর জীবিত ছিলেন। ভুবন-বিখ্যাত লার্ড বেকান্ সাহেব এই প্রকার বিস্তর প্রমাণ প্রাপ্ত হইয়া স্বপ্রণীত মরণ জীবন বিষয়ক গ্রন্থে এইরূপ লিখিয়াছেন, যে যে প্রকার আহার করা পিথাগোরস্ নামক প্রসিদ্ধ পণ্ডিতের অভিমত, তদনুরূপ ভোজন দীর্ঘজীবন প্রাপ্তি পক্ষে অত্যন্ত উপকারী। ডাক্তর হিউফ্লগু কহিয়াছেন, যে সকল লোক যৌবনের প্রারম্ভাবধি আমিষ-ভোজন পরিত্যাগ করিয়াছে, তাহাদের মধ্যেই অধিক দীর্ঘ জীবি ব্যক্তি প্রাপ্ত হওয়া যায়* ।

মনুষ্য নিরামিষ ভোজন করিয়া যে দীর্ঘ জীবন প্রাপ্ত হইতে পারে, তাহার এই প্রকার ভূরি ভূরি প্রমাণ প্রদর্শন করিতে

* Fruits & Farinacea &c. Part III.
Chap. XV.

পাওয়া যায়। এতদ্দেশীয় বিধবারা সামান্যতঃ দীর্ঘজীবী হয়, কোন কোন পতিহীনা স্ত্রীকে শতাব্দেরও অধিক আয়ু প্রাপ্ত হইতে দেখা গিয়াছে।

ফুলতঃ, রসায়ন-বিদ্যা-বিশারদ অদ্বিতীয় পণ্ডিত জ, লীবিগ্ এবং ডাক্তর লেমান প্রভৃতি অন্যান্য বিদ্যাবান্ ব্যক্তি অবধারণ করিয়াছেন, যে মাংস ভক্ষণ করিলে, শরীর শীঘ্র ক্ষয় হইতে থাকে, একারণ, তাহা পূরণ করিবার নিমিত্তে মাংসাশিদিগকে পুনঃ পুনঃ আহার করিতে হয়। মার্শেট্, ওলিবর্ প্রভৃতি শারীরবিধানবেত্তা পণ্ডিত লিখিয়াছেন, যে নিরামিষ ভোজি ব্যক্তিদিগের রক্ত মাংসাশিদিগের অপেক্ষায় নিম্নল হয়, এবং তাহা শরীর হইতে বাহির করিয়া দেখা গিয়াছে, মাংসাশিদিগের রক্তের ন্যায় শীঘ্র পচিয়া যায় না। এই সমুদায় বিবেচনা করিয়া, গ্রেহাম্ ও স্মিথ্ সাহেব কহিয়াছেন, নিরামিষ ভোজন করিলে যে অপেক্ষাকৃত দীর্ঘজীবী হওয়া যায়, তাহার সন্দেহ নাই*।

* Fruits & Farinacea &ca. Part III.

চতুর্থতঃ ১—অনেকে কহেন, মুশ্ৰুসিদ্ধ মাংসাশি পশুদিগের দন্ত ও মনুষ্যের দন্ত এক প্রকার ; অতএব দন্তের আকার বিবেচনা করিয়া দেখিলেও মনুষ্যকে মাংসাশি জীবের মধ্যে গণিত করা উচিত । কিন্তু মাংসাশি-দিগের এ যুক্তি নিতান্ত অমূলক । একথা যথার্থ বটে, যে মাংস-ভোজি ও উদ্ভিদ-ভোজি জন্তুদিগের দন্তে পরস্পর বিস্তর বিভিন্নতা আছে ; এমন কি, শারীরস্থানবেত্তা পণ্ডিতেরা দন্তের আকার মাত্র দৃষ্টি করিয়া কোন্ পশু মাংসাশী ও কোন্ পশু উদ্ভিদ-ভোজী, এবং কোন্ পশু কিরূপে জীবন যাত্রা নির্বাহ করে, তাহা নিঃসংশয়ে নিরূপণ করিয়া দিতে পারেন । কিন্তু প্রধান প্রধান শারীরস্থানবেত্তা ও শারীরবিধানবেত্তা পণ্ডিতেরা অতিপন্ন করিয়াছেন, যে দন্তের আকার ও অন্যান্য অনেক বিষয় পর্যালোচনা করিয়া দেখিলে প্রতীতি হয়, যে মাংসাহার করা মনুষ্যের স্বভাব-সিদ্ধ নহে, ফল, মূল, শস্যই তাঁহার উপযুক্ত খাদ্য । মনুষ্যের দন্ত বানর ও বনমানুষের দন্তের সদৃশ, বরং এবিষয়ে মনুষ্য অপেক্ষায় বানর,

বনমাংস, অশ্ব, উষ্ট্র ও হরিণের সহিত মাংসা-
 শি পশুদিগের অধিক সাদৃশ্য আছে। ইহাতে,
 যখন মৎস্য মাংস বানরাদির খাদ্য নহে,
 তখন তাহা মনুষ্যের স্বভাব-সিদ্ধ খাদ্য
 বলিয়া স্থির করা কোন ক্রমেই সম্ভব হয় না।
 শূকর কখন কখন আমিষ ভক্ষণ করিয়া থাকে,
 তাহার দন্তের আকার প্রকারও তদনুরূপ।
 তাহার কষের দাঁত ত্রিভুজ-ভোজি পশুর
 ন্যায়, ও অন্যান্য কতক গুলি দন্ত মাংসাশি
 পশুর ন্যায়। যদি আমিষ নিরামিষ উভয় প্র-
 কার বস্তু ভোজন করা মনুষ্যেরও স্বভাব-সিদ্ধ
 হইত, তবে দন্তের গঠন বিষয়ে তাহারও ঐ
 প্রকার ইতর বিশেষ থাকিত, তাহার সন্দেহ
 নাই। ফলতঃ কেবল দন্ত কেন? লিনিয়স,
 গ্যাসেণ্ডি, ডোবেল্টন্, লারেঙ্স, লার্ড মন্-
 বোডো, কুবিয়র, টামস্ বেল, সর্ এবেরার্ড
 হোম্ প্রভৃতি প্রধান প্রধান শারীরস্থানবেত্তা
 ও শারীরবিধানবেত্তা পণ্ডিতেরা নিরূপণ করি-
 যাছেন, যে দন্তের আকার, হনুর গঠন, হনু-সম্ব-
 দ্ধ মাংসপেশীর আয়তন, ভক্ষ্য চর্বণ কালীন
 হনু সঞ্চালনের প্রকার, অস্ত্রের দীর্ঘতা, যক্-
 তের আয়তন, এবং অন্যান্য অনেকানেক বিষ-

যে ঔদ্ভিদ-ভোজি পশুদিগের সহিত মনুষ্যের সম্পূর্ণ সাদৃশ্য আছে, কিন্তু মাংসাশি পশুদিগের সহিত কিছুমাত্র সাদৃশ্য নাই। ঔদ্ভিদ-ভোজি পশুদিগের ভক্ষ্য চৰ্ষণ ও পরিপাকার্থে অধিক লালনা আবশ্যক করে, এ কারণ তাহাদের মুখ হইতে অধিক লালনা নিঃসৃত হয়, এবং তাহাদের শারীরিক সুস্থতা বিধানার্থে অধিক শ্বেদ নিঃসরণ আবশ্যক করে, একারণ তাহাদের লোমকূপ হইতে অধিক ঘর্ম নির্গত হয়। মনুষ্যেরও তদনুরূপ অধিক লালনা ও অধিক শ্বেদ নিঃসৃত হইয়া থাকে*।

* In the absence of claws and other offensive weapons; in the form of the incisor, cuspid, and molar teeth; in the articulation of the lower jaw; in the form of the Zygomatic arch; in the size of the temporal and masseter muscles and salivary glands; in the length of the alimentary canal; in the size & internal structure of the colon and cæcum; in the size of the liver; and in the number of perspiratory glands: in all these respects, man closely resembles herbivorous class of animals.—Fruits and Farinacea &ca. by John. Smith. Part II. Chapter. I.

বিশেষতঃ বানর, বনমানুষ, মানুষ এ ত্রিবিধ প্রাণির এই সমুদায় বিষয় অবিকল এক পুকার* ৷ অতএব, পূর্বোক্ত মহামহোপাধ্যায় পণ্ডিতেরা কহিয়া গিয়াছেন, সমুদায় শারীরিক ব্যবস্থা বিবেচনায় মানুষকে কোনক্রমে মাংসাশি বোধ হয় না। ফল-মূল-শস্য-ভোজি বলিয়া স্থির করাই কর্তব্য ‡ ৷

পঞ্চমতঃ ৷—মাংসাশি মহাশয়দিগের আর এক যুক্তি এই, যে তৃণ, পত্র, শস্যাদি-ভোজি জন্ত সকল মৎস্য মাংস পরিপাক করিতে পারে না, এবং মাংসাশি জন্তুরা ফল, মূল, শস্য, তৃণাদি পরিপাক করিতে পারে না, কিন্তু মানুষ উভয় প্রকার খাদ্যই পরিপাক

* Thus we find, whether we consider the teeth and jaws, or the immediate instruments of digestion, the human structure closely resembles that of the Simiæ; all of which, in their natural state, are completely herbivorous.—Lectures on Comparative Anatomy, Physiology &c. by W. Lawrence. Lecture IV. Chapter VI.

‡ Fruits & Farinacea &c. Part II. Chap. I. II.

করিতে পারেন, অতএব তাঁহার পক্ষে উক্তয়
প্রকার দ্রব্য আহার করা বিধেয়। কিন্তু তাঁ-
হারদের প্রতিপক্ষীয় পণ্ডিতেরা সে প্রকারে
এ যুক্তি খণ্ডন করেন, তাহা লিখিত হইতে-
ছে। 'পুনঃ পুনঃ পরীক্ষা করিয়া দেখা গিয়াছে,
যে অভ্যাস দ্বারা বস্তু বিশেষ পরিপাক
করিবার শক্তি বৃদ্ধি হইয়া থাকে। ব্যাত্র
স্বভাবতঃ মাংসাশী হইলেও যে নিরামিষ বস্তু
পরিপাক করিতে পারে, তাহা পূর্বেই উল্লেখ
করা গিয়াছে। কলিকাতা-নিবাসি কোন ভদ্র
কুলোদ্ভব গৃহস্থের এক টা বিড়ালের এ প্র-
কার অভ্যাস হইয়াছিল, যে মাংস দিলেও
আহার করিত না। এইরূপ, সিংহ, ব্যাত্র,
বিড়ালাদি মাংসাশি পশুরা যে নিরামিষ বস্তু
ভোজন করিয়া সুস্থ শরীরে থাকিতে পারে,
ইহার প্রচুর প্রমাণ প্রাপ্ত হওয়া যায়।
মেঘ, বৃষ ও অশ্ব স্বভাবতঃ নিরামিষ-ভোজি,
কিন্তু, অভ্যাস করাইলে তাহারাও মাংস ভ-
ক্ষণ করিয়া সুস্থ শরীরে থাকিতে পারে।
আরব দেশের অন্তঃপাতি কোন কোন স্থানে
যথেষ্ট তৃণ, পত্রাদি না থাকাতে, তথাকার
লোকে অশ্বদিগকে মৎস্য ভক্ষণ করায়। পূ-

কঁকার গাল নামক ইউরোপীয় লোকেরা
 অশ্ব ও বৃষদিগকে মাংস ভক্ষণ করাইত । না-
 রোয়ে ও ভারতবর্ষের দক্ষিণখণ্ডের কোন
 কোন স্থানেও এইরূপ রীতি প্রচলিত আছে ।
 ধর্ম্ম কোন কোন স্থলে এ প্রকার দৃষ্টি করা গি-
 য়াছে, যে নিরামিষাশি জন্তুর আমিষ ভক্ষণে এ
 রূপ অভ্যাস পায়, যে তৃণ-শস্যাদি ভোজনে
 আর অভিরুচি থাকে না । কোন জাহাজের
 মাল্লারা এক মেঘ-শাবককে কিছু কাল মাংস
 ভক্ষণ করিতে দিয়াছিল, তাহাতে তাহার এ-
 রূপ অভ্যাস হয়, যে কয়েক মাস পরে তা-
 হাকে তৃণাদি দিলে, তাহা আহাৰ করিলেক
 না । ফল, মূল, শস্যাদি আহাৰ করাই
 বনমানুষের স্বভাব-সিদ্ধ, কিন্তু এবেল্ নামক
 এক সাহেবের এক টি বনমানুষ ছিল, 'সে
 তাঁহার সমভিব্যাহারে জাহাজে আসিতে আ-
 সিতে অত্যুৎপাদিবসের মধ্যেই বিলক্ষণ মাং-
 সাশী হইয়া উঠিয়াছিল* । এইরূপ, ফল, মূল,
 শস্য ভক্ষণ করিতে আরম্ভ করিলে, তৎসমু-

* Fruits & Farinacea &ca. Part II.
 Chap II. Shelley's Poetical works. Queen
 Mab. Note 17.

দায় পরিপাক করিবার শক্তি বৃদ্ধি হয়, এবং মৎস্য মাংস ভোজন অভ্যাস করিলে তত্তৎ দ্রব্য পরিপাক করিবার শক্তিই বর্দ্ধিত হইয়া থাকে। সকল জাতীয় লোকেই প্রথমাবস্থায় অতিশয় অসভ্য থাকে, এবং জঙ্গলে জঙ্গলে ভ্রমণ কর্তৃক পশু পক্ষ্যাदि বধ করিয়া উদর পূর্তি করে; তখন তাহারদের জিঘাংসাদি নিকৃষ্ট প্রবৃত্তি অধিক প্রবল এবং ধর্ম প্রবৃত্তি সকল দুর্বল থাকে, এ কারণ প্রাণি বধ করিতে দয়ার সঞ্চার হয় না। তদবধি তাহারদের আমিষ ভোজন করা অভ্যাস পাইয়া যায়, এবং তদ্বারা এ প্রকার প্রগাঢ় সংস্কার জন্মে, যে মৎস্য মাংস ভোজন করা মনুষ্যের প্রকৃতি-সিদ্ধ। যখন অভ্যাস ও ভোজ্য বস্তুর গুণ দ্বারা জন্তুর পরিপাক-শক্তির স্বরূপ পরিবর্তিত হয়, তখন যাহারা ক্রমাগত পুরুষানুক্রমে আমিষ ভক্ষণ করিয়া আসিতেছে, তাহারদের যে মৎস্য মাংস পরিপাক হয়, ইহাতে আশ্চর্য্য কি? ইহাতে যদি আমিষ নিরামিষ উভয় প্রকার দ্রব্য ভক্ষণ করা মনুষ্যের স্বভাব-সিদ্ধ বলিয়া স্বীকার করা যায়, তবে তাহা সিংহ, ব্যাঘ্র, বিড়াল, গো, অশ্ব, মেষ প্রভৃতি ইতর জন্তুরও প্রকৃতি-সিদ্ধ বলিয়া অঙ্গীকার করিতে হয়।

অতএব, যখন অন্যান্য কারণে আমিষ ভোজন নিষিদ্ধ বোধ হইতেছে, তখন পরিপাক হয় বলিষ্ঠ মাংস ভক্ষণ করা কোন ক্রমেই যুক্তি-সিদ্ধ নহে। মনুষ্যেরা চিরকালই পরমেশ্বর-প্রদত্ত শারীরিক ও মানসিক শক্তি সমুদায়কে অবৈধ বিষয়ে নিয়োজন করিয়া আসিয়াছেন। অজ্ঞানান্ধ অসভ্য লোকের আচার ব্যবহার যদি বিহিত হয়, তবে ধর্ম্ম-ধর্ম্ম ও কর্তব্যাকর্তব্য বিবেচনা একেবারে রহিত করিতে হয়। কোন কোন জাতি যে নরমাংস ভক্ষণ করে, কোন কোন জাতি যে আম মাংস উদরস্থ করে, এবং আমেরিকা খণ্ডে মেটা ও ওরিনকো নামক নদের তীর-বর্ত্তি অটোমাক্ নামক লোকেরা এবং অন্যান্য কোন কোন প্রদেশের লোকেরা যে এক প্রকার মৃত্তিকাভোজন করে* ; ইহাতে তাহারদের দৃষ্টান্তানুসারে নরমাংস, আম মাংস ও মৃত্তিকা ভোজন করা কি মনুষ্যের স্বভাব-সিদ্ধ ও যুক্তি-সম্মত বলিয়া স্থির করা কর্তব্য? যখন প্রাণি বধ আমারদের ধর্ম্মপ্রবৃত্তির বিরুদ্ধ, যখন আমিষ ভোজন করিলে নিকৃষ্ট প্র-

* Lectures on Comparative Anatomy &ca.
by W. Lawrence. Lecture IV. Chapr. VI,

বৃদ্ধি প্রবল হয়, যখন দন্ত, হনু, পাকস্থলী ও অন্ত্র প্রভৃতির আকার প্রকারাদি বিবেচনায় নিরামিষ ভোজনই মনুষ্যের প্রকৃতিসিদ্ধ বোধ হয়, এবং যখন তদ্বারা সুস্থ, বলিষ্ঠ ও দীর্ঘ-জীবী হওয়া যায়, তখন জীর্ণ হয় বলিয়া মৎস্য মাংস ভক্ষণ করা নিতান্ত যুক্তি-বিরুদ্ধ, তাহার সন্দেহ নাই।

• ষষ্ঠতঃ।—কেহ কেহ কহেন, মাংসাহার করিলে বুদ্ধি-বৃদ্ধি প্রথর হয়। কিন্তু তাহারদের একথা কত দূর প্রামাণিক, ঘোরতর মাংসাশি তক্ষুসি, এক্সুইমাক্স, বুরাট প্রভৃতি পূর্বোক্ত অসভ্য জাতিদিগের সহিত হিন্দু, চীন প্রভৃতি নিরামিষ-ভোজি ও অম্পামিষ-ভোজি লোকের তুলনা করিয়া দেখিলেই তাহা অনায়াসে অবগত হওয়া যায়। তবে ইংরেজ, ফরাশি প্রভৃতি ইউরোপীয় লোকদিগকে যে বুদ্ধিমান ও ক্ষমতাপন্ন দেখা যায়, তাহারদের স্বাভাবিক শক্তি, স্বদেশের গুণ, শিক্ষার সুপ্রণালী ইত্যাদি অন্যান্য অনেক কারণ আছে। তত্তৎ প্রদেশীয় প্রধান প্রধান পণ্ডিতেরা স্বয়ং এবিষয়ে যে প্রকার পরীক্ষা করিয়া দেখিয়াছেন, তাহা বিবেচনা করিলেই চরিতার্থ হওয়া যায়। থিয়োক্রাস্টস্ ও ডায়োজি-

নিস্ নামক প্রাচীন পণ্ডিত এবং অতিশয় খ্যা-
ত্যাপন্ন ফ্রাঙ্কলিন্ ও সর্ জন্ সিল্কেয়র্ সাহে-
বেরা স্পষ্ট লিখিয়া গিয়াছেন, যে মাংস ভক্ষণ
করিলে বুদ্ধি মলিন ও মন্দীভূত হয়, আর
ফল, মূল, শস্যাদি নিরামিষ দ্রব্য ভোজন করি-
লে বুদ্ধি সতেজ হয়, বিবেচনা-শক্তি বৃদ্ধি হয়,
এবং প্রধান প্রধান মনোবৃত্তি পরিষ্কৃত হয়* ।

পূর্বতন জিনো, এপিকিউরস্, মেনিডি-
মস্, পিথাগোরস্ ও তাঁহার মতানুগামী বিজ্ঞ
ব্যক্তি সকল, ইত্যাদি প্রাচীন গ্রীক পণ্ডি-
তেরা, এবং মহাকবি শেলি ও বায়্রন্ প্রভৃ-
তি ইদানীন্তন অনেকানেক বিদ্যাবান্ ব্যক্তি
মৎস্য মাংস পরিত্যাগ করিয়াছিলেন । আ-
মিষ ভক্ষণ করিলে উৎকৃষ্ট মনোবৃত্তি সকলের
স্ফূর্তি হয় না বলিয়া, অসামান্য-ধাশক্তি-সম্পন্ন
ভুবন-বিখ্যাত সর্ আইজাক্ নিউটন সাহেব
তাঁহার দৃষ্টিবিজ্ঞান বিষয়ক সর্বোৎকৃষ্ট গ্রন্থ
রচনার সময়ে নিরবচ্ছিন্ন নিরামিষ ভোজন
করিতেন¶ ।

* Fruits & Farinacea &ca. Part III.
Chap. XIII.

¶ Fruits & Farinacea &ca. Part III.
Chap. XIII.

পূৰ্বোক্ত আলবেনি নগরস্থ অনাথ-নিবাসের বালকেরা নিরবচ্ছিন্ন নিরামিষ ভোজন আরম্ভ করিবার তিন বৎসর পরে, তথাকার অধ্যাপক কহিয়াছিলেন, যে নিরামিষ ভোজন' আরম্ভ করাতে, এখানকার বালকদিগের যে অত্যন্ত উপকার হইয়াছে, তাহার কিছুমাত্র সন্দেহ নাই। তদ্বারা অহারদের বুদ্ধি, মেধা ও স্মৃতি-শক্তি যে প্রকার বৃদ্ধি হইয়াছে, তাহাতে আমার আশ্চর্য্য বোধ হয়। আমি তাহারদিগকে যে কোন বিষয়ে শিক্ষা দিতে সমর্থ, তাহাই তাহারা শিখিবার নিমিত্ত ব্যগ্রতা প্রকাশ করে ও অনায়াসে বুঝিতে পারে। পূৰ্বোক্ত সিক্কোর, সাহেব আয়ল'ও-নিবাসি কতক গুলি বালকের বিষয়ে এই প্রকার লিখিয়াছেন, যে তাহারা যত দিন নিরামিষ দ্রব্য ভক্ষণ করিত, তত দিন বুদ্ধিমান ও কর্মঠ ছিল, পরে মাংস ভক্ষণ আরম্ভ করিয়া অলস, অকর্মণ্য ও বুদ্ধি বিষয়ে হীন হইল* ।

সপ্তমতঃ ।—কেহ কেহ কহেন, যে সকল শীতল প্রদেশে শস্যাদি জন্মে না, এবং বৃক্ষা-

* Fruits & Farinacea &ca. Part III.
Chap. XIII.

দি ফলবান্ হয় না, তথায় আনিষ ভক্ষণ ব্যতি-
 রেকে কোন ক্রমেই চলে না। বিবেচনা করিলে,
 ইহার উত্তর আপনা হইতেই উপস্থিত হইতে
 পারে। যে সকল দেশে শস্যাদি কিছুই জন্মে না।
 শারীরিক ও মানসিক শক্তি সমুদায় বথোচিত
 উন্নত হয় না, সুতরাং যেখানে লোকের জ্ঞা-
 নোন্নতি ও সভ্যতা বৃদ্ধির অশেষ প্রকার দুর্নি-
 বার্য্য প্রতিবন্ধক রহিয়াছে, কৃষি-শক্তি-সম্পন্ন
 বুদ্ধিমান্ মনুষ্যদিগের সে স্থানে অবস্থিতি
 করাই বা কোন্ যুক্তিসিদ্ধ? তবে ভবিষ্যতে বি-
 জ্ঞান ও বাণিজ্যের প্রাদুর্ভাব হইয়া সে সকল
 স্থানও বৈধান্ন-ভোজি ব্যক্তিদিগের বাসযোগ্য
 হওয়া সম্ভাবিত বটে। এক্ষণেও লাপ্লাও নামক
 অতিশয় শীতল দেশের অনেকানেক প্রদেশে
 যব, রাই, ওট এই ত্রিবিধ শস্য এবং গোল আলু
 যথেষ্ট উৎপন্ন হয়, এবং তথায় এক প্রকার
 হরিণ জন্মে, তাহার ছন্ধও পান করা যায়*।

আর নারোয়ে, ক্রুস প্রভৃত অত্যন্ত
 শীত-প্রধান দেশের লোকে যে নিরামিষ
 ভোজন করিয়া সবল ও সুস্থ-শরীরে থাকিতে
 পারে, তাহা পূর্বেই প্রতিপন্ন হইয়াছে ;

* Penny Cyclopædia. Article on Lap-
 land.

এবং তদ্বারা ইহাও দর্শিত হইয়াছে, যে মাংসাহার না করিলে যে শীতল দেশে বাস করা যায় না, এ কথা প্রামাণিক নহে । বস্তুতঃ, রসায়ন বিদ্যা দ্বারা ইহা নিঃসংশয়ে নিকৃপিত হইয়াছে, যে শরীরের উষ্ণতা সাধনার্থে যে সকল পদার্থ আবশ্যক করে, ঘূতে এবং শর্করা, তৈল, আলু, তণ্ডুল প্রভৃতি ঔদ্ভিদ বস্তুতে তাহা যথেষ্ট আছে; মাংসে তত নাই । অতএব, শীতল দেশে এই সমস্ত বস্তু আহার করা আবশ্যক । মেদ ভক্ষণ করিলে, শরীর সম্যক্ৰূপে উষ্ণ থাকিতে পারে তাহার সন্দেহ নাই ; কিন্তু যখন ঘৃত, শর্করা, তৈলাদি নিরামিষ দ্রব্য ভোজন দ্বারা সে বিষয় অনায়াসে সম্পন্ন হয়, তখন প্রাণি বধ করিয়া মেদ ভক্ষণ করা বিধেয় নহে । ফলতঃ, পূর্বোক্ত গ্রেহাম সাহেব কহিয়াছেন, নিরামিষ-ভোজি ব্যক্তিরা মাংসাশিদিগের অপেক্ষায় অধিক শীত সহিতে পারে* ।

এই স্থলে উল্লেখ করা কর্তব্য, যে আ-মারদের দেশের ন্যায় উষ্ণ দেশে যে মৎস্য

মাংস ভক্ষণ আবশ্যক করে না, ইহা প্রায় সর্ব-বাদি-সম্মত ।

অষ্টমতঃ।—নিরামিষ-ভোজি পণ্ডিতেরা স্বপক্ষ সংস্থাপনার্থ আর একটি যুক্তি প্রদর্শন করেন, তাহাও গ্রহণ করা কর্তব্য । যাহাতে অগ্নি দ্রব্য বা অগ্নি পরিশ্রমে অধিক কার্য সম্পন্ন হয়, তাহাই পরমেশ্বর-প্রতিষ্ঠিত সমুদায় প্রাকৃতিক নিয়মের উদ্দেশ্য । ভূমণ্ডলে লোকের সংখ্যা ক্রমাগত বৃদ্ধি হইতেছে, অতএব যাহাতে অগ্নি ভূমিতে অধিক লোকের আহার প্রাপ্ত হওয়া যায়, তাহাই কর্তব্য । যে সকল সভ্য জাতির মধ্যে প্রচুর মাংস ব্যবহার প্রচলিত আছে, তাহারা পশু পালনার্থে ক্ষেত্রে তৃণাদি বপন করে, এবং পশুদিগকে সেই সকল তৃণাদি আহার করাইয়া আপনারা তাহারদের মাংস ভোজন করে । ইহাতে, যে ভূমির উৎপাদনে যত লোকের আহারোপযুক্ত পশু পালিত হয়, সে ভূমিতে তাহার ২০।৩০ গুণ লোকের খাদ্যোপযুক্ত শস্য উৎপন্ন হইতে পারে । আর যে সমস্ত অসভ্য জাতি কেবল মৃগয়া করিয়া উদর পূরণ করে, তাহারদের এক এক জনের আহার আহরণার্থে যত ভূমি আবশ্যক করে, তাহাতে কৃষি-কার্যোপজীবী

সহস্র লোকের অন্ত উৎপন্ন হইতে পারে। অতএব, যদি আমারদের আমিষ ভোজন করা পরমেশ্বরের অভিপ্রেত হইত, তবে তিনি পৃথিবীর এপ্রকার ব্যবস্থা করিতেন না, বরং যাহাতে নিরামিষ-ভোজি অপেক্ষায় অধিক সংখ্যক আমিষ-ভোজির খাদ্য উৎপন্ন হইতে পারে, এই প্রকার বিধান করিয়া দিতেন।

নবমতঃ।—কোন কোন মহাশয় কহেন, আমরা স্বহস্তে প্রাণিবধ করি না, অন্য কর্তৃক নিহত জীবের মাংস ভক্ষণ করিয়া থাকি, তবে আমারদিগকে হিংসা দোষ স্পর্শিবার সম্ভাবনা কি? কিন্তু তাঁহাদের ইহা বিবেচনা করা উচিত, যে তাঁহারা ক্রয় করিয়া ভক্ষণ করেন বলিয়াই ধীবর প্রভৃতি মৎস্য, পশু, পক্ষ্যাदि নষ্ট করিতে প্ররূপ্ত হয়। তাঁহারা আমিষ ভোজন না করিলে, লোকের মৎস্য মাংস বিক্রয় করা যে এক উপজীবিকা আছে, তাহা মূলেই থাকিত না। যদি কোন ব্যক্তি কাহাকেও ধন লোভ দর্শাইয়া নরহত্যা করিতে প্ররূপ্ত করে, তবে তাহাতে কি সেই প্রবর্তকের অপরাধ হয় না? অতএব, তাঁহারা আমিষ ভোজন করাতে, ধীবর ও মাংস-বিক্রয়োপজীবদিগকে প্রাণিবধ করিতে এক প্রকার অনুমতি

পরিশিষ্ট

যদি তাহাতে পাপ থাকে, তাহা হইতেই একে অবশ্যই সে পাপের ফল-ভোগ হইতে হয়, তাহার সংশয় নাই। তাহারা যে মান প্রকার নিষ্ঠুর ব্যবহার পুঙ্খকণাও কখন অপহরণ করিয়া দয়া, স্নেহ প্রভৃতি উৎকৃষ্ট প্রবৃত্তি সমুদায়ে একেবারে জলা-জলি দেয়, এবং আমিষ-ভোজি মহাশয়েরা যে মৎস্য মাংস উদরস্থ করিয়া আপনাদের নিকৃষ্ট প্রবৃত্তি প্রবল করেন, ঐ সকল আমিষা-শি ব্যক্তিই এ উভয়ের মূল কারণ। অতএব, মৎস্য মাংস ভক্ষণ দ্বারা মনুষ্যের নিকৃষ্ট প্র-বৃত্তি প্রবল ও উৎকৃষ্ট প্রবৃত্তি দুর্বল হইয়া সংসারের যে অশেষ প্রকার অনিষ্ট ঘটনা হইতেছে, তাহারাই ইহার নিদানভূত, তা-হার সন্দেহ নাই।

জগদীশ্বর আমারদের নিমিত্তে নানা-বিধ সুখাদ্য সামগ্রীতে ভূমণ্ডল পরিপূর্ণ করি-য়া রাখিয়াছেন। তিনি অশেষ প্রকার ফল, মূল, শস্যের বীজ সৃজন করিয়াছেন, ভূমি-তেও এ প্রকার উৎপাদিকা শক্তি প্রদান করি-য়াছেন, যে এক গুণ বীজ বপন করিলে ভূরি-গুণ উৎপন্ন হয়, এবং আমারদিগকেও একপ-
 ১২০ তি ও শারীরিক শক্তি-সম্পন্ন করিয়া-

ছেন, যে আমরা কিঞ্চিৎ পরিশ্রম স্বীকার করিলেই প্রচুর ভক্ষ্য প্রস্তুত করিতে পারি। উত্তমরূপ শরীর রক্ষা ও পুষ্টি বর্দ্ধনার্থে যে সকল পদার্থ আবশ্যিক, কল, মূল, শস্যে তাহা যথেষ্ট আছে। এই সমস্ত মূলভ-সামগ্রী সত্ত্বেও আমরা প্রাণি সংহার করিয়া সিংহ, ব্যাঘ্রাদি হিংস্র জন্তু মধ্যে কেন গণিত হই? দয়া, স্নেহ প্রভৃতি যে সকল প্রধান বৃত্তি থাক-
তে, মনুষ্য নামের এত গৌরব হইয়াছে, যে কর্ম দ্বারা তৎসমুদায় নিস্তেজ হয় এবং নিকৃষ্ট প্রবৃত্তি উত্তেজিত ও বর্দ্ধিত হয়, তাহার অনু-
ষ্ঠান করিয়া কি নিমিত্ত পশুর সাদৃশ্য প্রাপ্ত হই? পরম কারুণিক পরমেশ্বর আমার-
দিগকে যে প্রকার প্রকৃতি প্রদান করিয়াছেন, তদুপযোগি অশেষ প্রকার শস্য, কলাদি সৃজন করিয়া রাখিয়াছেন। অতএব, তাঁহার প্রদত্ত এই সমস্ত মুরস সামগ্রী লাভে পরি-
তুষ্ট না হইয়া হিংস্র জন্তুবৎ আহারার্থে পশু পক্ষ্যাদি নষ্ট করা কোনক্রমে কর্তব্য নহে*।

* কিন্তু আহারার্থে জীব হিংসা করা অবিধেয় বলিয়া এপ্রকার অবধারণ করা কর্তব্য নহে, যে কোন স্থলেই প্রাণ বধ করা উচিত নয়। প্রত্যুত, স্থল বিশেষে আত্মরক্ষা ও অনিষ্ট নিবারণার্থে জীব নষ্ট করা বিধিত বোধ হয়।

■ বিশিষ্ট

এই দুই গণের জনের বৈধতা ও আমিষ
করার আশঙ্ক পক্ষে যে সকল যুক্তি
আছে, তাহারা তাহার বিবরণ করা গেল।
সুসাহেব-গ্রেহাম, জান্ স্মিথ, ডাক্তর
ফ্রান্সিস বেল, চীন, ফৌলর প্রভৃতি অনেক
বিদ্বান সমিতি প্রচুর প্রমাণ প্রদর্শন পূর্বক
আমিষ প্রতিপাদন করিয়াছেন। অতএব,
তাহারা আমিষ বিশিষ্টরূপ বিচার করিয়া
শেষিতে ইহা করেন, তাহারা ঐ সমুদায় বি-
দ্যাবান্ ব্যক্তির কৃত গ্রন্থ, বিশেষতঃ গ্রেহাম ও
স্মিথ সাহেব-প্রণীত পুস্তক পাঠ করিবেন* ।

* এই দুই গণের পুস্তকের নাম

Lectures on the science of Human Life,
by Sylvester Graham.

Fruits and Farinacea the proper food of
man ; being an attempt to prove from His-
tory, Anatomy, Physiology and Chemistry,
that the original, natural, and best diet of
man is derived from the vegetable kingdom,
by John Smith

সঙ্কলিত শব্দ সমুদায়ের ইংরেজি অর্থ

অধ্যবসায়	Firmness.
অনাথনিবাস	..	Orphan-asylum.
অনুচিকীর্ষা	Imitation.
অনুশ্রুতি	Causality.
অন্ত্র	Intestine.
অপত্যস্নেহ	Philoprogenitiveness.
আকারানুভাবকতা		Faculty of Form. *
আত্মাদর	Self-esteem.
আশ্চর্য্য	Faculty of Wonder.
আসঙ্গজিপ্সা	..	Adhesiveness
ইতর জন্তু	Lower animals.
উপচিকীর্ষা	Benevolence.
উপমিতি	Faculty of Comparison
কম্পাস	Compass.
কার্য্যকারণতাব	..	Causation.
কালানুভাবকতা	..	Faculty of Time.
কুসংস্কার	Prejudice.
গুরুত্বানুভাবকতা		Faculty of Weight
গোমসূর্য্যগাধান	..	Vaccination.
ঘটনানুভাবকতা	..	Eventuality.
জড়	Idiot.
জলপ্রপাত	Cataract.
জিঘাংসা	Destructiveness
জিজীবিষা	Love of life.
জীবনী শক্তি	Vital power

.....	Secretiveness.
.....	Telescope.
.....	Nerve.
.....	Science of morals.
.....	Lower propensities.
.....	Constructiveness.
.....	Temporary quality.
.....	Natural.
.....	Conscientiousness.
.....	Traveller.
.....	Stomach.
.....	Nature, Constitution.
.....	Combativeness.
.....	Natural.
.....	Natural History.
.....	Intellectual Faculties.
.....	Appetite for food.
.....	Faculty of language.
.....	Geology.
.....	Physical.
.....	Brain.
.....	Muscle.
.....	Mesmerism.
.....	Chemistry.
.....	Science of Government
.....	Revolution.

লোকানুরাগপ্রিয়তা	Love of approbation.
বর্ণানুভাবকতা Faculty of colouring.
বাণিজ্যাগার Firm.
বায়ুকোষ Air-bladder.
বাম্পীয় যন্ত্র Steam engine.
বাম্পীয় তরঙ্গী	}.... Steam-vessel.
বাম্পীয় নৌকা	
বাম্পীয় পোত	
বিজ্ঞান Science.
বিবৎস Inhabitiveness.
বৃত্তি Faculty.
ব্যক্তিগ্রাহিতা	... Individuality.
শারীরবিধান	... Physiology.
শারীরস্থান Anatomy.
শারীরিক Organic.
শোভানুভাবকতা	... Ideality.
শ্রমোপজীবী	.. Labourer
সংখ্যা Faculty of number.
সমসংস্থান Equilibrium.
সমাধিস্থান Burial ground.
সাধারণসূতিকাগার	Lying-in hospital.
সাবধানতা Cautiousness.
স্তর Stratum.
স্বরানুভাবকতা Faculty of tune



